

XXVI\*

B

26

NAPOLI

116  
B  
72

116 26

B

72

111  
C  
27



JOANNIS HENRICI  
BOECLERI

# OPERVM,

HISTORICI, POLITICI, MO-  
RALIS, LITERARII, ET CRITICI  
ARGUMENTI;

*TOMVS QVARTVS,*

*cujus contenta Syllabus Prefationi subnexus de-  
monstrat.*



ARGENTORATI,

---

Sumptibus JO. REINOLDI DULSSECKERI,

---

M D CC XII



SERENISSIMO AC CELSISSIMO  
PRINCIPI AC DOMINO,

DOMINO

GVSTAVO  
ADOLPHO,

Marchioni Badensi & Hoch-  
bergenfi, Landgravio Saufenbergenfi, Comiti  
Spanheimenfi & Ebersteinenfi, Domino Röttelæ, Ba-  
denvilæ, Lohræ, Mahlbergæ, &c. &c.

DOMINO MEO CLEMENTISSIMO.

*Sereniffime ac Celfiffime Princeps,*



IN parte ejus obfequij, quod  
non dedignata eft nuper Tua  
Celfitudo, hic quoque liber  
optat apparere: Nullo ille  
quidem cultu ad aulæ splen-  
dorem adornatus; fed operis  
argumento, & mittentis animo, in fperam admif-  
) 2 ( fionis

sionis haud difficilis erectus. Publica enim sunt pleraque, & illustria, quæ nunc vel denuo eduntur, vel primum in lucem veniunt: in quibus non ingenium scriptoris rude, non infacunda dictio, sed officij ex mandato & lege obeundi pietas spectari debet. Poterat sane, nescio an etiam debebat, in optatis esse mihi, ut, quando fortuna tam nobilis argumenti occasiones laboribus meis suggessit, etiam pro materia, stilus contingeret. Verum Deo & Reipublicæ constat sui consilij ratio, quotiens eximiiis quoque rebus enuntiandis, ineruditam ac indisertam vocem adhibent. Neque Tu is es, SERENISSIME DOMINE, qui colorem & pompam sis requisiturus, in hoc officij genere, quod simplici reverentiâ offert ac dedicat animum


*CELSITVDINI TVÆ*

devotum

J. HENR. BOECLERI.

# Lectori Benevolo

S. P.

 *Pluribus, quae praesertim in nobilissima Argentoratensi Academia, ex necessitudine & proposito publici muneris scripsi, pauca ista nunc colligi & exire passus sum: quod non mea sed aliorum interesse putarem, ne interciderent, quae semel in ius alienum concessissent. Immiscuere se aliqua de privatis & juvenilibus: quibus venia aetatis debetur. Scribendi ratio non semper una, nunquam autem ea placuit, quae oratoris laudem affectaret. Sola mihi ambitio fuit eritque, boni civis officio, in iis, quae publica ratio iungit, ex fide saltem, si minus ex decoro, fungi. Vale, Lector Benevole. Scr. Argentorati 10. Martij 1654.*

AD LECTOREM  
PRÆFATIO.

**R**Em literato orbi non ingratam,  
ut opinamur, facturi, BOECLE-  
RIANARUM ORATIONUM  
*Fasciculum*, cum annexis *Car-*  
*minibus & Programmatibus Aca-*  
*demicis*, nova editione in habitum elegantiores  
adornatum, publico desiderio damus; non sine  
nullo tamen auctario. Nam & accesserunt a-  
liqua, ab eâdem manu, oratoria *λέψανα*, quæ fru-  
stra in priore editione quæras; & adjectus est In-  
dex brevis quidem ille, qualem hoc scriptionis  
genus admittebat, non futurus tamen inutilis.  
Cum enim ante hoc quadriennium *Dissertatio-*  
*num Bæcleri* Academicarum Tomum unum  
protruserimus, daturi mox alterum; non incon-  
gruum videbatur, prout tunc sumus polliciti,  
Orationes quoq; ejus eâdem formâ (nam prius  
minore impressæ erant) recudendas curare; cò  
magis,

magis, quod distractis pridem editionis priori  
exemplaribus, quicunque elegantiores amant  
literas, non libenter carituros his quoque tanti  
Viri scriptis, persuasi fuimus. Plura dicere nihil  
attinet. Et fuerit hoc propemodum injuriam fa-  
cere Bœcleriano nomini, si lenocinia his con-  
quirere curiosè vellemus. Jam diu est quod  
opus artificem commendavit; nunc ergo versâ  
vice ipsum artificis nomen præscriptum potest  
in commendationem operis sufficere; justius id  
quidem, quam Protogenis alicujus aut Apellis  
perfectas manibus tabulas, aut à Phidia vel Lysip-  
po elaboratas statuas vel solum auctoris nomen  
olim pretiosas fecit. Quales cum Mummius,  
captâ Corintho, in Italiam portandas locasset,  
prædixissetque conducentibus, si eas perdidis-  
sent, novas eos reddituros, teste Vellejo, ob in-  
genij ruditatem irrisus est. Melius nobiscum  
agitur, quibus licet, multiplicatis typographiæ  
beneficio exemplaribus, celeberrimorum aucto-  
rum opera in publicam lucem reproducere, plu-  
rium deinde usibus suffectura. Quod cùm nunc  
quoque in *Bœclerianis* præstemus, tu, *Lector*  
*Benevole*, huic instituto nostro fave & vale.

CON-

# CONTINENTUR HOC LIBRO.

- L. *Panegyricus Serenissima ac Potentissima Suecorum Regina*  
**CHRISTINÆ** scriptus, cum insignia Regni apparatusissima  
solemnis festi carimonia susceperet Holmia.
- II. *Oratio ad Eandem Serenissimam Reginam, in feriis Nativitatis*  
*Christi, Vbsalia habita.*
- III. *Oratio altera, ad Eandem Serenissimam Reginam, in auspiciis*  
*anni M. DC. L. itidem Vbsalia.*
- IV. *In Eiusdem Serenissima Regina natalem XXVIIum.*
- V. *Panegyricus Serenissimo ac Celsissimo Principi AUGUSTO,*  
*Duci Brunsvicensi & Luneburg. scriptus An. M. DC. XLIV.*
- VL *Elogium Illustrissimi Comitiss & Fortissimi Ducis LINNARTI*  
*TÖRSTENSONII cumulo dicatum. A. 1651.*
- VII. *Laudatio Funebri Magnifici Viri Francisci Rudolphi Ingoldi,*  
*incluta Argentor. Reipubl. Tredecimviri & Scholarcha. 1642.*
- VIII. *Laudatio Funebri Amplissimi Viri, Jo. Friderici Schmidij,*  
*7 Cti, Ejusdem incluta Reip. Consiliarij 1637.*
- IX. *Laudatio Funebri CL. Viri, Matthia Berneggeri, Histor. Pro-*  
*fessoris in Academia Argentoratensi. 1640.*
- X. *Oratio secularis, jubileo Scholarum Argentoratensium. 1638.*
- XI. *De Typographia Argentorati inventa divinitate & fatis. 1640.*
- XII. *De fasciis CHRISTI. 1643.*
- XIII. *De precipuo boni civis in rempublicam ejusque statum officio, ad*  
*historiam Theramenis. 1648.*
- XIV. *De C. Cornelij Taciti historia. 1636.*
- XV. *De Pelleji Paternuli historia. 1635.*
- XVI. *Epitaphium Illustris Baronis de Gera. 1646.*
- XVII. *Consolatio ad Nobiliss. Joh. Silbersternium, Secretarium Regium,*  
*cum exequias unico filio iret. Holmia 1651.*
- XVIII. *Cum Nobilissimi fratres Remchingeri ad vitam Academicam*  
*initiaerentur.*
- XIX. *Principatus Tiberianus in καράλιφ descriptus. 1636.*
- XX. *Poemata quedam.*

## INDE SEQUUNTUR

*Programmata Academica. Et que accesserunt in hac nova Editione,*  
*Elogium Reverendiss. ac Celsiss. Principis, Lotharii Friderici, Episcopi Spirensis*  
*Coadjutoris Moguntini.*  
*Elogium Reverendiss. ac Celsiss. Principis, Joh. Hugonis ab Orsbeck, Coadjutoris*  
*Treverici.*  
*Elogium Christophori Forstneri.*  
*Oratio habita in solenni Panegyri, cum Magistros Philosophia creati.*





# PANEGYRICUS

*Serenissima Augustissimaq; Regina  
Suecorum,*

# CHRISTINÆ,

*scriptus:*

Cum Regium capiti decus auspicaretur,

*Holmiæ clb lbc L.*



**N**E mireris, DOMINA, si celeberrimo Sueciæ lætissimoque tempore, quod omnis ætatis, omnis sexus ora, in laudes, grates, & varix pietatis officia laxavit, ego quoque, infantix potius, quam silentii, crimen præoptavi sustinere. Meditatas quippe voces, debita æternitati opera, in gratulantium muneribus, certim ad Tuos pedes deponent, quorum ingeniis vigorem, decus, propitia quædam fortuna consuevit aspirare. Mea, ut in ulum præsentis spectaculi nata oratio, satis præclarescum agi putabit, si impressum devotissimi civis animo, publica festivitatis sensum, absque cura & arte, apud Tuas aures, fuerit profiteri. Postquam ergo (quod in perpetuum benedicat!) communibus civium Tuorum desideriis obsequen-  
am putasti, ut susciperes insignia regni, cujus fortunam de a nativitate, onera jam a compluribus annis sustineras; difficile dictu est, DOMINA, quos ille dies, die-  
rum

rum hujus ævi princeps, populis amores, quæ seculo decora, quas cælo delicias conciliaverit. Excita suis sedibus Suecia, cum in spectaculum publicæ felicitatis oculos, aures, animos intendisset; diviso inter majorum, & civium nuper adiutorum necessitudines affectu, prolixè officiosa; nunc se assurgere, nunc florere, nunc in fastigio stare, nunc elapsi temporis præmio, & spe venturi, ex æquo frui, quia Te frueretur, animosa interpretatione reputabat. Igitur nemo erat, quem auri gemmarumque splendor, & illud longum regalis magnificentie spectaculum ita præstringeret, quin omni opulentia illustrius judicaret virtutis tuæ meritum, quo tanquam proprio sidere solennis hujus festi pompa præfulgebat. Numerantibus enim annos, quibus Tuum nomen Suecorum fasti præscripserunt, ubique rerum prosperarum tituli præclaraque occurrunt facinora; nec ullum tempus caruit ea laude, quæ coronis Principum decus, sceptri robur, solio perpetuitatem affert. Commoverat se fortuna Sueciæ, & sub augustissimi Parentis Tui auspicio imperioque in ea summarum rerum momenta incrementaque procefferat, quæ sicuti non nisi unius inusitata indole & cælesti mente suscipi potuisse ac gubernari, palam erat; ita quin, extincto ante patratum opus auctore, ultro intercederent aut obhærescerent, vix prudentium quisquam sustinebat dubitare. Evenere contraria expectatis; ut is, quem perpetuatis immori victoriis juverat, Regum maximus, ubique superesse, ubique spirare, ubique certare pugnas, debellare exercitus, rueri socios existimaretur. Nam cum æternitati Suedici nominis propitia Deus sidera temperaret, maximi Parentis fato, tam felici rerum consecutione, incomparabilis fortunam Filiæ intexuit, ut ejusdem virtutis hæres, eorundem consors auspiciorum, quibus illud belli fulmen prævaluerat, inclyta puellarum, inter ornamenta adolescentiæ suæ lauro tempora cingeret, victoriis dies numeraret, patriam opibus, hominum genus beneficiis, orbem terrarum gloria impleret. Tales coronas, Tuo capiti, DOMINA, tuis imaginibus, antequam rerum summam capesses, assiduo studio

studio non unius populi suffragatio decrevit, sed consensus & conspiratio quædam nationum, in quibus aliqua bonarum honestarumque rerum scientia aut cura inest. Postquam vero ætas adolescentior, ante hos sex annos, Te avitis regnis moderandis admovit, quæ ex illo tempore, proh Deum immortalẽ, regiorum consiliorum operumque non rudimenta aut tentamenta, sicut de novis Principibus existimari mos rener, sed consummata specimina, sed absoluta miracula vidit ætas, exceperit fama, servabit æternitas? Quo factum est, ut diadema, semper quidem generi capitique divinitus consecrato debitum, non nisi post inscriptos omnis meriti Principis titulos reciperes, & sacra imperii pignora, quæ sorte nascendi obtinebas, virtutis insuper excellentia vindicares. Nunc ergo capit fructum aviti consilii Suecia, majorumque prudentiam laudibus in cælum vehit, ob permissam illi familiarẽ rempublicam, in qua nullus à laude cessaret sexus, nullum à generoso profectu tempus vacaret. Non est opis meæ, vel recensendo commemorare, merita augustissimæ domus, cujus ex Te perpetua expectatur, ac quodam veluti votorum publicorum impetu efflagitur posteritas. neque opus fuerit profecto, per priora distrahi, cum in Te universi generis dotes, titulosque vel natura expresserit, vel industria conjunxerit, vel fortuna cumulaverit. Quod si in imperiis, sicut in hominibus, numerare ætates, comparare incrementa fas est, cui dubium esse queat, quin hæc sit illa eminentissimi loci majestas, quam à progenitoribus elaboratam, edita ad decus & perennitatem rei Suedicæ, generosa propago perficere, atque hoc ipso rerum temporumque articulo longe lateque debuit illustrare? Faveat inclutæ gentis industriæ Fortuna: & in posterum quoque ea Suecis fata propitium Numen ordinet, quibus in oculis generis humani excelssime eminent: at enim ipsi non meliorem, sed eundem reipublicæ statum, neque accessionem regiæ laudis, sed perpetuitatem (nisi quatenus sola Te ipsam quotidie gaudes vincere) exoptabunt. Et quis ultra votis locus, ubi Deus in Regina, majestas in regno, virtus in civibus? Servet Tibi

hanc mentem, Regina, qui dedit, ut ad unum omnia auctorem referas; cuius hoc maximum munus habes, ne quem in terris auctorem appelles. Huic Te proximam regali solio, devinctam diademate, vicariam scepro, consecratam inaugurali caerimonia, nihil deverter ab illa felicitis imperii sive lege sive summa, quæ interiore commercio imperantis cum supremo Numine, omnem civilis operis vim atque successum metitur. Et sane multum à veræ rationis sensu elaboretur, si quis aliunde, quam à cælestibus illis auspiciis arcesceret, illam indolem quantæcunque molis capacem, illas curas in ardua omnia vigiles, illa ornamenta denique coronæ Tuæ, quæ præcipuorum siderum ignes fulgore provocant, nobilitate superant. Eant Artifices in consilium de gemmarum & auri pulchritudine: studeant Mathematici decus Coronæ borealis aptare Virgini: dedident Poëtæ in cælo, quod Ariadna gestavit in terris. Nihil reperitur, quod vel invento vel similitudine satis dignum sit illo regii capitis vinculo, cui origo æterna, forma cælestis, splendor divinus, majestas sacrosancta, virtus inviolabilis. Itaque videmus quidem radios tam augusti luminis, sed videndo hebescimus: secretique tam venerabilis sublimitas, private mentis humilitatem supergreditur. Subvenis tamen pietati civium Tuorum, DOMINA, & cælestis vitæ familiaritate, tum fulgentissimorum consuetudine operum, quodammodo inculcas nobis, quæ in Te ornamenta venerari, quæ miracula divinare fas sit. Et quotiens sic quoque intra metam dulcissimæ disciplinæ resistimus, parato è præteritarum rerum memoriis subsidio admōneri possumus, quantum supra usitata imperiorum atque populorum præconia, nostri temporis felicitas profecerit. Vindicata ex maximis periculis Respublica, perornata legibus Patria; emendati moribus, exculti studiis cives, defensi focii, restituti exules; prolati fines, muniti limites; conjunctæ amicitix, amplificatæ opes, cuncta domi forisque, pace, consilio, auctoritate, in duraturæ securitatis contextum colligata; non paucorum annorum, sed longissimi regiminis labor esset, neque Tuæ ætatis

ætatē mensurā, sed humani ævi spacio censeretur, nisi de illa Principe loqueremur, cui personam illustrandi sæculi, exemplo omnibus sæculis singulari Deus imposuit. Igitur operum tuorum historiam, non tractu & mora temporum dinumerabit, sed magnitudine successuum persignabit posteritas: & in virtutum Tuarum titulis semper plus intelligi debebit, quam dici poterit. - Vocabulis enim uti necesse est ex communi more, sensuque hominum; prudentissimā etiam cogitatione raro attingentium illos motus, quibus se in mentem Regiam, actumque dispensat familiari necessitudine conciliata Divinitas. Ea propter præcipua antiquorum sapientia, à verbis ad figuras & notas & simulacra, in tali negotio confugit: ne quid cognoscentis otio ac sollertia subductum, aut alieni culpa ingentis stilivæ detritum videretur.

In quo censu plurimum veneramur, atque iterum, iterumque aspicimus. DOMINA, illa ipsa festi pariter, ac imperii Tui instrumenta: illam coronam, quæ Tuo capiti sanctitatem, gloriam, perpetuitatem, circumposuit; illud sceptrum, quo Tua manus regaliter invaluit, exsplenduitque; illam chlamydem, cui cum Tuo corpore se involverunt mysteria securitatis publicæ; illud solium, in quo, tanquam in consecrata sede, sacra regni, & verenda majestatis pignora recumbunt. Huic me advolvi patere, DOMINA, & ingenuā imbecillitatis confessione defungi: qui optavetam sane, & decreveram publica voce effundere, Tui meriti & meæ pietatis vocabula; denique, quidquid id est, quod civium Tuorum animis hujus temporis solennitas ingeneravit: sed quæ confertim cupiunt erumpere, exitum sibi suoapte impetu intercludunt; neque disponere officii rationes aut partiri potest ingens lætitia, quotiens cum pari reverentiā conjungitur. Itaque parum abest, quin conticescerem: nisi me ab sollicitudinē ad securitatem quandam revocaret, incredibilis illa humanitas, quæ ad cæterarum virtutum Tuarum penetrabile aspirantibus prompta occurrit, & benefica admisionis magistra. hæc mihi tacite videtur polliceri veniam, si præsidium à licentia potius vulgi, quam ab eruditione sapien-

picatum mutuatus ausim credere, inter studia & officia hujus temporis, non tam factis elaboratisque orationibus, quam indigestæ simplicitati acclamationum, quibus omnia festi-ve personant, suam quandam gratiam inesse. Nam qui eloquentiam aut artem Tibi nunc imputant, DOMINA, delectationi Tuæ, aut famæ suæ inservire student. At vero civibus Tuis naturale cum sensu tuo commercium facile persuadet, nihil gratius Oprimæ Principi acceptiusque fieri posse, quam si Regiæ voluntati effusæque indulgentiæ securâ & liberâ fruendi gaudendique cupiditate respondeant. Impertivisti Te publico, DOMINA, neque magis aureo, argenteoque elegantissimorum nummorum imbre corpora perpluisti, quam opulentiâ benignissimæ civilitatis animos hominum perbeasti: ut omnium rerum immemores, nihil aliud, quam dexteram tuam appressis fatigare osculis, faciem insatiabilibus oculis perlustrare, nomen cœlo ferre; coronam, voce, gestu, ac pæne tripudio adorare plus quam cupiamus. Equidem in hoc animorum exultantium motu, ex infinitis, quæ se simul offerunt, laudibus Tuis, nunc excelsi magnitudinem animi, nunc generoso plenam spiritu sapientiam, nunc fidem, justitiam, gravitatem, continentiam, moderationem concinimus: & per nomina capto nostro majora acti, sæpius tamen ad facilitatem, beneficentiam, liberalitatem, quibus nos propius quodammodo respicis ab illo fastigio, revocamur. Sicut enim unius ejusdemque foliis, præcipuus quidem splendor, eminentissima pulchritudo est, cum è cœli altissimo vertice subjecta despicit; facilius tamen aspicitur, & jucundius nos afficit, cum propiora terris lumina partitur: ita virtutis regiæ, semper sibi similem, semper nobis venerabilem majestatem, modo difficiliter ex humili & longinquo intuemur, modo in viciniora submissam toto gaudemus vultu excipere. Quamquam, quid opus est, orationi talia prætexere discrimina laudum? quæ cum omnes sint maximæ, vel silentio oportet eas venerari, si par facundia quæritur; vel pietate promiscuâ eloqui, si una officii ratio spectatur. Quocirca, cum ob merita  
Tua,

ia, primum quidem DEO, deinde Tibi gratiæ sunt a-  
 ndæ, DOMINA, satis præclare confidimus, non verba à  
 obis expectari, quibus parum utique valemus, sed animum  
 igi, quem ex asse debemus omnes, dicamusque. Hinc est,  
 od summarum rerum nomina, non temere quidem, sed  
 ere in ore habemus; quod de pace belloque, de repu-  
 ica denique, cujus arcana scrutari nefas arbitramur, inno-  
 os sermones cædimus: quod præcipere liberis, tradere na-  
 onibus, dimittere in sæcula concupiscimus; contigisse no-  
 s Principem, cui Deus auspicio, cælum favore, natura mi-  
 sterio, orbis applausu, regii decoris palmam decreverint.  
 nimadvertis dudum, DOMINA, in ipsa oratione mea, il-  
 s vices fluctusque animi, modo in officium affectumque  
 umpentis, modo conscientia virium verecundantis. Quam-  
 am ne sic quidem teneri potest ardor noster, quin speci-  
 ina operum Tuorum, utut supra omnem commendatio-  
 em constituta, sigillatim gestiât interpretari, & obicere  
 umano generi magnarum cogitationum materiem, in qui-  
 us me pridem sentio deficere. Quis enim penitus asse-  
 natur animo, aut digne verbis explicet, vel unicum illud  
 acis Quietisque Publicæ studium, quo cœlestis animi fi-  
 em, sæculo; interioris necessitudinis observantiam, Deo;  
 eneficam civilis animi prudentiam posteris, immane quan-  
 um approbasti. Nihil de Danica Pace dicam; unde im-  
 erii Tui primordiis auspicatum omen accessit: nihil de iis  
 bus, quæ in posterum sub exemplo, non spe modo pru-  
 entum expectantur, sed gratulatione & votis idem cupien-  
 um pæne præcipiuntur. In solâ Pace Germanicâ, quan-  
 um est miraculi? Invitabat Te singularis armorum felici-  
 s, ut fortunæ affluentis sinum panderes: stabas in eo gra-  
 a, unde Te vix auderent revocare, qui incrementis Tuis  
 rio faverent. Nihil erat, unde plus periculi, quam spei  
 tenderetur. Quibus altior Reipublicæ intellectus & cu-  
 inerat, nescio quid fatalis in bella hortamenti agnosce-  
 ant, in numero & præstantiâ Ducum: quos Tibi, & in Tua  
 epublica natos nullius hoc ævo in orbe terrarum populi  
 exem-

exempla videbantur æquare. Nec ignorabas, DOMINA, quam accurate ratiocinarentur, qui ita judicabant, nisi quod aliam Tibi mentem inspiravit, qui supra mortalem sensum captumque, à profuturis noxia determinat, sæculique moribus Tuum candorem, prudentiam, consilium supervenit. Imposuisti ergo tot bellorum successibus gloriosum diem; & restituta pluviis late populis Pace, supra omnium tropeotum gloriam evecta, Victrix sæculi, Pacatrix nationum, multo concentu, domi forisque inclaras. Hæc comitorum Holmiesium ornatissima vox; hæc inauguralis festi dulcissima vociferatio; hæc litterarum, hæc nuntiorum ex difficilissimis locis conspirata, ut sic dicam, jactantia, singulis pæne momentis aures Tuas personat, DOMINA. Et quam cuperet, si sedibus suis exciri posset, idem facere Germania universe, quod partim facit per interpretes: ut Pacificam dexteram osculo veneraretur, ut apud solium Tuum, laudes, grates, obsequia, tanquam corollas, qualicunque munere dedicaret. Utinam mihi fas esset, gentis clarissimæ, fideque & armis vel hostium judicio celeberrimæ, intimos sensus enuntiare, ac devotæ Tibi pietatis impetus stilo signare. Melioribus utique, quam ego consequi possum verbis, candore autem supra omnem invidiam posito, forte in hunc sensum ordiretur: Vivas, ô Regina, & imperes, & Germanis semper faveas! cum quibus tot vincula Te jungunt, ut Deus hominesque duraturi fœderis fidem sancivisse videantur. Ex quo enim intricatis domesticâ discordiâ rebus nostris Suecorum arma intervenire, quid non vidimus divinorum operum, sive verius dicam, miraculorum? Jacebat ingentis corporis pars generosior, & libertatem, religionem, penates, excidiis, infamiâ, cruciatibus luere, promtius jam volebat, quam poterat. Verumenimvero, ut primum fulsere ab Aquilone auspicata Suecorum signa, momento immutatâ rerum nostrarum facie, conclamati reviviscere, & qui exsurgendi curam amiserant, suscitari cœperunt. Quippe GUSTAVI Illius Magni invicto Marte, terror hostibus, disciplina sociis, salus oppressis, uno eodemque tem-




spore, veluti transcurso & festinatione fatorum, accesserunt. Plena erant omnia laudibus, gratibus, votis in roem Liberatorem, incredibile quo animorum studio gestis, cui tot nominibus debitores, unum malleus debere beneficium, profusi inter nostra arma & suas torias sanguinis. Successerunt mox Tua auspicia, in eodem fatorum & adversus nos meritorum seriem: sed continuatione ipsâ bellorum eo tandem miseriarum venis, ut post triginta amplius annos, non querendum vis de optimo Reipublicæ statu; sed ut omnino habemus Rempublicam, enitendum videretur. In hoc re articulo, ubi Pax unice nobis necessaria erat, depre- sos à fortuna nihil erat, quod sublevaret: alteris nul- in Pacem serio cupientibus; alteris per speciosa & irrita cis nomina eludi detrectantibus. Qui animorum ha- us multo magis res nostras diverse traxit, postquam in o tandem negotio tot moras tracturo compertum est, pper easdem recurrere consiliorum vices, neque expe- i posse animos ambagibus pertinacis propositi implici- ac irretitos. jamque desperari cœperat successus rei to- us orbis expectatione aut tractatu agitæ: cum præfer- potissima consiliorum publicorum arbitra Fortuna tam tener tuo Marti suffragaretur, ut coram genere huma- Tibi bellandi vel causam, vel, si moribus sæculi li- ret uti, speciosissimum titulum, ultro videretur obtu- è. Qui fuerit tum miseræ Germaniæ metus, paucis quit enarrari: neque adeo nunc attingeretur, nisi per- eret ad augendam beneficii Tui amplitudinem, DOMINA, o triumphum omnibus armorum successibus nobiliorem portasti. Necessitates enim & preces nostras tuo juri, is utilitatibus prætulisti, paceque factâ, cum bellum Ti- fructuosius nemo non judicaret, certum perennis glo- e fructum, cum maxima quidem spe, sed quæ tamen certa fortunæ reciperet; generose permutasti. Cujus rei scipe quæso hunc quoque in primis fructum, quod ante illa in patres & contraria studia Germania, nunc Tuo mu-

nere, sibi concors, Tibi benevola, regali tuo folio, communi voto & certamine gratulandi, precatur prospera, ominatur gloriosa: atque, dum alii hoc inaugurale festum tuum ornant illustrium victoriarum titulis, ipsa arcum triumphalem Tibi dicatum incomparabili PACIS GERMANICÆ elogio inscribit, Teque, DOMINA vivere, quod ab initio dixi, & regnare, & perpetuâ felicitate florere, optat. Loquor hæc hactenus ad mentem Germanorum; quam exprimere totam, & præsertim effusissima gaudia, ac ineffabiles de Pace triumphos describere, supra meas vires positum intelligo. neque facile talia concipiuntur animo, nisi ab iis, qui interfuerunt; quique non tam oculis auribusque suis, quam reciproca animorum agitationi, & concitatis mutui sensus affectibus crediderunt. Erit mox tempus, cum ex profundâ tot malorum nocte emerfis, subinde lubebit respicere pristinas miseras, & dulcedinem serenioris cæli ex tempestatum antegressarum sæditate colligere, ac decoris ingeniis interpretandam commendare. Interea Deus Tibi, quam mereris gratiam referat, DOMINA, tuisque temporibus, tuis regnis longe avertat illa calamitatum prodigia, quibus Tua Pax Germaniam liberavit. Contingat Tibi secunda prosperitas, careantque invidia Fortunæ, incrementa imperii Tui: cui ad summum in terris nomen nihil deest, præter perpetuitatem. Hanc quoque abunde præstabit civium fides, ordinum consensio, Senatorum prudentia, exercituum virtus, & amica Deo indoles Tua, ô reatrix justitiæ & æquitatis, q̄ repertrix melioris vitæ, fundatrix pacis, anima regnorum, specimen Reipublicæ, miraculum orbis terrarum. Iterum Tibi Deus referat gratiam, DOMINA; cujus non modo virtutibus Patria attollitur, sed consiliis posterius sustentantur. neque enim satis habuisti fortunam optimi status semel repræsentasse, nisi munus Tuum fulcris insuper confirmares, subsidiis emunires, serie propagares. Accenditur ergo de Tuo lumine nova Sueciæ lux: radiisque majestatis Tux in Celsissimum Principem CAROLUM GUSTA-

USTAVUM pertingentibus, Regia Domus diuturna, perpetuæque splendoris successione nobilitanda posteritas committitur. Applaudit pulcherrimo operum Tuorum humanus orbis: Teque ita legisse successorem è domo, iudicat, ac si ex omni Principum numero fuisset requirens. Fuit hoc felicitatis Tux, invenisse in propinquis, qui dignissimus esset; virtutis, non tanquam propinquum elevisse. Nulla Regibus interior adversus quemquam necessitudo, quam cui virtus & amor Reip. auspiciū facit: Primique Principis iudicio non nisi optimum successorem destinari consentaneum est. Qualem cum Tibi Deus forlasset, maximarum administratio rerum approbasset, novisti imperio tantam spem, Tibi tam illustrem gloriam, Principi tam nobile præmium diutius debere: sed repræsentato statim Patriæ beneficio, sollicitam eorum prudentiam coarquivisti, qui in successore nominando nec suis, nec alienis moribus credere audent. Effecisti, DOMINA, ut augusta coronæ Tux pulchritudo liberalius cerneretur, cum in antiqua imagine fulgorem geminaret. quali fere inter sidera necessitudine, Sol nitorem suum Lunæ affundere, Luna soli amat refundere. O quantos illa, ut sic loqui permittam, præcipuorum siderum conjunctio & societas, Suevæ triumphos, quanta pollicetur beneficia? Erat hætenus vivere voluptatem, quā in terris nulla illibatio; Filiam & Matrem sanctissime inter se amantes, accuratissimæque officiorum & obsequiorum assiduitate, dulce cælo spectaculum, novum sæculo exemplum apparantes. nunc Tertium cedit pignus illustrissimæ necessitudinis; in alteram partem adjumentum ferens; in alteram solatium geminans; in utramque, decus, gaudium & unicæ pietatis affectum diffusans. Gratulatur Tibi, quantum est ubique Principum, Maximæ Regum Coniunx, o Reginarum Optimæ Mater; gratulatur Tibi de muneribus suis ipsa Fortuna, gratulatur una; cui jampridem cordi est, acceptam ex ore regnantis tux tesseram OPTIMÆ MATRIS reddere per populos, adorare per ætates, per monumenta passim consecrare. Deus,

qui senectam Tuam gloriâ lætitiâque hujus festi immensum  
 beavit, ac veluti coronavit, propria velit hæc bona Filia; Tibi,  
 Regiæque toti domui : cujus incolumitate salus Sueciæ, non  
 sine numine fatoque singulari fundatur. Atque hæcenus  
 quidem Tuam coronam, DOMINA, Deus hominesq; studue-  
 rint exornare : superest, ut Tuis Ipsa ornamentis faveas,  
 gloriæque immortalis, ad quam Te fata ducunt, auctoritatem  
 præstes. Nihil attinet, usitata enumerare nomina malorum,  
 quibus fortuna Regum & pater & sufficit. neque genium  
 nostri temporis accusare convenit, quod Principibus veri-  
 tatem, innocentiam, ceteraque præstantis imperii instrumen-  
 ta, invidere ac tantum non suffurari videtur. Jactaverit se  
 terrarum alibi, pervicax malarum artium impudentia. ir-  
 repserint in secreti Principalis penetralia; suas merces pro  
 nobilibus gazis venditarint; suos colores inter insignia im-  
 perii eminere cupiverint; carenis servilibus, tanquam orna-  
 mentis, animas ad regnandum genitas irretire studuerint.  
 Tibi, DOMINA, à teneris statim annis detexit has labe ac  
 exosas invisasque fecit, altioris & inviolati firmitudo animi:  
 detegetque ac profligabit porro ab oculis Tuis, melioris per  
 Te vitæ conditor; cujus sacramento Te vidimus rogari,  
 virtute inungi, gladio armari, vexillo instrui. His cæli re-  
 gnique pignoribus debetur unicum adversus insidias, nullâ  
 humanâ ope ceteroquin satis evitabiles, consilium præsi-  
 diumque, Principis cum supremo Numine familiaritas. Nu-  
 gantur enim, qui constantiam, & immobilis animi perpetuum  
 tenorem, à mortali principio arcessunt, studiisque imputant  
 civilibus. non est caducæ originis illa fax, quæ igne non  
 perimendo, lumine non agitando, efficacia non diminuen-  
 da, ad similitudinem & naturam cælestium siderum suosq;  
 natales, pertinaciter allevatur. Fulgebit talibus flammis in  
 perpetuum Corona Tua: nec septentriones tantum nostros,  
 sed totum, quaquâ patet, orbem illuminabit. Fulgebit; &  
 civibus Tuis claritatem, regnis splendorem portendet. Ful-  
 gebit; & Principibus specimen æternitatis, nationibus felici-  
 tatis regulam præmonstrabit. Fulgebit, & jam nunc hæc  
 studiis

diis in umbrâ educatis, læto Regiæ voluntatis omine affuebit. Ah! quid peto, DOMINA? quid me tantis rebus læco? Deprehendit me Tuum lumen, præstrictaque officii, quod molior, facultate, dubitare me fecit, si forte satius esset, è longinquo benefica luce illustrari, quam emissos de proximo radios non ferre; atque in medio venerationis sonantis opere, non voce, non animo satis competere. Non enitebit Te tamen, DOMINA, salutarem deficienti manum porrexisse; & ad fortius conandum, succumbentes suo oneribus Regia indulgentiâ instaurasse. Nec indigna tuis ritibus petimus, ô REGNATRIX AUGUSTA, ô BENEFICA CONSERVATRIX!



## II.

## ORATIO

*Ad SERENISSIMAM*

REGINAM,

Habita xxvii. Decembris clb l b c xlix.

Die scilicet Natalitiæ Festivitatibus tertio, cum è templo in Auditorium Gustavianum Academiae Upsalienfis concedere dignata esset. in qua de hymno Angelorum genethliaco, eaq; occasione, de Poësi sacra disseritur.

**P**ostquam animadverti, SERENISSIMA AC POTENTISSIMA REGINA, Tibi placere, ut verba coram Te, novus civis ac servus tuus facerem; optavi sane, ut mihi digna Tuis auribus; digna festo tempore, quod agitur; contingeret oratio: in qua vel obsequium dicentis, vel electio argumenti, posset enitescere.

b 3

nam

nam ut Tuos nutus observarem, ab ultimis pæne Germaniæ finibus huc profectus sum; & sapientiam Tuam, qua licet, æstimanti abunde constat, nihil apud Te, nisi exquisitum ingenio, elaboratum opere, adornatum verbis (quarum nulla mihi rerum facultas est atque copia) afferri oportere. Sed quæ duæ res timorem animo curamque principio incutiebant, iis me sublevavi, DOMINA, & in præsens adjutari sentio. siue Tuam virtutem cogitare, siue temporis reputare sanctitatem fas est. Quis enim nescit, quantam prudentiæ Tuæ partem constituat humanitas, & insita divinx ejusmodi indolis moderatio, quæ nec infantiam alloquentium aspernari, nec ignorantiam odisse, hæsitacionem vero ultro solet confirmare. ut propemodum credam, bene apud regias aures dicere, qui de bene dicendo minimum est sollicitus. Sollennium vero celebritas factorum, quibus per hos dies publica Ecclesiæ pietas occupatur, quamvis habeat res miraculo tremendas, mysterio arcanas, verbo ineffabiles; non excludit tamen simplicitatem admirantium, sed invitat: nec balbutiendi conatum repellit, sed arrogantis eloquentiæ deprimit fiduciam. Primi sunt, qui nato in terris Deo, ad audiendum canticum novum, quale humanis auribus nunquam auditum erat, excitantur, Pastores: primi non auditores modo felicitis miraculi, sed spectatores, imo præcones fieri jubentur. Ut magnum esse intelligerent, quod nuntiabatur, gaudium; quodam disciplinæ ordine ac per gradus, primo natum sibi Servatorem cognoscunt: mox modularis Angelorum carminibus ad prosperitatis tantæ arcana stimulantur: inde, accedunt propius, salutis suæ pignora oculis usurpant, contrectant manibus, denique correpti spiritu gaudiū nuntiati, gaudiū decantati, gaudiū perspectati, in officia gaudientium ac nuntiantium plena pietate properant, & quodammodo de pastoribus Evangelistæ rediguntur. Fiunt hodie, quæ sunt heri facta, circa eum, qui & heri & hodie, fuit & est & erit, unus semper, unus ubique, unus omnia. Sonat adhuc in auribus nostris vox beati carminis, quo cælestes chori *DEO gloriam, ter-*

ris

*pacem, hominibus bonam voluntatem* sive gratulati, sive precati sunt. Ex hoc argumento, quod non sapientia probe meditantis, non calamus velociter scribentis, exequi potest, rita pastorum simpliciter cogitantium fortean libet nobis aliqua repetere. Certe, si hoc me solatio tereris acquiescere, DOMINA, audebo sermonem ingredi de vera & divina illa Poësi, cujus specimine, venerandum Angelorum carmen, inter tot alia cœlestia monumenta, eximie aestimari debet. Neque alienum fuerit, opinor, Principi, sacris præcipue nunc operanti, omnis cæremoniæ religionisque formulam acclamare. & in secessu Academico, nihil contra strepitum aulae magis decore auditur, quam melius quietis jucunditas, cui eximias Deoque devotas mentes cœlestis musicæ concentus attemperat. nam de ingenio tuo, DOMINA, ad poëticæ & musicæ, id est, secretioris ac perfectioris virtutis congruentiam adornato, reverentius taceo, quam dixero, nisi quod oratio mea, aliquem sibi constantis atque consentientis naturæ habitum, quatenus naturæ nequit consonare, à contemperatissima indole Tua mutuabitur. Solent Poëtarum doctissimi originem suæ artis operisque ad Deum referre auctorem, neque alio quam cœlesti se incalescere spiritu, vigere motu, rapi affectu, quotiens numeris illigati sapientiæ amat, arbitrantur. neque in tali mendacio, nihil veri est. Quod enim modo Apollini & Musis, modo Deorum Dearumque aliis vana persuasione tribuitur, quin revera divinæ opis sit, atque illum consensum concentumque, illam, quæ feliciter Græce dicitur, harmoniam, quodam divinitatis simulacro in natura rerum, in artium genio expressam, consequatur, ne dubitare quidem fas est. nisi quod sanctitatem hujus officii varie corrumpi videmus, ignorantia, errore, depravati libidine animi. Quorum nihil usu potest venire in Poësi, quam cum perfectionis nota ac excellentiæ, cœpimus vere ac propriis *sacram* appellare: ab ipso scilicet sancto profectam Spiritu; in mentibus sanctorum hominum aut Angelorum, tanquam in temperatis ad cœlestem harmoniam organis elabor-

laboratam; in illustrissimis Sanctorum Scripturarum monumentis, velut in tabulis, omni auro, omni cedro longe pretiosioribus descriptam atque promulgatam. Hæc est illa vis divina, quæ, ubi mentes sibi dicatas, suo lumine illustravit, sua agitatione impulit, sua congruentia composuit, panduntur oracula veritatis, finiuntur moduli sapientiæ, numerantur incrementa salutis. Quamquam, quid describere conor virtutem, supra omnis eloquentiæ vocabula constitutam, quæque una & sola est sui ipsius interpret? Tua, DOMINA, cœlo cognata mens, divinisque per pietatem proxima instinctioibus, ex illis quæ dicam, satis intelliget, quæ dicere nequeam: veniaque & indulgentia isthæc qualiacunque minime subtilium rudimenta cogitationum, quod sæpius orandum mihi video, dignabitur. Quotiens ergo in tremendum illud æternæ arcanum sapientiæ, cum veneratione summa ac demissione animi intuebar, offerebat se interius quoddam Dei cum sacratis mentibus commercium; quas non tantum ut benignus hospes habitaret, sed ut ignea æternaque vis, efficaci, nec mortaliū vel voce, vel sensu, æstinando motu, suæ sanctitatis mysteriis imbueret, sui amoris flamma succenderet, suæ virtutis spiritu agitarer, suæ sæcundaret totas ac impleter bonis gratiæ! Hinc videbam emergere salutare concitati pectoris impetus, emicare pietatis accensæ fulgura, oriri denique carmen majus carmine: in quo syllabæ omnes, ut sic dicam, spirarent, verba procutrerent, oratio non tam diceret quam ageret. Jam, Moyses aliquis, plenus hoc spiritu, qui Poëtam divinum facit, qui Poëta ipse est, coram cœlo & terra, coram universo rerum, miracula Dei in oculis, in aures, in animos humani generis, summa cum majestate, nec minori cum terrore inculcabat. Vocem Domini, vocem tonitruī representabat carminis indoles: qua orbis concuteretur, sylvæ trepidarent, homines metu obtorpescerent. Jam Jobus aliquis, astra matutina loquebatur, recessus naturæ ac vires excutiebat, tenebat impios, semet ipse cum suis committebat afflictionibus



s veluti prælio: in quo dum militat, dum pugnam sus-  
 met, aut profligat, aut mutat, aut detrectat; ingens præ-  
 sit spectaculum vincentis in succumbente Spiritus, quo  
 caluerat, ut pugnaret, quo convaluerat, ut resurgeret. Jam  
 avidis alicujus anima, cum illo animaretur Spiritu, qui  
 primordio mundi aquis incubabat, qui congesta rerum  
 mina in frugiferæ facultatis seriem fecundabat, qui in  
 medio Sanctorum, animos hominum in harmoniam, har-  
 moniam in carmen, carmen in cantus temperabat: quid  
 non assequeretur magnitudine cogitationum, quid non imi-  
 tatur affectu, quid non repræsentabat lyra? Evolabat in  
 sublime cum aquilis, æternoque Soli suos approbabat fœ-  
 ds: audiebat juba Angelorum in cælo sonantia, atque  
 terris ea, quadam quasi vi reciproca, reddebat, resona-  
 bat, æmulabatur. nunc elementa, tempestates, terras, ma-  
 ra, montes, valles, dies, noctes, totam cum sua familia na-  
 ram advocabat; ut Deum laudarent, Deo exultarent; Deo  
 revererentur, Deo quiescerent; Deo gauderent, Deo trepi-  
 rent. modo intra se collecta vel amore Dei sui flagrare,  
 vel desiderio liquefcere, vel complexu adstringi voluit.  
 modo plena Spiritu, à quo exulare interim videbatur, cir-  
 amibat per plateas, & plangebatur; sedebat in tecto, ut pas-  
 solitarius, & mærebat; voluebatur in lecto, & lacryma-  
 um imbre madefiebat. gemebat, cum columbis; minurrie-  
 batur, inter palumbes; inter noctuas, vagabatur; inter i-  
 as terribiles belluas, inusitato summæ consternationis so-  
 tu, cum leonibus rugiebat. Has edoctus voces, Patris  
 rmen continuavit Filius: cujus canticum, summa canti-  
 rum, decus canticorum, canticum denique canticorum  
 merito appellatur. Quid hic familiarius Spiritu, quo di-  
 nus Poëta incalcescit? Sponsus est. quid felicius anima,  
 ne commercii tam beati secreto gaudet? Sponsa est. a-  
 at Sponsus; liquefcit Sponsa: loquitur Sponsus; Spon-  
 recreatur. Quærit ut absentem, qui ut semper præsens  
 set, Sponsus dici voluit. invenit, ut quærat: ut inveniat,  
 meritis. currit Sponsus: Sponsa, ut currat, trahitur. Quid  
 non

non affectuum, quid non artium, quid non lusuū, illē amor habet, quo nihil sanctius, nihil amicius, nihil flagrantius? Denique panditur cubiculum illud nulla humana opē factum: in quo inter oscula caritatis, sanctitatis, salutis, nuptiæ nullo fine terminandæ celebrantur. Neque adhuc cessat divina Poësis: cujus in æternitate usus consummabitur. hic, inquam, audietur, indefecta Angelorum voce decanandum carmen, quo æterna & ingens Dei Sanctitas, cujus charactere summum quondam sui populi sacerdotem insigniri, cujus majestate templum nomini suo extructum consecrari, cujus spiritu pectora servorum suorum impleri, linguas gubernari, carmina concinnari voluit; per choros, per intervalla, per concentum, trina vi, trina suavitate, sempiternum deprædicabitur. Inter hæc divinæ sacratissima Poëseos mysteria dum versor, fas erat respicere ad humanorum operum carminumque specimina, &, an simile quicquam, vel Græcorum rotunditas, vel Latinorum eruditio haberet, exquirere? Consideranti ergo gravitatem Pindari, merienti numeros Flacci, annotanti quicquid in Homero inimitabile, in Virgilio exactum, in ceteris perfectum vulgo celebratur: plenissima fides facta est, nihil posse reperiri, quod vel incomparabilem labii sancti profunditatem, vel compositionis spiritum, vel apparatus magnificentiam, vel varietatis artificium attingeret, nedum adæquaret. Licet enim in humana quoque Poësi animadverterem aliquid diviniore beneficii & artificii: nullo id tamen modo poterat comparari cum carminibus, quæ à præsentissimo Spiritu divini magisterio suum spiritum & vigorem; ab ipsa sanctissimæ veritatis indole suam quandam majestatem acciperent. Etiam de numeris & metro, quod varie alii texunt, alii retexunt, ita sentiebam: non tam pedum dimensione definiri, quam pietatis sensu, quanta sit in numeris sacris harmonia, quanta vis, percipi oportere. neque enim alium in toto hoc negotio tulerim judicem, quam qui Spiritu ejus Poëseos, quam legit, incalcescat; qui carminis non argumento nūus, quam structura movea-

oveatur. cum præsertim illud eximium ac singulare hæc  
 cæcis habeat, ut animos à terris & viliorum cura rerum  
 obductos intime afficiat, purget, rapiat, incendat, conti-  
 neat, atque in ipsâ, ut sic loquar, carminis metra dulcis-  
 nis vinculis innectat. Nulla vitæ fors, nullus tempo-  
 rum status est, nullus fortunæ casus, cui non levamentum  
 de aut adjumentum accedat. omnes animorum affectus  
 imperat, omnia pietatis momenta dispensat, omnem di-  
 vini commercii disciplinam instillat, domina mentium, ma-  
 stra religionis, officina gratiæ. Verumenimvero satis  
 imadverto, unde mihi recedendum sit, si velim progredi-  
 : atque, ad quid prævertendum sit, si exorsa suum de-  
 cant finem indispisci. Properat enim oratio mea ad æ-  
 ternum, nec minus tamen huic festo solenne Angelicarum  
 entium carmen : cujus imago Prophetæ per revelatio-  
 nem, exemplum Pastoribus per communicationem innotuit.  
 audiamus choros alternantes, resonantes hymnos, odas tri-  
 unitatis. *Sanctus Dominus*. cujus gloria ante sæcula, omni-  
 nis sæculis argumentum fecit : cujus in formando homine  
 sapientia, in servando bonitas, illustribus operibus, inusita-  
 tis miraculis, venerandis mysteriis continuata, cælum gau-  
 dio, orbem salute replevit. *Sanctus Dominus Deus exer-*  
*cituum: pleni sunt cæli & terra gloriâ ejus.* & dicat omnis  
 militia cælestis : *Gloria in excelsis Deo, & in terra pax,*  
*omnibus bona voluntas.* *Sanctus Dominus*. qui violatam  
 humano genere sanctitatis suæ imaginem, indictum no-  
 mini suo bellum, non excidio finivit, sed misericordia re-  
 conciliavit : qui profanæ infirmitatem naturæ, sanctis-  
 si- ne necessitudinis commercio repurgavit, & in possessio-  
 nem bonorum, quæ soli videbunt sancti, restituit : qui  
 um terra cælum, cum homine divinitatem æterna pace  
 populavit : *Sanctus Dominus Deus exercituum: pleni sunt*  
*cæli & terra gloriâ ejus.* & dicat omnis militia cælestis :  
*Gloria in excelsis Deo, & in terra pax, hominibus bona*  
*voluntas.* *Sanctus Dominus*. qui discordes sibi, discordes  
 universo rerum mortalium mentes consensione purissima  
 c 2 colli-

colligavit : qui amores , gratias , virtutes , in decus & honestatem humani generis instauravit : qui cœlestium sensu munerum pignorumque , servatas denuo terras imbuir : *Sanctus Dominus Deus exercituum : pleni sunt cœli & terra gloria ejus.* & dicat omnis militia cœlestis : *Gloria in excelsis Deo , & in terra pax , hominibus bona voluntas. Bona voluntas* , pacis turela , Dei gloria : *Pax* , gloriæ Dei sacra , bonæ hominum voluntati auspicata : *Gloria* , plena pacis , plena benevolentiae muneribus . *Gloria sancta , Pax sancta , Benevolentia sancta.* quia *Sanctus, Sanctus, Sanctus, Dominus Deus exercituum : cujus gloria sunt pleni cœli & terra.* & dicat iterum militia cœlestis : *Gloria in excelsis Deo , & in terra pax , hominibus bona voluntas.* Vix attinguntur , SERENISSIMA DOMINA , quibus immorari deberem , si materiæ , si tempori obsequendum esset. Quis enim dubitet , quin auribus Tuis unice gratum sit carmen , sapientiæ formulam , felicitatis summam , festivitatis sollemnis lætitiā , & Tui insuper sæculi fortunam , sanctissima rotunditate complexum ? An aliud nuper publicis supplicationibus argumentum , Deus & Tu decrevistis , DOMINA ? Ille Pacem Tua opera destinavit orbi , qua nulla post Augustam pacem , nascenti in terris Christo sacram , in memoriis rerum occurrit illustrior , amplior , gloriosior : Tu , ut oblatam tam potentibus auspiciis sæculi Augustei consuetudinem pari animo fatoque impleres ; Angelici muneris imitatrix , DEO gloriam cecinisti , terris pacem promulgasti , homines bona voluntate imbuiisti . ex quo intelligi potuit , necessitudo Pacificæ Reginæ cum Christo Pacis Principe . cujus anniversario Natali , nuper Natalem Pacis , multa cæremonia celebratum , certantibus quasi cum Angelici carminis argumento , hominum studiis applausibusque , præludere jussisti . Gaudebunt semper Tua consuetudine , Serenissima DOMINA , cœlestes illi Spiritus : sive , cum Tuis itineribus comites ibunt , sive cum operibus adjutores , virtuti fautores , securitati custodes præsto erunt . sed nunquam libentius suos cum Tuis sensus conjungent , quam ubi

longam factorum Tuorum seriem, quotannis in posterum  
 claudet vel ordietur illud carmen, quo letius nullum  
 le à primordio sui muneris ac divinæ Poëseos cantarunt  
 cantabunt. Animadvertis, DOMINA, me trahi in  
 gitationes, nullam in præsens explicationem habituras. id  
 od & alias mihi accidere sentio, quotiens de regia ma-  
 tate Tua, de regia virtute, de fatis regiis in piam reve-  
 nter meditationem me intendo. Equidem statim Poë-  
 quiddam simile patior: commovetur animus, incalescit,  
 pitur, & sentit aliquid altioris auspicii, cui se permit-  
 re, impense concupiscit. sed in ipso conatu (sive is non-  
 ematurus, sive naturæ humilitas attolli vetat altius  
 os motus) retardari soleo atque cohiberi. itaque ad sim-  
 plicitatem illam redeo, cujus exemplum semel orationi  
 ex subsidio comparatum volui. Et nunc iterum, ne  
 nis putare possit, nefas esse, de sublimibus humilia, de  
 grandibus tenuia loqui, ecce Tibi carmen vere excelsum,  
 ere augustum, quod Virgineo ore, Spiritu autem divino  
 ecantatum, omnis incrementi fastigiique summam & lau-  
 em, elogio modestiæ ac demissionis animi definit. Nun-  
 averat & fecerat Deus ingentia, & mira, & nova, Vir-  
 tum Deiparæ. quibus magnifice celebrandis intenta, *humi-*  
*ritatem suam Deo cordi fuisse, neque alios potius, quam hu-*  
*iles divinitus extolli*, suavissimo orationis compendio ar-  
 umentoque cantillat. ô quam excelsa est humilitas car-  
 minis, cum quo nulla comparari Poëtarum grandiloquen-  
 tia potest! quam illustris est simplicitas verborum, quæ  
 discenda pueris, meditanda Sapientibus, divinus Scriptor  
 commendavit! Sumet ex his vocibus paulo post eminens  
 materiam hymni, in nativitate Prophetæ Filii factus  
 Prophetæ Pater: atque libertatem, præsidium, fiduciam,  
 honestatem, partu virgineo quæsitæ, ac in humanum or-  
 bem diffusa, prædicabit: adeoque per hæc, ante Angelos,  
 sed cum Angelis, *DEO gloriam, terris pacem, hominibus*  
*bonam voluntatem*, asseverabit. Nam ad istam incompara-  
 bilem poësin nobis semper redeundum est, quam, sicut

quotidiano religionis officio & solennibus precibus, principium dicam an clausulam, sive potius summam, pie Ecclesia ac prudenter accommodavit: ita nos orationis nostræ occasionem simul statuimus atque complementum.

Tempus sane monebat, ut sacræ Poëseos majestas, quia ad Reginam loquor, ex cithara aliqua Regia sese promulget: cum præsertim ignorationem regii muneris causari non possit, qui Tuum, DOMINA, exemplum intuetur. Eminent in Te undique, sita compositi serie, regaliū laudum tituli: quos sola rite explicat, sola rite commendat Divina Poësis. Hæc lucet, hæc coruscat, fulgentissimis istis luminibus: quæ cælo missa, Regias origines, Regias dotes, secreto munere intime persignant, publicoque spectaculo longe lateque ostentant. Hæc, vel vaticinatur, vel interpretatur Tibi amores, quibus indolem Tuam; favores, quibus majestatem Tuam; delicias, quibus virtutem Tuam, à prima infantia formare, tueri, complecti, secum denique conjungere, ac æterno fœdere devincire, ille summus, qui Reges facit ac regit, ille Tuus, & Rex & Deus destinavit. Hæc, solio Tuo commercia cæli, munimenta factorum, ornamenta gloriæ pollicetur. Hæc designabit veritatem sententiis, formulam verbis, compendium disciplinæ, qua illam regii magnitudinem animi, illam sapientiam, illam moderationem atque clementiam, illam humanitatem atque continentiam, non ex artificio adulatorum, sed ex pietatis officio, in Te omnis ætas venerabitur. Sed ab hac argumenti parte, ingenii me tenuitas pridem non dehortatur modo, sed abstrahit: nihilque ad excusandam orationis balbutiem præsidii relinquit, nisi sola brevitatis impertendæ titulus veniæ allegetur. Forte autem fiet, SERENISSIMA DOMINA, si rudis ac indiferto sermoni ignoveris, ut aliqua in nobis facundiæ scintilla, Tua humanitate susciretur. Ita Te DEUS servet, ô gloria regnorum, ô sidus terrarum, ô admiratio sæculorum, REGINA AUGUSTA,

TRIUMPHATRIX PACI-  
FICA!

ORA-

## III.

## ORATIO

In auspiciū anni clbIocL.

habita die III. Januarij,

*Ad SERENISSIMAM*REGINAM  
SVECIÆ,Cum altera vice Auditorium Gustavia-  
num præsentia suæ splendore illumi-  
naret.*SERENISSIMA AC POTENTISSIMA REGINA,  
DOMINA MEA CLEMENTISSIMA.*

**A**Uspicati sumus annum, si præterita respicimus, insignem complemento; si futura meditamur, salutarem omine, nobilem principio, fortunæ singularis pignoribus gloriosum. Quicquid vel superstitionis ingenio fictum, vel pietatis indulgentia repertum, vel prudentiæ rationibus deliberatum, olim vel hodie, circa sollemnia annui temporis auspicia, in argumentum humanæ sollicitudinis aut studii invaluit: ea omnia, partem tunc magno animo spernere, partem felici compendio lucrari tas est. Tuus, DOMINA, conspectus, omnem nobis officii fatique & formulam & summam repræsentat. Sive enim rerum initiis aliquid non vani augurii inest; quid non Vrbalia sibi de hoc polliceatur anno: cujus primordia

dia, in utroque, Religionis & Sapientiae templo excelsissimus Regiae praesentiae splendor, tanquam tutelaris numinis auspicio consecravit? Sive grates laudesque Deo habere, ac vota nuncupare par est; Tua nobis merita praesto sunt, DOMINA: quorum & magnitudinem publica pietate veneramur, & perpetuitatem prece sollenni exposcimus. Quae, ut recte a nobis atque ordine peragantur, non aliunde forsitan procedere orationis debet series, quam unde grandia publicarum momenta rerum in suos neuntur articulos, & novorum celebritate eventuum disponuntur. Absolvit hic annus partem alteram saeculi, in quod Fortuna contulit mutationes rerum insignes, varios casus imperiorum, discrimina gentium, vicissitudines fatorum, quibus Europa usque ad summum periculi intremuit. Sedes fatalibus motibus, amplissima terrarum Germania placuit, quam ipso corporis late fusi contextu discordiis opportunam, ab initio statim saeculi lacessiverant, inde turbarant, denique jam fere in ordinem redegerant, vehementis nescio cuius prudentiae consilia, quae sibi Europae nationes ex aequo timenda pridem est quod iudicarunt. Adolefcebat jam saeculum, inter immodicos armorum praepotentium successus: neque aliud superesse videbatur, quam is casus, quem Germania semper pretio, pacatione, sanguine a suis cervicibus redemerat. Dormiebat hoc temporis, neque parietis vicini incendium ad se pertinere credebatur Gallia. cognatae gentes reliquae, incertis casuum, quaestuosam quietem; fidei & speciosis consiliis, ambitionem suam facile praetulerunt. De Suecia, plerisque nihil in spem, nihil in metum venerat, quam Deus interim domi pacatam, generosis consiliis instructam, Heroem maximo gubernatam, in vertendi cardinis subsidium, & novas fortune vices excitavit. Ingressus igitur vicesimo abhinc anno Germaniam GUSTAVUS MAGNUS momento temporis faciem rerum immutavit, admirandisque virtutis ac felicitatis profectibus, Svecorum gloriam & sociorum libertatem cepit asserere, donec in medio aetatis flore ac victoriarum cursu intercepitus, iterum



rum Fortunæ reliquit spatium deliberandi, miserone in-  
 ritu, an servitute partis succumbentis, bellorum Germa-  
 nicorum finis decerneretur. Sed jam pueritiæ Tux, SE-  
 NISSIMA DOMINA, mox adolescentiæ auspicio, ar-  
 dum Svecicorum virtus, fortunam publicam ita sustine-  
 re ac librabat, ut bello quantumvis magno & ancipiti vel  
 istum iudicio suffectura crederetur, ni pace conciliaren-  
 tur, qui armis profigari non poterant. Traxit ea consulta-  
 complures annos: neque Minervæ olea adhuc prove-  
 neret, nisi objecta ægide & vibrata fortius hasta, ab insi-  
 tantium odiis defensa fuisset atque emunita. Quantis  
 tem per hæc tempora accessionibus, in solenne sæculi  
 umentum iverit nomen Svedicum, non potest sine ap-  
 ratu verborum explicari, aut citra comparisonem prio-  
 rum temporum intelligi. Est equidem jam inde ab an-  
 tico septentrionis hujus populis familiare, contundere su-  
 perbas opes, peragraræ orbem victoriis, annos triumphis  
 numerare: sed aut vehementer fallor, aut imperitus rerum  
 sum, qui priora cum præsentibus conferendo non animad-  
 vertit, hoc sæculum dedisse, quod majoribus nulla ætas  
 contulerat. cujus rei cum in oculis testimonia versentur,  
 demonstratione verborum abstinendum iudico. interroga-  
 tamen prudentiores velim, an recte sentiam de iis, quæ  
 iter conabor delibare, Gothorum quidem veterum  
 morem, successus armorum in orbem distudit? sed sub ea  
 estimatione & verenda auctoritate, qua hodie inter magna  
 nomina eminet, nunquam in civilem famæ publicæ  
 mulam ivit Suecia. Gerebantur sane ingentia bella:  
 quæ cum Germanicorum bellorum gloria, nec causis  
 partibus nec consiliorum gravitate queunt contendere.  
 in autem, foris victores, domi sæpius diminuebantur:  
 prius nunc turbatis, nunc neglectis longinquam felicitate  
 fruuntur luentes. Nova est, atque hujus ævi propria commen-  
 tatio, quod externis bellis, domesticaque disciplina ex æ-  
 quo attolli rempublicam vidimus. Pax denique Germa-  
 nica, quid non singulare, quid non admirandum habet?

d

Hanc

Hanc ego æternam Svedici nominis adoream, qua hoc sæculum propitii numinis favor coronavit, dum intueor, vix tempero mihi, quin prodigia tanti boni itilo signem. Ventum erat diuturnitate bellandi ad illud tempus, quo deflagrasse pridem furoris Martii vehementia, consilioque & rationi plus, quam antea, reliquisse loci videbatur. Sed successerat acerbitati, tenax propositi semel capti voluntas apud eos, qui pacem semel bello mutatam cupiverant, ac potentiæ studium: quod citra ultimam necessitatem exuere, ignavam, & magnis fastigiis turpe habetur. Hinc multum temporis operæque insuntum, donec, ut Pacis conditiones tractarentur, impetrari potuit. hinc in deliberatione instituta, miræ ambages, involucria, diversa, sæpeque sibi ipsis adversa consilia. Nec in ipsa re parum erat perplexæ difficultatis; inter tot nomina partium & discrepantes suæ cujusque utilitatis rationes. Faciebat omnia terribiliora metus & calamitas eorum, quorum salus ac libertas jam non propriis nitebatur auspiciis, sed ut materia belli inter alienas manus vertebatur. Hos suspicio equidem & timor, ut eventus decernit, sed, ut tum res erant, prudentia potius in ejusmodi fere cogitationes egit, ut Pacem Svecis serio posse cordi esse desperarent. Quid enim? non diffidendum quidem gravitati & candori Svecorum, sub oculis totius Europæ, in publico quasi theatro, ista asseverantium: sed inter recepta publice simulationum ambigua, simplicitatem, quæ mutuum facientibus debetur, non tuto semper loco esse. præsertim cum bellum inter quotidianas pæne victorias, & omnes rationes militares etiam in longum ordinatas, Pace utilius videri posset. Auxit hanc opinionem plurimum, Bavaricæ Bohemicæque militiæ proventus: qui adversariorum fortunam non parum concusserat; Svecis autem instrumenta & vias ad summam rerum expediendam demonstraverat. In promptu erat speciosus titulus ex moribus temporum. in tota quippe de Pace deliberatione, modo hos, modo illos, consilia & animum ex fortuna sumere, ac subinde commutare, vulgarissima

na querela arguebat. Verum, quod humanis consiliis impeditum ac inexplicabile videbatur; Tui muneris operis-  
 se esse, SERENISSIMA DOMINA, Optimus Maximus  
 DEUS voluit. Tu cum spe metuque Germanorum ita  
 ansegesti, ut eadem opera Deo Tuam mentem agitant  
 olequium, orbi universo magnitudinem animi, sæculo in-  
 comparabilem fortunam approbares. Dedisti pacem, quo  
 tempore speciosissima danti esse potuit. Vicisti non minus  
 actionis fide ac gravitate, quam debellato quocunque  
 licibus armis prælio. vicisti genium ævi: cum jampridem  
 s pacis privatim utilissimæ illecebras contempsisti, quæ à  
 atrocitatis sanctitate simul, & à commodis sociorum Te a-  
 decabant. Vicisti, quod difficillimum est, Te ipsam: o-  
 ni cupiditate ac immoderato ardore, qualem bellorum  
 accessus gignit, intacta aut major. Ergo Te Pacatricem  
 oculi, eorum, qui servati sunt, pietas; eorum, qui re-  
 conciliati sunt, integritas; eorum, qui socia ope adjuvi sunt,  
 les loquetur in populos, celebrabit in ætates, prædica-  
 t ad posteros. Et quandoquidem eadem contentione  
 eficis divinum opus, qua cœpisti; magnisque hætenus  
 boribus, Pacis fiduciam, à novis subinde periculis & in-  
 trimentis emergentibus, munis ac firmas: hic annus in  
 imis, DOMINA, fundatæ quietis publicæ jam certus ac  
 curus, sacro capiti Tuo coronam parat, non magis regiæ  
 nctitatis insignibus conspicuam, quam prudentia tempe-  
 ve ac gloriose pacandi imperii eminentem atque singula-  
 m. Sed hoc Septentrionis Palladium, in quo tot popu-  
 rum fata vel consummare vel custodire Deus destinavit,  
 editabitur in posterum, quibus elogiis colat, sapientia:  
 rtabitque augustus annalium labor, quo sit honore in tem-  
 o Memorix dedicandum, pignus æternitati pacis, regno-  
 m disciplina, temporum gloriæ sacrum. nobis, rudiore  
 o pertexendum est, quod cœpit institui: atque adeo nunc  
 figurandum, quid in posterum nobis hic annus portendat  
 ut promittat. Sicut enim, qui spacia locorum & inter-  
 alla oculis metiuntur; aliquem sibi statum componunt,

d 2

unde

unde procedere rectius aut amplius diffundi contuentis acies possit : ita, qui divinandi prudentia res futuras speculantur, tale suis cogitationibus principium accommodent oportet, quale vel respiciendi opportunitate, vel prospiciendi facultate momentis utrinque potentibus, rerum temporumque eventus perficiat vel connectat, id quod de anni hujus quodammodo sæculari celebritate omnes agnoscunt atque sentiunt. Fulserunt Sveciæ sereni sæpe soles; atque, si præterita revolvere lubet, præscripserunt sibi annales hujus populi & inseruerunt laureata passim elogia ac miniata ornamenta. Veneramur ergo iterum illustres majorum animas: neque gloriam, distinguendis insigniendisque prioribus sæculis fatalem vel obliviscimur, vel dissimulamus. At vero hujus anni incomparabilis profecto fors est: quem, confectis maximis difficillimisque bellis; redita & constabilita potissimis Europæ gentibus libertate, religione, pace; prolatis finibus, firmatis fœderibus, adjunctis amicitiiis; novæ temporum felicitati ordiendæ proprium destinatumque, in fastos patrios, titulo auspicioque heroico, Fortuna Regia inferet, æternitatiq; Svedici nominis consecrabit. Quousque autem ista felicitas sit processura, temerarium forte fuerit conjectare, nisi partim certa rerum pignora nos de futuris confirmarent, partim exempla omnis memoriæ electissima erudirent. Habemus Principem, omnibus ingenii dotibus animique artibus, quibus Deus maxima imperiorum fastigia unquam condidit ornavitque, instructissimam. Donec hæc rebus Svedicis moderabitur, ut semper in incremento virtus Regia, ita semper in profectu fortuna reipublicæ erit. Destinari porro cœlesti tantæque molis capaci animæ, summam omnis præstantiæ sortem, præter assidua documenta, vel GUSTAVI, in ejusdem operis auspicia divinitus adornati Herois magnitudo evincit. ultra quam licet ascendi potuisse mirum est, verissime tamen in nostros Principes, si sexus ex parte mutetur, convenit, quod in similis fortunæ exemplo Poëta de Julio Cæsare & Augusto extulit:

*-- Ille videns Nati bene facta, fatetur  
Esse suis majora, & vinci gaudet ab illo.  
Hic sua præferri quamquam vetet acta paternis,  
Libera fama tamen nullisque obnoxia jussis,  
Invitum præfert, unaque in parte repugnat.*

Monet nos Augusti mentio, ut intelligamus, non procedere fere ultra id quod summum est, regnorum sortem. Neque enim, collocatam ab Augusto in optimo statu rempublicam Tiberius, pari fortuna continere; neque Alexandri ad summa provecti fatum, quisquam potuit consequi. Et si ad magna itidem, sed minora prioribus, veniendum est; non fuit, qui Constantini Magni, non fuit, qui Caroli Magni, ut regnum, sic merita & fata hæreditate cerneret. Quandoquidem ergo in salute sacrati illius capitis, quod libentius devoti obsequio animi veneramur, quam feliciter infacundæ orationis præconio laudamus, fortunæ publicæ majestatem acquiescere novimus; æquum est, ut bonis ipsi nostris faveamus, pietate, scientia parendi, virtute, & prudenti sollicitudine. Nulla fuit gens tam aliena à religionis sensu, quin prece sollenni, conceptisque votis Principis sui salutem diis, quos colebat, efficaciter commendari crederet, & Romanis hic ipse mensis, pridie Nonas, qui in diem crastini convenit, in eam rem facer erat. Nobis præsentior pietatis ratio, fiducia certior, in æterni Numinis mandato promissioque, cottidie dicat vota, & bona verba, quibus Optimæ Principi salutem, vitam, gloriam non precemur modo, sed impetremus. CHRISTINA, Deo dilecta, Vive, Regna, Perenna! CHRISTINA, Deus Te dedit; Deus Te servet! Simplici verbo defungor, in re, quæ animorum potius ardore studioque, quam vocum formulis, à Deo, & nunc sollenni tempore loquere, & deinceps nullo non loco ac tempore, exoranda est. Præcipuum hoc & primum in futuram felicitatem auspiciis, omnis bonæ artis, omnis boni moris studium atque diligentia, ultro consequatur;

que-

queretur. Cum enim nullum sane Reipublicæ tempus sit, quod carere possit honestis & ad publicum decus pertinentibus studiis, plus tamen est, quod perducta ad summum ævi felicitas expostulat. Nam, & Deus in experimentum virtutis ac constantiæ, sua mortalibus munera elargitur; & cum magnitudine operii crescunt curæ, ampliantur labores; neque vel subsidia rerum vel ornamenta, nisi cum profectu tractari fas est. ubique tenior fortunæ publicæ sensus; & prudentior civilis officii interpretatio; & administratio negotiorum desideratur sollicitior. Quicquid denique non est plenum convenienti dignitate, sollerti consilio, strenuo tractatu, non est hujus sæculi: quod ignavos & vitiosos, nequaquam inter sua nomina numerat. Quid? quod invidia mille oculis in aliena commoda vigilat: nec quisquam magnas opes quæsitur, quin eadem opera potentes inimicos inveniret. quorum quo occultiora sæpe sunt odia, hoc periculosius dato tempore erumpunt. Possem enumerare præclaros populos, nobiles respublicas, in quas nihil juris res adverſæ habuissent, si secundarum rerum copiam, & suæ fortunæ fastigium, labore, vigilantia, provisu & cautione gubernassent. Videntur fata, post impletum militaris gloriæ cursum, Sveciæ singularem ex Pace gloriam fortunamque meditari. Si enim, quod prudentes existimant, ex ingenio Principum, disciplina colligitur civitatis; quid Regina nostra ad Pacem aptius, ornatus? si primordia studiorum de incrementis testantur profectuum; quæ non Pacis artes, in hoc regno vel patriam vel hospitium cœperunt eligere? Valde tamen, ne fallatur, vereor, qui plerisque viam pedum satis visam autumat, qua oporteat incedere, si fortunæ publicæ, si fatis sæculi ingenue & serio cupiamus obsequi. Nominabo unum genus, ut intelligantur, quæ hac vice nominari nequeunt. Literarum studia hodie tractamus promiscue apti ineptique, temere & cum consilio: atque si multis literatorum nominibus opus haberet patria, possumus for-

for-

forte in formam exercitus agminatim adlisteret. Quid autem futurum sit, si res operam & nostræ artis specimina postularet, ignoro. id abunde scio, quid in raptis temere ad militiam agrestibus usu soleat venire: cum alius gladio, alius telo caret; ille quo minus recte utatur tumultuariis armis, rubigine ferri retinetur; ille quid prorsum, aut retrorsum moveri debeat, non intelligit: plerique, cum pugnare jubentur, in cæcum cæcum agitant corpus, de feriendo adversarium parum cogitant. Sed nolo minus prospere ominari de militia nostra literaria, si modo Sapientes habeam auctores ejus, quod dicam: literas male negligerterve tractatas adeo non convenire reipublicæ utilitatibus aut felicitati sæculi, ut potius & istas varie pervertant, & hanc turpiter obsecurent. De cetero, omnis ævi experientia confirmavit, plus incommodi in vitam civilem invexisse, qui literis infelicitate aut leviter operam dederunt, quam qui eas nunquam attigerunt. Ut taceam, præcipuos semper omnis sapientiæ adversarios ex eo genere produisse, qui non isto studiorum nomine diu segne otium convelaverant, doctrinaque vix primoribus labris degustata, animum bonis artibus non induerant. Nobis omnia meliora in spe ac votis sunt: & medebitur, si quid superest hujus mæni, primum quidem DEUS, deinde Tuum exemplum, DOMINA, quo nullum potest esse perfectius. Tibi amore sapientiæ, cura & studium reipublicæ concilavit; Tibi scientiæ amplitudinem, usus vitæ ac negotiorum suggestit: Tibi generosa agendisque nata rebus indoles, promptam studiorum utilitatem expedit. Si Te ducem sequimur, DOMINA, redibit virtus literis, honos artibus: nec jam inter vocabula scholarum, sed inter illustria opera Tui sæculi eruditio numerabitur. Idem nos, ad cetera spei nostræ pignora, & venturæ prosperitatis omnia compendium ducet. Si ad vitam Tuam componimur, ad mores Tuos emendamur, non hujus modo anni auspicia rite implevimus, sed insequentium nobis

nobis fata propitiavimus. Ut alia circumspiciamus auguria, ut recurramus iterum aut procurramus, nulla necessitate compellimur, nisi quod Tua, spero, indulgentia parietur, DOMINA, si publicos populi affectus non excludere mea potest oratio. De fati quippe hujus anni auspicioque agitantibus, statim in mente, statim in ore est illud tempus, quo regiuni capiti decus auspica-beris, & Ubsalian honore, privilegio, felicitate incomparabili, supra quicquid est urbium evehes extollesque. Hujus festi splendorem, magnificentiam, apparatum, ac ituram cælo lætitiā, avidissima mentis commentatione præcipientibus veniam Tu quidem dabis, SERENISSIMA DOMINA, quod hinc potissimum sæculi fortunam, & suas quisque spes denuo auguramur. Faciatque DEUS OPTIMUS MAXIMUS, ut, quicquid ejus spectaculi impatienter desideramus, utile sit faustumque Quietis temporum, securitati populorum; sive potius, Tuae Incolumitati; in qua cuncta rerum publice utilium faustarumque auspicia continentur. Sed jam diu scilicet est, quod in Te fulget illa regiarum virtutum corona, quæ supra omnem auri gemmarumque nitorem illustis, omnia loca, benignis splendoribus in admirationem Tui convertit. hanc suspicere, est auguria salutis captare: hanc venerari, est Bonam Fortunam propitiare. hæc præsentī ubique efficacia, annis nomina, mortalibus auspicia, imperiis fata, vel por-tendit, vel dispensabit.

ORA-



## IV.

ORATIO  
IN NATALEMSERENISSIMÆ  
SVECORUM  
REGINÆ*Septimum & vicesimum,*

Habita

anno clb Isc LII. d. VIII. Decembris, in

Academia Argentoratensi

*ab Illustriss. Comite*

C. C. Königsmarckio.

A. O.

Septima & vicesima vice, quod felix faustumque sit, anniversariis humani orbis gaudiis & gratulationibus colitur hæc dies: cui præclare de seculis omnibus mereri contigit, quando augusti conscia pars, CHRISTINAM, sidus populis, Principibus letum, annalibus miraculum, prima nuntiavit ostenditque. signem auspicatissimi festi materiam velocique singulorum annorum profectu in consummata laudis fastigium exactam, non parum, hoc utique tempore, commendat Dinum, quod se ultro prodit, pro securitate humani generis consilium. Quoniam enim sancta omnibus sæculis

e

Regum

Regum majestas, hoc demum tempore sperni alicubi terrarum cœpit atque conculcari : itaque tanquam fatale in gigantes telum ipse Deus Ultor voluisse videtur expedire, nomen illius REGINÆ, cujus indolem cœlo caram, virtutem terris salutarem, merita omnibus populis amica, Invidia ipsa revereri, Fama prædicare, Æternitas consecrare decrevit. Desit, opinor, inter homines numerari, qui ad tantam rerum lucem cæcutire mavult, quam suspicere. Neque argutulus jam, sed flagitiosus cenferi debet, qui singulare unius imperium criminari audebit, tanquam otiose à Sapientibus confictum, nulloque exemplo publicæ salutis nobilitatum : postquam intueri licet REGINAM, qua meliorem Principem, ne votis quidem accuratissimis formarent, quicumque perfectam sibi felicitatem proposuere. Sed hæc atque hujus generis alia, jam pridem vario doctrinæ atque ingenii certamine earum gentium prædicatio extollit, apud quas bonæ mentis sensus, aut reipublicæ intellectus superest. Planeque certus sum, hoc ipso die, in florentissimis Europæ nationibus, celeberrimisque locis, Reginam Sueciæ, *felicis seculi specimen, boni imperii normam, rerum humanarum decus*, conspirata animorum contentione, suavi vocum modulatione, exquisito orationis cultu decantari. Sicut autem studiorum elegantia & artificio, nemini non, & juvenis, & literarum experts, in obeundis ejusmodi officiis concessero : ita non parum præsidii, in loci hujus sanctitate, in virtute tam illustris cœtus, amplector : prorsusque statuo, nefas esse silere, ubi & pietas dicentem vel excusat, vel laudat ; & argumenti favor, audientes vel conciliat vel permulcet. Quo enim potius modo honorifice vos appellem, auditores optimi, quam si citra dubitationem mihi persuasero, quicquid à me, tenuiter de grandibus, humiliter de sublimibus dicitur, id vestris omne cogitationibus, vestra doctrina & commentatione, augustius reddi ac veluti suppleri, atque interpretando illustrari? Vestrum erit, de Natali Maximæ Reginæ, vestrum de meritis Ejus, decore estimare.

timare. Vos ego, cum Nativitatem Regiam auditis, impicere credo, in cœlestes fatorum tabulas; non quibus Parca: suum Jovem cum Diis cæteris in ordinem redegeunt; sed in quibus unus cunctorum regnator Deus inscripsit leges, mundo formam, mortalibus disciplinam, imperiis fortunam decreturas. In his, inquam, ab æterno constitutum legis provisumque, ut orbi Arctoo tandem illucesceret sæculum, quo nobilissimorum in terris imperiorum felicitatem majestatemque in plerisque æquaret, in nonnullis superaret. Subit ergo, vobiscum venerari, ter Maximi benignitatem Numinis quadam quasi vicissitudine qua populis & ætatibus munera dispensantis: ne, quantum ad præcipua rerum momenta attinet, ullum in orbe nomen neglectum, aut inhonoratum relinqui videretur: tum utem, quanta sit, quæ Suedico nomini decreta est, gloria, cuperem mihi à vobis sub exemplo proponi, si quod ex omni parte congrueret. Forte autem, ex iis quæ propius accedunt, Romani maxime populi eam ætatem in oculis habere fas est, qua Deus admirandam imperii magnitudinem, Julii Cæsaris Marte compegit, Octavii Augusti consilio ordinavit. Tunc enim, aut nunquam alias apparuit, quo virtus belli assurgeret, & quam innumeris artibus sapientia pacis, ad componendum ornandumque sæculum indigeret. Non licet, nunc adorare illa arcana pacis Augustæ, qua effectum est, ut nascentem in terris pacis Principem quietæ compositæque gentes, quodam quasi turbarum silentio venerarentur: ut sapientiæ auctorem felici proventu, omnes artes, omnes scientiæ, velut noscerent, & paulo post prædicarent: ut Regem humane libertatis auctorem, exciperet civilis ac temperata imperii divino auspicio fundati majestas. Illud unum dicam, ut hoc fieret, Augusti ingenium in talem habitum formavit, consilia cœlesti ope instruxit, fortunam inusitato favore provexit, non alius rerum temporumque arbiter, quam qui GUSTAVUM primo MAGNUM, postea incomparabilem summi Parentis filiam CHRISTINAM, Sveciæ,

imo populorum plurimis, imo seculo & orbi donavit. Non coaluissent in suam magnitudinem Assyriorum opes, nisi Nino successisset Semiramis: neque Alexander facile Græci magnitudinem imperii condidisset, nisi patrem habuisset Philippum. Sed in illa similitudine, sicut unam Heroicæ virtutis fortunæque originem atque consecutionem deprehendimus: ita longe interioris est commercii, quicquid hic cum Regina nostra Deus communicavit. Namque ut GUSTAVUS & CHRISTINA Heroës essent, sic habent divinitus, sicut habent cæteri. Ut autem heroicæ laudis ea extarent documenta, quæ vel gloriose dederunt, vel copiose, ô diu! dabunt: id tanquam GUSTAVO, tanquam CHRISTINÆ, quæ jam non magis personæ, quam singularis meriti nomina sunt, concessum intelligitur. Verum incomparabilem istam, uniusque ex omnibus Reginæ nostræ destinatam gloriam delibare, neque tumultuarii sermonis, neque adeo opis meæ fuerit. Itaque malo ad cunas ejus redire, & Nativitatis Regiæ momenta, non ex astris & Mathematicorum cælo repetere, sed ex eo temporis articulo suspicere, quo Europæ fata in novas rerum vices ire, & moderatricem novi illius sæculi Sveciam esse, Deus voluit. Hinc enim quodammodo animadvertere juvabit, qualis indoles tantis moliendis efficiendisque rebus par esset. Quamquam sic quoque fatendum habeo, mihi ab initio statim, iam dulcis cogitationis verba deesse, ut significem illud à divino accensum vultu lumen, quod Regalem infantiam dulciter circumfunderet, teneraque vim mentis illustri cognatione persignaret, foveret ingenii vires, agitare motus, temperaret impetus, eliceret omnia, reconderet miracula, continuaret auspicia, donec adesset tempus, quo adulta cælique virtutem penitus ostentatura majestas, ad augusti instar solis terrarum orbem illuminaret. Hic est ignis, arbitror, Regium semper insigne, quem Regibus accendit Deus numine, præferunt Angeli honore, gratulantur obsequio mortales. Hujus munera deinceps erunt, illa sapientia, illa magnitudo animi, illa moderatio

arque

atque continentia, quas non minus supra Principum maximorum exempla, quam supra sexus fortunam, in Regina nostra omnis venerabitur posteritas. Nam presentis ætatis vereor ut alia sit conditio, quam si cui ex propiore loco in oppositum solem contingeret oculos intendere. Obvium necesse est multiplicatis fulgoribus, qui ad unius radii, etiam procul emicantis, conspectum præstringuntur. Solet humanus animus, ubi aliquo spei aut præfagii argumento futura colligit, confidentius in se recedere, suumque adfectum dulci & ad exemplar perfectum exacta imagine imminuentis boni alere. Neque dubium habetur, viros sapientissimos, Proceres Sueciæ, jam tum in tenera Regiæ Virginis ætacula, magna omnia præfagientibus animis, fortunam patriæ ample ac magnifice præsumsisse. Sed nimirum longe superavit divinationem prudentum, eventus: nemoque in hunc diem comperrus est, quin Regiæ suæ, ex optimis maximisque Parentibus genitæ, pulcre quidem sed longe infra rem & merita ominatum se esse profiteatur. Inscripterat sane in ipso vultu nobilitatem animi, natura procreatrix: notisque corporis illustribus inusitatas cælestis mentis dotes designaverat. Sed fallor, aut fortunæ is lusus est, quoties miracula edere decrevit, ut ad præfagia venturi invitet magis, quam admittat humanam sapientiam: potiusque gaudeat illa philosophantium cautione, quæ in ipso rerum successu non dememinit, quantum licuisset ante suspicari, nisi reverentia, fatum legibus debita, juberet semper ex sollertia divinandi modum tenere. Itaque, quid illa vis in oculis, Paternam aciem referens, portenderet; quid gravitate-juxta & gratia mixtissima vultus majestas promitteret; quid vigor ille corporis, acerrimo animo viriliter sufficientis, repræsentaret; eo demum tempore citra involucrum patuit, ex quo sine recordatione & obvia imagine singularium bonorum, quibus Regina unici exempli humanum orbem beat, nemo in illud Speculum Virritutis intruere potest. hoc est momentum, unde nescio quo alterno motu rapitur animus. hinc post fortunam di-

vinare, & à luce ad natales lucis recurrere, lubido est. Quotiens enim, serpentes undique circum incunabula infantis laureas cogitatione repetimus; quotiens trophæa signis armisque hostilibus late exstructa, primos generosi germinis aspectus lususque imbuuisse animadvertimus; quotiens per titulos & elogia summorum operum, tanquam per indices annorum, mensium, dierum, adolescentem à prima origine ætatem describimus numeramusque: toriens videmur nobis cum mathematicis in cælo esse, aut cum præsciis magnarum rerum mentibus arcanas notas legere, disponere sacras sculpturas, interpretari veneranda symbola, & in fatidicum carmen cogere, de cognitis tanquam in posterum augurantes: quanta sit futura, cui adhuc parvulæ tot muneribus blandiatur Cælum, tot invitamentis arrideat Fortuna, tot excelsæ indolis hortamentis suffragetur Genius: quam Virtus exceperit nascentem, enutriverit Sapientia, perfecerint Gratiæ. Intelligitis nimirum, Auditores optimi, quo progrediendum sit, si quis hanc de meritis Regis commentandi rationem velit persequi. sive enim promoveri velis pedem, inexhaustum est quod retinet; sive ipsis inhærere primordiis cupias, infinitis plenum illecebris est, quo in ulteriora trahimur. Nunc præfectam auspicii majoribus, salutem mortalium principem, in aula sua optamus intueri; nunc in administratione imperii venerari concupiscimus: modo in laudes concitatur imbellis lingua; modo votis & faustis recordationibus pietatis officia simplicius fungi, animus ardet. Et quamvis ipso tantarum rerum sensu tractatuque, quicquid in mente humana generosi spiritus, quicquid pulcræ meditationis est, elici amat ac expromi: non putaverim tamen, eloquentiæ hinc subsidium potius, quam reverentiæ impetum conciliari. Quod, sicut in me, cujus qualecunque ingenium nullo idonearum artium instructu sublevatur, non mirum est accidere: ita de aliorum curis & viribus animosius sentientes facile sequar. Illud tantum apud vos, A. O. (quorum prudentia unice erudiri cupio) ingenue profitebor, quod in hac  
cogi-

cogitatione patior. Audivi sæpè ex præceptoribus meis, hominibus non indoctis, cum ex Cicerone boni Oratoris laudes mihi recitarent, cum demum hujus nominis mensuram implere, qui rerum sublimium magnitudinem dicendo exæquaret, recondita explicatione, inusitata decore, illustria cultu prosequeretur. An, præter ipsum Ciceronem, talis faciundæ exemplum vivat in memoria seculorum, mihi possit forsitan ignosci, si dicam, me nescire. Ingenti tamen teneor desiderio, in hanc artem, captu sane meo majorem, propius introspiciendi, si quis vel Cicero vel Plinius hodie merita Reginæ meæ, oratione non umbratica adæquaret. Judicare enim quam bene alter Trajanum laudaverit, alter omnem Romani nominis majestatem extulerit, non est nostri temporis scilicet, quod exacta rerum veterum cognitione destituitur. Quocirca in commemoratione tantarum artium semper mihi in mente illud vulgi verbum: hic Rhodus, hic saltus. Prodeat enim Sophista aliquis, & declamatorios flores, omne genus, in argumentum tam venerabile profundat: quid aliud existimaverint viri sapientes & cordati, quam injuriam fieri Principum augustissimæ: cujus virtus non cadit in locos communes, nec describitur solennibus sententiis, aut formulis libellorum ac commentariolorum concluditur. Insistat alius poëtarum fabulis, & verba in adulatorum ore nata, undecumque emendicet: quam indignum fuerit imitatione ludicra inanique sono vanissimæ voces temerare nomen Reginæ, quæ & servum genus dicendi scribendique avertatur, & omnes execratur adulationes? Est subtilior etiam, minusque aperta, sed tamen indignitas, materiam, non amplitudine magis quam contextu nobis: quando, ingenuo quidem proposito studioque, ita in unum defigimus oculos, ut vel solum hoc admiremur, vel æferamus non postponendis, vel alia quam decebat, forma habituque describamus. Videas id præsertim evenire, notiens de amore literarum, & singulari doctrina, qua & seipsum & fortunam & sæculum suum sapientissima Regina supergressa est, sermo instituitur aut cogitatio suscipitur. Qui

ex

ex magistrorum formulis sapiunt, atque eruditionem, libellorum mensura ac solennibus titulis meriuntur, eos nihil sani, nihilque cordati de studiis Regiis animo concipere, aut temeraria lingua pronuntiare, non est mirum. Neque etiam redarguere, sed miserari debemus eos, qui verentur scilicet, ne in tanti animi Principe caritas literarum, curas imperii dedecet ullatenus aut conturber. Si enim nesciunt, quod in totas jam nationes innotuit, cur ignorationem suam infamia maledicentiarum cumulant? Sed nec in illis, qui Reginam & accurate, & diffuse, nec minus generose ac utiliter doctam admirantur, laudandum censeo, si in hoc veluti Rhetorum campo ita immorentur, ut videri possint, parum intelligere, quanto majora sint, quæ inter Regales titulos eminent. Quam enim est multo illustrius vivendo exprimere, quicquid ad decus & laudem magnificum vel scitur, vel scribitur, vel ut quidem sciendo scribendoque à literatis attingitur. hoc ego nomine beatam prædicæ ac felicem Reginam nostram: hoc nomine illam Imperio suo, nec minus Imperium Illi, sed propriis auspiciis amplificationum perornatumque gratulari fas est. Etenim quid cum Platone Aristoteles, quid Xenophon, Synesius, Dio Chrysostomus, de optimo regimine tradere; quid omnis historia, ac utriusque linguæ scriptores cæteri, de civili felicitate suggerere potuerunt perfectissimæ Principi, quin suo Ipsa ingenio, suis moribus exemplisque non repræsentaret modo tantorum doctorum disciplinam, sed suppleret insuper superaretque? Si ab ea dote incipimus, quæ in Regibus vere regia est, tacet utique aut balbat tota illa pagana sapientiarum jactatrix vetustas: neque quisquam docet aut explicat, quicquid est divinitatis in Regibus, præterquam ipse Deus. Cujus arcanis sanctisque commerciis imbuta Reginarum Nostrarum indoles, sui auctoris motu, viget, agit, valet, splendet; intacta profanis, cognata cælestibus; ignea, velox, pura, infatigabilis. Hinc sincera omnia & inaffectata, procul à fūco & inanibus, non fallunt homines, sed erudiunt. Pietas in Deum unice intenta, quatenus extra penetralla præci-



præcepti atque operis, conscios admittit, cordata, seria, efficax: innocentia morum, non verborum figuris, sed incorrupto vitæ tenore conspicua: Castitas & continentia, qualem non nisi singulari munere divinitus contingere paucissimis, Deoque proximis mentibus posse, ultro intelligitur. Nec aliis censenda est natalibus illa magnitudo animi, nihil earum rerum, in quibus vulgo depereunt summi loci homines, se dignum reputantis. Dicam quod res est. Mallet Regina mea carere Regno, quod supra ceteros scilicet mortales eam extollit; quam Regio animo, quo Reges ipsos quodam modo supereminet. Arrogantissimi mortalium Stoici veteres, magnum, diisque, quos colebant, superiorem animum, his legebant, si nihil admiraretur, nihil metueret, nulla re perturbaretur: Et hi tamen sunt, qui, ut omnia contemnerent, se ipsos stultissima sapientia unice admirabantur: ut impudenti audacia, ipsi propemodum naturæ molesti essent, insatiabiliter metuebant, ne orbis resciret horribile Stoicæ sectæ arcanum, virtutem non in re, sed in verbo esse: ut odiis, inimiciis, & furiosæ pertinaciæ suæ obsequerentur, Civitatum & Rerumpublicarum quietem strepente perturbabant. Ridet tam importunum hominum genus Regina Nostra, meliorisque sapientiæ plenissimum fructum capit, quando & admiratione Dei & fiducia bonæ conscientiae, & moderatione virtutis, tantum à tumida ostentatione recedit, quantum speciminibus solidæ laudis, invitata pariter ac immobilis acquiescit. *Optimos mortalium altissima cupere*, quam bene apud Tacitum dicatur, nescio. Id scio, Reginam, cujus auctoritas loco rationis esse potest, primum, nihil magis cupere, quam ut optima sit; deinde, quia sui se voti compotem ipsa facit, altissima abunde mereri: utrum autem, quod meretur, recipiat, de eorum sollicitam arbitror. Eodem animo, quo summa omnia meretur, nonnunquam summa omnia spernit. Quid ter humana victoriis triumphisque augustius? at illa, maiorem Regiaque magnitudine digniorem triumphum comenta est, triumphare nolle. Non ignorat prudentissima

Princeps, quo vivat sæculo; quibusque vulgo artibus paces bellaque moderentur, apud quos una consilii operisque lex habendi ac dominandi amor, virtutis curam tantum non extinguit. Non impetrare tamen à se potest, quin humilem sapientiam credat, alienæ calliditatis imitatione securitatem suam pacisci potius, quam fidem simpliciter colere, ac generoso candore æquam mentem, æquam causam pro inexpugnabili munimento habere. Damnat enim, & pro inertium remedium consultis despicit, qui fictis simulatisque rebus, tanquam unica arte confisi, fatalem maximis quibusque Imperiis versutiam, inter numina & religiones aularum adornant dedicantque. Quicquid interim sibi ad tempus & in speciem polliceantur arcanorum talium magistri: in summam certè & serios usus, honestis niti, non occultis, sicuti sceptrorum majestati convenientius, ita ad salutem reipublicæ firmitus habendum est. Sed rem sanctam & illustrem non capit nisi sublimis animus, Deumque revereri & imitari suctus, quo auctore quæcunque non instruitur prudentia, delirat ac deficit, cum sibi maxime videtur profecisse. Miseros vero Principes, qui etiam in cætera nescio, quot minutis artibus & sollertiis indigent, ut secutos constituent & venerabiles! Omnium vultus observare, expendere verba, interpretari gestus, captare rumores ex omni angulo, multa timere, non pauciora suspicari: hæc scilicet sacra commovent, quibus in secreto aures Dominorum patent. Cum subtilibus istis molestiis semel transegit Regina nostra, quæ, cum uno velut intuitu in cuiusque vultu plerasque notas animi legat, & politissima perspicacia, quidquid in minimis maximis rebus ex decoro veroque aut secus trahitur, dijudicet; nusquam hæret, nusquam angitur, sed explicata faciliq; hilaritate, serenum ac parem cuicunque fortunæ animum, ad negotiorum formas & hominum mores non deprimit, sed demittit; humanæ, sine blanditiis; gravis, absque fastu; injucunda nemini; venerabilis omnibus. Malos etiam exemplo quam supplicio emendare, magnificentius rata, vere suis debet auspiciis, quod

quod rarior ad ultima remedia necessitas adigit sæculum, nulla re, quam disciplina Principis felicius. Non ignota loquar, si meminisse vos jubeam, A. O. quam ferax præcipuarum laudum, Aula Suedica toto orbe concelebretrur. Nescio, an præcipuam hoc ævo dicam, atque unicam, è qua meliores exeunt, quam intraverant, quicumque non sunt insana-biles. Quem non paulatim ebrietatis pudeat, cum apparet Reginæ, quæ omnem ebriorum conspectum gravatur? Quis non deponat ferociam animi & rixandi contendendi-que libidinem, cum animadvertit, Reginam eos mores nec prudentiæ nec virtutis capaces pronuntiare? Insolentia au-tem & superbia, quibus se coloribus tuebitur, qua spe ex-ultabit, apud modestissimam Principem? Denique quis in-venere illud castimonix specimen rectis oculis aude-rit intueri, conscius sibi turpis voluptatis impuræque Ve-neris? Tum autem assentatores, parasiti, & cum Thraconi-ous Gnathones, omneque morionum genus (quibus deho-restamentis vulgo aulæ perstrepunt) Regia CHRISTINÆ in perpetuum absistere jussi, suo exilio passim testantur, qui-bus moribus apud Septentriones vivatur. Non mirum est ergo, quod in loca minus delicata, ex amœnissimis pulcerrimis-que terrarum, magna vis hominum confluit, pretiumque sui laboris, variè quidem, sed potissimum contemplatione templi unici omnisque memoriæ clarissimi, capit. Qui magnum ex aulis frequentatis vulgo nomen affectant, eos re audio denarrare fastum palatii, numerum & nationes rivitorum, scenam apparatus & instrumenti Principalis; luxuriam mensæ, delicias Gynæcei, & si quæ sunt simili-æ æstimationis. In aula Suedica, quidquid ad magnifi-centiam & politioem cultum abunde conspicitur, longe infra spectaculum, quo solo generosæ mentes & allici-tur & retinentur, & erudiuntur. Potestis, opinor, A. O. quanquam tantis locorum intervallis disiuncti, partem vestri voluptatis pensentiscere, si vobis proponatis Reginam omnibus & ingenii dotibus & animi artibus instructissimam: hæc heroico plena spiritu, omnem amplissimi regiminis ad-

ministratorem animo complexa, proximis, remotis, invigiler provisu, affulgeat ope, consular labore. Talibus curis intentam nec somnus, quo parcissime utitur, divertit, nec absterret difficultas, nec avocant illecebræ. Dedit illi Deus, (quod nemo negat aut nescit) ministros maximos, Senatores gravissimos, actores rerum summarum efficacissimos: estque hæc pars non minima ejus felicitatis, qua Reginarum optima gaudet ac fruitur, quando solium suum quoridie vider circumstare meros Germanicos, Drufos, Agrippas, Mæcenares, & quidquid magnificorum nominum ad numerosam hujus aulae gloriam describendam ex veritate comparari potest. Nec ignoro impetitis ira videri posse, quasi omnes imperii curæ amicis Reginae incumbant, Ipsam parum onerent. Præterquam autem, quod nemo sanus directare potest evidentiam Divinæ ordinationis, quæ tales ministros, non nisi tali Reginae, nasci fierique voluit; etiam illud meminisse debebant, qui de rebus grandibus & sanctis profana aut humilia sapiunt, magnorum ministrorum nomen vix salutare esse reipubl. nisi sub magno Principe, cujus prudentiam & virtutem cogantur ultro revereri. In quo genere laudis triumphare posset mea ratio, si liceret in publicum producere secretas maximorum virorum sententias, & familiaria citra omne adulandi studium testimonia. Attingam paucissimis, sed verissimis verbis: nemo est, nemo prorsus, ex istis pace belloque illustribus Proceribus, quorum sapientia Regina suevit uti, quin admiraretur & suspiciat Reginae suæ prudentiam, in omnia expeditam; animumque in arduis magnum, in futuris providum, in dubiis solertem, in eligendo perspicacem, in agendo celerem, in ordinandis rebus compositum. Nemo est (ut iterum hoc dicam) nemo, qui in feriarum curarum conscientiam adhibitus, non recedat admirabundus, sibi que patriæ de Regina incomparabili gratuletur. Beatos vero & reliquos, qui de exteriore spectaculo penitiores fructus didicerunt consecrari! Veniat in hanc aulam, qui Reipubl. gerendæ natus est, & judicet, quis principem locum


locum dignius obtineat; illine qui ventri somnoque dediti, aut rebus somno, an somnio dicam, similibus, præter ludibrias voluptates & superbiam, nihil Principis usurpant; sic ministrorum suorum ex necessitate servi, ut cæterorum ex lubricidine Domini: an vero, qui ad exemplum Reginæ Nostræ invadunt tempora occupationibus, distringuntur laboribus, exhaustiuntur molestiis, pro omnium otio negotiosi, pro quiete civium irrequieti, pro salute reipublicæ infatigabiles. Veniant, qui ex longa peregrinatione vultum potius, quam animum compolitum retulerunt, & discant, se hospites esse in omni ratione civili & aulica, quæ inania sic admittit, ut non nisi solidis innitatur. Veniant, sicut venerunt hætenus, varix nationes, varii homines, & hoc in minimis ponant, si Reginam audient sua Italix, sua Gallis Belgisque verba reddere, cæcuditorum vero linguas ipsis eruditis melius callere. Nam si magna possunt capere, non alio potius exemplo, virtutem verumque laborem, nec minus fortunam utrique amitam, condiscere optabunt. Fallor, aut ad hunc lydiū lapidem impacti, sic demittent cristas, ut pavo, cum pedes suos respexit, speciosam caudæ pompam contrahit, quicumque hætenus vanis coloribus & ineptiis sæculi animum oblectarunt. Veniant denique, qui ope, auxilio, solatio, beneficio egent: Veniant, inquam, nec per centum obstacula & ambages aditum moliantur: admissio facilis, audientia comis, subsidium paratum. Ecce, si te pudor tuus, aut graviora aulæ negotia, mollius expectare tempus jubent, non longa est mora: singulas hebdomades, unum diem desiderii supplicum consecratum habere jussit Regina indulgentissima; quo tanquam beneficium sidus humilibus locis exoritur. Ipsa, inquam, prodit per agmina bellos porrigentium, sua manu accipit, legit, aut lecta audit desideria singulorum, examinat, responder: sumptuæ, & tædio, & expectatione, veluti per compendium, omnes liberat. Invitat & pæne trahit in ulteriora materies: quam si daretur stilo persequi, quot extarent nunc

in conspectu vestro, A. O. justitiæ exquisitis æqui bonique rationibus temperatæ documenta? Quot liberalitatis ac munificentiae in omne hominum genus, sæpe supra fidem, nunquam citra prudentiam diffusæ monumenta? Verum enimvero, jam ab initio vestram mihi sapientiam tanquam subsidio comparavi, ut, quæ ex auscultatione hæc colligi, quæ ex meditatione suppleri, ex fama publica & humani orbis suffragatione confirmari possunt, eorum à me nihil indictum putari queat, si, quibus auditoribus, quo sermonis proposito, susceperim dicendi partes, justa æstimatione pensetur. Laudationibus & factis Orationibus celebrari nomen suum non desiderat Regina: Famamque ex omni orbe canoris buccinis acroamata hujus generis accinentem, non adulatur ut amicam, sed ut famulam suæ virtutis moderatur. Civium autem suorum pietatem nunquam verbis sed officii sinceritate meretur. Quæ res me nonnihil cunctantem impulit, ut hoc die, hoc loco, in vestrum prodirem conspectum, Auditores, impelletque porro, ut Ipsi Dominæ, eadem simplicitate, qua hic verba feci, mea obsequia in posterum nuntiem; imo jam nunc veluti præsentem (quando enim abesse credenda est diffusa ubique tanti nominis majestas?) alloquar. *Natalem Tuum, REGINARUM MAXIMA, celebrare aggresso, veniam largiaris, oro quasque, si nihil vel à Musis, vel à Gratiis, festi hujus sanctitate dignum potui mutuari. Ex quo enim Tua cœperunt palatia habitare ille Diva, Tuo conubernio angustiores facta, non vulgari cultu amant propitiari. Sola igitur auspiciis meo instituto Fides dedit: illa Tibi familiariter dilecta, illa admissionibus apud Te præesse solita, illa quovis habitu semper in oculis Tuis honesta & grata. Memineram, quo plausu, quibus studiis, anniversaria Tuorum pietas veneraretur diem, qui maxima sæculo gaudia dedit, cum TE primum dedit. Non poteram ergo, inter Tuos feliciter locum nactus, non agitari iisdem affectibus, non instigari iisdem stimulis. Neque locus alienior videbatur, quo me nunc, flagrans studium ex nuntio*

Tuo

Tuo pendendi, & haud mollis Parentum voluntas, constituere. Licet enim omni scholastico conatu sublimius sit nomen Tuum, credere tamen debui, non minus spectari ex Academia devotum animum, quam ex palestra; non minus ex subsellii doctorum, quam ex tabernaculis militum, tuas voces & fausta omina exaudiri. Ascivi ergo socios, quos bonarum rerum, & civilium officiorum, praesertim auctorem majestatis Tuae studiosissimos arbitratus sum, inter hos & cum his, salvere jussi faustam diem, qua Tibi nascenti lucem, & eadem opera rebus humanis splendorem alluxit: qua hactenus quotannis candidior prosperiorque: & tuis meritis cumulator exorta est: qua sic tamen plura promittit deinceps, & faxit DEUS! Te sospite diu representabit. Invenimus vota & preces, quibus Te vivere, Te valere, Te regnare omnes exoptavimus. Vivas, (inclamo iterum) REGINA OPTIMA, Vivas! Qua tuis moribus emendas saeculum, beneficiis imple orbem, Vivas! Qua potentes regis imperio; humiles sublevas indulgentia, Vivas! Qua faves ingeniis, suffragaris artibus, Vivas! Qua fortunam aquas animo, sexum superas virtute, Vivas! Qua amore Tua Domus, cum amore reipublica prima copulasti, Vivas! Qua in aula Tua sollennem tesseram, OPTIMAE MATRIS, audiri cupis, Filia amantissima, Vivas! Qua illustres Familias & servas & facis, Vivas! Qua nobilitatis apicem virtutis sublimitate metiris, Vivas! Qua de omni ordine, atate, sexu, pulcre mereris, Vivas! Qua delatores odisti, adulatores fugis, Vivas! O salutare sidus gentibus, O gloria omnis avi, O Regina Regiarum! Vivas, & devotissimam Tibi servi ex minimis pietatem propitia lubensque accipias! Cujus voti compos factus, satis bene, quamvis infacundus, ex hac cathedra, satis feliciter dixi.

PANE



V.

## PANEGYRICUS

*Serenissimo ac Celsissimo  
Principi*

A V G V S T O

Duci Brunsvicensi &  
Lüneburgensi,

*scriptus*

Anno clō lōc XLIV.

**I**lustres virtutum titulos, ac dignas æternitate laudes, vel historia posteritati conservat, vel prædicatio viventibus interpretatur. Quorum ut illud communis mortalium favor ultro extollit: ita hujus non simplex æstimatio, quasi inter eruditos coorta, imperitis haud raro pro argumento rumorum fuit. Nec sane abnuerim multos laudandi officio ita usos, ut neque facundiarum rationes, neque propositi, abunde viderentur subdixisse. Quo fit, ut minora rerum, & si recte autumaveris, in levi habenda, superbis aliquando præfulgeant honoribus; atque ex diverso, eximii magnitudo meriti cultu inani detrita obsoleat. Quin etiam, ubi satis in argumentorum consilii tum artis fuerit, majore adhuc auspicio opus est, ut relicta omni declamantium consuetudine, seria & prudens & in usum vitæ nata, ex ipsis rerum penetralibus altissimoque sapientiæ recessu, emergat oratio: in qua tu  
nec



nec historici gravitatem, nec facultatem oratoris, nec Philosophi disciplinam jure queas desiderare. In quo genere, sicut paucis ab omni ævo datum est præcellere, ita qui annalibus tale studium ausit postferre, neminem forte inter eos, quibus altior liberalis Musæ intellectus est, liquerit reperire. Virtutis quippe indolem, moresque & ætatem vitæ, quotusquisque penitus introspicere, aut, cum introspexit, aliis explicare potuit? cum tamen utrumque ex eorum censu sit, quæ ut fiant, generis humani interest. præsertim circa vitas Principum, curasque Regum, per quos Divina sese bonitas mortalium cœtibus dispensat, atque terris munera dilargitur. Ut nec grati videatur, nec pii civis esse, ad tot beneficiorum nomina connivere; ut, ubi occasio celebrandi data est, negligentis silentio immarum momenta rerum transmittere. At enim sicut communis omnium officio Principalis meriti veneratio conuenitur: ita laudatio accuratior ad prudentes pertinet: qui nunquam temere aut per adulationem; semper autem cum ratione ac reverentia id muneris norunt usurpare. Hæc que talia dum repeto mecum in exordio hujus scripturæ, tuæ illustrissimo Summi Principis nomini consecrata est, magna me invadere trepidatio poterat, si meopte auspicio consilioque rem tantam aggredi, aut fiduciæ quicquam in meis ausus essem viribus collocare. Quamvis enim argumentum studio boni viri ac meditatione dignius, ne prudentum quidem vota potuissent excogitare; non pauca tamen erant, quæ me, auspiciatissimum nomen Tuum rudis nomen signare, aut in conspectum tam divini Herois meam quicquam literarum prostituere, ô splendor rerum Principumque, AUGUSTE, prohiberent. Nunc majori auctoritate in hoc propositum traducto, omnis reponenda res est in Tua bonitate, Princeps Serenissime: quæ si propitia admisit pietatem hominis, nulla nisi simplicis reverentiæ obsequia edocti, non est quod aliorum hominum judicia vel timere cupiam, vel placare. Quid enim frequentiam nunc magistros aut præcepta dicendi verear,

cum tantum sit auspicii, favoris, magnificentiæ in argumenti titulo, ut non minus disertissimorum confidentiam infringere, quam infacundis conatibus vim & robur & spiritum mutuari possit, vel solum nomen Illius Augusti Lunæburgici? cui quidquid adjunxerimus vocabulorum, minus erit uno vocabulo; quod & tot retro seculorum decora, & venturi, quæquæ patet, ævi amplitudinem mirabili compendio in se conclusit.

Magna est, & in omne virtutis, potestatis, majestatis, fortunæ ac auspicii Principalis decus pertinet titulorum series; quibus antiquitas sua humani generis rectoribus studia & obsequia approbavit. Sed quid in illis tam splendidum, tam laude dignum, tam sublime denique & augustum dari potest, quod in illustrissima Ducum Brunsvicensium & Lunæburgensium prosapia, aut, si mavis, in solo Augusto non occurrat? Origo generis ab ultima heroici sanguinis stirpe demissa: majores præcipuam tetrarum partem gloria aut imperio amplexi: Proavi Principes, Electores, Reges, Imperatores: affinitate ac matrimonii nexa Europæ regna: meritorum gestarumque publice rerum memoria cælo æquata: hæc eo magis propria Tibi sunt, AUGUSTE, quo majore fato familiæ tot annalibus memoratæ successio in Te recubuit: ut æternæ Domus claritudo & haberet exemplum singulare, & daret, unde vetusta gloriarum insignia collectim repeti, ac nova in posteros cumulate fas esset dimitti. Non enim obscura esse potest ista Divini circa generosas stirpes Numinis provisio: qua non certis modo laudum intervallis perennitatem earum viresque distinguit, sed solennes quasi circuitus orbisque inustitatis fulgoribus illustrat. Gloriæ militaris, ut ab hac ordiatur, tum alii, tum Welfphones vestri grandia sæpe documenta dederant. at vero, cum *Henricus Leo*, tanquam alter Mavors, se in arma effudisset, cum ritu fulminis obvia prosterneret, remota terreret: tum demum potuit intelligi, quantum generosa nec magis ferro quam indole sua animata virtus polleat, Dignitarum infu-

fulas, scepra, tiaras abunde in domum vestram & sæpe  
 fortuna intulerat : quæ ut muneris sui fidem ac modum  
 consummaret, honoris omnis complementum, & augu-  
 stissimi fastigii apicem in OTTHONE Quarto splendere vo-  
 lit, nec segni tamen auctoramento. Quippe, ne quid  
 imperatorii oneris parum graviter experiretur, cum invi-  
 dia & æmulatione, tanquam novus cum monstris Hercules,  
 standum habuit. Est hoc etiam in fatis magnorum  
 principum singulare, quod neque concuti publica, neque  
 incussa restitui possunt, nisi partem fortunæ ac discrimi-  
 nam ipsi sustineant. Igitur à multis seculis, nunquam  
 omittas rebelliones, contusos imperiorum turbatores, fra-  
 ges foris barbaros legimus: quin Vestros, AUGUSTE,  
 suos titulosque recognoscamus. Modo incitati ac fer-  
 ventis seculi genio pares commodastis spiritus; modo  
 in tranquillorem paci vultum indulsistis: nunc consiliis Ve-  
 stris acquievit Patria; nunc opem Vestram requisivit Gal-  
 lia, Hispania, tetraurum cætera. Lucet Vestris distincta  
 eritis fastorum series: atque inter tot virtutum prodigia,  
 permixtus ubique candor, & popularis gravitas, cum pri-  
 vate fide, meros nobis *Arminios* ac *Maroboduos*, probata  
 stili quoque iudicio nomina, longe lateque ostentant.  
 Ad nobis ad solemnia quædam virtutis vestræ tempora re-  
 verendum est. Commoverant se iterum fata Germaniæ,  
 ruebat imperium super Imperatorem; cum è Magni Tor-  
 rati sobole FRIDERICHUS ille, cunctis ingenii dotibus  
 omique artibus eminentissimus Princeps, unus maxime  
 his est idoneus, qui polluram Wenceslai probris rem-  
 publicam pristino nitore vindicaret. Sed expectationis  
 sedem publica vota infame mox patricidium intercepit:  
 pressoque inter ipsa augustissimi operis exordia Rege Ro-  
 manorum (jam enim hunc titulum loco ritumque solenni  
 petar) longis patriam tumultibus atque cladibus invol-  
 Interim fortuna seriem beneficiorum, quæ in res  
 Germanicas ex hac domo destinaverat, abunde refectura,  
 tribus FRIDERICI BERNHARDO & HENRICO longissi-

nam heroica posteritatis successionem decrevit. Nam ex altero horum, *Duces Lunaburgenses*; ex altero *Brunsvicenses*, seorsum deinceps numerati, nulla non fati publici, aut splendoris Principalis celebritate inclaruerunt. Torum nominum sanctitatem, quæ cumulatim undique meritis, ex ævo in ævum, ex serie in seriem exsplendescit, veneror potius, AUGUSTE, quam capio: neque quicquam magis necessarium aut minus concessum iudico, quam subsistere ad singula, modo porrigere gradum, modo referre; nunc in latum excurrere, nunc in orbem circumagi, & cum numerosis laudibus non quidem paria facere, sed eodem tamen spatio incedere. Fuit enim hæc majoribus ingenii ac operibus cura: nunc illa vix licet fastigia signare, quæ in æternis gloriarum vestrarum templis, tanquam pignora novi ac singularis muneris, benignum Numen voluit eminere. Ibat fortuna superioris seculi in novas rerum vices: & religionis Christianæ sidera, ut sic dicam, variis passim maculis infuscata magnam piis mentibus tempestatem præfigere videbantur: nisi mature serenitas illi antiqua cum fulgore incorrupto restitueretur. Sed, tentato primum negotio, præsumbrabat graviter illa caligo, quam multorum oculis, nescio quæ nitoris adoptivi opinio, ac speciosorum claritas nominum obduxerat. Igitur inter plena periculis omnia, multum trepidabat recte sentientium pietas; donec excitati divino instinctu Heroës summi ac Principes, in publicis, quæ Augustæ agitabantur, comitiis, gloriosissimo Imperatori CAROLO cum reverentia simul & fiducia diserte testati sunt: Inter manifestas religionis corruptelas, quæ subinde hominum temporumque vitio invecæ propagatæque erant, non posse se alia de divinis sentiendi loquendique norma uti, quam certissima divinorum oraculorum formula; à quibus quicquid discreparet, nemini cum injuria obrudi fas esse: itaque se suosque, quo minus Dei gloriæ & animarum salutem relictius consulerent, adeoque non quidem ab Ecclesia, sed ab Ecclesiæ deliquis recederent, impediri non debere.

Inter

Inter hos, inquam, tam generosos & magnanimos sacrosanctæ religionis vindicos, qui pressæ veritati primum sunt ausi signum extollere ad bene sperandum, ERNESTUS & FRANCISCUS Lunæburgici, avus alter Tuus, AUGUSTE, alter patruus magnus, publicis perpetuisque monumentis prædicantur. Ab eo tempore, provehendo, quod exorta erat, operi illustres passim officinas moliri divina cœpit Providentia: ut, quas bonarum ignorantia literarum religioni offuderat tenebras, nova ubique doctrinarum lux dispelleret. Hac origine censerî amant præclarissimæ per Germaniam Scholæ & Academiæ. inter quas illustri nitore *Julium* illud *fidus* emicat. Quo enim potius nomine & similitudine dicam æternum istud sapientiæ domicilium, cui JULIUS ille Vester, auspiciû, decus, opes, & cumprimis faustum de suo nomine omen dedit? Ea certe Academiæ Juliæ celebrantur merita, quæ Illustrissimi conditoris famam, consilium, & divinam quandam felicitatem, vivo perennique encomio, per literati orbis ac seculorum, quantacunque erit, amplitudinem circumferent. Cujus tamen celebritatis non ultra nunc querenda fuit mentio, quam ut maxima quæque operum laudumque, intra domum Vestram, tam munifica Musarum admittance & commercio, veluti consummata ostenderem. Scilicet ad Tua properanti, AUGUSTE, obiter præmonendum erat, quam perfectum omnis virtutis, omnis meriti, omnis gloriæ exemplar æmulandum Tibi amplificandumque, domestica disciplina & augusti sanguinis feliciter in Te transfusa indoles commendaverit. Multum sibi aliquando videntur sapere, qui illustres familias, & proavorum laureas, & generosi decus sanguinis, Stoica verborum arrogantia extenuare audent ac pæne contemnere. Quo fit, ut, dum placere imperitis cupiunt, prudentibus imperiti merito videantur. Est enim profecto, est divina quædam omnique vulgari captu fastique sublimior dignitas in illo sanguine, ex quo Deus Heroes format, publicarumque moderatores utilitatum producit,

denique, impressa sui similitudine, veluti quosdam in terris Deos creat. A qua Supremi Numinis destinatione cum in hoc argumento recesseris, quid nisi profana & ab Augustarum sanctitate domuum arcenda poteris animo concipere? Frustra cogitat Principem, qui Deum in Principe non cogitat, non videt, non veneratur. Frustra nobilitatem profapiae in ore habet, qui Dei de illa nobilitate consilium in animo non reponit. Magnum est ac aeternis dignum gratibus beneficium, quando unum aliquem caelesti virtute ac subsidio instruit, tuendaeque gentium salutis aut attollendae gloriae accommodat Divina bonitas: neque certior dignitatis pariter & admirationis heroicae fides cogitari potest, quam natus publicae felicitati consecratusque Princeps. At verò, cum ex una stirpe, non dicam civitatis alicujus rectores, sed magnarum nationum, populorum, regnorum arbitri, sospitatores, vindices, omni majestatis instrumento elogioque adornati, non interrupta seculorum serie, prodeunt: quis non videt, quam propinquis cognatisque nominibus Deus ejusmodi profapiam caeli commercio ac terrarum venerationi adinoverit? cum praesertim in Te, AUGUSTE, ac illustrissima sobole Tua, tam copiosa gloriae ac spei pignora congruant, ut perpetuitatem incomparabilis fortunae quavis ostensione fortius queant asfirmare. Etenim, dum ex Celsissimis progenitoribus Tuis, HENRICO & URSULA, FRANCISCI Saxoniae Ducis filia (quorum memoriam omni verborum honore majorem, nominando tantum liceat venerari) non Paternae tantum Maternaeque virtutis indolem, in Te traduxit summus Principalis generis architectus, sed cumulata utriusque toto orbe laudatissimae Familiae decora, veluti in unam consummati exempli formam congregavit: nonne suum de Te ac Tua posteritate consilium abunde putandus est declarasse? Itaque si qua sollicitior pietas signandis illustribus memoriis prudentum animos attemperat, non alio nomine debet ac elogio annalibus inferri natalis Augustus, quam  
sub

sub commemoratione perfectissimi muneris, quod Deus ex sollemniori & augusta suorum operum officina, necessitatibus Germaniæ, ornamento seculi, disciplinæ posteritatis, æternoque Principum exemplo gratificatus, longissimæ felicitatis fata jussit implere. Apud quæ primordia, AUGUSTE, Tua constitutos tam arcana vis voluptatis pertentat, ut nec promovere gradum sustineamus, quem vix ex argumento retinente molimur; & pervenire tamen ad ea cupide gestiamus, quorum tot pignora, quatenus fas est, prætractamus. Juvat in cunis auspicia captare de solio, atque ex habitu infantis, illam vultus majestatem interpretari, quam in Principe nemo sine sensu ac nota excelsæ mentis intuetur. Non sum ex iis, qui sideribus nimium ac genituræ in formanda hominum indole ac specie tribuunt; neque ignoro pulcerrimas sæpe animas minus exquisito habitare domicilio; sed cœlestis cujusdam gratiæ lineas ac dignam imperio formam, quæ in Te resplendet ac elucet, valde erraverit, qui non inter ea reputet mysteria, quibus ad sceptrorum sanctimoniam Divinitus solent Principes initiari. Sive naturæ, favorem cœli præfagientis ea est seductas, sive imago regnatoris omnium Dei, honori Principatus officioque destinata, suos quosdam in Principis personam radios spargit. Hinc vigor in vultu, vis in oculis, gravitas in conspectu, decor in gestu actuque; & expressioribus indiciis, virtutum singularum imagines, supra privitæ dignitatis mensuram cumulata, demissas superna origine Gratiæ repræsentant. Cujus rei fidem nulla ætatis pars est, quæ non uberiori subinde documento asseveraverit. Eminebat in prima pueritiæ face, generosus ille & graviorum curarum sive nuntius, sive sponsor, impetus: quo annorum moras ac Tuam ipse ætatem prætergressus, quidquid pulcrum, sublime, honestum esset, animo concipere, sermone extollere, cenatu aspirare, nunquam, AUGUSTE, destitisti. cumque maturo Tui fati instinctu veræ magnitudinis subsidia præsentisceres, universam liberalium disciplinarum amplitudinem studio complexus, celerrimis

ac pene inauditis profectibus in id fastigium erudiitionis evalisti, quod rarissimus quisque eorum, qui omnem litteris vitam dicarunt, potuit attingere. Cujus commendationis amplius diffusa est materies, quam ut in unum debeat locum contrahi. Igitur nunc, AUGUSTE, si in officio Tuo aliqua nostri ratio haberi potest, ad Musarum Te palatia omnisque elegantiae ac prudentiae sedes gradu non segni prosequemur, labores admirabimur, palmas numerabimus: indeque ad tot gloriarum fructus, inrer secreta Palatii Tui explicandos revertemur. Prima Tibi, post domesticam disciplinam, placuit publicorum studiorum magistra Rostochiensis Academia. cui cum anno ætatis quinto-decimo, Tuam præsentiam & mox auctoritatem in gerendo supremo magistratu Academico commodasses; altero progressu Tubingam delatus, ejusdem honoris exemplique magnificentia, verum *Juventutis Principem*, omnisque virtutis ac industriae auspicem Te ac ducem præbuiti. Mirantur, ac inter suæ felicitatis memorias studiose consecrant hodieque illustres Academiae, quas Tuo ingenio formatas, Tuo ore pronuntiatas, ternas utraque orationes audire: quæ & argumenti delectu, & stili elegantia, satis jam tum demonstrarunt, antiqua Tibi Julii & Augusti Cæsarium exempla proposita esse, qui & ipsi ab adolescentia præclare instituti, adeo nunquam aliena eguere facundia, ut inter præcipua regnandi instrumenta facilem in omnia eloquentiam expedirent. A quorum more cum primus Nero, ac deinceps reliqui certatim discessissent, imminuto non parum imperatorio decore, tyrannis ministrorum invaluit, ac in tot sæculorum damna inveteravit. At Tibi, AUGUSTE, sanctior & interior patriæ, dignitatis, civium cura, non aliam studiorum rationem permisit, nisi quæ Principalis muneris actusque gravitatem olim deceret, imo consummaret. Venit in partem testimonii Argentina nostra: in quam, solutis pietate sollemni Optimi Parentis memorie justis parentalibus, illustrem doctrinarum famam non intulisti modo, sed plus etiam confirmasti, Professores hu-

ma-



unitate, Cathedras splendore Tuo tam eximie amplexus,  
 novi prodito honore exempli, ab ore Illustrissimi Juvenis,  
 ium Academicum in certamine litterario, non magis di-  
 ratione generis, quam doctrinæ merito, citra prælidium  
 enum, obtinentis, tum gratulabunda Studioforum con-  
 o, tum doctissimi cujusque affectus æstimo juxta & ad-  
 ratione defixus pependerit. Cujus officio recordationis  
 promptiore cultui ac libentia defungimur, quo præstan-  
 tua in hanc Urbem voluntas, repetito postea aliquo-  
 s hospitio, varique exhibita comitate, apparuit. Certè,  
 qua Musis Argentoratensibus fato destinata est perenni-  
 , nunquam illæ suum posteris desinent AUGUSTUM  
 entare. Atque adeo, quam cuperem, AUGUSTE, vel  
 parte talis obsequii, vel in ordine susceptæ scriptionis,  
 quam saltem studiorum Tuorum formam stilo designa-  
 privata mentis industriam facile obruit altioris fati  
 gnitudo: quæ profectuum singulatum momenta, incre-  
 menta, fastigia per inaccesas reliquis vias, ad fati sui ter-  
 nos rapiendo potius quam promovendo extollit. Quod  
 ex intervallo vestigia quadam sublegere fas est, Augu-  
 um cognominem Tuum, Romani conditorem imperii,  
 incipum, sicut gentiles credidere, normam & exemplar,  
 rum ante oculos constituerem, atque ex ejus disciplina,  
 nium quendam, meis cogitationibus ac spiritum conci-  
 em. Hic acerrimæ indolis præstantia Cæsari Julio æsti-  
 tus, post adoptionem, Apolloniam mittitur in studia: ut  
 capeffendam Parentis fortunam, id est, ad summi im-  
 pti regiarumque curarum molem sustinendam omni fa-  
 ntia instrumento firmatus olim accederet. In hæc vo-  
 rendentem, magistrorum gravitas, occasio, publica ex-  
 tatio, & supra omnia Divini cujusdam vigoris arcana  
 ligatio magnis subinde auctibus provehebat. atque ne-  
 ulata tor hortamenti virtus evagaretur flagrantius, usus  
 e pro formula, disciplina Reipublicæ pro consilio, am-  
 tudo Principalis fortunæ pro mensura placuere. Itum  
 in eloquentiæ penetralia, quæ cum reclusisset felicissi-  
 h mo

mo adolescenti, ipsa omnis facundiae domina ac dispensatrix sapientia; relictis statim seculi ineptiis, & circumlatum fosculis, promptam ac profluentem, & quae Principem deceret, orationem sectatus, nihil antiquius habuit, quam ut emendatissimo nitore verborum, splendorem Palatii; & facillima venustate exponendi, publici actus genium ubique propitiaret. Ea Latine, ea Graece oranti cura; non puerili illa concepta studio, sed plus quam virili maturitate, ad augendam majestatem imperii & prodendam successfulibus formulam quasi praedisposita. estque prodigii simile, quod sine omine deterioris status immutari postea ea civilis eloquentiae ratio non potuit. Sed pergit, imò festinat Octavius noster in civilis scientiae abdita, in gubernandi artes, & immensam illam artium amplitudinem, cui paucissimi mortalium ab omni aëvo pares sunt reperti, animo peragrat, complectitur ingenio, destinatione persequitur, ac in terrarum orbis fata quodammodo librat. Commune ad miraculum juvenis, quicquid liberalium elegantiarum, invento aut usu celebrari consuevit: atque ex his pleraque sui notitiam, omnia vero amorem capaci animo ac æstimationem insinuant. Nec à militaribus interim meditentis, & si quæ alia strenuitatem corporis ac vigorem excitant, cessatum: donec is fieret Octavius, cujus studia Augustum, quod postea nactus est, cognomentum non dedecere, Tuisque, AUGUSTÆ, mererentur comparari. nisi quod Pietatis disciplina, id est, nobilissima Principalium studiorum pars, à Theodosii potius alicujus exemplo arcessenda est: quem hoc præcipue nomine, ut veram optimi Principatus effigiem ac spirantem felicitis imperii formam, historia miratur. quanquam quid in hoc genere imitatio maximorum, quibus mentem semper attendisti, Principum profecerit, rectius forte dicitur, cum ad ipsum virtutum Tuarum augustale reverenter accedet nostra oratio: Cui nunc satis est, attingisse studiorum Tuorum memoriam, quibus, supra quam credi aut dici potest, generose ac strenue ad præcipuæ decus doctrinæ, & dignarum summa fortuna

una artium gloriam evectus, summi Principis fidem prius merito quam munere implevisti. Jamque universi totius ambitum, conditionem, ingenium, cum regionum populo-  
rumque moribus, industria, prudentia, studio emensus  
eras; cum altiori Tuæ fortunæ instinctu denuo excitatus,  
multissimis terrarum gentiumque diligenter obitis, in re præ-  
senti, quod ajunt, æstimasti, quibus nexibus, vinculis, ro-  
tis, ingens iste fari Europæi orbis volveretur: quæ sidera,  
quibus regnis, quid promittant: quæ in Germaniam no-  
stram & res Germanicas, voluntates, studia, consilia ver-  
tentur in animis hominum, in aulis Principum, in ore na-  
tionum. qualia qui non advertit, vix est, ut suæ Reipub-  
licæ tempora perite ac prospere administret. His inten-  
tum cogitationibus animum, multa observandi sollertia, in  
majores curas temperat, quam quæ intra linguarum noti-  
tiam, morum politiem, rerum pulcrarum spectacula, deco-  
ram aulicarum exercitationum agilitatem, & similia fru-  
tum peregrinationis ac propositum concludi patiantur. Il-  
lis enim omnibus licet eximie vel intervalla temporum di-  
stinxeris, vel graviorum gloriam artium ornaveris, longe tamen  
tractatiora erant, quæ ingenii ad imperandum nati curas po-  
tissimum occupabant. Cum præsertim magnos ubique viros, &  
recondita doctos aut tractantes, Tibi nondignatio magis Tua  
quam virtus conciliaverit. Id in Italia Tibi curæ, cum Pa-  
pæ studia coleres, cum tot urbium ac Principatuum ple-  
que nosceres, cum Romam augustissimi quondam impe-  
rii aulam, ad Clementis VIII, aulam, statusque ac moris  
modi comparationem exigeres. Nec in Sicilia & Me-  
dicæ quidquam eorum prætermisum est, quæ pie pruden-  
terque cogitanti de fatis rerum temporumque vel recorda-  
tio prioris ævi, vel præsentium æstimatio, vel divinatio fu-  
rorum potest suggerere. In Britanniam vero, quam sole-  
ni tempore atque adeo omine Tua Te fortuna traduxit,  
AUGUSTE? ut ostenderet Tibi incomparabilem Semirami-  
dis Anglicæ successorem JACOBUM, auspiciatissimi regi-  
nis primordia inter publicas cærimonias capeffentem;

Teque sanctitate festi, & conspectu tanti Regis, Tur indolis, Tur gloriæ admoneret: quæ alterum à Jacobo heroicæ doctrinæ virtutisque exemplum jam tum minabatur. Atque si, quod Prudentibus placet, occulto quodam vigoris ac necessitudinis commercio præstantes naturas mutui affectus invicem conciliant; quantos hausisti spiritus ex Christianissimi Galliarum Regis HENRICI affatu ac humanitate: qui non per se modo benigne & comiter gratissimum hospitem excepit, sed ad LUDOVICI quoque sui venerationem admisso, luculentam occasionem patefecit, demerendi ejus auspicii ac majestatis, quæ tantum ex amplificata Galliarum gloria nomen, illi Heroum incremento meditabatur. Longum fuerit, Belgica quoque cum ceteris itinera persequi; ac seorsum describere, quantum experientia ac laudis undique collegeris retulerisque: loquuntur pro nobis abunde consentientis testimonia famæ, judicia summorum ubique Principum & aularum, communis Germaniæ gratulatio, quæ de tanto decore suo nunquam dubitavit magnifice sentire ac sperare. Fulgebat in reduce sincera ac incorrupta patrii moris gravitas: quam ne diuturna quidem peregrinatio in pravam exteri ritus imitationem deflexerat, aut in vanitatis amorem ac versutiæ distorserat. quæ pro virtutibus vitia cum multi avide arripiant, merosque interim Ulysses somnient, hoc assequuntur denique, ut nec externæ gloriæ elegantia expriment, & in fastidia disciplinæ mentisque Germanæ corrupti, nescio quid monströse peregrinum per oculos stupide mirantis vulgi circumferant. Quæ domesticæ labes gloriæ, quantum publico noceat, cum præsertim magnorum exemplis nominum se tueri cœpit, vel propterea nolumus declarare, ne argumento in fastiōra omnia sæcundo convivium fecisse videamur. Et jam pridem nos ipsa Tui Principatus specimina vocant: quem tanto instructu aggressus, quadraginta per annos, aucto subinde administrationis curarumque onere, ita hætenus gessisti, ut Optimi, & pro capto temporum Felicissimi Principis exemplum sine exemplo

plo impleveris. Sequitur enim ut in universa vita, ita præsertim in imperio, fortuna virtutem : fidumque ac familiarem Deo Principem omnis natura, omnia rerum elementa suo quodam obsequio ministerioque demerentur. Equidem cum omnis Principatus inter ea sit, quæ eximio Divinitatis favore atque commercio gaudent : ineffabilis tamen ac longe interior est conjunctio, quæ mentem Pietatis remigio instructam, ad superna evehit, apud superna retinet, supernaque fœtam sanctitate in terrarum regimen dispensat. Hæc est origo generosi magnique consilii, quo sceptræ præpollent : hinc vis auspicii Principalis, hinc majestatis veneratio, hinc omnia summæ fortunæ decora & pignora augustiorem in humana vultum expediunt. Itaque non officio tantum Christiani hominis, sed inter proprias sanctissimi muneris Tui curas, pietatis studium eminere voluisti, AUGUSTE. In quo se nemo Tibi, vel instructu subsidiorum, vel spiritu & ardore, vel emendati moris rectitudine, merito anteponat. Mirabitur posteritas, nec injuria, cum Sacrum Codicem, vice vel assiduissimis usitata sæpius, perlectum pridem relectumque, noto jam in vulgus elogio cognoscet : sed quanto plus est miraculi, in ipsa tanti operis tractatione ? Primarum majestatem originum roto admittere animo, conferre interpretes, adhibere Doctores; quid operæ, studii, cognitionis, quovis seculo vel Sapientum doctrina contulerit, vel ardor Sanctorum penetraverit, sub unam quasi lucem conspectumque statuere : hæc, inquam, summi Theologi, sed in Principe documenta, non salutari minus, quam novo exemplo suspicimus. Accedit & reliqua sacræ eruditionis supellex, & quidquid religionis sinceritatem ordinat, formam tuetur, dignitatem amplificat, disciplinam gubernat. Ex quo Tu instrumento, AUGUSTE, Ecclesiarum tutelam, patrociniū, moderamen, quantum vel hominis ingenio vel Principis officio fas est, non in præsens modo depromis, sed in futurum disponis : transmissis etiam ad posteros monumentis, quæ Tuum in rem Ecclesiasti-

fiasticam studium meritumque voce perenni eloquantur. Mos est gentilibus, cum intra animi adyta formant Principem, quem nusquam in aularum Palatiis inveniunt, ad fabulas denique decurrere, ac ingeniosis ambagibus mysteria boni Principatus involvere verius quam explicare. Inter quæ commenta non parum præcellit Minois educatio: quem novem annis in contubernio ac disciplina Jovis enutritum, ex illo divini secreto commercii ad solium & regnum producant. Nec Osiridem suum, facundissimus audet Synesius pro publico boni imperii specimine prostituere, nisi arcanis prius Deorum sacris assuetum, & convictu quasi quodam cœlesti, in decus regni formatum. Quæ figmenta, sive disciplinam imperandi è cœlo Deoque deducunt, sive munus imperatorium Divinis alligant auspiciis, alludunt potius, quam exhaustiunt, nec repræsentant sed significant veritatem. Nobis sapientiæ melioris stilus præmonstrat exemplum Principis, quem non fictitious aliquis Jupiter, sed Deus Deorum, Deus solus, Deus Rex & Regum auctor, sua imbuunt sapientiâ, suis fatiat colloquiis, suis firmat præceptis, suo implet numine, suo agitat vigore, sua ornat imagine. Solium quaris? cum Divino cohæret, sceptrum? à Divina manu porrigitur, consilia? è divina mente promanant. fortunam? divino favore secundatur. Et quid dicam amplius, aut quibus omnino verbis dicam, de Pietatis tuæ exemplo fructuque singulari, AUGUSTE, quam peritissimus quisque sub Davidis illius aut Salomonis imagine cogitandam facilius animi affectu, quam orationis conatu declarandam suscepit? Igitur ex ipsa uberrimi argumenti copia, non inepti rationem compendii in cetera mutuabor: ut semel omnes intelligant, non minus supra facundiam, quam supra mensuram sollempnem esse, virtutes Principis à tam propitio, tam familiari, tam conciliato Numine profectas. Sedeant age peritissimi, rerumque actu & fortunæ casibus gnaviter exerciti, & expendant, divinum illud Tuum, EXPENDE, quo tanquam signo aut tessera Prudentiæ reconditæ

dite penetralia præscribis: invenient haud dubie, quæ expendendo nunquam satis sive expendant, sive expediant. Non est mihi fas existimare de præcipuis consiliorum momentis, quibus securitatem sui status ac salutem tantus Princeps pace belloque providit ac redemit: possunt tamen pro argumento esse temporum discrimina, negotiorum incipitia, animorum perplexitates, fata Principatum, in quæ communem patriam pertinax fortunæ publicæ indignatio implicavit. Navem inter certamina tempestatum servare, non nisi periti, sed & generosi gubernatoris est: neque Rempublicam ex circumstantibus undique periculis alius, quam profundæ ac præsentaneæ artis mentisque Princeps eripuerit. Jacet sepulta pæne suis ruderibus Germania: trepidant inter cineres fatalis incendiî miseræ civitatum ac populorum reliquæ: omnia squallore, lamentis, desperatione opplentur; ubique caligo mœstitiæ, tenebræ calamitatum, pavores exitiorum deimæris incubant terris. E qua tam deformis spectaculi circumstantia, Tua ditio nitidius tollit caput, & tanquam ex alta nocte lætioris radiis luminis promicat. Beneficium ingens, & hodie paucissimis commune, divinum ante omnia favorem, sed & Tuam, AUGUSTE, prudentiam nimis, quam evidenter commendant: neque quisquam Imperiî nostri tam est ignarus, quin Augustæ pacis, adhuc inter ultimarum rerum pereuntium solatia veluti delecta sede resistentis, auctorem miretur, obvioque statim prædicationis argumento, defæcatam affectibus mentem, temperata cautione consilia, porrectas in abdita curas extollat. Vertitur periculose jam complures per annos, ac penè evertitur Reipublicæ orbis: atque in tanta status publici concussione, tam ambiguâ omnia nexibus intricantur, causis impelluntur, artibus variantur, ut, quam heri faciem negotia prætulerant, hodie amiserint, neque in crastinum provisa ex hodierno habitu conjectura subsistat. Quo fit, ut nec in cavendo metus, nec in discernendo judicium, nec in providendo solertia, nec in observando attentio, quidquam.

quam expeditæ rationis inire possit, nisi quod omnia expendendo, AUGUSTE, novum ad sapientiam iter reperisti, quo per ardua quævis enisus Tuæ pariter ac posteræ ætatis curam ex dignitate muneris sustineas. Jam primum, ut recte de instantibus iudices, recte de imminentibus cogites, non contentus Augulli alicujus ingenio aut Aristorelis magisterio, ignoratam gentilitari viam ingrederis, ac pleraque perite de publico sentiendi momenta ex ipsis fatorum tabulis condiscenda autumas: satis gnarus, oculum Prudentiæ humanæ valde hebetem esse, nisi Providentiæ gubernatricis consideratione assidua illuminetur. Multum potest in moderandis hominum consiliis replicata veteris ævi memoria, & in exemplum accita annalium series; quæ non gesta modo eventusque, sed causas insuper ac rationes plerumque promulgat. Id est, quod se pollicentur gravissimi quique veterum ex Græcia Latioque Historicorum: id est, quod lectores peritissimi quætere videntur ac sectari. Tibi omnis rerum hominumque memoria in promptu est; Tibi juxta patent gentium consilia & scriptorum artes, sed in hoc diversus es ab exemplo summorum Principum, quos imitaris, quod illi tantum ex libris hausere, quantum calamus auctoris consignaverat; Tua autem sollertia, in historiis non pauca attendit, quæ Historicus ultro reliquerat aut ignoraverat. Atque ita, cum Severus Alexander ex peritis historiarum discit, quid ex rebus gestis ad gerendas subsidii aut similitudinis suppetat; cum multi illi & magni imitatores Augulli (quem vel nominis causa sæpius adhibere debemus) in evolvendis scriptoribus nihil æque quam præcepta & exempla publice vel privatim salubria consecantur: aliquid altioris studii Tibi relinquunt, AUGUSTE, quo contextus rerum fatales, & dispensata divinitus in omnes actionum species partesque momenta, id est, ipsam prudentiæ totius vim ac spiritum, in quantum homini fas est, complecteris. Quam curam dum plerique hodie quo ac seculi vitio negligunt, infirmari Prudentiæ genium necesse est,



est, quem sola Deo cœloque nixa generositas decet ac tueri. Quid mirum est, eos falli, qui tam callide & animose spes metusque suos in secula mittunt, immensisque molitionibus futuras ætates occupant? qui humani subtilitate ingenii mirandarum structuras rerum inædificant? qui consilia successu & exemplo, nec ultra metiuntur? Porfus quasi exclusum tertis Numen, aut otiose inclusum, nihil juris vel curæ vel potentiæ denique in humana obtineret. Tibi meliorem sapiendi formulam missa cœlo dictant auspicia: Tibi excelsæ mentis magnitudo, certum in arduis auxilium, in dubiis consilium, in adversis remedium sponder: atque, ut verbo dicam, Tibi Natura suas vires, Prudentia suas artes, Fortuna suas opes ultro indulget. Principales sustinere curas, atque populorum præesse utilitatibus, quantæ sit molis onus, si non aliunde constaret, ipsa nos eorum doceret raritas, qui per se tuende rerum summæ sufficiunt. Itaque ministrorum per manus, regnorum arbitria plerumque ac fata jactantur: neque quisquam navigio minus moderatur, quam qui gubernatoris nomine præfulget. At vero AUGUSTI nostri Principatus, quo agiteretur spiritu, quo convalescat vigore, quibus se attollat humeris, non prolixa quæstio est. Supra primam ingenii animique sortem, primo dignam & natam loco, nihil est, quo ascendas: hæc nullis impar negotiis, adjutoribus suis adest auspicio, præest exemplo; agenda præscribit, acta judicat; momenta rerum apud se congregat, ex se dispensat, ad se revocat. Quod si ad oratorum hic imagines veniendum esset, primarii sideris emissum in omnia fulgorem, aut præsentis ubique Numinis majestatem, ad interpretanda, quæ diximus, mutuaemur. Sed vocetur nunc simplicius *indoles Regia*, quæ nominis regii munerisque menturam sola capit, sola implet, ac in Principe omnia Principatus decora supereminet, atque, cum Te talem Natura genuit, AUGUSTE, talem Sapiëntia educavit; Heroem utraque quidem, sed qui ure & nomine Principis esset, moliebarur. Atque hinc per-

perfectio illa Prudentiæ Principalis æstimanda est, quam nunc commendamus. nec alio spectat apparatus iste insolitus, quem circa solium Tuum omnes doctrinæ, artesque, velut in sacratio donaria suspenderunt: ut in Principe primum splenderet, quidquid in Principatus felicitis spectaculo unquam splendere potuit ac debuit. Armaria rebus verustate, raritate, artificio notabilibus referta non mediocri sumtu ac labore multi adornavere: sed affectus quam peritia major, & famæ potius studium, quam operum æstimatio id consilium moderabatur. Tibi pictura, plasticæ, & cum suo comitatu soboleque mathesis, exquisitæ monumenta industriæ artisque, non ut amatori modo, sed ut artificii ac judicii, adeoque crebrius solito ac liberalius se dicata cupiunt. Ne de illustrissima nunc Bibliotheca dicam: quæ numero librorum ac præstantia, dispositionis cura, suppellectilis apparatu, ornamentorum dignitate, subsidiorum commoditate, inter miracula Germaniæ emereret; nisi majus esset ipse Princeps miraculum, cujus munificentiâ Bibliothecam instituit, solertia ordinavit, scientia comprehendit. Sciunt nihil in majus augeri, qui propiorum Tuæ aulæ usum adepti, plus ornamenti in animo Tuo, quam in fortuna; plus sapientiæ in ingenio Tuo, id est, in viva illa Bibliotheca, quam in tot codicum millibus, quos omnes notitia, cura, digestionem Tua dignaris, agnoscunt. Quanquam, cui jam ignota esse potest infinitæ lectionis copia, & omnigenæ eruditionis varietas, quam non Virtutum modo actu vitæque consuetudine approbasti, sed victuris per omne ævum literis consecrasti? Nunquam defuerunt, qui specioso in vulgus colore Principem potius scribenda facere, quam legenda scribere oportere, contenderent. qui si hoc volunt, ne imperii negotia omitterantur, aut destinata publico interceptantur tempora, non debent nomine Principis promiscue uti. An tu Julium & Augustum Cæsares, M. Antoninum, ac minus vetusta nomina *Leones*, *Basilios*, *Cantacuzenos*, non satis industrie publica sustinuisse commoda autumabis, quod varii

rii generis scripta, nunc soluto sermone, nunc metris illigato, partim gravioribus apta consiliis, partim temperando idonea otio ediderunt? Atqui tantorum spiritus heroum in omnia egregia & decora promptus validusque, non erat vulgari modulo merendus. Quod alii laborem, hi naturam vocant: quæ aliis distractio est, his vix occupatio censetur: unde alii fatigantur, hi reficiuntur. quid, quod eodem tempore intentam pluribus mentem nec memoria confundit, nec iudicium frustratur? Qualia cœlestis cuiusdam vigoris prodigia non capiunt, qui tam opere & moleste de magnis viris satagunt judicare. De Tuis certe scriptis, AUGUSTÆ, quæ amœnitas ingenii, copia doctrinæ, & regii gravitas spiritus ex æquo decorant, nunquam serio cogitabit, nisi quem fata nostri temporis de cœlesti destinatione admonuerint. Ecce litterarum domicilia ac instrumenta, atque cum his amorem & curam eruditionis, bellicæ hæctenus clades per Germaniam corrumpunt, dissipant, extinguunt: consternatas tot daemnis mentes in desidiâ fatalis torpor agit: periclitatur spes ac decus posteritatis; quam non nisi magno molimine in gratiam cum avito & meliori more reduceris. Igitur Hercule aliquo Musagera opus erat: qui nominis maiestate, omnique elegantia cultu ingruentem audacter barbariem propulsaret, ipsaque exempli magnitudine in strenua posteros consilia provocaret. His instincta tam fatalibus stimulis optimi Principis voluntas, quo sponte ibat, fertur alacrius, Musas admittit secretius, scientias dispensat largius, eruditos fovet amatque impensius. Quidni fulgeres præcipuis in omni genere litterarum luminibus Academia Julia, quæ eodem gloriarum tuarum auspice & socio gaudes, eodem operis duce frueris & teste, ejusdem Patroni munificentiam experiris & arbitri iudicium admiraris? Multas scholarum, contemptus depressit: & absimit quotidie aliquas inopia. Tux perennitati satis provisum est exemplo Augusto & Juliano: cuius imitatio domui Luncbur-gicæ, tanquam fato demonstratum felicitis imperii pignus,

vel ominis causa in perpetuum curæ erit. Neque enim quidquam efficacius est & auspicius ad commendandam posteris virtutem, quam exempla majorum: quæ non tantum familiarius movent, ut cognata; sed validiorem insuper venerationem habent, quia sine præfatio inclinaturæ in diversa fortunæ deferri nequeunt. Itaque nihil est præclari, quod non ab illa expectari Aula debeat, cujus status tot disciplinæ munimentis ordinatur. Observes inter artes regnatricis domus, consecratam Romæ religiosa cærimonia Palatii sedem: ut imperantis domicilium non magnifico magis ornatu præcelleret, quam sanctitate majestatis præpolleret. Ad Tuam, AUGUSTE, aulam venientes, nulla quidem superstitio arcet, sed objecta in limine veneratio sanctiore scilicet affectu imbuunt: ne ad sedem Deo divinoque dicatam Principi, cælestibus plenam pignoribus, sacra Principatus & penetrales virtutum genios, ut sic loquar, complexam temere aut profane accedant. Ante omnia ipse Dominus aulae, & mens, & anima, ex illa suæ potentia officina, in omnia remota, propinqua, per se, per alios, virtute exemploque securitatem in populos ac salutem, cum utriusque instrumento, dispertit. Ipse semper agit, semper viget, providet, sospitat, splendet, moderatur: nunc ardentem fortunam obsequio devincit, nunc minanti plenos generosi spiritus animos offert: nunc præsentia in formam & vultum ordinat, nunc futuris facit aut claudit viam. Jam, ubi inter Justitiam & Clementiam medius assedit, alteramque alteri, & utramque sibi conciliavit, mox videas audaciam malis decedere, fiduciam redire bonis, infelicibus patere asyllum. fugiunt totisque exulant finibus calumniæ litium, nequitia lycophantarum, injuriæ præfectorum; neque hic contemnere & contemni, opprimere & opprimi, seculum vocatur: quippe sub tanto æquitatis jurisque auctore & magistro, facile sua se fortuna metiri discant, qui aliena mallent abuti. Solet non raro evenire, ut benefici ex aula sideris lumen ad multos nequeat penetrare, obductis passim per aulicorum artes nubibus,

bibus, aut qua transire debeant radii, caligine offusa. AUGUSTUM nec adulatoris criminatio, nec obrectatio invidi, nec æmulatio adversarii fefellerit: omnia pariter absistunt, omnia metuunt, neque inimicum vitiis animum vitiorum artifices audent tentare. Hinc liquida & serena lux in omnes Principatus angulos se permittit; non casas præterit ac tuguria, non agros minus quam urbes exhilarat, summosque cum infimis pari benignitate permulcet. Modo Liberalitas sub illo lumine in egenorum solatia, aut benemerentium præmia præsto est: modo Humanitas ad inspicienda infelicium damna, levandos merentium dolores, laudandam civium fidem ablegatur: modo ipsius Principis aspectu, tanquam Sole, adversus sæculi tempestates, omnia refoventur. Quod si denuo ad ipsa tot bonorum penetralia remeare libet, ne ab interiori quidem ac familiari vitæ consuetudine nos excludet innocentia Principis ac sanctitas: quæ exemplo melioris sæculi consecrata, nihil minus quam latebras amare porest. Digna sunt, quæ in omnium oculis versentur, ac sermonibus, dicta & facta Principis ad laudem ac decus nata; assidui pro Republica labores, remissionum tempora parce, nec otiose interposita: decora & prudens in conjugem comitas, in sobolem pietas: benignitati propior apud amicos gravitas; dignitatis ac disciplinæ memor in familiares auctoritas: cultus corporis, mensæ, totius aulæ, inter magnificentiæ, elegantiae, moderationis specimina & confinia, rationi fortunæque attemperatus: ministeria ad usum Palatii & operas disposita: luxuriæ instrumenta & artificia, locum melioribus laxamentis cedere iussa: exclusi scurræ, circulares, harioli, aliaque consortii Principalis dehonestamenta. Nihil in vultu, in gestu, in incessu Principis, quod exemplo aulæ in omne decus formatæ disconveniret. Neque minus egregie secundas partes AUGUSTA tuetur: cui hoc, illustrissimum inter feminarum elogium nomen, non Mariti tantum merita & regii consors sanguinis nativitas, sed augustæ mentis celsitudo, longeque sexum supergressæ virtutes

res suo jure vindicant. Loquetur Te, generosissima Heroidum SOPHIA ELISABETHA, omnis posteritas; & cum AUGUSTO Tuo inter præcipua matrimonii factorum industria congruentiaque conciliati exempla prædicabit; quæ tanti conjugis judicium mereri, implere, superare potuisti. Per Te repensantur omnes illæ Charites, & quidquid Amorum decorumque, primum in CLARA MARIA POMERANA, deinde in DOROTHEA ANHALTINA, Serenissimis, Viragibus, Optimus Princeps amiserat: quasi prorsus id agere voluerit fortuna, ut sua non parcius continuasse quam collocasse beneficia videretur. Pulcrum ac venerabile spectaculum! fulgorem tot radiis è cælo derivatis accensum, non nisi ad aram Phœbi Tui dedicatum, ejusque lumine auctum illustratumque in gaudia publica & solatia dispensas. mater populi, affectu; matronarum specimen, exemplo; aulæ salus domestica, beneficio: cujus potentiam nemo doluit, modestiam nemo desideravit. Nam quid ceteras in omnem elegantiarum cultum conuenientes dotes artesque memorem, de quibus nec pauca debent, nec multa nunc dici possunt? Igitur haud paulo rectius seorsum & accurate, inter illustrium miracula foeminarum, tantum nomen ad posteros Scriptorum pietas celebrabit. Nobis enim tam multiplicatus aulæ Augustæ splendor, ne omnia semel & liquide contemplemur, oculos præstringit, summasque tantum collucentium undiquaque siderum imagines ostentat. è quibus dulcissima flamma est, quam, veluti ex percussu, Celsissimorum Parentum folio, augusta utriusque sexus pignora copiose refundunt. Quid non speres magnum ex illa sobole, cui Deus magnarum originum indolem, fortunam, exempla vel ingeneravit liberaliter, vel luculente repræsentavit. Atqui non sperandi jam sed confidendi argumenta quotidie supeditatis, ætatisque vestræ mensuram mirandis laudum profectibus præminetis Illustissimi Juventutis Principes, RUDOLPHE AUGUSTE, ANTONI ULRICE, FERDINANDE, nam ad Vos eo majori fiducia accedo, quo testatior est

est indolis Vestrae benignitas, neminis hominis quaecunque etiam in Augustam domum Vestram studium aspernari docta aut sueta. Vos inter delicias & amores sæculi veneror: Vobis ista exsplendescantis abunde virtutis omina ac specimina gratulor: Vos, ut munimenta felicitis aulae ac subsidia, Providentiae rerum publicarum Sospitatrici, publica pietate cominendo. Vobis fera Parentum immortalitas, prospera Sororum matrimonia, digna denique Vestris moribus fata contingant ac tempora. Paucis ista verbis comprehensa, quam prolixo mentis affectu dicantur, ita poteritis aestimare, si me inter eos numerare dignabimini, qui divinae in res Germanicas curae monumenta, pignora, auspicia, indeque natas expectationes, non irreverenti diligentia speculantur. De cetero, credite, me omnia ista vovere atque augurari, quae nuper, felicioris magni Viri calamo ad Vos sunt exarata: *cujus speculum Augusteum* tanta concinnitate adornatum est, ut praeipuisse potius in hoc argumento, quam praeuisse aliis scriptoribus facultatem videatur. Nunc ad Te, SERENISSIME DOMINE, redeundum est: ad quem omnia, quae in aula & Republica Tua haecenus veneratus sum, suos cultores remittunt. Tuo debetur auspicio, curae, dispositioni, exemplo, quidquid Augusta domus splendoris ac disciplinae; Respublica vigoris habet ac salutis. Tua, AUGUSTE, Censura omnia emendat; Tua vigilantia omnia defendit; Tibi caritatem suam publica populorum allegat pietas: Tibi obsequia sua civium consecrant curiae, conventus, ordines: Tibi elogia Augustae & eximias laudes, & fausta omina, omnis sexus, omnis aetas, & aperta undique gratulantis turbæ ora vocesque modulantur: *per AUGUSTUM se vivere, per illum arare, edificare, negotiari; libertate atque fortunis per illum frui.* Tibi, si quid ex antiquitate magis exquisitum, Prudentum studia recordantur, statim & merito accommodant. Ponebant olim plurimum in votis Principum aut imprecationibus: quibus vel certa terris prosperitas, vel haud dubia perniciēs acciretur. Hinc cæli ac siderum clementiam, terrarum

rum proventus, agrorum fruges, fœturam pecorum, hominum fœcunditatem, Reges suo Regno à Regiis diis precatos adeptosque, speciose videas memorari. Neque ulla in Principe splendidior celebritas excogitata est, quam ut missa cœlo in publicum munera, imperantis nomine ac auspicio prædicarentur. Quæ res multum utique ex vero trahit: quævis partium adulatio suas, ut fere solet, partes non raro interposuerit. Quæ enim certior sancti Deoque carissimi Principis æstimatio dari potest, quam effusa per populos, in Principis gratiam, divina beneficia? quæ ita jubentur cives excipere, ut Deum simul in munere, simul in Principe, qui muneri conciliando dispensando; præest, revereantur. Itaque vere **AUGUSTUS** es, Princeps Serenissime; vere sanctus, vere venerabilis; sanctimonia augusti, eminentia auspicii, incremento felicitatis. Neque quisquam Tuorum de illa dubitat majestate, quam quotidie omnes sentiunt, omnes vident, ipsisque pene manibus contingunt. Vive & Vige & Splende, ô Vita civium, ô Vigor imperii, ô seculi Splendor! Deus Te amet, **AUGUSTE**, quem Tu semper amasti, qui Te semper amavit! Deus Te servet, qui Te semper servavit! Deus Te amet servetque, **AUGUSTE**, ut Tuos diu amare, diu servare possis! Quidni enim à laudibus, quas non capit ingenii tenuitas, ad Vota transgrediar; quæ, si cetera desint, sola absolvit pietas? Conquirere elogiorum titulos, disponere virtutum classes, meritum numerare adoras, prædicare fortune munera, ejus forte fuerit, qui Tuam magnitudinem angustius, quam par est, metiatur, aut certe justum moliatur historiam. Quid quod nec civilis modestiæ est, de vita ætque Principis, sine nutu Principis, adeoque sine numine & nomine, ut sic dicam, ullam expositionis plenæ seriem ordiri? cumque laudatio communis pietatis præcepto contineatur, quidquid ad historiam accedit propius, singulari indultu juberi amat. Ea propter nemo hic describenda putabit divina **AUGUSTI** in imperium Romanum, in Illustrissimas necessitudines, in omnem Germaniam merita: Virtutum ac officio-



officiorum cumulata in perfectæ beatitudinis exemplar decorata : elaborata pro egregio publico consilia : vindicata è Martis sinu, Patriæ spolia : tolerata constanter & superata feliciter discrimina ; è quibus modo vita Principis, non sine nota fati heroici, modo civium salus sub præsidio Principalis fortunæ convaluit. Quidquid horum est, AUGUSTE, institutum meum supergreditur : qui sub auspicio ductuque Musarum, plurimum in aula Tua pollentium, inter eos volui comparere, quibus testandi occasiones devoti animi accipere potius, quam deligere fas est. Si propitio pacatoque vultu, prima & adhuc circa Augustum limen verecundantia obsequia admiseris, ex Tuis haud dubiè auspiciis, DOMINE SERENISSIME, quæ nunc desideratur unice ac deficit, ingenii sermonis-  
que facultas reficiet se ac instaurabit.



## VI.

## ELOGIUM,

*Illustrissimi Comitis & Fortissimi  
Imperatoris,*

LINNARTI TOR-  
STENSONII,

tumulo dicatum.

**T**ORSTENSONIAM Gentem, antiquis apud Suecos titulis Equestrem, primus in altiore nobilitatis gradum extulit LINNARTUS: Comitis dignationem, ob rempublicam sæpe fortiter fideliterque administ-

nistratam, judicio & indulgentia CHRISTINÆ Regi-  
næ adeptus. Huic, ut in summis non modo suæ ætatis,  
sed omnis ævi imperatoribus numeraretur, præter natura-  
lem ingenii ad ardua facti dexteritatem, disciplina Maximi  
Regis, GUSTAVI ADOLPHI, auspiciis fortunam-  
que contulerat. Sub ipsa enim adolescentiæ initia in tan-  
ti Principis familia, mox & in commilitio esse cœpit: bel-  
lique, quod tum in Livonia acerrimum gerebatur, rudi-  
mentis induratus, ab infimo ordine ad Tribunatum pro-  
cessit. neque mutavit nomen, cum postea bello Germani-  
co, vi muneris ampliore, rei tormentariæ curam gessit:  
Regi suo in dies carior & jam inter eos æstimatus,  
quos in omnia promptos, & ingentis fati, quo tum res agi-  
tabantur, capaces ministros, Fortuna Sueciæ, adornasse vi-  
debatur. Audita non semel vox est Regis, familiari ser-  
mone, TORSTENSONIUM inter paucos imperatoriiis cu-  
ris parem destinantis. Quod ille sive judicium sive præsa-  
gium, quanto virtutis gloriæque successu impleverit, ab eo  
potissimum tempore repetendum est, quo post cetera mi-  
litarium officiorum operumque decora, summæ rei impe-  
rio præfectus, concussam morte illustrissimi Ducis BANE-  
RII & labantem fortunam belli, suo adventu immane quan-  
tum recreavit. Habuit ille annus (à quo hunc decimum  
numeramus) miras incerti Martis, ac pæne inauditas tam  
longo bello vices. Paulo enim ante, BANERIUM sua fe-  
licitas videbatur vocasse ad occasionem patrandi operis,  
quale nullius ævi historiæ memorant: ut Cæsarem cum  
universa aula, Imperiiq; Proceribus, comitia Ratisbonæ  
habentes, ex urbe ad vim subitam & strenuam nondum  
fatis instructa, vel in fugam exigeret, vel in triumphum  
educeret. Mox ad alia inde non sine incommodo digres-  
sum, tacitis passibus mors pone consecuta, hostibus non  
modica gaudiorum & successuum materia fuit. Ejecta pas-  
sim locis opportunis, præsertim per Saxoniam, Suecorum  
præsidia: amissa simili fato Silesia: neque Gôrlicium, caput  
rerum nostrarum in Lusatia, singularis Wanckii, sum-

na ope propugnantis, virtus tenuit: Guelferbyti vero ob-  
 idionem, tanto temporis, sumtuum, laborum, hominum im-  
 pendio hæcenus tractam, coortum inter obfessores ex æmu-  
 latione certamen, ac dissociatæ subinde fœderatorum vires  
 dissolverunt. Instabat hostis impetu, consilio, virtute: at-  
 que in dissidia ducum, & querelas militum intentus, suam  
 occasionem ex adversis nostris strenue ac feliciter confecta-  
 batur. Inter quæ TORSTENSONII è Suecia adventan-  
 tis, primo nomen, mox præsentia illum rerum cursum suf-  
 flaminavit; Fortunamque, nescio quid transfugii simulan-  
 tem, in partibus, nec invitam, retinuit. Compositis enim  
 & instauratis, quæ turbata erant in exercitu & apud socios,  
 quaqua progressus est, terrorem, fugam, vulnera in hostem  
 tulit: receptis, & in ditionem vi metuque subactis pluri-  
 mis oppidis locisque opportunis. in quibus Glogovia, situ,  
 opere, præsidio munitissima urbs, intra unam & alteram ho-  
 ram expugnata, ingenti armorum annonæque abundantia,  
 merces & instrumentum festinantis ad novas subinde vi-  
 ctorias belli fuit. Idem impetus Schvveiniciu domuit:  
 nequicquam prævertere tantam celeritatem auso Principe  
 Lauemburgico. Qui cum egregia militum tuendæ Silesiæ  
 impositorum manu, victoribus illatus, fœdissimæ cladis &  
 caprivitatis suæ (in quam sequebantur ducem, præter le-  
 gatos plerosque & tribunos, duo amplius armatorum mil-  
 lia magnusque signorum numerus) unicum solatium habuit,  
 maturatam intra paucos dies ex vulneribus mortem. Vix  
 tertius agebatur mensis, & Silesiam ferme omnem arinis me-  
 tuque tenebat TORSTENSONIUS. Unde in Moraviam  
 improvisus divertit, atque caput regionis Olomucium op-  
 pugnare adortus, impetu fortunaque sua tantopere præfe-  
 ctum loci exterruit, ut obsidentium vim ultra paucos dies  
 sibi sustinendam non putaret, dederetque, irreparabili in  
 posterum jactura, urbem omni copia militaris apparatus,  
 commeatum, divitiarum abundantissimam, bellique, ut sic  
 dicam, integri comparandi gerendique officinam. Tum ve-  
 ro, irritata tot adversis hostium virtus, reficiendisibus

majore auspicio ac intentioribus curis incubuit : novamque belli apparatissimi molem Archiduci Leopoldo Guiljelmo, auctoritatem aulae & dignationem Caesaris ad exercitum laruro, commisit. Exacta igitur non instrenuis laboribus ætas; nec alio tamen eventu, quam ut Sueci parta per Silesiam & Moraviam pleraque retinerent, & mox supplementis novato exercitu, insigni accessione augerent, hostemque, post crebras velitationes & levia certamina solutasque velut in vicem, hinc & inde, obsidiones, in Misniam ad fatales Lipsiæ campos pertraherent. Inter cruentissimos belli Germanici dies, altera illa Lipsiensis acies fuit. Utrumque summis viribus pugnatum, utrimque sinistrum cornu inclinatum; ducum quoque ab utraque parte nihil non conantium, æquata pericula: **TORSTENSONIUS** ictu tormenti prostrato equo, tanquam è mortuis ad consummandam victoriam surrexit: Archiducem contra fortunam spei insistentem, jamque ab exercitu desertum, exigua fidiſſimorum manus è circumstantibus hostium gladiis ægre eripuit. Venerunt in manus **TORSTENSONII**, præter impedimenta & omne instrumentum castrense ac imperatorum, ducenta circiter signa: nec multo post, accessio victoriæ, Lipsia fuit, repetita à prælio obsidione ad deductionem compulsa, operibusque & apparatu Suedicæ his locis militiæ caput esse jussa. Insequente anno, commutata belli ratione, Gallassius **TORSTENSONIO** oppositus, à probata sibi unice militandi consuetudine non discessit: super infitam cunctationem, ingentis consilii ratus, fatigare & detinere hostem, cujus invicta prælio virtus, & penetrabilis urgendo bello impetus esset. Verum **TORSTENSONIUS**, in conspectu hostis, semper è propinquo quatenus tuto licuit, affectantis, circumferre arma & terrorem per Bohemiam, Silesiam, Moraviam: excindere castella, occupare præſidiis urbes & connectere; subvenire obsessis, nihil apud hostes quietum pati; excursionibus interiora Austriæ terrire. Huc enim animum fortunæ publicæ sensu penitus imbutum, perpetuus, & naturalis, ut sic dicam, stimulus inci-

incitabat : hoc belli caput , & regimen rerum ; hinc finem armis , hinc paci auspicia petendum : & , munito jam aditu , provilisque in proximo subsidiis , ut primum se præberet occasio , redordiendam , qua fata monstrarent , viam. Equidem , quantum faveret votis , pro pace publica rite conceptis , Fortuna aliquantisper in occulto tenuit : donec distractum bello Danis inferendo **TORSTENSONIUM** , confectis prospere celeriterque rebus , post octavum mensem , in priorem arenam restitueret. Gallasius enim , serus Daniæ auxiliator submissus , cum ad propiora revocaretur pericula à **TORSTENSONIO** , neque in agmine , neque collatis postea apud Bernburgum castris se expedit , quo minus in illa conclusione & tentata ad extremum fuga , nobilissimus exercitus propemodum internecione deleteretur. Rarum absque decretorio conflictu decus , & opportunum augendis **TORSTENSONII** adoreis , ex eo hoste , cui tantum hæcenus sua calliditas placuerat. Hac accepta clade , Cæsarei in Bohemia reparando bello , quanta unquam contentione , incubuerunt. contractæ undique cum eximiis ductibus , copiarum : quas delecta Bavarici militis manu Werdanus auxit. Hartzfeldio , cujus insignis ea tempestate militaris fama , supremum in omnia regimen datum : præclare destinatis , quæ in rem erant , si cum alio hoste negotium fuisset. At vero generosum **TORSTENSONII** animum , tam bene constitutæ Cæsarei exercitus opes , ad fortia consilia , potentibus ultro irritamentis accenderunt. uno eodemque tempore Danica , quibus strenuæ efficaciarum virum Helmsoldum Wrangelium discedens ipse præfecerat , moderatur consiliis , instruit viribus , munit subsidiis : & Bremense bellum Königsmarckio , expeditæ in omnia virtutis fortunæque Duci , conficiendum tradit : & in Bohemiam ad Cæsarianarum robur partium festinat ; certus , prælio decertare cum resistantibus , aut , si certamen detrectetur , promotis signis bello sedem apud intacta Danubii firmare. Provenere , quæ prudentibus destinata votis erant , omnia : Fortuna , magno quidem pretio , sed ingentes victoriarum

fructus Suecis vendente. Jancoviensi quippe prælio, quidquid laborum, conatum, discriminum, virtus humana capit, tota die sustinendum fuit, antequam debita **TORSTENSONIO** victoria obtineri potuit. Hæc ultima, de septem majoribus pugnis, ab initio Suecicorum in Germania armorum, usque ad constitutam publice pacem, pugnatis, exercitus hostium magnificientissimi vires vel absumsit, vel in ditionem victoris redegit. Hatzfeldius, cum quinque summis militiæ præfectis, captus; Gætzius, occisus, haud obscura cæteræ cladis argumenta sunt. Quancquam longe nobiliora victoriæ præmia putari debent, patefactus in Austriam aditus: pressus servitute Danubius, qua parte hætenus munimenta & claustra imperii ostentaverat: terror ad portas Viennæ prolarus; & in oculis urbis dominæ omnia prædæ ac direptui habita. Quantum ille annus ad summam belli profecerit, ne hostes quidem diffiteri poterant. Et quis fuisset procurentis fortunæ impetus, nisi **TORSTENSONIUM**, occupatis jam passim locis opportunis, ad majora paratum, pertinacior apud castellum Brunense morbus attinuisset? Quo factum, ut obsidio difficillima, Ducem omnia inspicere, omnia exigere & urgere solitum nimis quam desideraret. Neque tamen interea minus militiæ tam felicitis strenuitas, expetitis pridem destinato consilio locis pervagata est. Cumque nova belli ratio in Bohemiam revocaret **TORSTENSONIUM**, & subinde, ingravescens valetudo, vacationem ei militiæ, & redi-tionem in Patriam, tandem impetraret: non discessit tamen ab exercitu, donec, petarmatis denuo instructisque copiis, designatis locis, dispositis consiliis, formidabilem hosti & nulli non magno operi parem apparatus, cum fortuna partium, successorî Carolo Gustavo Wrangelio, vi-ces imperatoris pridem strenue functo, tradidisset. Tanti civis reditum, nunc quoque celebrat Suecia, faustisque om-ninibus & bonis recordationibus duraturæ cum æternitate rerum pietatis studium explere gestiens, captas urbes, superata pericula, conferta prælia, modo in cumulum, modo

do in seriem, colligit, explicatque: hæc sibi gaudia, hæc liberis posterisque suis exempla, dulcissimo annalium genere, in animis & conscientia victoris populi consecranda iudicat. Una omnium communis vox auditur: Hic est ille, qui Magni Regis contubernio æstimatus, inter Herois magistri victorias ad tutelam patriæ succrevit: hic suboli nostræ in agmine dux, in castris doctor, in acie commilito; ubique civis, ubique pater fuit: in hujus oculis generosa vulnera meruisse, sanguinem & spiritum profudisse, optimum pro republica augurium duximus: hujus merita, in fatis nostris; manubiæ, in tropæis, inextincta claritudine effulgebunt. Personabant ejusmodi acroamate viventis etiam **TORSTENSONI** aures, fama que sui cogebatur vel eo nomine frui, quod civibus suis illam panegyrici concentus voluptatem invidere non audebat. Sed postquam vivendi finem fecit, nescio quo pacto & studiosius inclamantur, & jucundius audiuntur, profectura deinceps cum sæculis orbe toto præconia, quibus interim per solenne officium, gloria funeris, & monumenti perennitas exstructa est. Quorum industria, domi & circum finitima quamvis magnis operibus, enitescit, scriptorum ingenio, favore amicorum, beneficio exquistorum varie monumentorum opus habent, ut famam nominis sui immortalem faciant. Suecorum arma, nobilior pars orbis, diverso nomine ad se pertinere putavit: atque in suas memorias retulit. Plenæ Gothicis nominibus tabulæ Rerumpublicarum; plenæ imaginibus Arctæ virtutis ac simulacris, provinciæ: plenæ miraculis summorum Principum **GUSTAVI MAGNI** & **CHRISTINÆ**, literæ omnes historiæque, & sunt jamiam, & magis erunt deinde; cum debita tantis rebus commentatio, interioris graviorisque prudentiæ genium, novo huic & pæne adhuc stupenti ad sua fata sæculo familiariter conciliaverit. Extra ergo semper in illis titulis laus ac fama **TORSTENSONI**, & hæc laudis famæque summa: quod duorum Principum, quibus nihil majus universitas rerum vidit, grassantibus ad sublimia virtuti fortunæque, per omnia amplissimum obsequiis

sequi atque ministerii munia suffecerit. Qui hoc dixerit, omnes ingenii dotes, omnes animi artes dixisse intelligitur: quibus primæ sortis viros, Deus, à se adornatos, Principibus instrumenta imperii, nationibus ornamenta sæculi commodare solet. Hic commendationis humanæ apex, hæc genuina Heroum dignitas: ultra quam non ascendunt, qui ex hominibus Deos facere conati, si historiam profitentur, mendaces; si rhetorum & poetarum consuetudinem obtendunt, otiosi ac ludicriprehenduntur. In TORSTENSONII certe laudibus, si quis has instituat stilo signare, parum decore, opinor, extaret, quidquid in umbra natum, Martii hujus campi lucem reformidat, & à gravitate ac modestia castrensis disciplinæ in diversum abit. Etenim, ut parem rantis rebus moliendis efficiendisque indolem; ut felicitatem, & felicitatis comites an duces, prudentiam, industriam, fortitudinem, justitiam; ut administras harum virtutum reliquas, nobilitate præcipuas, numero plurimas, intelligat sæculum, admiretur posteritas, nullis opus est artificum inventis: non magis utique, quam ad demonstrandum solem lucerna indigemus: sola est, unde quidquid hoc est muneris, expectari debet, simplex & ingenua commemoratio vitæ, sic omnigena laude tanquam proprio lumine collucentis. Sive enim summa nobiscum fastigia rerum sequaris, nihil deerit ad æstimandam non fallaci mensura invicti Herois magnitudinem: sive in singula juvet potius inspicere, operum rationes & causas persequi, nullo certius documento, quam pateat ample nativa virtutis majestas, quamque ascitum refugiat decus, judicabitur. Sunt equidem magni sæpe homines, quorum facta, pro eventu veluti confertim offuso fulgore, in oculis populorum mirifice coruscant: præsertim in bello, ubi virtutum nomina potius, quam ingenia, æstimantur. Rarissimi decoris illa laus est, quæ animum bonis artibus serio compositum, ad incorruptam præclare agendi consuetudinem, interiore quodam motu ciet temperatque. In TORSTENSONIO, cum immensum præfulgeat clarissimorum magnificentia operum, plus admirationis



tionis habet indoles & ratio auctoris: qui fortunam conciliare semper quam tentare maluit. Quo factum est, ut dissociabiles laudum tituli, fiducia & consilium, pari semper passu profectaque, vel incederent ad provisâ, vel procurerent. Negotorum naturas nemo inspexit penitius; tractandi vias, nemo expedit celerius: cumque aliorum sententias nunquam non exploraret, propria ipse difficilimis quibusque rebus sollertia superfuit. Quantam curarum molem unus sustinuerit, nemo suspicari potest, nisi qui Germanici belli magnitudinem, acerrima domus Austriacæ consilia, nec minores quam pro ingentibus propositis opes: tum Sneticarum eo tempore partium, distributas regionibus, diffusas fœderibus, connexas utilitatibus vires, in numero habet. Provinciarum regimen, præsidiorum necessitates, sociorum comoda, copiarum supplementa, annonæ subsidia, modo in has, modo in illas partes, varie distrahebant animum, nihil sibi negligere, nihil hosti concedere fuerum: cumque tantis ab aula intervallis, pleraque pro re & tempore tractanda essent, non minus interea domum respicere: mentem ac rationes publici summique consilii, divinandi sollertia assequi, regiasque utilitates congruentibus accurate obsequiis propitiare, primum in omnia auspicium erat. Atque si vera rebus vocabula ponimus, non unius belli, sed multorum instar habuit, in tot duces, exercitus, provincias ab uno emanans capite provisio. In qua tantum fuit cœlestis cujusdam industriæ, ut neque ab arcanis Fortunæ propositis, neque à commissa sibi reipublicæ salute gloriaque, neque ab optimis perficiendi rationibus, providentissimus imperator usquam deverteret aut aberraret. Prodigii simile fuit, tot laboribus sufficere virum creberrima valetudine debilem, defectumque pæne artuum robur, sola firmitudine animi sustententem. quem propterea, ante experimentum imperatoris virtutis non defuerunt, qui vulgaribus dictis contemnendum putarent. Sed constabat ratio consilii, Sneticæ nunquam feliciter incrementis obsecutæ, quam cum **TORSTENSONIUM**, incommoda valetudinis ne-

quicquam caussantem, è patria, non multo ante reperita, in expeditionem tantæ nittentibus & misso gloriæ futuram perurgeret, atque in ea, usque ad demonstratum divinitus articulum temporis dilato vacationis desiderio, retineret. Evolvantur annales, replicentur militares sæculorum memorix: quis unquam dux, prospera valetudine & viribus corporis, in bello non minimum polletentis, præcellens, majora vigoris, efficacix, celeritatis documenta dedit? Dixeris, lectum ejus, plura aliquando diligentix specimina, quam aliorum castra & campos, habuisse. Itaque, non jam deminuit ea res, sed auxit viri admirationem: magnusque apud hostes, venerandus inter suos **TORSTENSONIUS**, incorrupta ubique auctoritate famaque perviguit. Efficaciora sunt omni commendatione testimonia hostium, in literis, in sermonibus, in consiliis, hunc vigilem, hunc acrem, hunc vi astuque juxta impenetrabilem metuentium simul & laudantium. Et quam parum absuit, quin accederet ille affectus, cui nullus inter arma locus vulgo relinquitur? Certe, quin generosissimus quisque hostium, aut aliquo virtutis sensu præditus, mansuetudinem **TORSTENSONII** victis semper paratam, nec in medio armorum cursu incompertam, amaverint, dubitatio pridem argumentis etiam in vulgus notis, exempta est. Id ego præclarissimum laudis militaris genus reor, iram certaminis, libidinem gladii, licentiam temporum vincere: hoc est, immodicis modum, infinitis, limites dare; bellorumque inhumanam feritatem, æquitatis & juris temperamento coercere. Hæc certissima animi ad præclara nati fides, hæc virtutis non simulatæ tessera, hoc prudentiæ generosioris rarum sed verum pignus est. A quibus titulis longe absunt, qui jus sceleribus datum inter ornamenta belli numerant; neque rationem armorum in hostico reddi, præferociter arbitrantur. **TORSTENSONIUS** nullum paracendi prætextum neglexit: præter debitum imbelli ætati & sexui favorem, nunc virtutem, nunc miseriam hostis, in occasionem, nec clementiæ tantum, sed beneficii trahens:

hens : relictis post se subinde iis moderationis vestigiis , quæ nec socios sociis , amicos amicis , inter bella hodie æquo videas animo debere. Quis miretur , exemplo ducis tam notabili & perpetuo , insinuatum animis militum amorem veteris disciplinæ ? quam nostra ætas , postquam arte bellandi omnia sæcula vicerat , primum per fiduciam neglexit , mox per incuriam perdidit. Accessit amor imperatoris , longe efficacior recti moris magister quam metus & terror , cujus aciem præfracta peccandi consuetudo pridem hebetavit. Et supererat sane **TORSTENSONIO** , quidquid ad promerendam militum voluntatem vel ingenii , vel artis , vel fortunæ , conferri potest. Alloquio comis , aditu facilis , aspectu jucundus , desiderii militum ope , solatio , beneficio consulebat : incolumitatem eorum a periculo , corpus ab injuria & inopia , incredibili sollicitudine vindicabat : relictis præclare factorum incorruptus , laudator virtutis ingenuus , instigator meritorum munificus : pater castrorum , commilito exercituum. Cui , dum vicem reddere , commune militi cum legatis præfectisque studium est , nullus ignaviæ , nullus protervitiæ locus relinquitur. Longe ducibus æmulatio & simulas : cujus semina , nunquam fere militaribus animis ac temporibus desunt. Caritas imperatoris , gratias , amicitias , necessitudines inter præstantes viros serentis concilianisque , omnem discrepan-  
pandi occasionem imperumque absumserat. Æquum se omnibus præbendo , quia partibus nunquam accessit , partes sustulit. Hinc tam æqualis militiæ tenor , tam conspirans pro gloria nominis Suedici studium , tam ordinatus congruensque operum ac victoriarum contextus. Vincebat hoc tempore Suecia numero & præstantia ducum , quidquid est in orbe toto bellicosarum nationum. Sed , si defuisset , qui tam excellentes naturas ad se invicem & ad rempublicam temperaret accommodaretque , fortasse impedimentum inde verius , quam auxilium gerendis rebus existere poterat. Quid in minore numero , aliis hodie usu venerit , domestico ipsorum judicio arbitrioque vel declara-

rari vel premi satius est, quam nostra oratione præcipi. Apud veteres, Græcia certe, quo tempore summi bello viri numerabantur, sibi plus negotii, quam hostibus creavit: non facile repertis, qui inter se concederent. In regno firmioribus quidem vinculis virorum armorumque robur videas colligari: sed, agente procul rege, non dispar fere periculum imminet. nisi quod singularis exempli auspicio fortunaque, REGINA Suecorum paternæ militiæ majestatem, vim, disciplinam, concordii fortium ministrorum opera, eo usque potenti auctu provexit, donec non invictum modo sed tremendum hostibus robur, ad emerendam, quæ desperata propemodam erat, tot populorum pacem, ematuruisset. Dignissimi consiliiis fatisque Regiis obsequii gloriam, in tanto opere, TORSTENSONIUS tum aliis nominibus, tum vel maxime, quo dixi, retulit: quod tot tantorumque bellatorum excessos & magnis animis innasci solitos spiritus, in militiæ usum ac ordinem, sua auctoritate, humanitate, sapientia, quasi optabilibus vinculis, sic adstrinxit continuitque, ut nullum nisi ex æmulanda virtute certamen, inter ipsos emicaret; nulla sociandis curis & laboribus mora intercederet; nulla festinandis & copulandis armorum successibus tristitia obtrectaret. Præterquam enim, quod naturali quodam bono, in omnia famæ gratiæque ornamenta valebat: nemo repertus est, qui eum peritia belli, aut dispositione consiliorum anteiret. Comitabatur ergo imperium ratio: neque molesta videbantur jussa, quibus prudenter contradici non poterat. Licet venerari tabulas mandatorum circum absentes dimissas, aut præfuturis magnæ rei datas; tanta comprehensione rerum, tanta momentorum explicatione, ut non tam agenda præscribi, quam agendi sapientiam communicari diceres. Tam accuratos viri mores, non poterat non amare Fortuna, si ve potius, auctor & fortunæ & morum Deus: quem in omnibus auspicem, ducem, fautorem non modo habebat cum multis, sed propitiabat colebatque cum paucis TORSTENSONIUS: parum ille quidem à profano abfuturus nomine

mine inter imagines Suedicas, nisi Regis ejusdem magistri sui exemplum, ad signa & principia castrorum revocasset. Quod si enim, primam imperatoris laudem pietate definitenti, praesidio argumentoque opus sit, quæ potior esse ac praesentior auctoritas potest, quam GUSTAVI illius Magni: qui in tanto dignitatis, virtutis, artis apparatu instructusque, nihil absque divina ope vel patratum sibi vel patrandum, serio & graviter prædicare, nunquam dubitavit? Ex hujus instituti disciplina, Deus in consilio, Deus in acie, Deus in obsequio, praesentissimum semper nomen, rebus suscipiendis formam, perficiendis copiam, obtinendis eventum non patiebatur abesse. Injuriam enim Suedicæ gloriæ putabat TORSTENSONIUS, si bellum conspirante per omnia cælo inceptum gestumque, imminuto divinitatis commercio, in mores sæculi degeneraret. Neque tamen ariolis & vatibus, quorum secunda fuere, per licentiam publicæ perturbationis, tempora, auscultavit: infidum bellantibus genus, Deoque, cujus arcana citra fidem cælestis disciplinæ jactabat, adversum, ratus: quin & firmiora pie sperantibus, quam curiose divinantibus præsidia divinitus destinari, perpetuato consiliorum proventu, citra omnes belli offensiones, expertus. Id in animo, id in ore habuit: eo nomine grates, laudes, vota, Deo servatori, vindici, victori exsolvit. Sibi non alios de tantis rebus fructus vindicavit, quam ut patriæ, amorem; Principi, obsequium; Deo, reverentiam intelligeretur approbasse. Jactationem prosperæ militiæ, aut insolens omnino verbum nemo ex eo audit, Incorrupta adversus ambitionem & adulationes, civilitatis animi, magnitudinem famæ modestia tuebatur. In cetera quoque morum vitæque consuetudine, ea comitas, temperantia, lenitas, elegantia virum honestabant, ut nihil posset exactius ab eo expectari, qui in sapientiæ doctrinis ætatem contrivit, vivendique modum ad perfectam officiorum regulam conformavit. Literarum etiam studia, quibus vacare homini inter arma educto, non contigerat, & amabat plurimum, & filius, auctoritate; clientibus, stipendio

comendabat. Erat admirationi ministris Principum, & magnarum rerum administratoribus ac transactoribus, quotiens facilem in omnia prudentiam, responsis, literis, sermonibus expediret; sicque bonitate naturæ, tanquam præsidio doctrinarum niteretur: accuratus iudicio, cautus provisu, compositus colloquio, actu gravis. Aularum consilia, Principum proposita, Europæ fata, non ipso tantum ardui muneris tractatu, experientia; sed inter præmia belli, cum instrumento victoriæ, fortuna tradiderat, atque cum eo communicarat. Igitur non deprehendebatur subitis, non implicabatur perplexis, non decipiebatur abstrusis. Gratia in vultu, lepor in verbis, suavitas in convictu, raro prorsus spectaculo, huic Marti personam Mercurii induerant. Adeo autem non corrupti tranquillam hanc morum temperiem, valetudinis genus, quod maximis quibusque viris omnem pæne humanitatem excutit; ut ne ministrorum quidem cuiquam, Heri dolores, jurgio, convitio, denique asperiore verbo, luedi fuerint. Tale ingenium, quin inter prima orbis humani ornamenta eminere debeat, soli possunt dubitare, qui in maxima publicæ felicitatis ignoratione versantur: neque exempla laudis civiæ comparare didicerunt atque ratiocinari. Re militari præstitisse alios, alios civitatis regendæ peritia claruisse, magnæ quidem, sed usitatæ laudis est. Qui vero unus idemque fortissimus imperator & optimus civis comperiatur, fere non nisi fatali bono profecturis ad magna ætatibus & gentibus indulgetur. Quo nomine **TORSTENSONIUM** Sueciæ, & Sueciam **TORSTENSONIO** gratulari debemus; congruentibus in præclaros viros annosque fati, belli pacisque gloriam luculento fastigio consummaturis. Ornarunt mutæ felicitatis necessitudinem, divina humanaque præmia, quibus **TORSTENSONIUS** undique circumfluebat. Quantum enim est, quod de ingentibus virtutis imperatoriæ meritis, nihil fortuna delibavit, aut subtraxit? quod finis principio, successus consilio, celeritas fato, præcipitis instar rotæ festinanti, respondit? Quantum est, quod inter fulmina Martis, inter

fer-

ferrum & ignes, & infinitas mortes, incolumis semper evasit, qui moriendi exemplum animumque aliis subjecerat? quod ne captivitatem quidem in vita, nisi semestrem pertulit? Jam Regum, sine controversia, incomparabilium indulgentia, quo plus judicii, eo plus ornamenti habet. à GUSTAVO, genium veræ laudis virtutisque hauserat. huic auspicia famæ dignitatisque, imo & incrementa, si de usitatis gloriæ titulis ageretur, debebat. CHRISTINA, paternorum amplificatrix operum, auspiciis imperiisque suis gloriose functum, ditavit opibus, evexit honoribus, cumulavit gratiis. Hujus munere, augusti Senatus Regii confessor, ante expeditionem: in expeditione, summa cum potestate imperator: inde opimarum possessionum dominus, denique Comes factus est. Hujus invicem martum non nisi laureatis literis adiisse, tempora gratulationibus occupasse, annos supplicationibus impetratis illustrasse, omni præconio magnificentius est. Hujus, regium capiti decus auspicantis, triumphos usurpasse oculis, ornasse officiis, instruxisse trophæis: huic liberos educasse; hujus alloquio, suprema valetudine, respirasse; hanc reliquisse superstitem, primæ felicitatis modum & votorum humanorum summam explet. Neque à tanta claritudine publica, privatæ tenor vitæ discedit. Conjuncta nobilitate, ingenio, virtute singulari; utriusque Filii indoles, vel adolescentiæ rudimentis, vel spe pueritiæ, illustris; Filiæ tenera itidem, sed origini cognationique suæ fidem abunde faciens ætas; haud levia in solatium & decus nomina erant. Quid affinium & amicorum necessitudines? quanta concordia, quanta familiaritate, quanta mutui amoris suavitate pervigebant? Sola est, quæ intercedere prosperis videbatur, valetudo: cui medendæ nulla, leniendæ segnia vulgo remedia proponuntur. Verum, hæc quoque adversitas in gloriam cessit. Qui enim, inter morbi tam tenaciter urgentis perpetuas insidias molestiasque, tantas res gesserit; & præsertim fulmineam illam celeritatem, quam præcipuum Heroi-

Heroibus ad magna nitentibus telum divinitus attribui videmus, capere potuerit, primum in historiis exemplum **TORSTENSONIUS** erit. Cui nec brevis vita, ante initia senii abrupta, fraudi esse potest. Præterquam enim, quod hoc compendio ad meliorem vivendi conditionem translatus est: etiam immortalum, quæ edidit, operum, nec patriæ fructus; nec civibus exemplum; nec familiæ gloria peribit. Ipsius autem memoriæ ac nomini, quantus esse maximus potest, ingenio famæ, & victuris in ævum monumentis honor habebitur.

**I**Nterea Vos, generosa tanti Parentis proles, Comites **GUSTAVE ADOLPHE & ANDREA**, Elogium hoc ad paternum tumultum, inter suprema omnium ordinum studia officiaque, dicari finite. Titulus pollicetur ingentium meritorum, non laudationes: nec annalium nuntius invadit, sed iustis inservit funebribus: quæ nulla re decentius, quam simplici virtutum memoria, & inaffectatis civium vocibus instruuntur. Vos quoque, ô eximia pectora, post exequias, omni pietate obsequioque concelebratas, post sepulcrum præcipuo cultu & magnificentia adornatum, longe antiquius, vestroque sanguine dignius, memoriæ paternæ, officium debetis. Regenerare parentes virtutibus, æmulari meritis, hoc est demum, iusta solvere. Tradita est vobis ingens nobilitas, procreatione, exemplo, disciplina, ad hoc onus sustinendum, omni studio & contentione decet conniti. Generosi proprium est animi, reverentia sanguinis ad virtutis indolem excitari: neque ullos ad laudem duces sequetur, qui bene de republica meritis majoribus ac parentibus suis, non utitur doctoribus. Quod ut rectius faciatis, attendite animum literis, invadite memorias temporum, noscite virorum domum militiæque illustrium studia & opera: ut quanti Parentem vestrum facere debeatis, ipsa vos paulatim magnarum rerum meditatio atque comparatio doceat. Mementote præterea, quid de virtute militari, cujus præsidio patria carere nequit; quid



quid de laude imperatoria, maximus ipse imperator, Parens vester senserit: quanta asservatione verborum eos reprehenderit, qui omnem belli profectum honoremque à fortuito eventu suspendentes, huc neque adferri neque accommodari bonas artes oportere statuunt. Quam accuratis autem numerosisque officiis, boni civis munia contineantur sæpe vobis prædictum, sæpe monstratum, paterna dicta factaque revolvantes, cognoscetis. Jam, cum de LINNARTI TORSTENSONII, fortitudine, prudentia, liberalitate, modestia, æquitate ceterisque laudibus, pleræque in terris gentes, plerique magni viri, documenta sibi & adjumenta petant: quam indecorum & turpe esset, ad eos minimum inde utilitatis pervenire, quibus tantæ imitatio gloriæ, non disciplina tantum, ut ceteris, sed propiori jure, hæreditas est? quam si adire cunctemini, periculum est, ne non generis modo famam, sed patriæ in summo fastigio eminentis fortunam, parum habere propitiam videamini. Id quod à vobis quidem, procul aberit: quibus jamiam fixum sedet animo immotumque, paterni decoris præceptique vestigia premere; id est, per omnem vitam adorare Deum, venerari Principem, amare patriam; corpus ad laborem, animum ad virtutem exercere. Ita

non in monumentis literarum magis, quam in vestris meritis, grande TORSTENSONII nomen perennabit.



## VII.

## Laudatio Funebris,

*Magnifici ac de patria præclarissime  
meriti VIRI,*

FRANCISCI RUDOL-  
PHI INGOLDI

in inclyta Argentoratensi Republica  
Tredecimviri & Scholarchæ:

*Habita nomine publico in Academia tot meri-  
tis ab ipso ornata,*

Kal. Aprilis ann. cfo Id cXLII.

*Illustres meritis & dignitate publica Viri, Patria patres, &  
Scholarcha: Magnifice Rector, Spectabiles Decani, Ex-  
cellentissimi Professores: Nobilitate, Auctoritate, Pru-  
dencia, Experientia, Doctrina, Artibus ac Doribus va-  
riis Ornatisissimi Auditores.*

**C**Um ante quatuor & quod excurrit annos, JO-  
HANNEM FRIDERICUM SCHMIDIUM de-  
creta publice funebri laudatione ornaremus, dif-  
fusæque per omnem civilem gloriam virtutis ex-  
emplum, memoriæ temporum sollenni ritu consecraremus:  
non postremum hunc officii sui fructum tulit Academia,  
quod illud studium tum aliis præclarissimis in hac urbe vi-  
ris, tum vel maxime illi vehementer probatum est, qui præ-  
cipui Schmidiani actus plerumque dux & comes, adeoque  
laudum pars & auctor, paria olim suo merito expectare po-  
tuit, & omnino ab Academia, cujus perpetuus non dicam  
Patro-

Patronus, sed Pater erat, debuit. Intelligitis, Auditores, INGOLDUM illum à me signari: virum non sui nominis magis, quam meriti honore notum. Cui cum Respublica Argentoratensis & Academia (prævertar enim ad proximas necessitudines) plurima maximaque semper debuerit, plura tamen subinde optavit debere, si diutius, debendi nomina multiplicare licuisset. Sed enim ad ultima gratæ voluntatis officia & suprema munera perventum est, si communem humani moris iudicii que sensum sequimur, Auditores. Exemto namque inter ipsam præclare de nobis merendi industriam, quid aliud tanto viro potuimus reddere, quam carimoniam funebrem, & exequiales ritus (qualia cum multis communia habet vir nequaquam cum multis comparandus) & nunc Academicam hanc celebritatem, qua inter paucos sane, neque sic fortasse satis, illum veneramur? Namque id omnino mihi & verendum & fatendum est: siue respiciam civilis actus varietatem, qua ipsam Reip. amplitudinem amplexus est; vel gestorum magnificentiam, quæ non ad Urbis modo nostræ, sed ad sæculi splendorem pertinent; vel productioris ævi perfectionem, exemplique prolixitatem; qua sicut Patriam abunde cumulavit, ita affectus civium suorum, & præsertim nostram orationem facile obruit. Equidem cum antehac aliquoties ex hoc loco verbo facerem, non parum adversus argumenti magnitudinem recreabar ejus præsentia, de quo mihi nunc ita loquendum est, ut non possim non vel inter dicendum meminisse, vel ad dicendum desiderare, conspectum venerandi illius vultus, qui quantum fiduciæ & roboris solebar olim dicenti aspicere; tantum jam animi & artis intelligitur mœrenti detrahere. Verum hæc & talia, voto sane nostro & expectationi concionis obstatè possunt: argumento & æternitati laudum, quas delibabimus, non possunt. Consuetudini enim & vulgo potius, quam rationi accuratius subditi obdiderit, qui inter ultima Academicæ erga Ingoldum pietatis monumenta hunc congressum posuerit. Du-

catur hinc exordium ejus officii, quod omnium nomine, quos alma hæc studiorum sedes & magistra sui corporis partes agnoscit, susceptum, omnium cura diligentiaque, per omnem vitam, ad omnem posteritatem, ex omni occasione propagabitur. Nulla illucescet temporis nostro festivitas, nulla posteris Musis celebritas instaurabitur, quam non insigniat fausta recordatio & venerabilis memoria ejus viri, qui maximis Academix festivitatis, vel quia præfedit, auctoritatem; vel quia celsiore fastigio & ipsas & Academiam extulit; auspiciis quodammodo commodavit. Nulla erit tam ingrata fama, nulla tam incuriosa virtutum ætas, nulla tam negligentem occupata eruditio, quæ tanti nominis celebrationem ad se non pertinere arbitretur. Est enim, Auditores, omnino quædam in animis hominum magnæ virtutis admiratio impressa: quæ & negligentiam splendori summarum rerum advertit; & hebetudinem, radiis gloriæ illustrat; & pietatem, meriti religione pignerat ac obstringit. Neque is vel temporis affectus, vel præsentis spectaculi stupor, sed solidum & cum ipsis reipublicæ, imo cum orbis hujus annis victurum & in majus profecturum credi monumentum debet. Quicumque in quocunque reip. negotio, magistratu, dignitate deinceps versabuntur: Ingoldiana vestigia primum invenient, mox intelligere discent, denique studebunt æstimare. Ipse Reip. genius, ut sic dicam, & fortuna animis civium inspirabit singulare publici egregii tuendi arcanum, imirationem, inquam, Ingoldiani exempli, per omnia spectati, probati, felicitis. Volentibus enim fortasse vobis erit, Auditores, me statim à magna & omnino tali cogitatione ordiri, quæ nec officio, quod obimus, inferior; & pietati, quam omnes profiteamur, opportuna videri potest. Igitur repetenti fata Argentoratensis status, & cœlestis in hanc Urbem curæ seriem, qua licet, animadvertenti mihi vix dubium relinquebatur, post elaborata à magnis viris superioris ævi incrementa, post sustentatum suppari arte præcedentis sæculi florem, INGOLDUM nostrum in hujus sæculi præsidium, circa cujus initia reip. capel-

capessere cœpit, divinitus fuisse destinatum. Tumescabant pridem, quæ temporaria curatio & indulgentia instauratæ pacis antea texerat, Germanicæ rei vulnera: & jam satis admovebatur is terminus, qui imperium secundissimo potentix cursu ad Europæi orbis decus apicemque provecum, non concuteret modo ingenti motu, sed conversione rerum maxima pæne affligeret. Communis patriæ forti, in extremis ferme finibus sita, sed intimis prorsus nexibus illigata erat Argentina. in hanc curas non uniusmodi populares, exteri, amici, inimici, alii denique varietate temporum varie animati intenderant. hinc exorta negotiorum moles, & ostensa undique periculorum ancipitia, & immensum aucta reip. bene gerendæ difficultas. Ad quam sustinendam pariter atque profligandam, opus erat, Atlantes quosdam & Hereules non è fabulis optare, sed è cælo in salutem civitatis expectare. datus est inter primos INGOLDUS: vir & natura & divina benignitate, ad animos hominum vel gratia demerendos vel auctoritate permovendos quodammodo factus, omnique impetrabilis efficacix instrumento exquisitissime adornatus. Illo auctore atque agente cœpit in posterum Respublica in tristibus confidere, in arduis eniti; sibi consulere, aliis non deesse, fidem tueri, magnanimitatem non dimittere, omnia cœpta singulari prudentiæ arte non moderari magis quam honestare. Cum enim futuram viri magnitudinem mature civium animi præfagirent, per rudimenta quidem minorum & incrementa majorum dignitatum omnia, ex instituto patrio ac disciplina sui status, traductum, citius tamen, quam ferme solet accidere, in sanctiorem utilitatum publicarum officinam, in venerandum istud gravissimorum consiliorum penetrale, quod augusto Tredecimviralis collegii nomine colimus, communi & velut una totius urbis sententia, ascrivere. Atque hoc est illud stadiûm, in quo, rarissimo exemplo, triginta amplius annis, illustria Ingoldi merita, magnis occasionibus instincta, magnis accessionibus cumulata, perpetuis successibus promota, in oculis Germani an humani

oibis dicam, inter honorum applausus & prudentum admirationem, decurrere. Nihil domi, nihil foris absque consilio ejus & ope suscipi. quicquid deliberatum arduum, actu impeditum, in hujus humeros rejici. quicquid inventi novitate emendandum, reparationis industria instaurandum, dirigentis auctoritate munendum, consuetudo aut temporum casus superavit; Ingoldianam videbatur dexterritatem exspectulare. Quo factum est, ut nullum praefecturae, inspectionis, curationis nomen civitas nostra cognitum habeat, quin inter praefectos, inspectores, curatores Ingoldum suum ubique nunciet, ubique commendat. Dixeris, nemini patrifamilias, tam accurate tam expedite rei familiaris suae partes perspectas esse iudicio & notitia comprehensas, sicut is Remip. suam animo pervidit, ingenio complexus, dispositione moderatus est. Quae ad Senatum & judicia, ad statum regiminis & munia, ad jura civium, mores civitatis, arcana civilitatis; ad sociorum federa, amicorum usum, Principum Urbiumque pacta, vicinorum consilia, exterorum proposita pertinerent: quid opis aut subsidii aut spei in viris, vectigalibus, armis, vel ad reip. facultatem extaret, vel ad ultimos casus lateret: quae copiae, quibus temporibus sufficerent aut servarentur; quid & unde importari posset utiliter, quid exportari: & illa longe graviora, quomodo perturbationi temporum intercedendum; quomodo cum magnis necessitatibus & sumptibus, aerarii tenuitas, civium paupertas concilianda, id est, quomodo inter ipsam tempestatem & procellas saeculi, velis temisque moderandum, clavus obtinendus, cursus non deferendus, navis denique esset servanda: haec & talia non intime modo perspecta, sed ad praesentissimos usus prompta habebat Ingoldus. Neque vero est, ut quisquam ejus penitiae limites Argentoratensis curiae cancellis, aut urbis munimentis concludat, in tam celebri Germaniae loco ita gerenda est respublica, ut totius conditio imperii, quod Romanum vocare non immerito prudentes perseverant; oculis & animo comprehensa, subinde civilem actum ad maturas

curas idoneasque rationes convertat. Sciendum quid cohæreat cum universis & singulis, quomodo cohæreat, quæ nexuum firmitas, quæ in firmitate religio; quæ ex comitatus officio & observantiæ; quæ ex juris aut potestatis titulo vincula emergant: quid è talibus conveniat allegare in præsidium causæ, quid ipsa occultatione validius eam juvet. Esse sua Principibus, domibus, civitatibus ad invicem pignora, consilia, cautiones, spes metusque. qualia tetigisse aut verbo tentasse, aliquando periculosum fuit, quia arcana sunt: ignorasse, semper perniciosum; quia præcipua publici actus momenta sunt. Non decuerit altius penetrare in re profunda pariter & inexhausta: nisi quod cogitatio cuius prudenti facilius suggereret, quam oratio persuaderet auditori, majoribus solertiæ adminiculis nostra tempora & statum indigere, quam cum terrarum orbi amplissime quidem diffusis provisionibus, sed simpliciore consilio & animosius jura daret Romana Majestas. quæ mihi utique tantum in consulendo difficultatis acquisivisse, quantum in possidendo spatii amiserat, videtur. Certe illud extra dubium fortassean ponant, qui accuratiore studio conditionem imperiorum scrutantur, Germanicæ rei tractationem, à sæculo & amplius, plus aluisse reconditoris prudentiæ & laboris, quam in maximis quibusque regnis suspicari unquam fas fuerit, cumque ipsa membrorum in toto corpore competentia, non parum habuerit semper subtilitatis, & incurrerit postea obscuritatis: factum est, ut nemo in partibus feliciter versaretur, nisi qui universi genium percalleret; nemo cujusquam ex Ordinibus, quos vocant, commoda promoveret, nisi qui communem & intimam ordinum, ut sic dicam, coordinationem probe intelligeret. quæ sapientia in dies, nec sine omine secuturi nescio cujus fati, impeditior, Ingoldi tempora sane, non item consilia conturbavit. Excitabatur in capaces sæculi & discriminum curas animus ad hoc ipsum servatus, ut ostenderet publice: Argentoratensium civitati nunquam defuisse recta cupiendi constantiam, superfuisse ardua tractandi indu-

industriam, crevisse etiam inter adversa, sperandi meliora fiduciam. Nam hac recidunt ferme, quæ vic magnus, innumeris artibus, maximaque contentione, pro patria aggressus, sic perfecit, ut virtutem ejus nemo ausit disuti, laudes nemo possit explicare. Multum hic fortunæ debetur, multum Numinis secundantis favori: verum quod omnino majus præconium excogitari potest, quam occupatus divinis operibus homo, & in terris cælorum majestate fultus maximarum rerum administrator? Hinc emergunt scilicet tot ac tanta illa præsidia, tot agendi instrumenta, quæ non minus agentem, quam successus actionem, exornant, hinc est, quod ex uno pectore, inusitata consilii copia dimanat; quod uno sæpe momento, amplissimi provisiō temporis concipitur; quod in abditissima, observatio; in diversissima, cognitio; in subitanea ratio sufficit, hinc est, quod **INGOLDUS** aliquis per gentes suæ reip. auctoritatem, sine ambitione ostentat; pericula sine temeritate sustinet; emolumenta sine calliditate amplificat. Quis & quantus est ille qui acerrimas optimasque mentes in sui cultum excitat; inimicas, ab odio sui divertit; obliquas, sibi devincit? qui delicatarum fastidia, morosorum censuras, capriosorum tendiculas devitat ac declinat? qui judicio negotia, provisiōe eventa, ut arbiter dispensat, ut vates anticipat? Conducas in unum infinita talia, quæ humani actus vel significant subtilitatem, vel gloriam illustrent, & deinde rursus quæras licet, quis & quantus est ille, quem summorum in rep. omnique civili vita operum effectorem & magistrum admirari fas est? Hic, postquam nobis Romani, invicti Livii & aliorum calamo, suos Camillos, Fabios, Nasicas, Catones, Æmilios, descriptos & in clarissima historiæ luce monstratos dederint; postquam Athenæ, suos Themistocles, Aristides, Pericles, Thraſybulos, Phociones, ex antiquiore notitia produxerint; postquam Spartani suo Lycurgo, Corinthii Timoleonte, Thebani Epaminonda, Sicyonii Arato felicitatem suam probaverint: nihil à suo jure alienum fecerit Argentina, si contra vetustatem se ac sua miran-



mirantem, nominet virum, Livii historia, Plutarchi commentationibus dignissimum; atque INGOLDI vocabulo exemplum tantarum rerum proponar; quas cum pro sua copia facundiæ extulerit studioli memoriæ & posterorum ætas, nostra tempora, condendis annalibus iniqua, interim vix attingere dicendo, aut cogitando intelligere solent. Nam nec æstimantur facile, cum difficulter & raro gignuntur virtutes: nec propagandis laudum documentis serio student, qui de suo statu periclitantes, ferme posteros desperare. Si tamen omnino serio annalium honore Deus vel Germaniam vel Argentinam aliquando dignabitur, & post nescio quarum ineptiarum conatus, prudentis viri manu, virtutes nuperæ elogium, vitia infamiam, memorabilia cetera ætatem ferent: exiniium profecto decus erit ejus nominis, cujus in aulis Principum & Regum frequens & prospera occupatio, in nationum & civitatum animis illustris operæ veneratio, in fama & ore hominum testatissima summorum artium prædicatio, sæcundam præceptui operis vel varietate vel nobilitate materiem suppeditare potest. Nobis enim, angusto tempore constrictis, vix tribus verbis licet indicare: Ingoldum obivisse legationes numero plurimas, tempore diurnas, tractatione & laboribus maximas. aliquoties solus, sæpius cum magistratibus collegis, nec raro cum Schmidio illo Nostro, semper autem cum auctoritate & successu ivit, egit, pertendit. octuagies circiter reip. causa peregre absuit, adeoque per complures annos patriæ conspectu ac necessitudinibus caruit, ut his cives sui inter carissima pignorum tranquille fruerentur. quorum interim somnos illius vigilia; securitatem, illius pericula custodiverunt. quibus neque paucis neque modicis, sed fultus tamen ubique sua virtute ac fortuna, adeoque non citra honorem magni exempli, defunctus est. Deprehenderat eum aliquando cum focis & comitibus inopinata vis aquarum, torrentiorque quam pro more & specie amnis, fatum Alexandri Epirotæ non minabatur jam, sed intentabat. nisi quod destinatum tantis rebus absolvendis virum, nulla

vis extinguere, nullus casus interciperere poterat. Scilicet amat divina Providentia, non exercere magis incertis subitisque casuum virtutem Heroum, quam præstantiam, salute inrer anticipitia rerum conservata, velut illustri documento mortalibus declarare. Certe præsentissimæ mortis ereptus, non tam periculi magnitudine multatus, quam miraculo liberationis & amatus à Deo plurimum & honoratus videbatur. Audivistis quendam quasi sævientis naturæ conatum: cujus maximi quique impetus vix sunt vehementiores, consternatæ in arma & furorem multitudinis impotentia, cum qua plerumque comparantur. Hoc quoque discriminis genete Ingoldiana virtus enituit: cum nobilissimæ mercatibus & auspiciandi decore imperii civitas, triennali dissidio conflictata, vix tandem post Cæsaream opem, amicis etiam adniventibus, ad compositionem statum convaluit. Fallor an verissime in Nostrum quadrabat, quod Poërarum princeps, non sine singulari sapientiæ & artis exemplo, viro gravi & magno, in tumultu civili, tribuit officium:

*Ille regit dictis animos & pectora mulcet.*

Auditus est, ut alter Menenius Agrippa, cum admiratione eloquentiæ, quam prudentia moderatione tempestitiva gubernabat; adeoque cum favore, quem plena cælestis cuiusdam gratiæ facies convictis & inclinatis ad meliora animis infinuabat. Cujus tam ardui negotii successum, inter periculi totius reputationem, sæpe Deo postea seriis laudibus in solidum vindicabat. sicut & alia multa quibus in Comitibus imperii, in congressibus Principum, in commercio civitatum, non difficultates modo rerum, sed spem suorum ac expectationem vicit. Itaque passim felices tali viro Argentoratenses prædicari, passim suspici Reip. dignitas: quam nemo unquam gravius expressit, nemo validius sustinuit, nemo majori splendore illuminavit. Nec fuisset sanè stabilis illa civitatis fortuna, illud decus, nisi ceteras Ingoldi virtutes immobilis patriæ caritas & invicta pietatis constantia æquavisset. Non una aularum, nec modica, per-

pertinere ad ornatum augusti Consilii ac Senatus sui existimarunt, si inter principes viros & summa nomina, etiam Ingoldus ille niteret. Crediderim magnis Principibus arcano suæ fortunæ instinctu & notitiam & favorem præstantium virorum conciliari: sicut vicissim maximas quasque artes naturali sceptrorum reverentia imbutas licet animadvertere. Sed quid faceret Noster, quem cultus invitantis majestatis, & necessitudo retinentis patriæ, diverse trahabant? Videbat sane, ubique Patriam esse ubi Deo & egregio publico servimus: videbat, foris sæpe magis patriam quam domi juvari posse; videbat magna consilio, prospera eventu translata virtutis exempla: sed & illud, quod arduæ deliberationis caput est, videbat; Remp. Argentoratensem, adversus incerta temporum, vel maxime talibus viris indigere, quorum apud extraneos æstimata pariter & expetita virtus esset. Hæc & talia non perfunctoria æstimatione pensabat & videbat vir Prudentissimus: quanquam fortasse nulla prudentiæ ratio est, qua in tam anticipari mentis humanæ consulatione, videri satis & pensari potest, id quod est optimum factu ac prosperissimum. Acerimas quasque mentes fatigat ista dubitatio: cui sola exitum dare divina moderatio solet, cum ad sensum cælestis constitutionis, interna quadam vi, dilectas sibi animas proprius admovent. Id quod sæpe agnovit Noster: cujus pietati & nos merito accommodamus prædicationem ejus constantiæ, qua tot opulentia, tot honoris fastigia, civili dignitatis modo posthabuit. Verum quid illa consecramur, quibus abstractum à nobis tanti meriti Legatum, quisquis intelligere cœperat, cupiebat? cum tot in oculis, tot in animis omnium sint, quibus redux è præcipuis legationibus plerumque suam rempublicam sine exemplo beavit, munera dicam an beneficia? Inter quæ non differo illud nominare, quod Academiam nostram, imo Academia nomine Rempublicam, & utriusque causa solennem hunc cœtum interius afficit, & obstringit fortius. Quod enim in orната summis juribus studiorum Universitate discimus & docemus:

cemus ; quod amplissimos honores literarios petimus & impetramus ; quod celeberrimis Principum quorumque in Scholas beneficiis gaudemus , fruimur , eminemus : INGOLDUM debemus potissimum , Auditores . aliquoties audiui memorantem , quæ difficultates intricaverint id negotium , quæ interpellaverint moræ . & quid amplius dicam ? si recte singula putamus , Unum hunc tantæ rei auctorem idoneum , unum confectorem felicissimum judicabimus . Non dubito , quin apud omnes , qui literas amant aut sequuntur , instinctionem reverentiæ habeat hæc auscultatio : forte & prudentiæ commonitionem apud reipublicæ studiosos . Nonne enim hoc complementum est Argentoratensis gloriæ : quæ postquam maximis quibusque laudum variarum profectibus hoc fastigium imposuit , nil videtur habere optandum , quo ascendant ? Sed nos , reposito fidelibus providisque animis isto metu , orationem ad Ingoldum Nostrum reducentes , hoc rudimentum Scholarchæ serio admiramur : imo vero auspicii tanti mentione ad principia nostri status velut revocati , quanta sit futura præclarissimi muneris provisio , vel inde intelligimus , quia tam illustis fuit inceptio . Ita accessit ad tuendam auctoritate & cura scholam , ut ampliore in ipso accessu sui studii palæstram , & tanquam singularis operis capacem sibi constitueret . Scholarcha idem & Scholastici fastigii auctor ; curator idem & instaurator , uno tempore , una opera , quantum dedisset , & quantum daturus esset , inusitato & plusquam pignore admirationi pariter ac spei omnium ostentavit . Itaque ergo à viginti amplius annis , quidquid juvare Academiam aut ornare poruit , Ingoldianis non curis modo sed meritis contineri satis constat . Ille , ut comparatæ dignitati sua visconstaret , Imperatoriæ munificentia sua auctoritas , id est , ut esset Academia , quod diceretur , ex summo studio , nec sine objectis crebro molestiis , contendit : Ille , ut cathedræ doctoribus , auditoria studiis , convictio moribus , sceptræ imperio , leges disciplina florerent ac præcellerent , assidua & efficaci solertia advigilavit : Ille , ne honor sapientiæ , præ-

præmia industriæ usquam deessent, favore prolixo & animosa benignitate prospexit. Nemini illum præstantia lauit, quin æstimo eam suo ornaret; nemini modestia, quin comitate quadam attolleret. Alia amabat in alio: neque unquam cuiquam fraudi fuit, alicubi defecisse, si in proprio, ut ita dicam, sui muneris opere valuisset. Videtur hoc vel ideo tangendum esse, quia eam discretionis, ut hodie loquuntur, laudem pauci intelligunt dicam an merentur. ut quisque ingenio & censuræ præfecti cuiusdam, in minimis displicuit; fastidio, contemptu, etiam odio, univérse transmittitur (utinam sufficeret id dixisse) imo revera afflicatur. Quanquam longe dignius est tam celebri loco audiri, quo affectu, quo consilio totam, ut cum sapientibus appellitem, harmoniam Academici corporis sustentaverit vir tantus atque concinnaverit. Habebo, ni fallor, optimum quemque meæ asseverationis testes & querelæ socios, si dixero: incesisse alicubi pravum morem, quod unum tantummodo aut alterum studiorum ac scientiarum genus in Academiis fovetur, & in quendam quasi florem adornatur, ceteris obiter curatis, ac pæne interdum neglectis. Noster, cum sciret ad ludibrium Cæsarei beneficii & ad manifesta Reipublicæ detrimenta eam rem pertinere, mirifico industriæ & bonitatis temperamento perfecit, ne qua eruditionis, celebritatisque literariæ commendatione Argentoratensis Academia, suo nomine minor esset. Sua divinarum rerum tractationi servata majestas: sua Jurisprudentiam decorabat gloria: non Medicinæ vel Galeni scientia vel Hippocratis peritiam deerat: Philosophiam quoque nec sapiendi nec differendi facultate inferiorem operabat. ejusque voti, ut se faceret compotem, æquilibrio quodam sagaces in omnia curas dispensans, tum firmioris fundamenta status jecit, tum unicum famæ rarioris iter suæ Filiæ (quo enim nomine potius hodie memoretur Academia?) opere publico præclare emunivit. idque ea moderatoriis instituti arte, quam modo occæpi dicere. Namque licet tanta esset facilitate, ut in Academia non videretur osurus æmu-

los; æmulationis tamen professio odio, pestem Academicæ perfectionis maximam avertit. cumque nimis conatus sapientiæ à profuturis publice laboribus accurate, si quisquam alius, didicisset distinguere, ipsa viri peritia pro munimento erat, ne à generosa sapiendi ratione uspiam decurreretur. Animadvertitis, Auditores, me ex plurimis paucula quædam seligere, quibus consummatum magni Scholarchæ exemplar, non oratione mea expressum intueri, sed indicio facto declaratum, meditari intra animos vestros ipsi ac formare possitis. quod facilius nimirum erit, si nullas voluntari laudatissimæ dotes; nullas dotibus occasiones defuisse; adeoque ad prolixam virtutem temporis insuper prolixitatem accessisse cogitaveritis. Vocetur ergo & sit. periodus hæc Ingoldiana: &, cum bona venia vestra, Scholarchæ, qui vixistis, quique vivitis, designetur Academicæ celebritatis epocha unius elogio, quem supremum Numen non auspicandi modo felicitate, sed diuturnitate administrandi ceterorum fato supervexit. Quamvis haud dubie futurum est, ut communi omnium judicio, quicumque cum Ingoldo præfuerunt, Zornii, Kagenecii, Strumii, Prechteri, Draxdorffii; itemque Storckii, pater & filius, cum Helleri, Meieroque, splendidiori nomine posteris narrandi habeantur, quia ipsum Scholasticæ dignitatis apicem, ipsum consummatæ eruditionis florem curarunt, adeoque præteriti temporis vota impleverunt, & venturæ ætatis industriam pignerarunt. Verisimile est, cum illustres illæ animæ, magni illi & primi rei Scholasticæ Argentoratenensis triumviri, Jacobus Sturmii, Nicolaus Cniblius, Jacobus Meierus, nascentes in hac Urbe Musas piis manibus susciperent, patrioque sinu educarent, nihil ardentius eos in optatis, nihil certius in spe, nihil divinius in præfagio habuisse, quam quod successores eorum veluti hereditaria & fatali cura, augmento tanti pignoris provehendo, & postea præsertim aureis, quæ dixi, temporibus, imponendo florentissimi status culmine, præstiterunt. Fuerit ergo absolutus, quod jam alibi cogitationibus publicis suggelli, fati Scholastici ille

ille cursus, qui plerumque, ubi ad summum pervenit, contrariò neque auspiciato itinere, humanis rebus suam fragilitatem inopina volubilitate exprobrat, nisi quod perennitate Reip. nostræ, quam Deus testatori subinde cura fovet ac (ita auguror) fovebit, melioris spei ac fiduciæ robur merito sustentamus.

Ceterum sicut jucundissimum esset & magnificum auditu, si qua dicendi facultas posset illam magnitudinem Ingoldi, qua pacis artes, bellorum curas, decus Patriæ, suis venerabilis, exteris mirandus sustinuit, exponere: ita utilioris forte magisque necessariæ res operæ fuerit, Tibi generosa & studiosa Juventus, cui spes ornandi sæculi, juvandarumque patriæ incumbit, magnitudinis tantæ rudimenta, & quædam quasi imbuendæ ad summas laudes mentis mysteria, fidei amicoque monitu commendare. Si enim statux veterum memoriales, si cippi gestorum interpretes, si imagines nominis & familiæ indices, non tam ut illustrium virorum vultus nosset & famam sciret flos patriæ, quam ut artes meditaretur, virtutem investigaret, passim viscebantur: consentaneum erit, nostram quoque pietatem, qua nata in exemplum publicæ præstantiæ nomina celebramus, admonendis succrescentibus in usus civiles ingeniis, erudiendæque posteritati, consecrari. Equidem vultus Nostri Herois adhuc firmitus animis vestris hæret, & animorum representatione oculis obversatur, quam ut orationis nostræ pictura, aut penicillo Apellis cujusdam indigeatis. Atque si omnino vos penitior spectaculi gravissimi voluptas raperet, non dubito, qua estis judicii ac studiorum rectitudine, ea vos inprimis visenda credituros, quæ nullam oculorum aciem, nullum videntis conatum admittunt: ad quæ nimirum æstimanda, diviniior illa, quæ conspectui patet, forma vos instigaret. Illam oculorum vim atque vigorem, quem nemo sine sensu venerationis aspexit, vividissimi indolem animi ferre, acerrimæque mentis pignus habere, ex Angusto Suetonii vestri, ex Arminio Velleji intelligeretis: illam vultus comitatem, sed cum gravitate; illum florem pul-

cri-

critudinis, sed cum dignitate regia, Plutarchi Pompeio, virtutum maximarum hîdem amplitudine speciei merito, compararetis: totius corporis venustatem, & modice quidem, sed cum condecencia succi plenissimorum artuum erectam staturam sub exemplo validæ in sanitatem & libores naturæ vobis commendaret, Curtianus Alexander, Nepotis Eumenes, Agricola Taciti. Reperiretis è studiis vestris, unde per singulos ætatis gradus, è corporis habitu quædam sapientiæ instrumenta concinnari possent, quibus denique planum fieret, tam singulares vultus, divinis quibusdam gratiis habitari, heroicæque notam majestatis per oculos humani generis circumferre. Non enim concesserim, quod nonnullis placet, solius genituræ id beneficium esse, siderumq; clementia, & parentum conditione debere æstimari. Est in cælis Deus, est in terris, qui terrena generatione quidem, sed ad cælestes naturas, maximorumque operum capaces formandas utitur: atque sub spectabili schemate eas in theatrum humani orbis actusque introducit. Secundas, post hanc vim, familiæ parentumque nobilitas agit: de qua ipsa interim altius, quam ferme usitatum est vulgo, præsertim in honorem exempli, quod tractamus, sentiendum, ac loquendum est. Floruit Ingoldiana familia in hac Urbe, vetere & eximio patriciatu à tribus amplius sæculis: perpetuis & muris nobilitati Alsaciæ connubiis innexa: beneficiis in ecclesiam, in pauperes, & quæcunque piam causarum nomine donari dicuntur, copiose & insigniter in hunc diem celebris. Tulit ingentia meriti ac famæ specimina: quæ jampridem inter monumenta egregiorum civium, clarissimorum magistratuum, nostra custodit Respublica. sed hoc parum generose in laudibus Nostri cælitis sonaret, nisi ipse generis luculenti fatum, ingenio implevisset, virtute amplificasset, meritis consummasset. Nihil pertinuisset ad hujus diei celebrationem Henrici Ingoldi prudentia, qua ante centum amplius annos, suam Rempublicam illustravit: nihil amor & studium in litteras literatosque, quod Erasmos, quod Melanchthones laudatores me-

ruit:



ruit: nisi Franciscus Rudolphus, lucentem avitis vestigiis semitam ingressus, etiam ultra profecisset. Huc vobis contendendum est, Commilitones; huc vobis ductu exemploque Ingoldiana juvenia præbit. quæ nunquam suæ fortunæ defuit, nunquam invitantibus ad majora fatis negligenter paruit. Et ante quidem, quam sui obsequii rationem ipse puellus subducere posset, egregia Vitrici Didymi Obrechtii cura (nam parentem necdum trimulus amiserat) tum fide ac indulgentia piissimæ matris diligentissime educatus & liberalissime institutus est. Certavit cum annis profectus studiorum: quæ non rudimentis tenuis attingenda, non eminus & voto affectanda, sed interiore ambienda commercio videbat iis esse: qui communibus reipublicæ utilitatibus suam ætatem suam cuperent operam rite consecratam. Est omnino major secretiorque, quam verbis explicari potest, Doctrinæ sive liberali Musæ cum Republica necessitudo: non in Unius solum imperio, quod facilius creditur & frequentius animadvertitur; nec in Optimatum modo potentatu, quod unum instar omnium & supra omnia exemplum ejus civitatis probat, quæ & duratione & firmitate prorsum hætenus est incomparabilis: sed & popularem statum, nisi hæc anima vegetet, nisi hic nervus roboret, periculum est ne illa consequantur, quæ omnium censura sæculorum, omnium prudentum querela in eo regiminis genere castigavit. Discite, quicumque patriæ discitis, patriæ studetis; discite, pro nescio quibus arcanis imperii, arcanum patrium & fatale: Popularem reipublicæ formam literarum beneficio, exuere quicquid habet invalidum; induere, quidquid ceteris statibus validum tribuitur. Exempla domi quærite, aut quandoquidem obvio monumento prostant, considerate saltem ac perpendite. Utinam enim, quod oratio nostra persuadere nequit, potentiore nota animis inscriberet vestris Ingoldi Nostri memoria. tot illa quidem tantorumque fertilis operum, quor & quanta non ad æternitatem Reipublicæ magis, quam ad testationem efficacis doctrinæ intelliguntur pertinere. Date mihi virum, qui ad gravissimorum tractationem negotiorum

o

pere-

pergre missus, inter præcipua prudentiæ ac doctrinæ nomina, jura disceperet, consilia arbitreretur, responsa pronunciet? qui domi occupationum cumulos ordinet, difficultates expediat, exitus inveniatur? an expectabimus talia, nisi ab iis, qui admissione sapientiæ familiarius imbuti, ex ipsius adytis sapiunt, ex ipsius ore verba mutantur? Defecisset haud dubie sub ingenti, & qualem fortasse nemo unus in hac Republica sustinuit, mole, Noster Atlas, nisi humeros adversum onera temporum munivisset valentissimæ genius eruditionis. qua illorum quoque gloriam æquavit, qui summos studiorum titulos & cathedras æmulantur. Tantum potuit, conceptus inter initia discendi ardor, auctumque cum adolescentibus studiis ignaviæ odium, & favens perficiendis artibus fortuna: cui pueri jam industria in deliciis, juvenis scientia in amoribus esse cœperat. Nec levia tanti affectus sive irritamenta sive fomenta tum Argentoratenses Scholæ, tum celeberrimæ per Germaniam Academiæ, quas eximiis virtutibus complures ornaverant, passim loquebantur. Jam Jurisprudentia sui fastigii insignibus merito decorandum judicaverat, jam Academia suis Professoribus jungendum destinatione ac voto disspexerat: cum Divina voluntas, veluti manu arreptum, ea locavit sede, ubi non juris modo sed salutis publicæ consultus, Academiæ caput potius, quam pars, quidquid boni de eo in spe vel illa vel ista expectatio habuisset, optato eventui impleteret, imo vero majori eventus auspicio longe longeque superaret. Scilicet aut hoc exemplo aut nullo alias liquet, quam sint ad omnem honestatem duces, ad dignitatem auspices, ad moris rectitudinem magistræ, liberales disciplinæ. hæc, quidquid natura iniecit, excitant; quidquid usus comparavit, componunt: quidquid elegantia suadet, virtus imperat, actus molitur, interiore quodam consilio moderantur. Justitiam in judiciis, commercio, sermone, quivis amare potest: sed penetrare ejus artes, disponere articulos & momenta, observare pericula, Ingoldi alicujus munus est: ille curam tuendi sanctitatem fori maturis provisionibus dispensabit; ille auctoritati suæ tempus leget,

leger, auxiliis locum constitueret. Non severitas deerit reipublicæ, non clementia erroribus: non facilitare aditus, non alloquia majestate carebunt. hic inveniet miser, quod soletur: hic quod terreat, improbus offendet. Splendet in viro dignitas, non superbiat: agnoscet, quod veneretur, aula: nec desiderabit, quod amet, libertas. Civis inter cives, princeps inter principes, & sic tamen civis, quo similior ceteris jure, hoc virtute eminentior erat. Nihil in gestu humile aut arrogans: nihil in nutu molle aut fastidiosum; nihil in habitu ostendebat cultuque, quod vanitate displicere antiquis, luxuria novis placere moribus posset. publice verendus, sed quasi usus, non quasi utens auctoritate: privatum jucundus, affabilis, urbanus, officia comiter, amicitiam fideliter, patrocina benigne, cum omnibus exercebat. Domus quoque inter magnifici & elegantis institutum medio cultu instructa, mores domini & dispositionem invisentibus loqui videbatur. Et si potiores te deliciæ tangerent, habitabat ibi conjugalis concordia & humanitas, satagebat familiæ industria, fulgebat liberorum indoles: quanquam magna sui parte amabile lumen violatum est & subductum, erepta inter teneram ætatem subole mascula trigemina. Quem casum, ut & ceteras suorum mortes, alto quidem doloris sensu in animum admisit (qui enim singularis illa bonitas aliter potuisset?) sed ne oblitus tamen videretur illius constantiæ, qua adversus tot ex publico molestias tot discrimina, invictus semper steterat, semper staturus erat. Nam, cum de cetero, nepotum numero ingeniisque jacturam filiorum fortuna solaretur, hic sine missione pugnandum erat: constituta semel & mansura lege, quæ magnos viros non magnis modo laboribus; sed invidia, æmulatione, obrektionibus exercet. Rursum vestris cogitationibus id subjicio, qui in actu rerum, & civili negotio olim victuri estis, florentissimi Juvenes: pro splendore, qui multorum perstringit oculos; pro lucro, quod non pauci affectant, polliceor vobis aspera curarum, iniqua molestiarum. quas maximis quibusque

virtutibus in rep. mereri licet. Justitia Aristides, severitate Caro; Phocio bonitate, Valerius humanitate: Demosthenes eloquentia, Tullius prudentia: Scipio majestate gestarum rerum, Epaminondas felicitate, inimicos invenerunt: quosdam religio, quosdam eruditio, præcipua animi humani bona, odii & periculis objecere: multo autem plurimosque maximosque viros, fides & studium servandæ patriæ iis exposuit calamitatibus, quæ in proditorum & impiorum civium capita tantummodo videbantur competere. Hæc reputata altius, interpretabuntur vobis pariter & commendabunt exemplum *Helvidii* illius, quem *unicum sui temporis ornamentum* gravissimus Historicorum laudat, & propterea INGOLDO comparandum memoriæ nostræ nunc suppeditat. Is *ingenium illustre altioribus studiis juvenis admodum dedit, non ut plerique, ut nomine magnifico segne otium velaret, sed quo firmior adversus fortuita temp. capesseret.* Existimate, ô mei hæc cum omine (quamquam abominor) difficiliorum in dies temporum dici posse: obfirmatoque adversum metus atque casus animo ad temp. accedentibus vobis, ea tantum præmia cogitanda esse, quæ propitium denique Numen, & æquior nobilibus meritis posteritas decernet. Ipsa enim tandem, quæ viventes incurfavit, invidia, mortuorum famæ favebit: suamque vel imperitiam, vel livorem, vel si antiquæ generositatis exempla reviviscent, errorem ac pœnitentiam profitebitur. Legistis graves testatasque Macedonici Metelli cum Scipione Africano inimicitias: quorum jurgiis, altercationibus, ac pæne rogatis præliis (ut Romanus auctor loquitur) sæpe curia, sæpe forum fervebat. At vero, Scipione indigna morte Reipublicæ necessitatibus erepto, Metellus non jam suæ simultatis sed periculi patriæ memor, in publicum procurrens, magnaue in vultu, in voce luctus indicia præferens; *concurrite, inquit, concurrite cives; mania urbis nostra eversa sunt.* Atque ita non alia quam virtutis æmulatione dignissimus vir, suo adversario, simpliciter & ingenue, ideoque vere parentavit: quamvis, si cui ultra fatum porrigere odia liberet,


is vel invidendo augebit laudes, quas obtrahat. Admonuit me ista commemoratio rei, quam nec tangere promtum, nec fas est præterire. Quantum enim est, heu quantum, quod in Scipione Argentoratensi nuper amisimus, Auditores! Equidem *Urbs nostra mœnia eversa esse* non sustineo dicere, stantibus adhuc iis, quos ingentis munimenti loco veneramur, & pro quorum incolumitate pia quotidie vota nuncupamus: sed & Magistratuum mortalitatem nil æternitati reipublicæ obstare, & ferri vulgo & credi scio. Satis possent ista magnifice dici, satis animose existimari, si res mortalium, & præsertim civitatum fortuna æqualius se & constantius haberet, si semper in profectu reipublica, semper in flore felicitas esset. At vero, quoties unius viri casus imminentem publice casum portendit? quoties Deus, cum illustres viros consummandis imperii incrementis dedisset, non distulit auctorum fine, decrescendi principia designare. Quis autem porro pietati consulatur, qui prudentiæ; si nec superioris merita temporis & labores grata recordatione respiciamus, nec futuri pericula, præteritis periculis moniti, diligenter prospiciamus? Possunt redire, quæ avertimus: possunt minari, quæ timuimus: possunt involvi, quæ evolvimus. Potest armorum necessitas imponi: quibus consilio moderandis, olim in ancipiti discrimine, quamvis deprecantem Ingoldum, obnixâ voluntate votoque destinavit Respublica. potest atrocitate sæculi, aliquid occultæ tabis Reipublicæ vitalibus inoriri: qualibus vitiis sollerter providendis, & perite declinandis Remp. sæpe Ingoldi oculo, sæpe Ingoldi spe usam esse, negari non debet. Talis & metus in bono cive assiduus; & desiderium in bono cliente, imo in bono viro, perenne sit oportet. nisi quod subinde remedii loco præsidem nostri status atque custodem Deum prece, pietate, spe propitiandum; superstitumque Procerum, Patrum, Adjutorum, virtutem præcipua æstimatione colendam nobis arbitrabimur. Facit ea res, ut, quæcunque de iactura Academiae & Scholarum deploranda animo conceperam, in conspectu vestri re-

verentiam & fiduciam patrociniū veluti subsidant ac recumbant, Nobilissimi Scholarchæ. Non estis admonendi, qua necessitudine pignoris, qua religione muneris, quo fari publici secreto, Deus, Academiam vestræ curæ fideique commissam voluerit. Ut æstimio & auctoritate & virtute præpollat, esto signatorius in vestro digito anulus : ut oculis & memoriæ semper præsto sit, esto nota memorialis manibus vestris impressa : ut cordi affectuique proxima sit, jaceat inter ubera vestra tam pretiosa tam dilecta merces. Liceat enim mihi quædam ex inimitabili sanctioris linguæ spiritu mutuari : quæ divinum consilium studiumque, cum hominibus sanctissima quæque & maxima commendat, his symbolis consuevit explicare. Favete gloriæ vestræ, dignissima æternitate nomina : imo favete Reipublicæ non ornamentis modo, sed usibus ; quibus multam actus vim ac indolem Schola subministrabit. Nolite committere, ut cuiquam vel ad suspicandum olim, vel nunc ad metuendum causa præbeatur, quasi temporibus vestris quidquam scholastico vigori decesserit aut decessurum sit. Habetis promotos & alacres ad provehenda in majus utilia publico studia doctores : habetis strenuam & erectam ad eximias laudes juventurem. Hæ deliciæ Ingoldi erant : hæc se salva Reipublicæ & florentia relinquere plurimum gaudebar. hæc vestra quoque fata (serissima autem sint precamur) consequetur felicitas : si præsertim operam dederitis, ne perpetuo miseriæ periculo pateant, qui fidem, ætatem, labores suos Reipublicæ consecrarunt ; aut ullatenus negligantur, qui in spem ætatis posteræ efflorescunt. Denique date hoc illustri Collegæ Vestri memoriæ, ut quod ipse facturus denuo erat, si licuisset, vos veluti custodes & interpretes voluntatis ultimæ faciatis, amplissimoque ordini memoretis : inter præcipua & suprema Ingoldi vota exceptas voces, quibus *cupere se, si daretur, adhuc semel Academiam ejusque doctores Amplissimo Senatui commendare*, testabatur. Erit ipsum, nec dubitamus, viri summi, desiderium, pro argumentis omnibus, apud Senatorias aures :  
erit

erit pro exemplo & stimulo successor, quem Ingoldi in locum feliciter ascivisti. Nam quo te primum exoptato Scholarum patrocinio publicaue presentia nobis exorientem, alio prosequemur nomine, vir Amplissime, Tredecimvir Inclyte, JOHANNES WENCKERE, quam comparatione ejus nominis, in quo tam perfecta curationis scholastica commendatio continetur, ut meliorem Patronum ne optare quidem fas sit? Deus, qui exemplum id singulare fecit ac venerabile, æmulationem exempli felicem jubeat esse ac perpetuam. Hoc adhibemus in prolixo voto verborum compendium: quod, expleto jam destinatae concionis tempore, in omnia necessarium potius, quam explendo affectui officioque idoneum par est intelligi. Igitur nemo hic expectet, ut vel eas notitiæ Ingoldianæ partes, quas Rectorium programma graviter expressit, vel eam virtutis vitæque sanctimoniam, quam Ecclesia publice celebravit, vel eam laudum copiam, quæ nobilissimorum hominum æstimatione passim comprehenditur; vel eam actionum dexteritatem, quæ interioris Reipublicæ monumentis permixta, usibus magis quam famæ populi destinatur, conquirere annitar aut aggrediar memorare. Neque sane prædicatio nobis tanti Herois est proposita, sed veneratio posthuma gratæque mentis pietas: cujus simplicitati vel antiquum illud, quod mortuis dicebant, VALE, aut quod sanctiore affectu dici posse videtur, SALVE, nunc sufficere potest. SALVE, inquam, FRANCISCE RUDOLPHE INGOLDE. Salve mens cælo recepta, cæli sideribus illustrior: Salve aureum pignus in sinu Abrahæ, in complexu Patris, in custodia manus Dei. Salve contemplator æternitatis, quam semper cogitasti: admirator Divinitatis, cui semper serviisti: spectator gloriæ, quam semper desiderasti. Salve amice supremi Numinis, sed jam admisione intima æstimare: Salve hæres perennis opulentia, sed jam possessione hæreditatis locupletate: Salve consors angelorum, quos assiduos habuisti custodes; Salve collega Sanctorum, quorum exemplo, virtutis cultu; officio, pietatis aspi-

assiduitate assuevisti. Salve decus tui Creatoris, qui te magnis rebus destinavit: Salve amor tui Servatoris, qui te veris bonis fortunavit: Salve cura S. Spiritus, qui te munusculis consummavit. Salve civitatis novæ habitator, cujus decorem tantopere dilexisti: Salve Prophetarum con-  
tubernalis, quorum verba per omnem vitam reverenter auscultasti. Salve & vale desiderium tuorum civium, quos terroribus sæculi & periculis reliquisti. Quod superest, nos tuarum laudum memoriam, animis custodire; linguas propagare; imitatione, pro suo quisque captu locoque æmulari nunquam desinemus.





## VIII.

## Laudatio Funebris

*Amplissimi VIRI*JOANNIS FRIDERICI  
SCHMIDII

Jureconfulti, plurium Principum, & præ-  
sertim Reip. Argentoratensis Consiliarii,  
*publico nomine recitata*

in Academia, XVI. Novembris anni  
cdo lccxxxvii.

*Illustrissimi ac Celsissimi Principes, Generose Baro, Magnificen-  
tissimi Viri Patria Patres & Scholarcha, Amplissimi  
Assessores & Consiliarii, Magnifice Rector, Decani Spe-  
tabiles, Clarissimi Professores, Præstantissimi Jcti & Me-  
dici, Venerandi Ecclesiæ, humanissimi curiarum mode-  
ratores, tuque cetera virorum, juvenum, adolescentum,  
vario titulorum honore memoranda Corona.*

**J**OANNEM FRIDERICUM SCHMI-  
DIUM, ingentibus virum meritis, parique publice  
fama, menses quattuor sunt, cum hæc Civitas amisit,  
extulit, humavit. Cujus equidem tanta fuit acerbitas  
funeris, ut contineri nequaquam intra necessitudinum ge-  
mitus, luctus tam alte, tam varie adactus posset; quin pa-  
labunda late mœstitia omnes desiderio ejus, qui nunquam  
sibi, semper omnibus vixerat, impleret. Consilii publici  
auctoritas, partem sui ac ornamentum; jura civitatis patro-  
num, justitia vindicem, Urbs ipsa dulce quoddam decus

P

ac

ac subsidium, divelli à se & abripi querebantur. Apud privatos quoque & vulgum nemo tam vulgaris fuit, qui non aliqua se voluptatis, solatii, auxilii parte fraudari intelligeret. Jam quis dubitabit, tot ubique urbes, terras, nationes, quot ope aut fama in favorem sui pertraxerat, rumore tristissimi casus confusas esse atque consternatas? Cum enim cetera quidem bona suæ quodque civitatis ambitu & mœnibus concludantur; viri prudentis fiderea virtus est; quæ & domi singulos benefica luce complectitur, & foris universos obstringit aut exhilarat. Vobis præcipue (revertar enim ad domestica) Patriæ Patres, durum videbatur & calamitosum, alienissimo vestro tempore tanto adjutore, socio, amico orbari: Cujus egregiam fidelemque operam, ut tot annorum usus vobis, tot negotiorum varietas pridem commendasset; ita temporum denique pericula & sævities unice fecissent curam, unice necessariam. Accedebat crebri-  
tate casuum attentior eorundem reputatio, & ex reputatione timor: dum longius, ut fit, progressa ratiocinatio, ne, quod aliis evenisse partim audieratis, partim videratis, hic quoque eveniret, accuratissima sollicitudine suggerebat. neque enim foris tantum viros undecunque clarissimos, bello, fame, mœrore, denique sæculi genio absumptos, quotidie erant qui nuntiarent: in ipsa Urbe vestra, aliena quidem illa, sed ad domesticos terrores apprime valebant exempla. neque immerito. quæ fortuna huc seposuisse, tanquam in securitatis quodam sinu, credebatur, residua atatis nostræ ac vicinæ ornamenta; ut res docuit, ad celebre conditorium & communem tumulum collegerat. Igitur proxima, remota cogitantibus, quid nisi tenebræ, extinctis tot ubique luminibus, & vastitas & cæca terris nox imminere videri poterat? Nec jam metus istud, & anxia futuri conjectatio, sed periculum, sed certa erat jactura: quam, præter memorata, altissime scilicet animis reipublicæ suæ amantibus cum aliorum in hac Civitate eximiorum virorum, tum nuperrime celeberrimorum Professorum; ad extremum SCHMIDII quoque vestri, de quo querimur, fata

fata imprefferant, & ad dispiciendam omni ope tantis vulneribus medicinam vos penitus adverterant. quam in animi constantia & magnitudine, in egregii publici cura, in amore civium, in labore & industria, egregie factum quod reposuistis. Hæc enim sola, qua cum publicis, cum privatis commodissime transigi malis potest, ratio: hæc adversum fluctus rerum humanarum ancora: hic tranquillitatis veræ portus est. Ac quam fortia quidem è complexu rei-publicæ vestræ solatia petatis, agnosci ab omnibus facilius fuerit, quam ab ullo laudari: animi autem generositatem illud quoque ostendit; quod, cujus in posterum usu & præsentia vobis carendum esse cernebatis, ejus omni modo fruendum memoria præclare judicastis. Quamquam vero, quod ad perenne nominis decus attinet, plurima illius viri & in omni publica re, vel provisa prudenter, vel graviter actitata, vel acute responsa, inter æterna vestræ Reipublicæ instrumenta & commentarios, non ad venturi magis disciplinam temporis, quam ad perpetuam auctoris sui gloriam custodiantur; vivatque adeo SCHMIDIUS, & victurus sit in animo Senatus Populique Argentoratensis, tam venerabilis ille posteræ futurus ætati, quam suæ fuit utilis: officii tamen publici, & grati animi, & efficacioris exempli visum est interesse, ut in Academia quoque nostra, id est, in ipsa immortalitatis officina, tantæ virtutis merita solenni prodita scriptione consecrarentur. Nondum eluxeramus, BITSCHLIANI, nondum LOCAMERIANI funeris luctum, cum de voluntate nobis vestra constitit. Igitur ipsa doloris societate, & affectuum recentiore exemplo, ad levationem alienorum adversorum, (quamquam quid alienum nobis esse possit, quod à republica non est alienum?) incitabamur; nostrumque Curie studium, quod magno quidem, sed latiore in argumento optabamus enitescere, non distulimus approbare. Maturata sunt iusta duobus, quos dixi, summis justitiæ sacerdotibus. quorum vitam & laudes, gravi, quo pollet, & memorabili genere dicendi executus est nuper is, in quem illi luctuoso obitu & dignita-

res suas, & labores, & cum his spem atque curam posteritatis, quam præclaris operibus ibant adjutum, transtulerant. atque adeo fulget nunc & triumphat, ut in cœlis anima optimorum virorum, sic in terris memoria. quam non in auro & argento, non in faxis & trabibus, non per statuas & titulos operose peritura ambitio; sed in hominum animis, in judicio temporum, in fama rerum prudentis viri calamus, victuro semper honore ab interitu vindicat. Nunc iterum congressa nec studio dispari nec officio Academia, utriusque me interpretem esse, atque SCHMIDII illius supremos publice honores recolare, cœtusque tam celebris auribus, animis, imitationi nobile magnarum rerum specimen commendare voluit, jussit. Credo, quod in materie per se maxima, minima esse facundia opus existimaret. Ego certe, qui nec eloquentia fiderem, nec ingenio, aliam mihi ejusce consilii rationem non potui excogitare. Quocirca cum in conspectum huc processi vestrum, Auditores Splendidissimi, procul mihi habenda, quæcunque aliis tali loco & tempore in promptu sunt, judicavi. Non utar, inquam, vel sollicito difficultatis obtentu, qui superbiam; non querula virium extenuatione, quæ persuasionem; non callida eloquentiæ declinatione, quæ fucum; non objurgatorio orationis contemptu, qui ejusdem maximam plerumque sibi propositam habet affectionem. Hæc si aliquando scholarum umbraculis placuere, nunc in gratiam viri semper in luce civilium rerum versati, ad artifices declamatoriæ ostentationis & architectos remittentur: dabiturque à nobis opera, ut, cum narrationis seriæ præcipuam, masculæ exornationis aliquam habuerimus curam, in utraque nihil nos spectasse præter fidem & veritatem, omnes queant intelligere.

Non decuerit apud confessum tam gravem, orationem in iis consumere, quæ ad ornamentum quidem clarorum hominum faciunt, sed ut vestis, ut gemma, ut anulus: cultus externi indicia, non animi testimonia. De viro eximio, nihil nisi quod talem fecit, dicendum est. Patriam laudare

illæ

illi instituant, quibus jejuna ad differendum materia, aut otii abundantia istud vel permittit vel persuadet. Non ibo hic in laudes tuas, sive tu hospita sive mater à me dici mavis, Illustre Argentoratum. Relinquatur superbix gentium, aut rhetorum ostentationi iste ludus, quo amplitudo terrarum, multitudo ædificiorum, apparatus substructionum, natura & species lapidum, quadam dilaudationis seu copia seu prodigalitate chartis inscribitur: Ego propter editum † orbi SCHMIDTUM nihil aliud, quam gratulatione te & voto prosequor: ut qualis censeris tum hoc tum plurimis documentis meruisti, semper esse, semper prædicari merearis, optimorum clarissimorumque civium genitrix, educatrix, alitrix. Hoc ego unum illud esse crediderim, quod supra murorum robora, supra turrium fastigia, supra operum magnificentissimorum spectacula urbes firmare, munire, exornare valeat; si virorum egregiorum virtute, non jam a contemptu, ab incurfu, à vilitate; sed à fragilitate & mortalitate ipsa quodammodo vindicentur. Cum enim, quæ saxo struuntur & æggers, vis expugnare, casus frangere, vetustas valeat consumere: gloria præclarorum facinorum cum orbe hoc, cum omni temporum decursu incorrupta perennat. Hæc non locum, non genus, non censum eligit, solius animi soboles atque tradux: ut tam erret, qui familiæ splendorem, quam qui patriæ celebritatem in veris ponere laudibus ausit. Equidem miseros ambitionis & vacordes semper æstimavi, quibus ut nobiles videantur, ad veterrima saxa, & semesos titulos, & sumosas imagines, in alium orbem, in ignotas terras, frequentissime autem omnium ad fabulas eundum est atque mendacia. quasi vel nobile quicquam sit, cui non veritas non ratio subest; vel non omnes ab eadem sint demissi stirpe, ab iisdem progenitoribus; vel denique, si curiosius agendum autumeretur, non unusquisque plures in avorum serie illaudatos quam laudatos inventurus sit. Nos in defuncto Nostro nihil ex ejuscemodi ineptiis, aut nominaremus si adessent; aut dum absunt, figmento arcessimus. Parentes is nactus est

P 3

bonos

† 1578. die Jan. 19.

bonos magis quam claros: quorum cum hoc fortunæ sit, illud virtutis est. Patrem *Bernhardum Schmidium*, matrem *Catharinam Kleiniam* dixere: ille organa perire, hæc fideliter domum; uterque educationem liberorum probitate, moribus, exemplo strenue moderabantur. Advertebat præsertim eorum curam, & spem successus in hoc labore incitaverat eximia hujus, de quo loquimur, filii indoles. Latebant adhuc penitus abstrusa, quæ manebant eam, fata; sed latere non poterant signa factorum prænuntia: nisi quod intra modestiam votorum, contemplatione, gaudio, pietate contenti parentes, interpretationem malebant differre. Solent qui tractandis equis operam navant, à primo statim ortu generosi pecoris pullum non degenerem dignoscere: si altiore ingressu, vividior motu, lætiore ferocia gavisus spectari, adhinniat, adluserit, adsulter: si arrectis superbe auribus, si contentis acriter oculis, si spirantibus pugnaciter naribus, iram & robur & impetum licet non ultra quam minetur. Prorsus aliquid simile habuit *SCHMIDII* Nostri pueritia, exeruit magis magisque adolescentia. Cum enim iis erudiretur disciplinis, iis imbueretur virtutibus, quibus istæ humanis usibus præparari ætates solent; ubique & in præsens officio, annis, expectationi satisfecit, & in posterum præclaram de se spem concitavit: neque delectationem aliis, sibi laudem peperisse contentus, ut cum ætate, ita cum Præceptorum votis perpetuo certamine contendit. quæ hoc pacto provocata cum plus ultra viderentur progredi, haud difficulter ab audaciæ opinione ad fiduciam & rationem illa redegit. Atque hic, si quam jucunda provectioni ætati tenerioris contemplatio solet esse, tam concessa nobis ratione instituti ejusmodi foret commemoratio, circumducerem vos, Auditores, per Gymnasii Argentoratensis curias ac subsellia, & monstrarem vobis puellum, cujus integra bonaque natura ex liberali facie; industria, ex intento opere; modestia emineret ex moribus: memorem disciplinæ, observantem pulcri atque decori, sic ad lectiones quasi ad epulas paratum; vividum, velocem, elegantem: nunc pro-

proximos, nunc superiores, postremo semet egregia laudis cupidine laceffentem, vincentem, atque adeo, quocunque eum sequeris, non nisi in primis consistentem. Contigerit mihi tale pueri seu prodigium seu spectaculum, nec dubitabo hunc patriæ suæ ornamentum & præsidium quandoque futurum, non ex Etruscorum disciplina aruspicum, nec ex curiosis astrologorum hariolationibus, sed, quod nobilibus vaticinandi genus est, ex ipsa virtutis natura & erecti moris successibus, denuntiare. Falli sane non magis metuum, quam eorum quisquam est deceptus, qui jam tum summa de Nostro omnia conceperunt. Cujus non tam anni, non tam præmia, quam strenuitas visa est festinare. Igitur ut ampliore theatro egregiorum amplirudo conatuum juvaretur, è Gymnasio in Academiam, id est, cursor indefessus in stadium, animosus athleta in arenam, equus acer in planitiem, non turgido sui amore prorupit, sed à meriti sui amatoribus est translatus. Aut igitur ruin, aur nuncquam alias apparuit, quid posset liberrimis permissa spatiis industria, & generosus discendi amor. Ferebatur per linguarum copiam, per sapientiæ multiplicis divitias, ita ut quæ profunde abdita, erueret; quæ late diffusa, emetiretur; quæ alre constituta, assequeretur; quæ difficultate essent obsepta, omnia labore, omnia contentione, quam suo more successus sequebatur, pervaderet. Coronandum duxit tam impigrum proci sui studium domina rerum Sapientia. sive tu hortamenta laudis velis interpretari, cum ingenium sublime meritis honoribus mactatum, illo veluti pabulo alitur, illo inflatur spiritu, illo accenditur oleo, & ad vires, augmenta, copias ultro subvehitur. Certe cum annus ætatis sextusdecimus, † primam, qui hunc infecutus est, alteram Philosophiæ lauream \* (non pigenda scilicet munera, quicquid illis placeat, qui honorum contemptu ipsam virtutem, ipsam contemnunt eruditionem) reportasset, exaucto subinde ardore, multiplicata subinde opera, ad metam suam SCHMIDIUS grassabatur. Longe diversas ille à delicatis nonnullis, & suavibus adolescentulis, quo-

rum

† 1594. 25. Apr. \* 1595. 11. Nov.

rum ubi ad hos titulos pervenit sedulitas (sive ambitio potius aut quidvis aliud dici debet, cui non bona mens, non bonæ mentis subest constantia) tum vero studiorum sibi venisse finem, tum laboris adesse terminum dulciter somniant. Igitur ex eo tempore jam abdicata præceptorum, quorum sibi nomina induerant, auctoritate.

*Scinditur ignavum studia in contraria vulgus:*

quidam ad greges ebriosorum, nonnulli ad magistros arrogantia & debacchationum; aliqui, ut mollius philosophentur, ad conciliabula divertunt muliercularum. Nova scilicet hæc, quam nec scivit Plato, nec agnovit Aristoteles, Philosophorum secta: quam nec inter Cæsarium munera, nec inter Academiarum titulos legisse memini (liceat mihi de barbara re, voce uti barbara) magistralitas est. Inter quæ resolutio per iners otium ac torporem animo, fracto effæminaque corpore, tempore autem, id est, re omnium pretiosissima, nec ulla ope reparabili, misere deperdito, spretis præterea atque conculcatis divina humanaque lege, bono more, conscientia, sacramento, quæso qua deinceps facie, quonoscendi erimus titulo? quibus autem instructi adminiculis ad publicas utilitates capeffendas accedemus? Hunc enim communem bonis omnibus finem, hanc sibi laboris regulam, cordata SCHMIDII præferim Nostri studia, ne à regia bonæ mentis usquam decurrant, proposuerant. Patriam videlicet esse, cui civium quisque ingenium, studia, vitam, ante omnia rectos vitæ mores debeat. Qui si à singulis negligentur, universorum periclitari salutem. cui haud dubie subtrahi, quicquid sapientiæ studio ac virtutis subtrahatur. Dum illustre hoc ad conspectum & memoriam juventuti nostræ exemplum commendo, dum ad imitationem destinata publico usui provoco pectora, non pigebit, mihi fortassis apud suspicaces invidiosam, pro republica apud bonos honestam vocem mittere. Male habebit civitas, quæcunque illa sit (nam de Nostra fugio secus ominari, & avertat ista Deus longeque averruncet) ubi juvenus urbica natalium decore & opibus ad contemptum litterarum



rarum, quas nemo contemnit, quin omnes simul virtutes contemnat; colore studiorum & nomine, ad segne otium & ignavia velamentum; parentum dignitate, ad superbiam ac licentiam: spe denique honestioris in republica loci, ad cessationem laboris & virtutum neglectiorem abuti vel pergeret, vel incipiet. Neque enim aliis incolumitas publica, quam disciplina juventutis passibus ambulare: eodem illæ transitu, iisdem utuntur conversionibus: cumque hæc ante illam attendi debeat, illa absque hac nusquam potest agnoscī. Sæpe illos rideo, qui felicitatem Romanorum (nam in hanc gentem, quotiescunque magno exemplo opus est, sive consuetudine, sive judicio statim convertimur) congestis tot populorum opibus, id est, quid aliud quam publico quodam latrocinio? seu prælatis longe imperii finibus, id est, quid aliud, quam molestiarum quadam mole? seu structis mirifice operibus, id est, quid aliud quam ludibrio casuum, spolio temporis? solent æstimare. Non fuit Roma prius, non diutius felix, quam dum juvenus Romana animum in probitate, industria, virtute; corpus in armis, in equis, in agris haberet, sive ut clarius loquar, cum se patriæ exerceret, patriæ laboraret, patriæ viveret. At cum à bonis negotiis cessavit, incepit malum publicum facere, & pro communi decore, privatam sibi quisque infamiam peperere. Brevis- sime dicam: postquam subiit otii dulcedo, subiere otii vitia, subiere otii præmia, id est, reipublicæ fœditas, imbecillitas, interitus. Persarum nomen, imperium, auctoritatem nemo sine veneratione vel olim audivit, vel apud posteros legit, dum præclarissimi juventutis mores & à puero exercita per omne honestatis genus ad viri firmitatem industria, qua mellitissimi præsertim Xenophontis scripta sibi aliisque placent, publice obtinebat. Hac inclinata, populus late dominator, contemni, vinci, subverti cepit. Si ad recentiora venire non refugimus, dum Germanorum juvenus, & præsertim Juventutis Principes GERMANAM FIDEM, GERMANAM VIRTU-

TEM docebantur, salvi fuimus: mutati mores pristini mutare viros, sæculum, sæculi fortunam, quæ ante virtutem sublatam nunquam terras destituit. Sed me quidem fata regnorum & mores civium paulo altius reputantem, amor & cura reipublicæ incepto longius tulerit, nisi quod in parte laudum Schmidianarum non exigua reposuerim, monstrasse, quantum ei ad magnitudinem per signa hæcenus ostensam, mox per argumenta ostendendam, contulerit res plerisque neglecta, omnibus necessaria, paucis dextre tractata, assidua patriæ & civilium utilitatum meditatio. Hæc inertiam vitæ; studiis pulverem detrahebat ac situm. Quibus cum multa curiosorum vitio accedere, multa adhærere ex otio, multa ex ostentatione videretur adstrui: pro infinitis observationibus, unam in oculis habuit ac animo, usus publici causa omnia vel discere, vel seponere, vel contemnere. qui cum solus quadam sapienti nobilitate attenditur, rem præstabit, mihi credite Auditores, quam frustra Lullianæ artis histrionia promiserit, difficulter vel ipsa veterum Encyclopædia præstiterit, consummatam eruditionem, consummatam prudentiam. quam frustra viri sectamur, si juvenes præterivimus. Dederat SCHMIDIUS animum severissimo legum & Juris studio. quod ut in societate civili usum habere egregium, ita difficultatibus intrinsecari plurimis, haud ignorabat. Igitur vitam & antea studiose desidia magis magisque odisse, ingenium autem omne cepit explicare ac intendere: ne vel in tam augusta scientia præter propter ipsam versando, nihil magnopere litteris, omnia forensi videretur volubilitati tribuere; vel alienas commentationes, & Doctorum opiniones, ita edisceret, ut de utrarumque rationibus ac fundamentis, in ipso scilicet interioris Juris prudentiæ penetranti reconditis, parum cogitaret. Quod utrumque crebrius quam publice prodest, facitari, Jurisconsultorum videas gravissimorum querelis fieri testatum. Scilicet præmonebat jam tum ad excelsa genitam mentem, fati sui sollicitudo, ac theatrum majus foro & illustrius ostentabar.

Daret

Daret itaque operam, ut in similis studii professione iis esset quam dissimillimus, quorum arrogans calliditas litterarum tendiculas & aucupia verborum, & cantus formularum non excederet. Aliud in cassidico spectari, aliud quæri in Jurisconsulto. quorum cum ille lucrum respiciat & quæstum; Hunc veluti commune civitatis bonum, præsidium amicis, opem alienis, salutem periclitantibus, malis merum ostentare, perpetuæque pro Republica auctoritate munitum esse ac potentia. Porro Jurisconsultorum dignitatem, tot Imperatorum judicio & munificentia amplificatam, ad summas in omni vita res gerendas aditum iis patefacere; neque regnorum consilia, aularum modamina, pacisque ac belli curas in alios frequentius conferri, frustra id quidem, nisi contingant viri, qui hos honores queant honestare, his dignitatibus dignitatem addere. quod sola legum cognitione, quantacunque illa sit, fieri haudquaquam posse, vel eorum constare exemplis, quos sub Jurisconsultorum titulo, non tam hoc nomen adscitum, quam plurimæ cumulatissimi pectoris artes, ac promptissimæ ingenii dotes supra Jurisprudentiæ fastigium extulerint. Igitur huic, omnem civilem scientiam, notitiam federum, jura societatum, pacta populorum, discrimina gentium, disciplinam rerumpublicarum, antiquitatem, senatorias consuetudines, omnemque præsertim Romani causam imperii, ejusque ad hæc tempora variationes, & conjunxit strenue, nec disjungenda deinceps unquam, rectissime autumavit. Vehementer enim illos falli necesse est, qui vel adolescentiæ per libellos, vel ulli ætati per definita temporis & operæ spatia, ista tradi posse credunt, quæ nulla ætate, nullo tempore ex animo sunt & manibus dimittenda. cumque cetera vel pueritiæ, vel adolescentiæ, vel juventutis partito labore studia sint; hæc vitæ disciplina universæ merito habetur. Cumprimis vero historia erat, quæ & modo memorata contineret; & præter cognitionem. ad usus perspicuitatem ultro deduceret, & præter usum, judicii subministraret copiam; & splendidi-

diffima ubertate, per omnia Reipublicæ tempora, per omnes rerum eventus, per antiqua, per recentia, narrando, judicando, docendo, comparando, denique omni præditiæ diffusissimæ apparatu instructuque naturam viri admirabilem, & exquisitam doctinam, & singularem industriam in liberalissimo utilitatum publicarum studio, & nobilissimo ejus studii fine dirigeret, firmaret, perficeret. Nam de eloquentia ejus virili, robusta, exercitata ne aliquid hic dicamus, commodioris respectu loci fieri intelligendum est: cum de ipsis eloquentiæ monumentis, & præclaris operibus, id est, de ornatissima nostri argumenti parte paulo post expediemus. Interea peregrinantem comitati patriæ reddemus; tum deinde Doctorem salutabimus; sed & auspicia dignitatum capeffenti, prænantio majorum decorum applausu gratulabimur. Ibat in adultam ætatem annus ab instaurata salute CLO IO XCIX, † cum SCHMIDIUS Noster, multa jam litterarum politiæ, multa rerum intelligentia compos; Argentoratum suum feliciter reliquit, ut felicius repeteret. Videbat pridem, rerum humanarum civiliumque rationum mirificam varietatem, non minore demergi profundo: ad quod exhaustiendum præsentissimo esse opus consilio; studio summo, judicio exacto, præcipue autem, experientia strenua & solerti. Hanc autem domi quidem inchoari, foris perfici; nec pro patria natali solo, sed universo orbe uti; quem si non pedibus & itinere, animo certe ac observatione emeriatur. Hanc inspicere præsentia, adire remota, penetrare occulta, attendere collocationibus, adfistere conciliis, interessè cœtibus, intrare curias, invisere aulas, domos frequentare. Neque dum hæc loquor, emissit vobis oculi & fraudulentus explorator, sed peritus aliquis peregrinator, & potissimum SCHMIDIUS ille, cogitandus est, Auditores. Quanquam, si festive magis quam caute talem mihi describendum sumerem, non formidarem dicere: peregrinatorem esse aucupem alienorum verborum, inquisitorem alienarum actionum, scrutatorem arcanorum,

canorum, arbitrum vitæ & morum, rerumpublicarum exploratorem, simulatorem plurimarum rerum, dissimulatorem omnium : sed (ne suspensos vos teneam) per spectatissimos titulos, reipublicæ causa excusatissimum, instituti rectitudine innocentissimum. Nam quid ego illos peregrinari dicam, cui linguæ unius mediocriter cognoscendæ ergo, tum visendis urbibus, hortis, arcibus tot annos impendunt, tot nummos? qui mihi profecto id unum videntur agere, ut sumptuose pariter ac strenue nihil agant. Igitur ubi eos desiderium maternæ sedis, aut tædium itineris, aut spes ostentationis domum reduxit, satis plerumque apparet, Plautinam mulierem longe virilius sapuisse, cum, quam hi tantopere abstrudunt, ingenue illa confessa est veritatem :

*Urbis speciem vidi, hominum mores perspexi parum :*

atque ita mirifica importunitate ac intempestivo cum maxime errore denuo incipiunt in sira sibi patria peregrinari. Noster ut in ceteris, ita in hac prudentiæ, ut ita dixerim, negotiatione, à vulgo indole & studiis multum fuit remotus. Ergo cum Austriam, Styriam, Carinthiam adisset, non ille urbes magnificas, sedesque, & palatia Ducum, tum Germaniæ ipsius propugnacula, atque imperii claustra miratus, operæ se ac instituti pretium duxit habuisse : (quamquam meminisse nedum oculis usurpasse juvet, fractos toties in illis locis Ottomannicæ dominationis spiritus, & coërcitas hostis immanissimi vires) sed in augustissima Imperii Regia præcipuum cognitu duxit, imperii artes, consilia, rationes, omnemque adeo non excelsissimæ tantum dignationis scenam, sed difficillimæ administrationis curam introspicere. Eventu felici sane optatoque, quid enim differam, ipsum argumenti pariter & fidei robur adhibere? Ut dignus Imperatorum omnium favore, ministerio, amicitia fieret, illa ego rudimenta, illa judico auspicia fuisset. Quemadmodum enim qui solem illum, mundi temperatorem, omnisque parentem fecunditatis, obvio corpore ac libero processu excipiunt, etiam aliud

agentes radiis collustrantur, calore foveantur, efficacia pertentantur, denique colore quodam imbuuntur: Ita in clarissima luce Imperatorii actus, in magnificentia gloriosarum dispositionum, inter summas Reipublicæ gubernandæ provisiones versantem, necesse est profecto excitari, vigorem ingenio, prudentiam animo concipere, atque cum maxima omnia videat, audiat, sentiat, non minora cogitare, loqui, destinare. Scilicet ut ingeniorum ignobiliora magnitudine rerum splendorum hebescere; sic vivida & habilia intendi perspicimus ac extimulari; usumque his & artem nullibi felicius, quam inter sublimia usus & artis exempla provenire. Cujus rei novum rursus documentum Italica SCHMIDII, quam Pannonicæ continuavit, peregrinatio præbet. De qua ut commodius loqui queamus, iterum cum comparatione loquendum est. Videas quippe nonnullos Italiam ea potissimum parte contemplari; qua contemplationi se subducit, rutaque & cæsa superstitioso horrore pervestigare; ut præsentem negligant, sepultam sectari; atque rudera subversa, & lapides pro stantis artibus mirari, amare, colligere. Quos fortasse (si illos tamen eximios fecero, qui tam raro quam laudibili proposito, illustrandæ eruditioni, explicandisque scriptorum antiquorum præcipuis illud ab oculata fide qualecunque præsidium sunt mutuati) curiosissimi generis stultitia teneri dixerint, qui tempora rebus, studia vitæ, laboribus moribus esse impendendos, haud abs re existimant. Sunt quibus cura & curæ finis, ut Italicorum itinerum fidem, longis commemorationibus de pomparum, religionum, caeremoniarum diversitate, de Pontificum, Cardinalium, Monachorum, ceterique sic superstitione ut cultu varii gregis fortuna, conditione, moribus, possint ad inanem otiosarum aurium voluptatem referre. Denique, sicut in eadem sylva, boves herbam, canes feram, aves nidum quarunt: ita animorum dissimilitudine, alios alia respicere, nec diversa modo sed contraria, atque illos quidem bona ac præstantia, hos vi-

lora

liora pejoraque captare satis constat. Nobis argumentum optimi esto, quod SCHMIDIUS Noster est secutus. Consecratus enim publico egregio attollendo animus, ad eumque finem & a natura factus, & a disciplina institutus, & fato suo velut infligatus, quid in illa terrarum quondam Regina, ut nunc est, civilium consiliorum magistra, quæreretur aliud atque compararet, quam consultandi dexteritatem, & senatorias artes, & quos in sinum patriæ & decus conferret redux, præsentissimos absentiae fructus alios? In quorum ego accessione, non omiserim numerare, quod in Austria, quo profectum domo primum pervenisse memoravimus, Liberi cujusdam Baronis (Dietrichstenium prosapiæ nomen est) spei adnotus, dum tempus & instituti ratio tulit, ætatem adolescentis rerum peritiam indigam, sapientiæ rudimentis; lubrico affectuum ambiguum, elementis virtutum; errorum facilitate mobilem, bonæ mentis fulcimento, dubium solertius an felicius, instruxit, firmavit, stabilivit. Nimirum & artium majorum & operæ res est, ingenia ad excelsioris fortunæ cultum excitare, quam aut intelligunt ii aut credunt, qui principum liberis rectores apponunt, non virtute spectatos, sed vanitatis quadam pompa monstratos, quique ipsi provinciam arduam, & prout recte aut secus administratur, in nihil mediocre ituram præfidentius quam cautius ambiunt. Illud satis utique constat, inter meditamenta civilium gubernationum (addidisset ferme & specimina) hoc præcipue illustre, hoc esse certum, si antequam hominum ipse cœtibus moderere, regas hominem, qui tot homines recturus sit, unique artes imperandi tradas, quibus in omne imperii corpus salus publica diffundatur. Sed jam tempus est, ut incrementum tuum, quo per triennium & ultra caruisti (si tamen eo caruisse dicenda es, qui te semper, quem tu semper mutuo affectu persecuti cogitasti) salvere jubeas & vivere, & bene rem gerere, splendor rerum † Argentina. Redit ecce civium tuorum quoddam veluti sidus: redit ex mercatu publicarum utilitarum

† 1603, 15. Nov.

tatum felicissimus negotiator : redit tuæ laudi , tuæ vōlūptati : redit , ut tuæ securitatis ergo per hostium gladios , per viarum aspera , per intricata negotiorum mitti possit , quem , te non mandante , hæc tamen eadem causa alio miserat , alibi distinuerat. Properat ecce in amplexum Academiæ , in amplexum Reipublicæ. Atque ut ad hanc instructor accederet , ab illa studiorum publice utilium consummari circulum petit. Nec mora adfuit impetrandi , unde abfuisset petendi festinata temeritas. Igitur † anno incipientis hujus sæculi quarto , mense Majo , eruditioni , cujus hæc urbs potissima magistra & educatrix & perfectrix fuerat ; Basilea , vicinitatis isthoc officio abunde lata , accessit coronatrix : titulumque solennem Doctoris Jurisperitissimi , & summa privilegia merenti pridem SCHMIDIO , magno Professorum applausu , multaque testimoniorum & laudum concelebratione rite apposuit. Quo ille honorum apice decoratus , primum eximios quosdam juvenes desiderio hujus studii incensos per amplissima juris spatia , legumque obscuritatem , via nec impedita , nec longinqua maximo cum successu deduxit : mox laudabile vitæque hominum necessarium advocationis officium ingressus , agendis causis tantam fidem , dexteritatem , industriam adhibuit ; ut , præter domesticas clientelas , ex aliis locis magnus in hanc civitatem , ad hunc virum , eorum fieret concursus , quorum vel in aula Camere Imperiali , vel in dicasteriis Electorum , Principum , Provinciarum , lites occupabantur. Atque satis constat eo usque famam viri & labores excrevisse , ut uno eodemque tempore centum sese clientes patroni exoptatissimi consiliis operaque sustarent. *Quid dulcius* (exclamat Aper ille apud Romanum auctorem , dum advocationis celebritatem considerat) *libero & ingenno animo , & ad voluptates honestas nato , quam videre plenam semper & frequentem domum concursu splendidissimorum hominum : idque scire non pecunia , non orbitati , neque officii alienijus administrationi , sed sibi ipsi dari ? illos quinimo orbas & lo-*  
cnples

† 1604. 2. Maii



*expletes & potentes venire plerumque ad juvenem & pauperem, ut aut sua aut amicorum discrimina commendent.* Afsecutus sane erat hanc gloriam, hanc voluptatem SCHMIDTUS, nisi vel major illa fuisset, qua postea insignioribus meritorum momentis, illustrissimas parare simul & ineri amicitias, adsciscere nationes, complecti provincias visus est; vel apud animum honesta magis quam speciosa appetentem quidquam potuisset esse latius, illa conscientia exploratione, qua inter tot clientelas nihil gratia datum aut largitionibus; nec fiducia litigandi quidquam defensum, quod jus causae nondum defendisset: nulli paupertatem ad impetrandum jus suum, contemptu, nulli divitias praeiorum captatione obfuisse; *sanctissimamque adeo rem, civilem sapientiam, pretio numerario non aestimatum à se, non dehonestatum*, quotidie secum, Ulpianei non magis dicti discipulus, quam exempli imitator reperebat. Quod integritatis & incorrupti studium patrocini nullo eum tempore deseruit: audieruntque propinquo vitae fine non semel dicantem amici; nullius se, quanquam priora sedulo excuteret omnia, in causis agendis calumniae, quaestus, praevicariationis sibi conscium: cuius si vel minimam suspensionem deprehendisset, quibus posset modis satisfacturum fuisse. Videatur hoc sane nonnullis in tanti viri laudibus haud valde magnifico extare elogio: nisi quod vel me tacente quantum in diversis saeculi moribus noxae lateat omnes agnoscunt, plurimi sentiunt. Verum dictis quidem praeclaris, quorum memorabili concinnaque gravitate valebat, neque hanc, neque alias orationis partes implebo, aut exornabo, cum in tanta praelustrum factorum multitudine, sententias explicare, otiosum queat ac praeposterum existimari. Quapropter ad institutum nostrum & honores SCHMIDII revertentibus occurrit pulcherrima, qua per omnes meritorum publicorum gradus ad summam in Republica auctoritatis fastigium ascenditur, scala, per quam enitentem, multa lubentia & favore conspicabimur. Quinquennium jam, quibus dixi studiis occupatum effluxerat, cum industria viri,

r

nemi-

nemini tum, minime autem omnium Amplissimo Senatui ignota, imo ad propiores dudum usus expetita, curiæ cæpit penitus vindicari; † demandato laborum plenissimo Actuarii, sed & post biennium \* Referendarii, in Minore, quem vocant, Senatu, munere. Quorum ut ille acta Senatus ad sequentis ævi notitiam & usus; ita hic animos ad rectiores planioresque sententias mihi videtur præparare. In quo utroque cum præcipuum fides, proximum sit facundia: effecit, ut & ista impenetrabilis, & hæc majoribus digna negotiis consensu intelligentium reputaretur. Igitur cum annus sæculi tertiusdecimus gravi vulnere Rempublicam afflixisset, exempto è viris meritissimo Assessorum pari, OBRECHTO & BERCHTOLDO, poscebatur votis omnium, qui orbem desolatamque dignitatem suo nitore ac publicis emolumentis redderet. Sed quem vota communia quærent, quem reperirent dexterrima judicia, nisi quem & eximia indoles, & promptissimi actus, & magna omnia summis in Republica rebus moliendis efficiendisque parem, civitati & civitatis præsertim tutoribus longe lateque ostentabant? Adfuit semper Augustissimæ huic Reipublicæ, quod ex superiorum historia temporum constare potest, singularis quædam in magnis dignitatibus conferendis, sive ut rectius ad propositum loquar, in dispiciendis incolumitatis suæ instrumentis prudentia: secutus est prudentiam plerumque eventus publice latissimus: faxitque conservator nostri status & auctor DEUS, ut propria nobis ac perpetua utriusque boni societas sit: sed fortasse nunquam prolixius evenit; quod consentiens cum Senatu populus optaverat. Nisi quod haud paulo facilius erat, dignissimum invenisse, quam modestissimum permovere. Coiverant seorsum, habito jam ante super ea re consilio, viri eminentissimi, STORCKIUS Consul, KOLLOEFELIUS & INGOLDUS XIII. viri: quorum illos quidem sua dies nostris usibus magis quam venerationi subduxit; hunc ut maximum civitatis bonum reverenter agnoscimus, ita ut longissimum sit, omnes precamur. hi † vocatum ad se nihil tale cogitan-

† 1609. 23. Octobr. \* 1611. m. Dec. † 1613. 6. Dec.

tantem SCHMIDTUM multa verborum gravitate docent, laudatissimos Reipublicæ procures majori quam vellent casu admonitos, ut arduis administrationibus suis denuo sociare consiliorum participes cupiant, ipsum præcipue tum honorifica compellatione, tum spe præmiorum & gloriæ, quam officium, si quod, venerabile ingentem traheret, provocandum duxisse, cujus prudentiam, ut perspectam, ita sibi judicaret esse necessariam. Adjecerunt his alia, quæ vel commovendo animo, vel commendandæ dignitati, apta videbantur. SCHMIDIUS percussus magis novitate rei, quam exhilararus honore, videbat fati sui, videbat Reipublicæ suæ voluntatem: cui refragari apparebat crimini proximum; statim obsequi, non uno nomine futurum erat onerosum periculosumque. Igitur, non obsequii, non caritatis in patriam, non reverentiæ adversus magistratum se immemorem fore, sollicita grati animi significatione, testatur, cum post petitam impetratamque tridui deliberationem rursus magnitudinem oblatis muneris, suam modestiam, & institutum vitæ fori potius utilitatibus, quam curiæ splendori accommodatum excusasset, longeq; se ut à contumacia, sic ab ambitione removisset, nova auctoritatis publicæ denuntiatione compulsus superiorum mandatis totum se permisit. Maneant vero semper in hac republica illa ex honesto certamina, ut cum recusantium modestia, eligentium pugnet dexteritas: deturque exempli hujus veneratio, ni, ut suspectus in posterum habeatur, quicumque magnis functionibus ingerit se magis, quam accedit. Quod cum in omni re turpitudinem, tum in hac etiam periculum immane habet conjunctum. Est enim, quod omnes intelligitis, Auditores, magnificum Assessoris decus (Advocatos Civitatis vulgo vocant, incommodo hic quidem elogio) inter ea numerandum, quibus optimum publicum suam faciem, conditionem, vices, sæpe & originem debet. Quapropter, non nisi optimus quisque, multaque dote & arte ad curas publicas sustinendas natus factusque, inveniendus est: qui administret, non ex illis aliquod muneribus, quæ sola fide

& industria constant, sed quod imperandi regendique ad-  
 miniculo & participandis summis provisionibus æstimatur.  
 Hos sive Consiliarios, & Assessores, cum Imperatoribus;  
 sive instrumenta boni sæculi, & imperii, cum Symmacho  
 ac Tacito; sive Amicos imperantium, cum scriptoribus ple-  
 risque dixerimus: in illa quidem laude, naturæ acrimo-  
 niam, usumque & exercitationem; in ista, innumerabiles  
 virtutis imperatoris artes, nec pauciores artium fructus;  
 in hac, cum egregia fide certissimum eorum quæ nomina-  
 vimus fundamentum complectemur. Equidem mihi me-  
 moriam temporum peragranti satis est compertum, apud  
 cunctas nationes, civitates, regna, non diutius im-  
 perii fortunam quam consiliorum rectitudinem per-  
 stitisse: neque aliud beatum regimen fuisse, quam quod  
 eximiis adiutoribus niteretur. quin mali Principum vitia, vir-  
 tute Amicorum, Reipublicæ innoxia; optimorum Principum  
 artes, sinisteritate Amicorum inutiles agnoscebam. pa-  
 rumque absuit, quin tyrannos publico temporum respectu  
 absolverem, quorum ingenia privatim damnabam. Quippe  
 quam divinam rem, tam, si recte adgubernaretur, inviolabi-  
 lem esse consilium cernebam. cuius nec libertas metu de-  
 bilitari, nec constantia per alienam libidinem flecti, nec  
 pietas ulla re posset expugnari. Nam quod cadibus ty-  
 rannidi viam patefactam aliqui opinantur, id nunquam sane  
 accidisset, si plures omni tempore exstitissent, qui bonum publi-  
 cum, quam qui privata pericula cogitassent, consiliiq; sanctita-  
 tem ante sanctitatis eventus habuissent. Fortunatam isthoc no-  
 mine Rempublicam nostram, quæ & statum suum admirabili  
 consiliorum prudentia ab initio fundavit, & ad guberna-  
 deinceps auctæ fortunæ molem tam præclaris est usâ adju-  
 toribus! Tria sunt circiter sæcula, ex quo ea Reipublicæ,  
 qua fruimur, forma civitati est imposita. Dimidium ejus  
 temporis, rebus scilicet modicis, ac domi porissimum occu-  
 pato, cunctaque suis ut auspiciis sic consiliis administrante  
 Senatu, caruit hoc quo de loquimur, Assessuræ munere:  
 donec increfcente per celebritatem Urbis negotiorum mul-  
 titu-

titudine, amplitudo publici regiminis tum hoc cœpit sub-  
 dio indigere. Cujus initio ante hos CXLVII. annos factum  
 cum & numero virorum, & eminentiæ splendore illa di-  
 gnitas denique augetur, usque in hunc diem ii numeran-  
 tur Assesores, in quibus nemo est quin publicis auribus ejus  
 nomen mereatur comendari. Quamquam enim de Græcorum  
 illo more, haud adeo magnifice sentiam, cum unius fune-  
 bri laudatione suscepta, ceterorum, quos eadem civitas præ-  
 stantes habuisset, virorum commemoratione sermonem oc-  
 cupabant; lubet tamen vel propterea obiter plerosque no-  
 minare, ut cum quantis Viris SCHMIDIUM Nostrum compa-  
 rare, quantis æquum præferre, judicandum vobis relinquam,  
 Auditores. WELTSLERUM itaque (nam hic ordinis ejus  
 princeps habetur) sequuntur BRANDIUS, BALDUNGUS, FRO-  
 SCHIUS, BITTELBRONNERUS, GREMPIUS, KOPPIUS, ÖLINGERUS,  
 BEBION, BOTZHEMIUS, NERVIUS, WOGESSERUS, HART-  
 LIEBIUS, GREISSIUS, OBRECHTUS. Atque hic, ne cum vi-  
 vis mortuos confundamus liceat statim adnectere BECH-  
 TOLDUM & SCHMIDIUM: quamvis eos antecesserit tempore  
 LEITERSPERGERUS, cum quo superstites adhuc BECHTIUM, IM-  
 LINUM, MOLLINGERUM (nam hi tres continuant interjunctam  
 seriem) vita longæva & prospera uti, merita virorum faciunt ut  
 optemus. Sed à ceteris quidem, quos partim faustæ recordatio-  
 nis, partim testandæ spei publicæ ergo & judicii, nostra men-  
 tio coluit, ad SCHMIDIUM redimus. Qui splendidam per se di-  
 gnitatem, inusitato administrationis splendore nimio opere illu-  
 stravit. Magna hic mihi adeoque longe major mea voce  
 dicendi materies surgit, rerumque amplissimarum copia to-  
 tus circumfundor: quæ dum suggerere videtur, nihil aliud  
 quam præpedire & auferre illam orationis varietatem, qua alias  
 ut parva crescere, sic ingentia solent exultare. Sane quid  
 in copiosa hac inopia consilii capiendum, non immerito  
 ambigam, nisi æquitate vestra freta, Auditores, ab initio  
 statim præplacuisse, summa potius capita tangendo æsti-  
 mandum vobis proponere SCHMIDIUM, quam commentan-  
 do singula exequendoque id assequi, ut fortasse multa ma-  
 teriæ

terix tamen imparia viderer dixisse. Quis enim tot Reipublicæ causæ susceptos labores perfectosque, quis tot saluberrima inventa, tot sagacissima consilia, tot illustria opera, consentanea stili gravitate possit explicare? Sive rerum civilium actorem intueor, magnus est; sive causarum oratorem cogito, magnus est: sive publicarum utilitatum artificem attimo, ubique magnus, ubique gravis est: sive legatum suæ civitatis considero, longe maximus, longe est gravissimus. Hoc enim arduum illud munus est, quo ego omnes contineri artes, omnes includi virtutes, neque certius argumentum summi viri arbitror fusos hostes, expugnatas urbes, constitutam pacem, quam obitas ex dignitate & usu publico legationes. Posset hic gloriari mea oratio, posset se efferre, posset triumphare, nisi tanta commemoraturo, omnia in rerum pondere, nihil in verborum cultu esset reponendum. Ivit SCHMIDIUS intra spatium viginti annorum, quibus non tam vitæ ejus quam gloriæ cursus & incrementa censeretur, publico nomine & causâ quinquagies quinque Legatus aut præcipuus Legati comes ac orator: ivit de rebus maximis, difficillimis, denique tali administratore dignis: ivit ad Imperatorem, ad Electores, ad Principes, ad Civitates seorsum; ivit ad augusta, quæ sublimibus negotiis vario congressu destinabantur concilia: & quo plurima comprehendi uno queunt, ivit semper gloriosior, quia redierat semper felicior, semper bene gesta publica re acceptior. Non expectabit autem quisquam, ut legationum harum causæ, tituli, negotia, eventus, hoc ex loco edisserantur: nisi quatenus legati & legationis unam ubique fortunam, publicam salutem, publicam gloriam fuisse, ignorari non debet. De cetero rectius publice nesciuntur, quæ ut publice profint, fidei paucorum commissæ, reverentius quam jactantius solent custodiri. Resciscat ista mireturque posteritas, non mea hominis indifferi prædicatione, sed æterno annalium honore erudita: si quem forte scribendis tam memorabilibus haud uno nomine temporibus, vindicandæque illustrium factorum virorumque memoriæ

Thua.

Thuanum orbi aut Sleidanum fata redonabunt. Sin majorum nos fortuna manet, & dicendis Germanis ingenia porius aut subsidia quam causæ deerunt, idemque patiemur quod Romano imperio in Orientem translato accidit, ut quo maxime memorandus tempore Oriens esset, nemo reperiretur qui memoraret: oblita certe non putabuntur, quæ actis immixta Reip. cum ejusdem perennitate, quam Deo commendamus, servabuntur. Illud non omiserim, quas ipse judicavit legationum suarum præcipuas, referre. Quarium præma in annum sæculi quintum decimum incidit, cum institutum de armis ponendis finiendoque, quod Brunsvigæ Principem cum civitate colliserat, bello conventum adiit, atque Halberstadii trium factus civitatum orator (nam & Norimbergenses Legati, cum Ulmenibus venerant) summa cum admiratione ingenii & eloquentiæ auditus est. Inventi certe paulo post sunt, qui æmulationis occasionem eam nacti, omni ope hoc Urbis honestamentum à nobis abstractum cuperent. Cujus rei commemoratione suo loco & similibus exemplis reservata, ad secundam è gravioribus legationem progrediendum est. quæ ante hoc decennium contigit, cum Mülhusam Thuringiæ coactis super Serenissimi Principis FRIDERICI Palatini negotio Septemviris Imperii, SCHMIDIUS tum in augustissimo eorum concilio, tum seorsum apud Electorem Saxonem, Imperialium civitatum nomine, de rebus maximi in omnem partem momenti egit: non sine memorabili laudis suæ accessione: quam tot præclaris artibus subnixam, semper ultra priores terminos proficere ac metas, nemo erat qui non videret. Succedit novus virtutis SCHMIDIANÆ testis, annus sæculi trigésimus, quo, cum indicta comitia congressique Ratisbonæ cum Imperatore Electores ingenti sed varia expectatione, metuque & spe, curas confictatæ duodecim annorum bello Germaniæ arrexissent, suamque quanto quisque poterat opere causam & pacem Synodo tam celebri commendarent: Liberæ, quæ vocantur, & Imperii civitates Evangelicæ, ut efficacissime loquerentur, Argentoratensis

sis ore Nestoris apud Imperatorias aures sunt locutæ. Repræsentabatur disertissima deprecatione, inducta late terris solitudo, agrorum vastitas, raptus penatium, injuriæ bellorum, acerbitates tributorum, concussio imperiû & pavor: cujus tor tantasque miseria non longius à patriæ exitio, quam à dilatione auxilii abesse. Igitur modum malis ac finem eos orare, qui omnem Imperiû incolumitatem ab Imperiû capite, post divinam opem, expectarent. Insequens annus causam gravissimæ legationis concilium Evangelicorum Procerum, Reipublicæ ab interitu vindicandæ indictum, locum ac testem Lipsiam: & mox alterius, Francofurtum habuit, quo pacis faciendæ ergo ferebatur facta coitio. Sed & permultæ difficultatis arduæque administrationis fuisse putandæ sunt, quæ anno trigesimo tertio hujus sæculi primo Heilbronnæ, deinde Francofurtum rursus institutæ sunt profectiones: cum utrobique de rebus satis ambiguus cum Proceribus Suedicis; quique eorum sœderibus erant innexi, ageretur. Verum quatenus legationum quidem numerus grandior est, quam qui sine defatigatione tam illustris Auditorii queat recenteri; artes Legati exactissimi, atque gerendarum rationes rerum, ex virtutibus tam præclari animi, & ingenii tam sublimis dotibus æstimabimus. Sane qui simplicius agunt, sola gestorum magnitudine, auctoris famam metiuntur: nobis potius convenerit ex gerendi rectitudine & artibus gerentem intelligere. Fit enim haud raro, ut virtutis laudem, virtutum imitamenta reportent: est cum destitutus bona arte Legatus, per inania, favente casu, inclarescit: quin imo haud optimæ negotii tractationes sæpe optimos habuere successus, neque quicquam tam fallacis est judicii, quam efficiendi subsidia ex eventu effectuum colligere. Quare dum alii ut exteriora ostentent, obvelant interiora; nihil Nostro ad gloriam fuerit accommodatius, quam penitus quærri, penitus inspectari. Ac Plato quidem Sapientiam admirabiles sui amores excitaturam inter homines, si corporeo posset aspectu usurpari, credebat. Mihi efficacior viderur, quæ obtruit



obtritu mentis acerrimo subtilissimoque, in pulcherrima rerum, & vel ideo pulciora, quod exteriori spectaculo non patent, fertur contemplatio. Cujus ope, veluti specillis quibusdam usi, fulgentissimum in SCHMIDIANO pectore decus, atque in omnes Legationum artes satis validum admirabundi deprehendemus. Prudentia scilicet est, quæ & Legati mentem acuit, ut tractandis hominum versandisque animis penetrabilis, omnium affectionum, omnium sciens studiorum, præsentia de præteritis ordinet, ad futura dirigat, latius meditationem quam verba mittat: & obstantia provide amoliat, intricata perite solvat, nihil impotenter rumpat, omnia tractet moderate: & Reipublicæ suæ, cujus non tam intelligentiam secum, quam vigilem in omnia curam circumfert, singula accommodando, quædam speciosa dimittat, quædam admittat necessaria, quædam adstricta remittat, quædam induat simulata: denique cum accinctam res & intentam postulat philosophiam, ut dexter excogitandis, promptus exequendis, cautus enuntiandis sit iis, quæ causæ utilitatem pondere, personæ favorem acumine juvant aut festivitate. Nihil enim dicto opportuno venustius, nihil subito responso utilius, quo legati haud raro supra contentionis assiduitatem & longam diem, supra factas ex assè persuasiones, supra quæsitissimas benevolentiae captationes profecerunt. Nihil præsentis consilio cordatius, quod nec asperitate retundi, nec inanibus moveri, nec terreri cuncto formidinis instrumento potest. Nihil circumspecta sui occultatione tutius, quæ Legatum, cui insidiatur quisquis ab altera parte est, à risu, à contemptu, ab invidia ad auctoritatem suæ Reipublicæ & speciem ubique graviter, ubique decenter repræsentandam incorrupta ratione perducit. Multa paucis dixit, & immensam laudis segetem simplici magis efficacia, quam congrua judicii amplitudine collegit, qui *tempora esse & verba, quæ Legatis committuntur* autumnavit. Enimvero cum consilia temporum, tempora rerum, utrorumque sit prudentia: nullum ab altero superari, nullum sine altero attendi, nullum

cum altero confundi, omnia invicem misceri, temperari, distingui, quantæ sit res difficultatis, soli intellexerint, quos civilis usus experientia versabili negotiorum, ut ita dicam, circulo probe exercuerit. Fugax, & inconstans & varie mutabilis res tempus, nec commodè semper apprehendi, neque certo retineri, neque sine ingenti intertrimento rerum potest negligi. Insidiatur incautis, insidiantibus se subducit, ridet festinantes, cessantes spernit; minatur sollicitis, praesidentes exterrit; rebus alligari dedignatur, res sibi alligare non veretur. Denique quoties in ambigua temporis & profunda prudentiæ cogitationem mitto, ejusque non exteriora vocabula, sed interiores rationes perpendo, nescio quid divinum, & mirabile, & quod facilis sit intellectu quam oratione assequi, reperio. Dictus est apud Romanos Sapiens Cato, dictus est Acilius: ille ob multarum, quas vita affert rerum usum, hic ob civilis scientiam juris. Lælius autem cum aliis ob cordatam rerum divinarum humanarumque intelligentiam, ejusdem cognomenti honore sunt mactati. Quod si adhuc hodie mos ille viveret, nonne manifestum est, cuncta in SCHMIDIO concurrere, ob quæ illi singula æternos meruere titulos, atque post enumerata quæ ceteris contingere sapientiæ genera, ejusdem aliquod fastigium huic soli partum, superesse? Sed hanc quidem partem nemo sibi digne sumserit amplificandam, nisi qui SCHMIDIANA aut SCHMIDIANÆ non multum dispari & prudentia fuerit instructus & facundia. Hoc enim alterum illud decus est, sine quo nec prudentia utilis, nec prudentiæ dignitas manifesta, nec legationis efficax potest esse tractatio. Est autem ea commendatio adeo propria SCHMIDIO, ut supervacuum ferme videatur prædicare de re, cujus post edita tot in omne ævum mansuræ specimina, testem omnem Germanum orbem nactus, miratricem omnem nanciscetur posteritatem, quæ aut omnia ignorabit, aut hoc nequaquam: vixisse Argentorati virum, cujus temperata dulci gravitate eloquentia, quasi cum Reipublicæ suæ majestate paria faceret; quocunque pervenisset,

quo-

quotiescunque maximis rebus dignum os daret, omnia lætissimo splendore, grataque lubentia impleverit, traxerit animos, rexerit tempora, transegerit negotia, audientium venerationem, Principum favorem, intelligentium admirationem meruerit. Inciderit in hoc argumentum tumidus aliquis, dissimillimæ illi quam commendandam suscepisset, eloquentiæ ostentator, næ ille nihil aliud quam rhetoricum quandam campum cogitabit, quæ solius civilis judicii censura est. Replicabit igitur Poetas, evoluet Historicos, extenuabit Græcorum Nestores, Ulysses, Pericles, Demosthenes: fastidiet Romanorum Hortensios, Cæsares, Cicerones: denique per vetustatis contemptum multa ambage incedens ad suorum temporum bona & SCHMIDII laudem perveniet. Nobis neque ignotum est, studiosiores laudibus suis amplificandis, quam prodendæ ad nos veritati veteres fuisse: à quibus nulla fortassis re sæpius vincimur, quam scribendi pompa & peritia ostentandi: neque tamen SCHMIDIUM laudare non possumus, nisi aspernatione aliorum utentibus tantum nobis fidei decedat, quantum adolevisse videretur affectationis. Qua longe relegata, eloquentiam viri simplicissime, id est, per signa dicemus. Nihil in oratione ejus vulgare, humile, ineptum: nihil in animi commentatione incautum, nihil in meditationis opere tumultuarium, nihil in omni actione & gestu ventosum. Quæ si parum vobis ad magnam laudem videntur idonea, cogitate an illa plus valeant: res intrincatas, nihil minus quam intrincate: difficillimas, nihil minus quam difficulter; invidiosas nihil minus quam invidiose; duras nihil minus quam duriter tractavit: explicator planissimus, disceptator bene compositus, deprecator validissimus, suavor gravissimus, hortator efficacissimus, instructissimus defensor. Ille in judiciis auctoritatem, in senatu majestatem, in aulis inodationem, sive per negotii genium invitabatur, absolutissime expressit; sive per impedimenta nihil tale inveniebat, invenit per victricem impedimentorum sacundiam. Equidem divinum quidpiam mihi, & sacrum & venerabile

videtur, posse hominum animos fluctuantes oratione dirigere, dubios consilio firmare, averfos temperamento allicere: calliditatis vafraimenta supplantare; aurium superbiam placare, fastidium permulcere: regio fastigio, quod plerumque morosum; politicis artibus, quæ plerumque subtiliter occultæ; populari expectationi, quæ plerumque temerarie varia est, oratione satisfacere. Abriperet me in immensum rei illustrissimæ pulcritudo, nisi SCHMIDIANÆ contemplationis, in quam penitus mentem defixi, invitamenta sequentem conspectus vester gravissimus ad pettenda cetera revocaret. Futurum tamen sic quoque tardius obsequium, illud incitat, quod de perfectissima ornatissimaque eloquentiæ absque eloquentiæ ornatu diutius loqui, cum tadio non injusto videri queat conjunctum. Præsertim cum non pauci adsint, quibus comparatione suavissimæ auditionis suæ, cujus nunquam eos potest oblivio capere, ariditatem nostræ descriptionis in proclivi sit flagellare. Scilicet quamvis plurimi ducerent, quæ ex dicentis ore audirent; non minimum dicentem commendabant, quæ viderent. Statura decenter erecta: dignitas vultus aspectabilis: quem insignia senectutis, ubi accessissent, non corrumpebant labenti specie, sed inflexa maturitate honestabant: oculorum graviter adgubernata dispensatio: membrorum succiplenissimorum apta exercitataque competentia; pronuntiatio & gestus, cui non auctoritas, non suavitas, non varietas deesset. Igitur quoties uberrimi excellentia celsitudoque sermonis omnia in se convertit, plane dixisses, pectus viri incolere Prudentiam, os habitare Facundiam, vultum insidere Gravitatem, corpus totum omnes Gratias, omnes domicilio legisse Venustates. Uno certe eodemque tempore, ut mentibus audientium sapientiæ illa copia, sic obtutibus amabilis vultus gratia SCHMIDIUM insinuabat. Accesserant mores probitate & industria eousque conspicui, ut in ambiguo esset, plusne fidei dicendo mereretur an vivendo: nisi quod utrinque eminens reatitudo alterutrius ornamenta amplificabat. Ægyptiorum prin-

principes ajunt, ut gens illa signis ejusmodi & figuris ab ultima vetustate dedita erat, collo torquem gestasse, cui vocabulum Veritas, materia aurum, materiæ honestamentum gemmæ essent. Hinc per ambages sciri volebant: virum civilem duabus debere potissimum rebus enitescere, probitate vitæ, & ingenuitate sermonis. SCHMIDIO sæpe pretiosos torques non sua tantum dignitas, sed Principum præcipue favor circumdederat: sæpe auri virum, sæpe gemmarum splendor oculis intuentium monstrabat. Longe autem sæpius meritorum virtutumque fulgore spectandum animis & conscientiæ mortalium se præbebat: coruscus erecto more, erecto sermone, denique profus dignus, qui nullo externo decore, nisi quatenus interioris meriti indicium id esset, æstimaretur. Tales scilicet viros in animo habebant (an enim & vidisse contigit unum alterumve?) Paschalius ille experientia vir fultus & doctrina, tum fretus judicio Gentilis, cum ex antiquioris ævi collectis virtutibus suos describerent Legatos. redeundum enim est ad eam gloriam, cujus adminicula hætenus tetigimus. Tales erant Legati, quibus cum Cyrus olim uteretur, muros quosdam sui status, & propugnacula se adeptum & credebatur & jactabat. Talibus Legatis cum Argentoratenses hætenus essent armati, quis imbelles eos, quis male crederet munitos? Hi quos iratos convenere, relinquunt placatos: hi quos reperere insidiosos, efficiunt pudibundos: his negotia spiritum, his tractationes publicæ vigorem debent: nec aliam Respublica foris speciem habebit aut famam, nisi quam Legatus vel dederit vel detraxerit. Atque inclytæ quidem hujus Civitatis cum nemo sit apud extraneos, qui magnitudinem & progressam fatalibus incrementis gloriam ignoret, nemo tamen magis unquam æstimavit, quam cum magni alicujus viri, ut illius JACOBI STURMI quondam, ut INGOLDI hujus, ut SCHMIDII Nostri (nam hæc duo per multos jam annos capita legationum nostrarum, ut ita dicam, & pectora erant) persona velut interprete moneretur. Severissimi oris scriptor altissimique vir

consilii Sallustius Crispus, cum Reipublicæ suæ prospera vel adversa, præclare aut secus facta assidue secum reputaret, sedulaque meditatione, quænam res maxime tanta negotia sustinisset, quid domi felices, foris magnos reddidisset Romanos, agitarer; denique sollertissimo, ut ego quidem arbitror, iudicio, *paucorum civium egregiam virtutem cuncta*, inquit, *patravisse*. Fallor an omnes Respublicæ aliquid simile habent: in quibus ut semper plures sunt, qui virtuti potentiam antepoñant; ita cum aliquorum virus imitandi nisu exempli ceteris neglectis sibi atque Reipublicæ est intenta, magno successu se quidem supra potentiam, rem vero publicam supra privatos ausus & pericula detrimenti extollit. Neque ceteris aliquid hæc sententia detrahit. Sed profecto aliud est in homine rationis, aliud spiritus vitalis, aliud sensuum munus; nec si unum ex his evehimus, reliqua per contemptum deijci, quin imo per comparationem putanda sunt conjungi. Verum enimvero cum tantus jam esset SCHMIDIUS, ut non tam Argentorati, conditione generis; quam in remotis terrarum finibus, caritate meritorum natus videretur: ingens certamen (qua enim alia leniori voce utar?) circa eum asferendum, alliciendum, possidendumque se intendit. De quo more quid sentiam, non habeo equidem dicere. Video potentissimos Reges, Principes, Respublicas mutuum istud circa viros eximios contentionis genus exercuisse: video ut mutuos questus, sic mutuas excusationes: video suspensa circa tantam rem prudentum judicia: & quæ sita tristiori negotio mitiora vocabula: video denique longè tutius hic esse cogitare, quam loqui; narrare quam judicare. Primi virum aggressi sunt Legati Serenissimi Principis CHRISTIANI BRANDENBURGICI, quos anno cdo dc xv Norimbergæ agentes, quo SCHMIDIUM quoque institutum de rebus summis & amicitiiis tractandis consilium pertraxerat, simul amor tantarum virtutum, simul patriæ suæ attollendæ cura summopere cepit. Igitur ut magis impetrabilis esset, intimæ familiaritatis orator mittitur: Persua-

deret

deret amico eximio, ut Consiliarii secretioris, & secururam paulo post vicariam Cancellarii dignitatem in aula sui principis, munera per se clarissima, clariora cum offerrentur, ne subterfugeret. Sed nimirum vera est, quæ vulgo fertur, sententia: Nihil amore Patriæ fortius, nihil esse constanterius. Non removebat quidem SCHMIDTUS neque tum neque postea, tam promte insequentes ipsum honores, sed semet removebat ab honoribus. Quorum illud fastidio videri affine potuisset, hoc certissimum fidei pro sua Republica pertinacis haberi par est indicium. Quæ ut invicta ab omnibus crederetur, secuta mox molimina maxima & irrita perfecerunt. Magdeburgensis Archiepiscopatus erat, cujus administratio hoc fulcimentum quia aptissimum videbat, aulæ est veluti fatis sibi debitum putare. Quod negotium ut sub manus prospere succederet, nihil non tentatum. Biennio postquam Culmbacenses legati pro se, quod dixi, frustra speraverant, pro aliis jam satis impense niti cœperunt. Cum enim Heilbronnæ federandis ordinibus & communis causâ concordia, qui Principum Civitatumque nomine missi erant, convenissent, Cancellarius supra laudari Marchionis, sanctiorisque arbitri consilii URBANUS CASPARUS FEILTSCHIUS (cujus Mæcenatis nostri nomen venerationis causâ usurpamus, quatenus perspectas nobis virtutes nec incognita merita, ratio instituti non permittit, ut in rarissimæ Nobilitatis laudem vindicemus) SCHMIDIO exposuit inclyti Principis Archiepiscopatus Magdeburgici Administratoris, de adsciscendo novo Consiliario, sive potius idoneo Cancellarii jam decrepiti successore, consilium. Ipsum ait potissimum placuisse, qui ad tantæ dignationis amplitudinem, ingenti salario & singulari Principalis munificentia favore invitaretur. Accedere loci amœnitatem, aulæ disciplinam, ipsum Principem non tam fortuna, quam animi dotibus æstimandum. A quo se conciliatorem voti lectum nihil magis optare, quam ut sic SCHMIDII voluntas, quemadmodum sua industria desiderio Principis responderet. Ad ea Noster, cum suscipi tantam rem sine deli-

deliberatione ac consensu aliorum nec posse, nec debere testatus esset, tempus moræ & dilationi & negationi quæsitum poterat videri, nisi insequens annus fortiolem machinam admovisset. Scripserant Proceres Capituli Magdeburgensis ad celeberrimum eo tempore hujus Urbis Assessorum, eumque ut cum SCHMIDIO in hanc sententiam ageret, rogaverant: vivere adhuc secum, & victuram esse illius eloquentiæ aliarumque laudum memoriam, quam anno c10 dc xv Halberstadiensis conventus animis plerorumque impressisset: igitur de præcipuo administrationis suæ adjutore sollicitis nullum debuisse alium succurrere, quam cujus tot insignia merita ut pridem audissent, ita nunc sperarent. Intelligebantur his addenda etiam quæ non essent addita: præmiorum magnitudo, opulentiæ decessorum, domi quies, omnia circum federata, amica, & vel necessitudine sociata vel religione: annonæ facilitas, vicinitas rei salariæ felicitate, tum celebritate Academiæ memorabilis. Quibus cunctis SCHMIDIUS, Patriæ addictam operam, Procerum suæ Reipubl. prolixiā voluntatem & beneficia, rei familiaris & necessitudinum conditionem, & quæ simillimi videbantur futura ponderis, opposuit. Longæ fuerit res moræ hic referre, quæ comitas offerentium, quæ constantia SCHMIDII in ceteris fuerit, FRIDERICUS PALATINUS, per Comitem Solmensis; JOHANNES ERNESTUS VINARIENSIS, per Forstenheuserum; FRIDERICUS ULRICUS BRUNSWICENSIS per Petreum JCtum, id est, Maximi Principes per idoneos interpretes auctoresque, ille Consiliarium, hic & iste Cancellarium, ultro ambierant. Sunt in hac Civitate, sunt in hoc Auditorio (patientur enim illustrissima Germaniæ nostræ sidera plane dignam suo fastigio curam memorari) quorum vel serenissimæ necessitudines, vel ipsi, utramque, quam modo diximus, dignitatem Nostro detulere. OXENSTIRNA quoque ille, rerum Suecicarum alter Atlas, cum Cancellarium ei loco, unde in cetera regimen sperabatur, operaret, hunc statim vidit, voluit, expetivit, Cujus rei magna



magna admiratio, magna esset commendatio, si oratione exequi vacaret, quod mentione libuit perstringere. Quis enim posterorum crederet, recusitam, quantum oblatam dignitatem ceterarum principem, & honorum quos novimus apicem: extraque vota habitum, quod alii unice in votis haberent, nisi supra vota crederent? Neque interim de Saxonica Assessoria quicquam dixi, quæ summorum virorum studio & opera, SCHMIDIO nequicquam conciliabatur. neque ipsam Imperatoris gloriosissimi singularem munificentiam memoravi, quam non SCHMIDIUS per ambitionem, sed ipsa SCHMIDIUM per meritorum favorem invenit. Annus agebatur Clod. DC XXV, cum augusta imperii parens Vienna, viro non domi tantum meritis claro, sed per omne regni Germanici corpus late nobili, titulum & jura Comitum, quem vocant, sacri Palatii, nec cogitanti nec petenti transmisit, atque donavit. Debuit scilicet omnibus constare, Imperatoriam vere laudem esse, hominum magnifice meritorum laudes amplificare & attollere: sive tempus jam erat, ut honor iste, quem anxie à multis ambitum, pretiose à quibusdam & fallaciter eintum, deerrasse nunquam ad indignos satis constat, virum ipse sibi quæreretur, cui dignitatem non magis adderet, quam deberet. Ivi-mus, Auditores, sive potius (tanta fuit brevisitas) cucurrimus per honores plerosque SCHMIDIANOS. in quibus illud per nobis honorificum, pergloriosum merito videri potest, quod plures meruit quam recepit, plures recepit quam optavit: duas res rarissimas pariter consecutus, ut esse magnus quam dici mallet, & præmiorum dulcedini factorum semper conscientiam longe anteferreret. Triumphata igitur Argentorati ambitio est, quæ ne usquam vinceretur, magnos sibi passim animos, magnos viros, & clarissimos ubique principes, inde ab antiquo credebatur pignerasse. Ma-cte vir, præclare per omnia merite! Macte etiam emerite! Quærebas tu quidem tot laboribus & negotiis tandem modum, quærebas finem: ratus haud dubie æquissimum, ut post patriam ope, consilio, sudoribus, periculis præclare sem-

semper adjutam, post Germanum orbem factorum gloria & meritis impletum, post honorum præcipua ultroneo favore delata, tandem tibi liceret, quod justissimum industria præmium est, metam contingere, vitæque actu perpetuo nobilitatæ mercedem in tranquilliori ejus fine, & sapientia tot modis hætenus tibi devinctæ, secretiori amplexu invenire. Nec sane quisquam erat, quin intelligeret, impensos Reipublicæ tres & viginti annos, pauculorum qui superessent sedationem usum, debuisse seni impetrare, nisi quod haud fallebat prudentiam Illustris Senatus, quantum ad Rempublicam illa petitio pertineret. Non sustinuit tamen tristius ei responsum dare, cui omnia lata, omnia candida pridem ex animo cupiebat. Quare sub finem anni, quem in hoc sæculo † trigessimum tertium numeravimus, non tam dimissa, quam è strepitu curiæ ad domesticam quietem translata novique auctoramento salarii, in privata, ut sic dicam, publicorum consiliorum societate retenta viri opera est, si tamen hætenus steterit negotiosi ratio otii. At enim quam ille levationem senectutis speraverat, in decus ejusdem atque ornamentum converti è vestigio sensit, summorum splendore hominum, dubiorum anxietate civium non defuit celebrari domus, quæ nulli hætenus clausa per superbiam, nulli tristis per frustrationem spei, omnibus salutaris, omnibus exoptata semper fuerat. Infixa erat longe validius, quam ut facile aut cito divelli posset, civitatis animis viri mansuetudo, facilitas, æquitas: & ad spem futuræ opis audacius ferebantur recordatione præteritæ. Agnoscebat ille affectus hominum, & cum sibi dissimilis esse non posset, comitanti affectus molestiæ ignoscebat, videbatque viris egregiis & strenuis non tam à naturæ impressum, quam à fati sub necessitatis lege destinatum, grande illud & operosum,

*Non sibi sed toti genitum se credere mundo.*

Accessere anno insequenti Serenissimi Principis EBERHARDI WÜRTEMBERGICI, tum Rerumpublicarum Augustanæ Vindelicæ, Noribergensis, Francofurtensis, Ulmenensis; ante  
bien-

biennium vero Celsissimi Principis GEORGII HASSI, consilia SCHMIDII operamque desiderantium, auctoramenta. quibus ille ut à voto suo, sic à solitudine remotus, non ausus est, desiderii sui respectu tam cordata aliorum desidia destituere. Magnificus ille & ingens ut animi sic verborum Tullius, cum emeriti Jurisconsulti gloriam disertissima brevitate vellet complecti, domum ejus totius oraculum civitatis appellavit. SCHMIDII domum non civitatis modo hujus, sed totius pene Germania oraculum fuisse, soli ambigere possunt, qui in profunda rerum publice gestarum ignoratione versantur. Ideo quod grandiloquus Orator, non nisi cum aliqua immutatione & figuræ artificio usurpare ausus est ex veteri Poëta, nos penitus & cum fiducia, *Quid est*, inquam, *præclarior, quam honoribus & Reipublica muneribus persunctum senem, posse suo jure dicere idem, quod apud Ennium dicat ille Pythius Apollo: se esse eum,*

*Unde sibi populi & reges consilium expetant, suarum rerum incerti? quos ego mea ope ex incertis certos, compotesque consilii dimitto, ut ne res temere trahant turbidas.*

Quanquam si ad domestica prævertimus, ea profecto proxime antecedentibus annis inciderant tempora; quæ SCHMIDII otium nequaquam otiosum, virtutem minime patiebantur esse emeritam. Quin imo sicut in aliis rebus asperitas casuum ad labores revocat, quos iisdem lex subduxerat: ita cujus tranquillitati patria apprime favebat, propter opem toties præstitam, ejus non poterat merita & meritorum necessitatem per durissima negotiorum oblivisci. Quæ de re, cum omnia dispicio, rectissime exemplo me loqui posse intelligo. Tempore, quo vaserimus qui unquam vivere Principum Philippus Macedo, Græciæ dominatum affectabat, & magna jam parte obtinebat, Athenæ potissimum erant, quæ ambitioni ejus obstarent, & improbas spes fortiter coercerent. Harum libertatem vi & ferro aggressus est: frustra. pactionibus & federibus tentavit: frustra. fraude,

de, insidiis, artibus, blanditiis oppugnavit: frustra, omne calliditatis ingenium, & horribilia sacra frustra semper, frustra commoverat. Mærebat totiens victrix perfidia: suetusque successibus animus, priorem fortunam misto indignationi pudore circumspectabat. Nec latuit fatalis mora tyrannidis Demosthenes. Hunc enim Oratorem, non Atheniensium populum esse, cum quo sibi anceps bellum surrexisset, sæpe apud amicos querebatur. Athenas, inquiebat, pridem noster imperus expugnasset, nisi in hunc scopulum incidisset: pridem astutia penetrasset, nisi per hoc munimentum locus ruinæ quærendus fuisset. Demosthenis consilium murus est, eloquentia telum, magnitudo animi & vigilantia propugnaculum. Thebas cepimus: Thessalia nostra est: nostræ essent Athenæ, si unus noster foret Demosthenes. Quæ Philippi & post eum Antipatri de tanto vito judicia, qui apud Lucianum præsertim legit, si temporum nostrorum haud est infcius, non potest quin de Argentoratensi Demosthene cogiter. nisi quod plures nobis fuisse, quam Atheniensibus, & adhuc esse Demosthenes, tacita gratulatione omnes meminimus. Labet hic æquitatem vestram, Auditores, & prudentiam obtestari, ut si quæ abrupte à me aut obscure aut frigide aut inæqualiter dicta fuerint, partim quidem consilio, partim vero imbelliæ conatus nostri adscribatis. Quemadmodum enim in majorem esse, quam ut ex æquare indoctus sermo possit, materiem, lubens fateor: ita quodam animi decreto interdum eloquentiam, quam vehementer amo, insuper habeo, neque minus disertò esse libet, quam ubi maxime licet. Cujus rei exemplum si priora non satis evidenter dedere, sequentia ultro suppeditabunt. Quam putatis enim multa, quam ingentia esse, quæ de SCHMIDIANIS dicenda virtutibus supersunt? Atque ego nec multis, nec ingentibus usus verbis, singularum rei paginarum singulis sententiis, singulis complectar propemodum verbis. idque eo excusatus, quod apud eos mihi sermonem esse satis memini, quorum exacta prudentia sibi met sæcundissime

sine potest explicare, quæ oratoris tenuitas tractationis plenitudine assequi non audet. Egone hic generosi excellentique magnitudinem animi, cujus nulla in dignitatum civilium splendore elatio, nulla in publicarum privatarumque advenitatum concursu dejectio; aut justitiæ ac fidei rectitudinem, sine qua nihil domi, nihil foris, nihil maximarum minimarumque actionum recte geritur; aut pietatis incorruptæ studium, quod cum à civili viro removetur, nihil humani in eo, nihil boni, nihil fasti ominatique relinquitur, quidquid novis illis Etruscæ larvæ structoribus placeat: an ego hæc, inquam, omnia verboſo excursu, & materiem sequente orationis flumine diffundam? Atqui non tam mea dictione quam vestra actione & exemplis, quanta earum rerum vis sit, quanta efficacia, fieri queat manifestum. Neque quisquam opinor erit, quin vel nomine viri audito, cupide statim in SCHMIDIANÆ vitæ, per tantas virtutes actæ contemplationem & monumenta ultro feratur. Occurreret aliis indefessi laboris strenuitas, nullis avocata familiaritatibus, nullis interrupta affectibus, nullis interstincta cessationibus: nulla, ne in Rupertini quidem secessu prædii, alia voluptate, quam laboris mutatione remperata & & varietate. Alii cum omnes hujus viri actus specioso quodam decore honestatos recordabuntur, nihil tamen ad speciem relatum, & cum omnia faceret, ut laudari deberet, nihil eum tamen fecisse ut laudaretur, judicabunt. Nonnullis obversabitur omnis cultus, omnis moris mixtissima venustate gravitas: & cum dictorum gratia, ipsius aspectus, ipsius incessus suaviter dispensata condecencia. Quæ res efficiebat ut contemplatio tacentis, pro disciplina esset informantis. Neque SCHMIDIUS in præcipuis hæc laudibus, quod nonnulli solent, sed in præcipuarum laudum ornamento habuit & adjumento: satis gnarus, multis per naturam, aliquibus per consuetudinem ea contingere: quæ ob id nullam ad commendationem magnopere valeant, nisi decreto animi interiore, ac judicii felicitate penitus gubernentur. Quod nullis minus datum, quam iis, qui in-

nium tali quadam specie tumidi, ceteros quorum divina animi bona exteriori illo cultu, (ut neminem omnia simul ornant) destituuntur, fastidiose contemnunt. Quæ sinisteritas tam procul a SCHMIDIO, quam ipse ab omni fastu, ab omni proculerat superbia. Admissio facilis, alloquium come, responsa planissima: nullum in vultu supercilium, nulla in verbis imputatio, nulla in tempore ratiocinando morositas. Humilitatis suæ damna nemo, nemo infelicitatis metuebat: descendente in utriusque solatium obvia humanitate. Quæ si digniores tantum colat, minores prætereant, primus & turpissimus hic, si hac appellatione uti licet, solæcismus Politicus est. Quid enim dici potest absurdius, quam collocatum in civilis actus luce hominem, illam ipsam lucem suam refugere, tristisque arrogantia nube ac supercilii quadam caligine velut infuscare? quasi vel extra ceteros sit, qui supra ceteros est; vel virtutis ullius laus sine custode virtutum omnium humanitate queat teneri; vel in publicis dignitatibus privatum cogitari à quoquam debeat fastigium. Scilicet virtutes ipsæ, ubi maximæ ceperunt esse, nisi temperamento quodam modestiæ miscantur, propius ad exultantem accedunt vanitatem, quam ad illam rerum, quas laudabiles vocamus, moderationem: sine qua incivile dixerim, quidquid qualibet titulorum congerie suevit æstimari, cujus rei admirabilis eluxit & SCHMIDIANIS actionibus imago. Dederat natura uni, quæ in multos partitum solet conferre: adstruxerat fortuna, quæ inter homines ferme plusquam humana putantur: cumularat in illo pectore, quod nunc desideramus, in illo corpore, quod nuper mirabamur, auctor & naturæ & fortunæ Deus illa bona, quibus Respublicas tueri, crescere, ornari, quibus mortalium societatem semper voluit juvari atque contineri. Erat haud dubie cælo iudice plerisque major, qui plerisque cælo secundante ad publicas utilitates erat instructior. At enim nec magnum ille, nec bene se putabat instructum, nisi totum, universorum usui humilitas vindicaret, quod excellentia animi singulorum con-

ditioni

ditioni supervexerat. Hinc ut omnium petitioni prompta semper opera, sic parata erratis venia : quibus ut liberallius ignosceret, interpretari ea mitius, sive potius non interpretari malebat. Si paucis multa absolvenda sunt, nihil hoc viro erat civilius, nihil publice lætius, nihil benignius. Et potuerunt sane hæc rectissimi per omnia vitæ officia exempli mentem ostendere : quam si lubebit noscamos licet per miracula. Inusitatum enim plane est & ad fidem difficile, quod dicam. Cum diversa sint imperiorum, quibus regimur mortales, genera, diversisque & modis habeantur & rationibus administrantur, factum adeo est, ut nemo unus repertus sit, qui habile ad dissimillima ingenium omnibus regnorum formis æquali laude applicaret. Magnus vir in Republica Romanorum libera fuit Porcius ille Caro : qui si sub Principibus vixisset, tristitia haud dubie sibi, tristitia aliis fata maturasset. Appiorum nonnemo egregius Optimatum assertor, malo publico bonas artes exercuit, quia populi naturam temperanter habere non didicerat. Dignus qui sub Augusto viveret Mæcenas : dignus qui non sub Cæsare, sed sub florentiore Primorum statu ageret Tullius Cicero. Atque si per magnorum seriem virorum imus, satis liquebit, quosdam suo sæculo, suo statui aptos, quosdam aliis quam suo aptiores, neminem pluribus commodum imperiis vixisse. SCHMIDIIUM vero nec Principatui inutilem, & primoribus optabilem, & acceptum populo fuisse, tot vota, tot eorum loquuntur præconia, qui consiliis ejus ad varias imperandi rationes vel potuere vel voluere uti. Verum neque has neque ceteras adeo laudes diutius persequi animus est. Licet enim haud verear, ne nimia sint, quæ omnes gaudemus plurima esse, tempori tamen & splendori hujus loci, & fiduciæ vestri favoris, Auditores, dabimus, ut aliquantro plura vobis cogitanda relinquamus, quam proposuimus intuenda. Quin & illud audemus putare venia dignum, si inter tot publica de privatis parum cogitavimus. si quam industrius paterfamilias, quam fidelis maritus, quam moderatus

deratus fuerit herus, quam denique domesticas virtutes civilibus æquaverit, atque ut maximus publico actu, sic familiari vita & interiore non extiterit minor, neque jam exposuimus, neque deinceps exponemus. Equidem satis novimus, adeo non in levibus illa habenda, ut citius magnis viris artem, qua suam domum, quam qua suos cives, suas regerent provincias, defuisse, historiæ pridem sit monumentis testatum. sed ad finem properantibus, quodcunque ab eo distinet, seponendum est. Nisi quod unum prætervehi non possumus, cujus respectu, cuncta quæ diximus, indicta mallems. Contrahit sese animus ac sermo ipse refugo pavore deficit, postquam ex tam læta, pulcræque optimarum rerum contemplatione, in funestum, qui tanta nobis, tanta Urbi, tanta Germaniæ gaudia abruptit, exitum incidimus. Fuit, fuit illud patriæ decus, illa terrarum voluptas, ille bonorum amor, ille virtutum splendor, ille temporis stupor, & quod unum post tanta nomina nollemus elogium addere, fuit desiderium nostrum, SCHMIDIUS. cui pæne sexagenario vivendi attulit finem mensis hujus anni Julius \* nondum adultus: quem infamæ nota & tristi nomine damnarems, si cum supersticiosi gentilibus existimarem mortem, quam occasionem novæ gloriæ, novæ initium felicitatis esse nulli dubitamus. An enim occidit, qui ne occidere unquam posset, ad æternam properavit? an interiit, qui interitura hæc, sive potius jamjam intereuntia post se reliquit? an mortuus est, qui generosa piæ mentis celsitudine mortem & mortalia vicit? Quin rejecta animi mollitie, cui recte indulget, quisquis minimum indulget, fortius loquimur: quin brachia nostri Servatoris, & ter maximum numen, & æternitatis lucem, & angelorum consortia, & omnia majestate, fulgore, gaudio, triumphis plenissima cogitantes, inter hæc SCHMIDIUM vivere, exultare, eminere, exsplendescere, perennare agnoscimus. Scilicet non est vita, in hoc orbe vivere; sed vixisse. Neque verius incipimus esse, quam ubi esse desuimus. Usu quidem ferme venit, ut semper  
acerba,

\* 1637, 8. Jul.



acerba, semper videatur mors illustrium virorum im-  
matura. Licet enim vitam satis longam meritorum insuper  
continuatione illi amplificaverint, quia tamen ingenium præ-  
claris artibus instructum metam excellentiæ & incrementi  
ex se non habet, nisi quatenus ultima fati linea certam  
omnibus definivit: plura solent & perfectiora etiam ab eo  
expectari, qui plurima, qui præstiterit perfectissima. Igi-  
tur cum in posterum fortissimos viros Patres Patriæ ac Se-  
natum, gravis aliqua & anceps tenebit consultatio: si im-  
mansueta & obstinata temporum pericula augustam hanc  
Rempublicam, quam divinitus hucusque immunem reve-  
reri potius, quam tentare debebant, non desinent tamen  
vel eminens petere, vel comminus terrere: si Philippus  
aliquis aut Alexander (raro enim occulti, raro aperti ma-  
gnis civitatibus adversarii desunt) exorietur: quanquam  
omen averfamur, Deumque tam constantem nostri status  
vindictam speramus, quam benignum hactenus experti su-  
mus fautorem; eventibus tamen moniti, ut quod factum  
alicubi est, fieri posse alicubi credamus, tali tempore vota  
publica haud dubie in SCHMIDII memoriam arbitramur  
reditura. Quem quia in omni rerum temporumque diffi-  
cultate consilii fuisse constat expeditissimi, itaque similitu-  
do negotiorum apud omnes desiderium similis consultoris  
excitabit. Curia quoque, sicut sæpe non sine voluptate  
recordabitur gravissimæ vocis, quam toties venerabunda  
attentione audire licuit: ita sæpius cum dolore ingemiscet,  
quod audire non licet in posterum. Veniet imo tempus,  
quo posterius acceptas à parentibus summi viri laudes mino-  
ribus suis gestient exponere, quotiens de publica felicitate,  
quotiens de communibus loqui bonis volent, versabitur in  
ore famæ illa prudentia, qua tueri Rempublicam; illa fa-  
cundia, qua consulta salutis edere; illa gravitas, qua tra-  
ctare animos; illa moderatio, qua civium affectus posside-  
re visus est semper ille Themistocles, ille Pericles, ille  
Crassus, ille Scævola. Certabunt enim doctorem virorum  
ingenia, & cum ex veteri ævo eloquentium jurisperitissi-  
mos

mos, & jurisperitorum eloquentissimos comparationis causa penceusuerint, aliquid in SCHMIDIO supererit, quo virum vere ac penitus civilem, omniumque tum publicarum tum privatarum administrationi rerum accommodatum, ultra liceat aestimare. Exteri quoque cum quacunque mente in Reipublicæ Argentoratensis considerationem versi, opportunitatem loci, modestiam civium, gravitatem regiminis, simplicitatem publici moris & industriam, admirabiles successus, inconcussam securitatem, secum reputabunt, nunquam deerit aliquis, qui, inter præcipua, inquiet, siue ornamenta siue instrumenta sua, civitas illa SCHMIDIUM numeret, cujus incredibili virtute & vigere plurimum ejus prospera, & adversa non raro convalescere. Quod si a remotioribus & futuris ad propiora revocandus est animus, cui dubium esse potest, Serenissimos hosce Principes (ut nunquam præclara cogitatione generosæ mentes solent vacare) auditione hac accensos jamiam exoptare, ut cum rerum administrationi vel fortuna eos reddiderit, vel ætas admoverit, talibus beentur Artificis, talibus instaurandæ gubernationis & firmandæ muniantur adjutoribus. cui voto ut de judicii merito gratulamur rectitudine: ita nostrum pro secundo eventu, demisse omnes conjungimus. Quod superest, vobis Magnificentissimi viri, Patriæ Patres, hoc pietatis Academicæ non eloquentiæ monumentum, voluntati vestræ lubenter meritoque dicatum, ita commendamus, ut de vestra incolumitate, id est, de Reipublicæ salute, desideria nostra semper fore sollicita, simul profiteamur. Cujus animi cum multa cupiamus, unum decuerit in præsens specimen edere, si Assessores vobis SCHMIDIOS non optemus modo, sed, quod recenti ejus monemur exemplo, qui non in SCHMIDIANUM magis locum, quam in SCHMIDIANA consilia successit & artes, in omne deinceps tempus ominemur. Reliquos, quos justissimæ causæ ad solvenda tanto viro justa funebria hunc in locum contraxerunt, meminisse velim, non rite præstitum quod præstandum fuerat, nisi ad imitationem potius tantarum laudum, quam ad cen-

cenfuram laudatoris, strenue se accingant, Cetera diversos partitim decebant; una omnibus communis cærimonia parentalis superest: in gratiam viri de publicis utilitatibus præclarissime meriti, de attollenda exornandaque patria semper cogitare.



## IX.

Laudatio Funebris

CL. Viri

M A T T H I Æ  
BERNEGGERI

Historiarum Professoris, Varronis

Argentoratensis,

*Recitata publico nomine, die VII. Maii*

CLIO IO CXL.

*Generosi Barones, Nobilissimi Eminentissimique Patria Patres  
& Scholarchæ, Magnifice Rector, Spectabiles Decani,  
Clarissimi Professores, Consultissimi Experientissimique Do-  
ctores Urbici, Reverendi Ecclesiastæ, Doctissimi Mode-  
ratores Gymnasii, vosque ceteri, genere, merito, officio,  
eruditione, elegantia Ornatissimi Auditores.*

**N**Unquam Argentoratensium Urbi ac litterarum studiis, vel major constantiæ necessitudo, vel iustior pietatis occasio venit, quam cum summus rerum humanarum arbiter fatorumque moderator, quem ornando politiciori sæculo, per annos quinquaginta

ginta octo, duos autem & triginta amplificandis hujus Reip. scholis, singulari munere impenderat, expleto feliciter operum gloriæque cursu, ante tres menses ipsos, ad æterna transtulit præmia, MATTHIAM BERNEGGERUM. Erant in animis omnium ac oculis, nemini æstimanda soli, tot ingenii, virtutum, artium monumenta, quot in uno usurpata, miraculi æstimationem publicasque grates; in uno amissa, desiderium grande ac dolorem merebantur. Ita inter beneficium publicum, quod palam erat, & jacturam, quæ abstrusa etiam, mitigari non poterat, suspensæ mentes, sensum præsentis acerbitalis, fortunæ prioris comparatione; luctum, fortitudine; memoriam funebrem, faustis recordationibus, sive miscebant, sive solabantur. Apparebat sane, satis Deo, satis sibi, satis gloriæ vixisse, imo semper & propius victurum esse, qui inter seniles annos, & exhausti molestias corporis, & nemini jam vitalem, tot casibus temporum, vitam, sui Auctoris voluntati cæloque permissus, æternitate, supra ævum beatus, honore meritorum cum ævo omni superstes, prorsus humani voti mensuram implevisset. Neque de exitu ejus queri natura rerum poterat, cui cum ad fastigium universæ laudis promte esset ac benigne obsecuta, magnum & incomparabile sui operis præmium, ab industria capacis animi & vivacibus scriptis tulit, quibus & ipsam & humanum orbem late illustravit. Verum enimvero ea est magnorum casuum importunitas, ut inter ipsa constantiæ meditamenta, aliquis ex nec opinato horror, eluctantem per adversa fiduciam interpellet aut lacestat. Etiam cum à conspectu præsentium, à desiderio ademptorum satis te muniveris, venturæ profecto sortis ut ignorabilior, ita formidabilior interpretatio nullibi magis in promptu est, quam ubi maxime vitatur. Præcipue cum ex propinquo ut indicia, ut omîna arripiuntur, quibuscunque vel sollertia conjecturam, vel anxietas similitudinem, vel providentia causam induit. Quo factum est, ut cum probe contra mollitiem se firmasset nostra Academiâ, non parum tamen hoc tempore videretur ei terribile, quod, si quid

quid fecius suo statui immineret, nondum id esset, gravissimo Andræ Schillingii, viri accuratissime docti, fato expiatum. Neque præterit augustinus Procerum Reipublicæ mentes hæc cura: quibus refoissum vulnus vulnere plenam ancipitis consilii medelam obvertebat: aggravante mali sensum ea præsertim necessitudine ac cognatione, quam suæ civitati cum magnis viris, nexu publico & supra affinitatum aut sanguinis vincula solenni, intercedere nunquam dubitarunt. Igitur dum sapientiæ quidem in ipsa sede sua periclitanti, subsidia opemque, haud minori ac par est solertia, dispiciunt, placuit interim, affectum propinquitatis, quam dixi, ritumque, tum aliis modis, tum parentali hac cæremonia explere. Post exequias enim honorifico & frequenti funere deductas, post elatum juvenutis delectæ ac in supremum Præceptoris sui cultum æmulæ, humeris corpus; post famam orbis cordati studiis & perenni eruditorum industriæ commissam; nihil restabat, quam ut ex hoc loco, quem toties illustis eloquentia ac diffusa in immensam varietatem doctrina Varronis nostri, magno cum concursu & applausu auditorum celebraverat, nunc vel nomen tanti viri, & quædam post ipsum meritorum commemoratio, sicut emissæ per convalles vocis ultimæ partes redeunt, denuo audiretur. Quod publicæ voluntatis institutum, quoniam exempli & pietatis esse nemo debet ambigere, sola eas partes obeuntis simplicitas requirenda erat. Quam sicut & claritudo Berneggeri, nihil pompæ aut fucati cultus indiga, omnibus facile commendaverit; ita mihi, præter ingenium ab ampullis pariter & cincinnis rhetorum plane alienum, tot egregiæ conjunctionis nomina, ultro imperabunt, ne de Præceptore, Hospite, Amico, Collega, & quasi Parente, curiosius, quam verecundius, loquar. Qui si aliqua dicendi facultate pollerem, milites potius imitatus, accepta ab imperatore arma in ejus funere invertentes aut velantes, ipso orationis habitu, conticuisse veram Argenteratensem Suadam, profiterer. Quare in præsentia ablegatis sæculi & moris inanibus, quæ in sterili argumento

inepta, in magno indecora, sine affectu peraguntur, auspici-  
 cium tanto nostro diei, cærimonia sanctior & religio da-  
 bit. qua heroicarum originum fastis, cum reverentia infe-  
 remus, annum superioris sæculi LXXXII. diem Februarii  
 VIII; non sic Halis Austriacis, quas magno cive auxit, non  
 sic earum Senatori & Judici Blasio Berneggero, ac Elisa-  
 bethæ Paurneindæ, lectissimis conjugibus, quibus suavis-  
 simum sui amoris pignus edidit: non sic ornatissimæ fami-  
 liæ, ut humano orbi, cui tantum ad melioris ævi lucem si-  
 dus extulit, lætum, candidum, illustrem. Insigniebat ea,  
 tempora Deus immortalis, ut magnarum rerum tractatio-  
 nibus, ita magnorum virorum nativitatibus. ortique pau-  
 cis circiter annis, quasi ad consummandam literarum præ-  
 sertim gloriam fata festinarent, non pauci, qui ostenderent  
 sæculo, quantum supra priores ætates essent amissuri ho-  
 mines, ut primum rursus ingratis barbaries præplacuisse.  
 Inter horum Principes Berneggerus erat. cujus dum incu-  
 nabula nos tam seriis cogitationibus imbuunt, eo tanquam  
 omine intelligimus, nil esse causæ, ut pueriles annos, tan-  
 quam indignos hujus loci auribus prætereamus. Equidem  
 nunquam pigendi res operis visa est scriptoribus, magnos vi-  
 ros, etiam ea parte, qua minores erant, describere. Et li-  
 cet nil solidæ certæque laudis prima hominum ætas habeat,  
 videas tamen nescio cujus gratiæ commendatione, libenter  
 eam & attente, sicut in scena primus fabulæ actus solet, ab  
 omnibus spectari cognoscique. Cujus rei video mihi in  
 ipso mentis humanæ studio affectuque originem reperisse:  
 quam nihil æque advertit, adversamque retinet, ac præter-  
 vecti quidem temporis recordatio, venturi autem expecta-  
 tio. Utrumque complectitur, instituta in virilibus præco-  
 niis adolescentiæ commemoratio: neque complectitur mo-  
 do, sed miscet, ac dissociabilem quadam communione re-  
 rum ad suavitatem audiendi contemperat. Jucundum est,  
 retroverti ad annos, qui significare magnam indolem, stri-  
 ctura quadam radiorum potuere: jucundius etiam, muta-  
 to contemplationis habitu, tanquam in re præsentī, quan-  
 tum

tum hi radii, splendoris, lucis, claritudinis in posterum robustiori ætati promittant, divinare. habet imo admirationis aliquid, tam evidenter apparuisse ante laudis initia, quantis esset profectibus absolvenda laudis gloria: quæ ut consummata denique, ita tanta æstimatur, quanta olim sperari debuit. Igitur qualia habuerit ætatis principia Berneggerus, ultro docemur incrementis: neque difficile est, ex viro puerum interpretari; sicut, quibus videre puerum contigit, de viri præstantia, satis efficaci naturæ prodigio, jam tum admonebantur. Statim humani modestique moris comitas, statim in ardua quævis itura apparuit industria. Ea gaudiorum prima parentibus seges, prima non vulgaris spei coorta occasio. præsertim, ex quo ætatem adolescentuli litterarum cultu excitavit formavitque Wolffgangus Pichlerus, cujus disciplina fideque biennium usus, raro vivacis gratiæ exemplo, nunquam postea ex animo beneficii memoriam, nunquam mutæ benevolentiæ occasionem dimisit: cumque acerbitas temporum denique in exilium expulisset virum, intercessit Præceptoris fato discipulus, & receptum hospitalitio lare, quod supererat vitæ, liberaliter ac secure iussit transigere. Sed hæc viri commendatio erit: nunc ad discantis parvuli gymnasia revertendum est. Quem Welsa primum, inde Argentoratum publice erudit. Dubites autem, an Argentorato Welsa, an hæc illi debeat Berneggerum. Nos enim Welsensi scholæ magistrum ac rectorem præcipuum dedimus: ille nobis, quem educaverat discipulorum præstantissimum, reddidit. Quamquam potius Juniani nominis merita, quorum jam in plerasque gentes cum usu gloria migraverat, referendum fuerit, quod diximus. Hunc dum sæpe & merito Weixelbergerus celebrat, injecta Nostro præclarissimæ lubidinis cupiditas, adeundæ visendæque urbis, quam tum cetera felicitas, tum tanti Doctoris fama late ostentaret. Etenim sicut Aristotelis magisterium & gloriam, Theophrastus quondam, ita Sturmii Junius excepit ac sustinuit. ad hunc pro-

properat Berneggerus, venturus, ut, ipse quidem sperabar, in communionem doctrinæ; ut fata destinaverant, successionem insuper laudis habiturus & famæ. Prorsus enim agnosco hic secretæ arcanæque quiddam è cælo constitutionis, quæ vel absolvendo studiorum Argentoratensium circulo, vel extruendo celebritatis fastigio, causas & viros moliebatur. Hinc profectam intelligo vim illam alacritatis, constantiæ, efficaciam (nam idoneum nec impar nomen nemo facile protulerit) quæ divinitus induuntur animi, magnarum rerum auctores futuri, ut his tanquam appositis ingenio alis, non ad astrorum imperiosos, quod nonnullis videtur, motus, sed ad verenda originis suæ placita, promte semper ac feliciter subvehantur. Cujus rei grande documentum Berneggerus dedit. quem sicut assiduissima contentio & indefessa agitationis labor, per insuavia studii severioris rudimenta, per molestos scholarum inferiorum pulveres, celerrimo profectu in Academiæ lucem pariter & exercitationis firmioris palæstram vindicavit: ita auctos ipsa occasione impetus, magni subinde successus in ejusmodi certamen exacerant, quod tu non cum ingeniis condiscipulorum, cum votis præceptorum, cum parentum spe, sed cum ipso, quod inexsuperabile omnes credunt, tempore certari diceres. Quo factum est, ut cum privatus numero studiosi esset, tanquam publicæ dignationis capax, non inter commilitones modo suspiceretur, sed foris innotesceret, atque non spernendis conditionibus invitaretur. Hoc loco subsistere vos mecum paulisper, Juvenes eruditi, jubebo: neque tam rhetorum legibus aut gravitati, quam vestris obediā utilitatibus. quibus sicut plane dicatas viventis Berneggeri curas scire debetis; ita defuncti memoriam, secundi perpetuitate exempli, in oculis, in animis vestris, fas est semper revirescere. Nam & alias, clarorum virorum artes, nomine tenus & specie, sicut in pictura colores, noscere, otiosi res instituti habetur. ut intelligatur quantus fuerit, quem admiramini, ante omnia quid tantum fecerit intelligendum est. Ea est res, ne vos teneam, hodiernis



diernis Academicarum moribus oppido aliena. Quid enim? Erumpit ex gymnasiis, quæ vocant, puer ætate lubricus, infans ore, literis inops, moribus rudis. si quæras, unde, & cur, & quo? honores Academicos memorabit & titulos, & post tertium quartumve annum, publici dignitates officii. Quæ via, o bone, quo instructu, quibus præfidiis? Græcis nil magnopere indigeo: Latina ex duobus Lexicis & mille Phrasibus, quas mirificas esse, omnes agnoscant, conquirere jussus, magnis propediem opibus abundabo. Artium præcepta partim memoriter teneo, partim facile discam, quot circulis volvatur cælum, quod sint rerum elementa, quot virtutibus vita describatur. Nam cetera in vilibus & supervacuis habenda, plurimorum mihi exempla persuadent. Hoc primum & maximum agmen, videmus incedere. sequitur pone cohors altera, quam nasutulorum esse, non difficulter judicaris. Hi unam aliquam disciplinam magnis furiis adorti; mox velut ulturi angustias argumenti, totum vanissimarum quaestionum mercatum in quadam curiosi operis pergula prostituunt & gloriose ostentant. Quos cum ante paucos dies nemo in sapientiæ regno nosciteret, denique Chinenſia esse miracula constiat, postquam reliquos mortales, cæcum sibi bardumque videri genus, ipsi prodidere. Jam qui sapientissime delipiunt, vel orationis copiosæ venustates consecantur, rerum cognitionem spernunt; vel, varietati studiorum imminentes, potissima nihil minus, quam potissimum tractant. Ne jam dicam, quanta ignavi moris turpitudine, vitam eorum obsederit, qui pro bonis honestisque artibus, quas debebant publico, solam denique temeritatem suam auribus oculisque patriæ inculcant. Abstinuisset tam vesano ritu Reneggerum, non id equidem laudibus ejus inferendum iudico, in quibus utique majora & solida spectamus: sed æquum erat, ut cujus vita omnis rectioris disciplinæ fuisset institutio, eadem adversariæ pravitatis esset siggillatio. Interim longe altiora sui fati auspicia singulari & omnino tali obsequio demerebatur, quod in conditionis consummata & anti-

antiquæ leges sponte tendebat. ex qua nihil præter nomina quædam disciplinarum, & excogitata cum dispendio sapientiæ compendia hodie retinemus. Non ignoro sane, periculose & cum invidia, de encyclopædia veterum & polymathia, quam vocarunt, sermonem suscipi. Corrupti fidei rei ac favorem nimia quorundam doctissimorum hominum ambitio: qui cum plurima scirent, nihil videri voluerunt ignorare. quasi terminos mortalitatis excesserit, qui in culmine ejus adhuc subsistit: quasi non plura discenda restarent, quam ceteros docere potest, qui communis omnium habetur doctor. Utebantur tamen hi juris aliqua specie: cum plerorumque enim inventis & exemplis certabant; neque tam rerum amplitudine, quam cognitionis humanæ modulo sua metiebantur. Longe interim frequentior est eorum jactantia, qui volubilitate quadam oris in fortuitam sapiendi audaciam exerciti, bonæ solidæque artis diligenter vacui & expertes, universam scientiarum latitudinem se emensos, neque amplius patere in libellis, qui circumferuntur, Encyclopædian, veterem & cum aspernatione aliorum clamitant, ut agnoscat, *in omni scibili versatos*, id enim sibi cognominis in honorem virtutis suæ adsciverunt. hos si cum prioribus contendas, ibi quidem quosdam inter doctos, heroas; hic quosdam inter ignavos sumas aut histriones interpretaberis. nam plenior censuram, cui hodie pares non sumus, Herodi Getiano, gravi & exercitato judici, delegabimus. Nos ab utroque anticipis invidiæ metu, tam longe nobis videmur remoti, quam ab omni arrogantiæ suspicione aut jejuniæ valetatis abfuisse Berneggeriana studia, nemo jam nescire potest. Sequebatur bona fide vinculum istud sapientiæ, & connexam apta compage rerum ac cognitionis seriem, quam non invenit Plato, sed commendavit: non excogitavit, sed illustravit Aristoteles: non conflavit in fucos & splendorem ambitio, sed formavit in nativum valensque doctrinæ corpus, divinis freque auspiciis recta ratio. Naturæ vires ac fata, siderum cursus & velocitatem, spatia tractusque

que terrarum, undarum vastitatem & miracula, hominum ingenia ac mores; venabatur industria, assequebatur solertia, peragrabat assiduitate, penetrabat constantia, iudicio complectebatur. Non orandi gravitate, non subtilitate carebat differendi. quam, sicut cetera eruditionis instrumenta, cum fructu publico & applausu, cœtibus eximiorum juvenum bonas artes strenue æmulantium, in ipso studiorum suorum cursu, non semel approbavit. quorum præclaris gratisque per omnem vitam elogiis honoratus, felicitis disciplinæ præ illis fructum tulit, qui, cum omnem disputandi artem tot ineptiis intricavere, quot ignorari pariter, publicæ utilitatis interesset, nihil denique discipulis ad seria studia provectis, præter seram agnitionem strenuæ inertitiæ, & molestiam dediscendi relinquunt. Quæ literarum intemperies, omnes præne doctrinas tanquam contagio corripuit: ex quo, quisque ambitionis suæ aut ignorantitiæ spoliū miseram juventutem facere cœpit. cui frustra scilicet traduntur studia, nisi & modus studiorum ususque, deterfis tandem inquinaturis vitam sordibus, in cordatam habitudinem & maturitatem commasculetur. sacra quædam & inviolabilis res est, commissâ regentis arbitrio ætas, quæ ut sequi ducentem potest, ita, an recte ducatur, judicare non potest. cujus florem jam tum, quantum in se erat, nunquam passus est Noster, per inania deflorari. suis denique periculis docebat, quam animose essent spernenda, quæ sce-næ vix apta, aut umbris tantum suis tuta, vitam olim dedecere. Posuerat ipse multum in omni cognitione mathematica operæ: adeo ut nec in genethliacis divinationibus quicquam intactum omitteret. In quibus cum ad peritissimorum laudem pervenisset; generose cum fortuna infelicitis laboris questus, statim quos nactus est, cohortabatur, ut tempori, ut famæ parcerent, nec in sua damna ultro incauti tuerent. Quemadmodum enim Mathesin ceteram plurimum humanis rebus conducere, publicisque morbis accensendum, tam nobilis studii neglectum esse, subinde prædicabat: sic innexa sidentibus fata, fatalesque prædi-

ctionum vanissimarum præstigias serio averfabatur, & quas in ipsis adytis suis deprehenderat fallacias, serio gravique iudicio detegebat. Hærent adhuc animo accurati, quos aliquoties inter amicos habuit, sermones, & exempla omni contradictione superiora: quæ referte jucundum equidem, sed angustia temporis parum foret accommodatum. Et lucrifecit nobis ipse expositionem, cum inter cygneas cantiones suas, in publico auditorio, capacium ni tallor discipulorum pectoribus alte infixit hanc philosophiam, quam nulla dies delebit, aut apud memores sepeliet. Tanto igitur tamque accurato paratu, ea studia aggressus est, in quibus haud dubie concurrat, quicquid uspiam est humanæ sapientia. Tractaverat sane antea auctorum utriusque linguae plurimos, sed tanquam opportunitates futuri operis specularetur, quod maximis videbat præsidii indigere, cetera viribus & occasione reservavit. Antiquitatis enim mores, populorum instituta, gesta temporum, inventa prudentum, totamque, ut sic loquar, prudentia historia; si ve omnis historiae prudentiam, sibi proponere ac disciplinam, præsentissimi, opinor, consilii, amplissimi ingenii, nec minoris eruditionis est negotium. Id quod parum iudicant, qui præterpropter studia, non in ipsis vivunt. quorum propterea, vix nomina recte accipiunt. Ordia à poetis, hos legit aliquis ad delectationem, ait: miratur inventiunculas, notat locutiones, laudat compositionem, id est, absolvit quod voluit, neque jam lector poetarum, sed plerumque eadem opera poeta est. Simili felicitate geritur res in oratoribus: quam suaviter hoc dixit, quam illud graviter, quam cetera copiose! Historia autem, quid est accommodatius ad fallendum tempus? narrati jucunde eventus, expositi mirifice casus, non patientur sane inter pocula aut in itinere obmutescere, aut ad ostentationis penuriam tedigi, quicumque ex hoc penu suam peram instruxere. Accedit facundia, quæ his fontibus derivata, in quædam gloria flumina excrefcit. Loquar ex animi sententia, Auditores, si nihil haberent hæc studia aliud,

-eju-

ejurasset & ipse dudum tam otiosas delicias; neque nunc in Berneggeriana laudatione meminisset verbulo. ad quam nec ista sufficiunt, quæ tamen haud dubie magnum operæ ac sui pretium ostendunt, emendata eloquentiæ venustas, artis subtilitas, litterarum copia & ubertas. Frustra potestatur cum Homero, qui non cum Homero sapit: frustra carminis ingenium cogitat, qui ad auctoris ingenium nondum penetravit: frustra varietate dicendi gaudet, qui varietate dicendorum parum est imbutus. Jam in Cicerone aliquo & Demosthene, venerabilis utique sese impingit animo orationis majestas: sed unde & qualis illa? quam ex abdito? quam ex profundo? Picturam laboriosissimi operis omnes mirantur: solus autem æstimat, qui pingendi rationes & scientiam didicit. Plane ut oratoris opes, uni sectantur, qui sapientiæ mysteriis probe sunt initiati. Quod si vobis hic declarandum sit, quomodo historiarum studio usus sit Berneggerus, angusta se & sublimis panderet materies: per cujus amplitudinem circumductos observare juberem, administrationis publicæ privatæque disciplinam, imperiorum fara, fatorum casus, casuum rationes, diffusam per temporum metas, moris humani varietates, rerum bene cognitarum, bene descriptarum experientiam. atque hic subsisterem, imparisque ad cetera linguæ silentium indice digito pensarem. ut cum in remota, victus spatiorum mensura oculus se intendit, magnum & singulare aliquid cernit, nec discernit: nisi quod magnum esse satis conjectat, donec accessu subinde propiori, majus judicat: & postquam quo tendebat, pervenit, tantum esse deprehendit, quantum nec contueri uno aspectu, nec nisi per moram contemplationis potest complecti. Nam quæ sint actionum omnium arcana primordia, agendi consilia, sinus, recessus, & multiformes formæ, denique anima & vita, & indoles rerum, quibus mortalis studii captusque metas, negotiosus orbis definivit, nemo verbis exposuerit, cogitatione attigerit, ingenio digne illustraverit. Sola efficacioris commentationis exercitatio, adjuataque plurimis doctrinis, plurimo vigore, id

est, non qualibet, sed Berneggeriani vis ingenii, intrat illud arcanum, cujus vel stupore alii, vel ignorantia sunt contenti. Erunt forte, dum hæc loquor, qui supra veri fidem & nativæ præstantiæ simplicitatem, existimabunt in speciem talia & verborum pompam adornari: fierique ut quædam rei augustæ insolentia me longius abripiat: sicut inassueta oculis spectacula, peregrinitatis potius quam cognitionis suæ implere aliquando minus peritos solent. Quibus ego, ut de me equidem multa hic respondeam aut pollicear, nihil attinet: sed, si verum amas, studiosa juvenus, potuisses interprete sui operis Berneggero facile olim discere, quod quæ ratio tua aliter tulit, neque nunc debes in dubium vocare. Quis enim hodie ea ætate profectuque, quo doceri aliquid reconditionis ejusmodi disciplinæ potest, historicis dat operam & aures? nihil disputamus, de cujusquam rationibus, quibus ad alia monetur præverti: illud tantum suggerimus, non esse admirandum tantopere, si felicioribus etiam ingeniis amplissimæ hujus philosophiæ ratio sit abstrusa: quam nec puerilis, neque subitæ, neque seræ perceptionis esse, testes habeo, quotquot his sacris unquam serio sunt operati. Atque hæc est quædam quasi peregrinatio, non Ulyssis alicujus, qui tot errorum ambagibus parvulum orbis spatium emensus, lucrum aliud nullum, quam veritas & sublestant fidem retulit: non hodierni alicujus nepotuli, qui delicatæ discursationis præmium, contentu patriæ & scientia fastus, per quædam mirifici soni cymbala & crepitacula plebejo stupori promulgat: non despecti erroris alicujus, qui, cum ab exterorum fastidio nulla bona arte se suaque potuit redimere, domum reversus venditari amat pro oraculo: non cujusquam, qui cum unam regionem vidit, mille alias ignorat: Sed illius, qui in universo orbe, qua humanus est, non qua lapideus, aqueus, luteus, vel aureus etiam ac gemmeus apparet; nec inter mensas & pocula, inter salutatores in atrio, inter turbam in compitis; verum in perpetuo quodam sapien-

pietia penetrati, inter arcanas admiſſiones & perfectiſſimas curas illuc profecit, quo itineribus & itinerum uſu aſpirare nemo poteſt. Is jam erit Berneggerus, qui licet incredibili teneretur deſiderio, coram arbitrandi, quæ in partibus terrarum cultiſſimis literæ commendarent, ſuamque viis paſſim illuſtribus omni ſtudio ac obſervantia approbatam cuperet induſtriam, nec deeſſet occaſio (experi-  
verant enim eximii juvenes complures, ſua ætatem con-  
tubernio viri per lubrica peregrinationum dirigi ſoverique)  
interceſſit tamen ſedulo his votis ipſa urbis noſtræ Fortuna. niſi quod raptim ad viſendam Hungariam, Moraviam, Bohemiam, Palatinatum Neoburgicum, Tirolenſem Comitatum, dimiſſo, ſolatium ex convictu viri magnifici & ſuper ceteras laudes rei que metallicæ peritiæ, pietatis conſtantia per ea tempora celebris, Ioannis Steinbergeri, quaſi-  
vit. Poſtea reverti juſſum docuit, quæcunque metueret ex omiſſione conſilii damna, notitia plurium, quam peregrinatores condiſcerent, linguarum; virorumque ſummo-  
rum amicitia ac familiaritate mox rependi. fore enim ut Argentorati quidem habitaret, ſed ubique terrarum viveret & pervigeret, interim hac via peragrandum, quicquid ad faſtigium ejus gloriæ ſupereſſet, qua communis non unius terræ ſpectator, ſed humani generis præceptor, publicæque magiſter diſciplinæ cenſeretur. Et jam Muſæ Argentoratenſes in cupidos amplexus virum receperant. Præfectus enim ſupremæ in decem curiis, quinquennali functione, præclararum induſtriæ publice privatiſque exemplum dedit: quod ſecuti, nec juvenæ uſquam commodis deeſſent, & ad altiora interim conſilia, ſtudiis ſuis conſulerent, ſucceſſus pares par contentio habuit: cumque alterutri ſufficere ad laudem inſigne eſſet, amabilis monſtri inſtar erat, ſuffeciſſe utrique. Impleverat jam antea, ut meritis excellentibus inſtitutionem ſcholasticam, ita ſucceſſorum labores arduæ imitationis ſtudio, memorandus inter clariſſima Urbis nomina vir, Caſparus Bitſchius, nec videbatur aliquid reſtare ad faſtigium; niſi quod deſtina-

to incrementis literariis Berneggero, per omnia felicioris sæculi fata, non tam implenda expectatio publica quam superanda erat. Credunt multi, Auditores, ut sunt pro-na ab eruditione in ambitionem, ab ambitione in vecordes fastus hominum ingenia, in vilioribus habendas, quæ erudiendæ juventuri impenduntur, curas: statimque pædagogicas sordes etiam iis obijciunt, in quibus plus quam professorium splendorem admirari debebant. Berneggero apud intactam ea barbarie posteritatem nunquam hujus operæ gratia peribit; qui licet Academica potius in gymnasio meditamenta exemplo maximorum ex antiquitate virorum, tractaret; nequaquam tamen quæ minora erant, fastidivit: sed universæ Scholæ ope consilioque tantum profuit, quantum freta suo splendore ætas, præsentioribus remediis, ut solet, aliquando averſa, ferte potuit. Rarum sane munus, & inter utilissima publico egregio studia ponendum, proviſu, ac ſolertia gubernare res ſcholæſticas. quod quæ eruditioni tantum deputant, aliquando nebulam in pariete pingunt. quanquam plures ſunt, qui auctoritatem ſuam aut gravitatem ſatis imperioſe allegant: ceteri promiſcua temeritate de innocua ætate crudeles ludos faciunt, & dum quiſque hic ſapit, dediscunt ſapere pueri, antequam, quid ſit ſapere, doceantur. Legat in his moribus, qui volent, deſcriptos literarum caſus, vices, interitus: aut, ſi nimis abſtruſa eſt hæc philoſophia, quærat interim, fallendi temporis cauſa, quorū Roma felix, docta, copioſa, Quintilianos numeraverit. nam nos fortaſſis ea proſperitate anteſtamus, quibus poſt Sturmium, Berneggerus contigit. Qui cum ex eo, quod dixi, munere ad Hiſtorici in Academia cathedram eſſet translatus, Biſchioque ad Jura docenda progreſſo, rurſum ſucceſſor datus, difficile eſt exprimere, quanta ſtudiorum ac temporum ſtrenuitas his auſpiciis enituerit. Utiliſſimam ſcilicet per ſe diſciplinam, vitæque ac rerum actui vere propriam, auctoritas inſuper docentis commendabat: in quo ſicut ſummam eruditionem omnes mirabantur, ita facilitatem



tatem erudiendi voluntatemque plurimum amabant. Pen-  
debat à docentis ore in auditoriis publicis ipse flos Acade-  
mice juventutis, generosi profapia, sagaces eruditione,  
ingenio præcipui, virtute splendidi (nondum enim pueri-  
lis ineptientis juventæ error, veras ac publicas proficiendi  
rationes damnaverat) atque in Thucydide, Tacito, Suetonio,  
Sallustio, aliis, non gestorum modo scriptionem, sed  
scribendi vias, artes, institutum, tanquam ex altero Thucy-  
dide, ex altero Sallustio accipiebant. Ita est, Auditores,  
ut penetrentur tam exacti operis arcana, opus est si-  
mili ingenio: & licet dispar gloria scriptorem sequatur ac  
interpretem, merito tamen & arte citra dubium comparari si  
non æquari possunt. Hic, si quid eruditio, arte; prudentia,  
usu; oratio, cultu; sententia, invento recondiderat: exprom-  
pta, explanata omnia. Si quid in antiquitate rarum; in cogni-  
tione, arduum; in historia, utile: ita evolvebantur, ut eadem  
opera & ad doctrinæ præstantiam, & ad actus dexteritatem  
non selecta modo, sed præparata; non exposita, sed ostensa;  
non admota, sed applicata viderentur. Nihil exiit ex ore  
ejus, quod obrunderet auditorem; multo minus, quod fal-  
leret. Professorium minime arbitrabatur, linguæ quicquam  
ad ostentationem, quicquam ad negligentiam & volubili-  
tatem indulgere. equidem nisi plus viris approbari, quam  
adulescentibus possint, quæ adulescentibus proponuntur;  
nisi semper & cum augmento fructus placere queant, quæ  
dicuntur semel in cathedra, tum ego rationes publice  
docendi parum accurate subductas meditatasque facile  
dixerim. Accendit ea res multorum ingenia, ut de ampli-  
tudine scientiarum & severis proficiendi legibus serio co-  
gitarent: quotiens audiverant Berneggerum, totiens non  
modo cognitorum voluptas, sed cognoscendorum ipsos in-  
vadebat desiderium. sive quidam doctrinæ genius, sui appa-  
ratus copiam, ubique & aliud agendo capacibus animis in-  
fundit: sive naturas præstantes ingenitus ad exempla illu-  
stria impetus rapit, & auctoribus eximiorum operum fata-  
li instinctu conciliat. Sed quod illud desiderium, cui non

responderet Berneggeriana facultas, quæ instructissima? cui industriæ non sufficeret comitas, quæ indefessa & incomparabilis? Quod tum ubique alias, tum vel maxime cognitum est, ubi super ordinariam professionem, eloquentiæ, bis orbæ, semel per triennium, iterum biennio amplius, patrocinium gessit. Libri, musæum, & imprimis ipse, omnibus & semper patebant. Vidisses in uno homine, summam temporis avaritiam, & summam liberalitatem: sibi porius quietem, quam aliis operam negabat; & quod tot salutationes, colloquia, consilia exemerant diei, nocturnus labor repensabat. ita induxerat in animum vir optimus, ignoscere juventuti; quicquid discendi studio, licet sæpe intempestivo, sæpe præpostero, peccaret. generosam præterea jacturam esse si privatim amitteret, quod in publicos usus olim rediret. ad quos non sufficit scriptis orbem excitare, nisi instrumento, auctoritate, ductu, cupientes subvehantur. Igitur exercitationes cuique dispexit, commendavit: exercentibus, prout publice privatimque ratio tulit, præfuit, adfuit, interfuit. in suis strenuum quemque ædibus invisens; hortatu, laude, auspicio efficacissimus monitor. hærentes expedit, dubitantes confirmavit; quos flagrantior cupiditas incautius avexerat, non objurgatione, sed quod omni stimulo fortius est, familiaritatis & colloquii quodam quasi comento recuperavit. Inter hæc multoties patientia viri tentata, nunquam victa; improborum malitiam, imprecatione bonæ mentis; præfractorum arrogantiam, exemplo modestiæ; curiosorum ineptias, gravitate instituti, non tam flagellavit, quam convicit. Haber hoc quoque vita Academica ex libertate vitium, quod temeritate pro judicio usi præfidentes juvenum, libere & impune, in clarorum virorum nomina & labores perpetuis censuris incurrunt. si quis tria verba ex Sallustio sublegit, jam Sturmios & Berneggeros fastidiose judicat, ceteros ex abrupto damnat: si quis juris, divinarum literarum, medicinar, artium reliquarum prima rudimenta attigit, aut ea paululum supergressus est, de principibus horum studiorum inter pocula & in circulis arbiter sedet:

sedet: si quis docentem, semel & negligenter audivit, male intellexit, statim quæ liber, & quibus cujusque inflat vanitas potest, pronuntiat: si quis omnia hæc pariter ignorat, tum vero ad convitia, probra, ludibria nemo minus rudis est. si quis (faciunt autem hoc plurimi) alia omnia potius, quam illud ipsum, quod reprehendere audent, didicit, nihil magis interim novisse vult videri. Habemus ergo, quod felix & faustum sit, non jam *quinque eruditionis iudices*, Atticæ felicitatis imitatione, sed ex profectu imitantium, quinque judicum genera. quos si *Bacchicos*, itidem antiquitatis exemplo, velit quis appellare, quod res est dixerit: nam & histrionali scenæ, ut isti, assident, & plerumque furore dei, cui serviunt, bacchantur. Nobis, cum jam pridem satis ad temnendum genus tam infame, & nescio cujus transmutationis capax, ut primum non indignari quidem, sed joculari alicui doctorum libuerit, supersit constantiæ, Berneggeri insuper exemplum placet, qui tenax propositi & invictus, tam diligenter saniorum disciplinæ studuit, quam insanabiles fugit, & cum averfatione extimuit. Ceterum inter tam strenua, tam assidua juventutis desideria versanti nihil videbatur relinqui ad alias curas temporis. at ille subcissivis operis quot præclara in publicum monumenta edidit? quo ingenio, qua eruditione illustria? quorum aliqua sæculo & patriæ, & Academicæ existimationi dedit: aliqua Mathematicæ, quam refrixisse propemodum videbat, instaurandæ gratificari, tempestivum & sapiente viro dignum existimavit: de cetero ad totam literariam antiquitatem repurgandam animo conversus, ejusmodi institutum primus tenuit, quo (præscine dicam) neque ad emendanda hæc studia, quicquam limatius; neque ad amplificanda, copiosius; neque ad tractanda instructius, à quoquam hæcenus excogitatum est. Prodierrunt antea præclari auctores, magna cum editorum celebritate illi quidem (quam intactam ad posteros perennare jubemus) prout cujusque ingenium, occasio, supellex tulit, aliquis scriptorem Msc. ope aut per sollertiam emacu-

lavit & correxit : alius varias lectiones collectas diligenter , examinavit ac contendit : nonnemo rituum & prisca moris aliqua exposuit : quidam usum & vitam spectantes , civilis viri institutionem quibusdam notis professi sunt aut dissertationibus. Ut minus dispersa hæc noscerentur , quærebatur consilium. cuius specimen meditari Lutetia Parisiorum cœpit. inde enim procusa sunt ingentia Taciti , Suetonii , Senecæ , volumina. Quas erat reperire doctorum in scriptorem eum curas , in unum corpus conducebant. Ejus generis etiam alibi exempla usurpata : extantque ad hanc formam Gruterianæ nonnullæ editiones. Verum hoc pacto nondum erat vel tempori vel eruditioni consultum. quid quisque , & an quod desiderares , annotasset , satis arduus inquirendi labor natus : sine tædio hactenus , nisi toties frustra tolerandus. multi difficiles loci & suspecti ne verbulo memorati , digna illustratu plurima plane præterita , alia bis terve à diversis posita. Plerique enim non ad editionem Auctoris ista , sed in suis adversariis forte consignaverant. Jam quantum supererat eorum , quæ aliis magnis viris , huic auctori quidem profutura , sed in aliis operibus , & miscellaneis sæpe commentariis prodita , inveniebantur. Berneggerus ergo inivit rationem , qua semel perfectioni studiorum & tempori , tum & instituto cuiusque , prolixo , ut ita dicam , compendio subveniretur. Quicquid ubique terrarum , inde post renatas literas , ad unumquemque scriptorem felicia publico elaboravere ingenia , quicquid emendationi , illustrationi , dictioni , argumento , ex omni penu doctrinarum servit , coacta sub unum conspectum , disposita in promptos usus , locupletata ingenio editoris omnia exhibentur. ita moles libro demittitur , copia augetur , ordo additur. cuius instituti pars sunt sane non ignobilis , *Indices* , non tumultuario aut semipleno congestu , non frigida & triviali philologia , sed plane novo exemplo , in majores quam facile dixero , opportunitates ac subsidia adornati , quæ experimentis potius , quam elogiis innotescere possunt. Hujus operis formam animo comple-

xus

xus Noster, ingenti apparatu, tempore, instrumentoque gravissimo, indigere se intellexit. Comparatæ igitur jam olim Bibliothecæ nobilissimæ, in quam patrimonium satis lautum impenderat, accessere tum quotidiana ex librorum emtione augmenta, tum effecti in omne genus scriptorum indices, sylvæ, notæ, commentarii: quibus ipse partim manum admovit, partim studiosorum ære satis largo conductorum opera perpetua, quæ minus ingenio videbantur opus habere, expedit. Fidem pæne excedit, quantos homo privatus, in hunc usum, sumtus toleraverit. Effectum ergo, ut singuli propemodum libri, neque minus recentiores quam prisca, suis quibusdam præfidiis sint ornati; & universi communi quodam mutui usus vinculo sibi inter se respondeant. quali paratu fortasse sola censeri Argentina potest. Enimvero quid expectare in posterum ex hoc elegantioris literaturæ domicilio orbis debeat, *Justinus & Tacitus*, quorum editione prælusit tantum destinatis Berneggerus, facilem conjecturam præbent. Sed & *Suetonio, Vellejo, Livio, Arriano, Ciceroni, Seneca*, ac imprimis, *Sallustio, Thucydidi, Pachymerio*, propinquus novæ lucis splendor oriebatur: nisi intercepto morte Berneggero, omnem hanc industriam & vota sæculi in Freinsheimianos humeros supremum numen aptavisset. quibus quam bene sedeat hoc onus, *Floriano*, pridem, & nuperrime *Curiano* opere cognitum abunde ac ostensum est. Illud non omiserim affirmare, dignum esse institutum tam strenuum, quod publica omnium eorum munificentiâ foveretur, qui pereuntium in Germania studiorum dignitatem reflouescere optant. cujus tamen voti fiduciam afflictæ domi res, & exhausta sumptibus tempora facile minuunt. & nescio an verendum habeamus, ne post instrumenta eruditionis bellica vastatione sublata, ipsa in pace eruditio nulla sit futura, nisi quod Berneggerianis quidem consiliis ostensa velut è machina subsidia, stabiles successus pollicentur: præsertim cum vel nomen viri ubique noti, ubique amati, benevolentiam rei conciliare possit, quæ suimet commendatione tantum pollet. Nisi fors

ninium præclare & sentimus de hac re & loquimur. Jam pridem enim audio quosdam, quibus tot artium instructi, tot verissimæ sapientiæ opibus nondum satis excusavit Berneggerus, quod bonis auctoribus strenuam & salutarem manum commodavit, quod linguas tot calluit, quot plerique ignorant. Critica enim hæc sunt, in verbis posita, viris & rebus feriis aliena. Non sum is, Auditores, qui ad pro-  
dendam silentio bonam causam ullo me patiar metu adigi; neque in præceptoris fama animus deesse discipulo potest; sed nec servile aliquid à me vel generosus quisquam expectabit, vel iniquus impetrabit: ut respondeam autem his vocibus, nondum inducor. Dividenda porius est defensio; rejectoque ad suas ineptias vulgo, miranda eorum voluntas, qui, cum suæ eruditionis, operis, & meriti à lubentibus ferant testimonium, ipsi, nescio quo fastidio, hæc studia pro vilibus aspernantur; eaque re profecto, non sine jactura famæ, si incidant in severos, errant. quid enim est omnino, quod eruditus & partium studio liber animus hic vel humile vel temnendum invenire possit? Rem ad liquidum à maximis viris deductam non instituo repetere: illud tantum rogo, ne ad unum modo respicientes, quod & ipsum immerito fastidiunt, (quippe cui omnium debetur scientiarum conservatio) ceteras laudes, eadem opera pariter obterant: ne aliorum culpam, aliorum pœnam faciant: ne virtutis & æquitatis postremam aut nullam in judicando rationem habeant. Fuerunt haud dubie, sicut in aliis, ita in hoc studiorum genere, insigni stultitia ac impudentia homines: qui cum absque idoneis adminiculis, jejuni ac expertes bonarum artium, numerassent syllabas, jugulassent litteras, vocem unam & alteram transiecissent, Critici volebant videri; quasi quisquam talis esse, nisi Philosophus posset. Quidam levia omnia ac minuta confectati, syrtibus illis & scopulis hujus studii, qui plurimi & asperrimi latent aut extant, nunquam tentatis, cum Varrone de palma contendebant, præque se unis, omnes credebant desipere. Talia possent millia litterarum dehonefamenta memorari: quæ

quæ si in ipsarum vertimus injuriam, videndum erit in posterum, quomodo à legulejorum & rabularum probro JCti; ab impostorum odio, Medici; Philosophi à Sophistarum titulo se expediant. Longe aliter de Berneggero, & qui ejus vestigia sequuntur, judicandum est: ex quibus Grammatistas nemo nisi per calumniam fecerit. Nimirum in hoc vertitur omnis iste apparatus, in hoc sudat iste labor, ut efficacia, robur, dignitas, omnibus iis studiis accedat, quibus universæ necessitates vitæ, jusque & fas publicum gubernantur. Huc sana ratio, huc conscientia, huc ipsum, quod ex tam fœdi contemptus omine intelligimus imminere, periculum vocat: ne spoliata suo cultu, & exuta vestibus sapientia, frigore denique ac tempestatibus intercidat. Id quod brevi futurum, timent & vident mecum, quicumque, nescio quarum rerum incitamenti fati publici curam didicerunt anteferre. Sit interea hæc apud modestos & recte sentientes non minima commendationis Berneggerianæ portio: quod, cum omne eruditionis genus traçasset, tantum in singulis plerisque progressus, quantum sufficisset sola sectantibus, etiam illi se intendit operi, cujus apparatu universarum usus doctrinarum & specimen debet obtineri. Quemadmodum nec in parvis numeramus, præter linguas doctis proprias, reddita Gallis, Hispanis, Italis, Illyriis, Belgis, sua verba: scriptas prompte, quarum usus veniebat, literas: conversa in Latinum difficillima & vix vernaculis hominibus intelligenda opera. Tale enim fuit, quod à summo nostræ ætatis Mathematico Italice editum, rerum verborumque abditis supra quam dixerim plenum Systema Copernicanum, Latinum à Nostro non sine admiratione orbis subtilior recepit. Ne dicam, quantum in amicitis clarissimorum per orbem Europæum virorum colendis, ea res commoditatis habuerit. Ab illis enim ad Berneggerum, ab hoc ad illos, frequentia commeabant literarum commercia. Quærit curiosus aliquis, quo argumento, causa, proposito? Nihil subdicebitur. quanquam enim moris parum elegantis habeat fortassis exemplum illa  
quæ-

quæstio: res tamen ipsa promi videtur dignior, quam occultari. Invitabat alium ex occasione ad amicitiam, viri humanitas, ab alio invitabatur: deferebat aliis cultum modestia, ab aliis accipiebat: officia rogabatur sæpius quam rogabat facilitas: familiaritatem instaurabat fides; communis doctrinarum utilitates confovebat eruditio; & dum collatis omnia rationibus geruntur, stimuli, auctoritas, præsidium, decus accedit consiliis elegantiae & felicitati sæculi destinatis. Conciliatrix autem tam oprabilis commercii utrinque fama fuit; non illa quæ rumores architectari, ebuccinare fabulas, adeoque pravas aut otiosas mentes, suæ vanitatis implere solet; sed quam virtutis doctrinaeque celebritati inter utriusque compotes, veris prædicationibus expouendæ, arcanis gratiæ irritamentis instructam, auctor præstantis naturæ, usquequaque dimisit. Ea inter absentes faciebat præsentia, quæcunque publicis semel auspiciis, ullibi terrarum emicuisent: ut vel hinc constet, non loco virtutem aut tempore conclusam, sed diffusam merito, liberrimo præclarissimoque cognationis non interruptæ genio definiri. Possimus hic prolixam illustrium nominum seriem adornare, virosque nullo non genere dignationis ac laudis eximios memorare, quorum gratia, amore, cultu, literis frequentabatur Berneggerus. Sed relinquamus istas tanquam secretas opes scriniis Musæi Berneggeriani: donec Filiis tempestivum commodumque videbitur, in paternæ memoriæ peplo, tam splendorum seriem titulorum, suo arbitrio intexere. Satis interim ad laudem & decus magnificum est, quod viri profapia, loco, munere, doctrina summi, hominis plerisque nunquam visî, ceteris per extima bonitatis fideique documenta cogniti, eruditionem & virtutes percolebant. Neque enim doctior quam melior fuit Berneggerus. quem facti ad virtutem mores, studiosusque officiis vitæ animus, in eximium solidæ laudis ac boni viri exemplum formaverant. Procul omnis fucus, procul erat simulatio. Igitur cum nativa in eo omnia apparerent, plurimum præstantiæ non apparentis, ad interpretationem judicantium, simplicitas & modestia recondiderant.



derant. Quæ in eo tam insignes fuerunt, ut prorsus sæculo suo major, prisci candoris pariter & sapientiæ spectaculum renovaret. Quod licet incallidum hodie & umbraticum videatur, maluit populo quam virtuti convitium facere, neque commisit, ut per ipsum quoque ostentatio & species boni moris veræ laudis locum occuparet. Effecit hoc institutum, ut mortalibus officia diligenter præstanda, Deo animum bona fide dicandum judicaret, ad hunc enim omnia referenda, inde vires operi & successus & normam petenda, nulli negligentius credunt, quam quibus ingenium aut ars sua non ad voluptatem modo, sed ad speciem placere potuit. Hinc & societati humanæ labes accessit: cui nemo recte studet, nisi qui Dei causa hoc agit. In cujus perpetuo non conspectu magis, quam reverentia agentes, fas est loqui aperte, amice sentire, consulere utiliter, juvare strenue, id est, quid aliud, quam Berneggerum imitari? qui nemini vel postulata elusit, vel vota moratus est, vel spem fessellit. Aliena negotia, ut sua procuravit: quorum cum plurima, pudore recusandi homo facillimus suscepisset, factum est aliquando, ut suo dispendio pollicitandæ comitatem sibi luendam existimaret, præsertim juventutis studiofæ desideriis, sicut antea dixi, sine exceptione deditus. hujus, auctoritate & consilio magister, dilectione parens, officio amicus, civilitate commilito erat. Adventantes humanitatis primo, mox eruditionis suæ implebat; neque facilius conciliantur animi, aut efficacius retinentur. Nulla tristitiæ, nulla fastidii adversus quemquam, in ore, in voce, in gestu indicia: quæ vel ad suspensionem curiosos, vel ad conjecturam delicatos perducerent. Tanta autem in omni actu suavis, ut ad amorem quosvis; prudentiores, etiam ad observantiam imbueret. Colloquia sua tam acinctæ attentionis judicio dispensabat, ut ambiguum relinqueret peritis, plusne doctrinæ, an prudentiæ, an bonitatis haberet, quod audiverant. Sententiam de aliis cautius an moderatius tulerit haud dixerim: rem in primis religiosam ratus, deprimere famam alterius, aut extollere;

nisi quod in hanc partem levius peccatur. Ut enim quisque est vir optimus & doctissimus, ita alios sibi facilius anteponit, aut æquius cum ceteris componit. Ergo minime probabat usitatum, inter doctos quoque, morem, quo ex uno forte delicto literario, statim de exultatione hominis, censoria tyrannide pronuntiatur: iisque furoribus libri nunc, & nullo magis quam æquitate nobilia humanitatis studia, in ominosam publice rabiem efferantur. Eruit aliquis longa commentatione, quod alius extemporali studio minus accurate expressit: causa dicta est, sententia lata: actor reum, novo more, condemnavit, ut ineptum, ut indoctum. Suppeditavit illi Manuscriptus codex aliquid planius, quam hujus conjectura olim divinavit: nihil obstat, quo minus puer virum, tyro veteranum palam traducat. Denique non sufficit, disquirere, disputare, dissentire, judicare: tanquam inter lanionum, aut, si quæ magis commaculata plebs est, globos, rixis & obscænis contumeliis res geritur. Berneggerus ne ad severitatem quidem verborum progressus est: quod rationis hoc negotium, non certaminis esse diceret. illam, ubi vera allata sit, pro se & adversum alios satis jam valere: incertam vero ac conjectura tantum nixam, aut mutua libertate contentam, aut mutuo metu, tranquillam esse debere. Sciebat præterea, partitum mortalibus, ut cetera, sic eruditionis laudem datam: in alio igitur copiam scientiæ, in alio dicendi elegantiam, in quibusdam judicii gravitatem, in ceteris industriam & fidem suo ornatu elegio, neque ignorari interim poterat, quam callidi essent suorum imbecillitatum dissimulatores, & bonorum simulators, qui nullius rei ignorantiam profiterentur. quo fieri solet, ut simplicior fors alius, non statim reperitur deterior. injuriam denique eruditionis fore, si ad unum omnia exemplum tam rigide exigantur, ut nullus inter poetas locus Ennii ingenio, aut Lucretii sapientiæ relinquatur; ut ex oratoribus Caro proscribatur, aut Crassus; quod uterque infra Ciceronis eloquentiam substitit. prope est ut ineptum

& humanioris vitæ societati prægravem dicam, qui hac scæbie tenetur. qua foris gentium odia provocantur, domi collegia & publicarum utilitatum conturbantur munia. quibus concordia, æquitate, facilitate nunquam defuit Berneggerus. cui pro amico erat, quicumque publico pro sua virili infervitet. Interiorem familiaritatem sicut cauto dilectu admittebat, ita officiis, supra quam credi potest, fidelibus, atque constantia inviolabili conservabat. Beneficus adversum omnes & animose liberalis. cujus rei documenta plurima & maxima superiorum temporum favitiæ opposuit: tanquam parens quidam ac nutritius tot exulum, tot mendicantium: quorum aliquando multa millia in nostram civitatem, depletæ latissima devastatione circum regiones, ut in unicum atque extremum afflicti ac pæne extincti spiritus receptaculum, infuderant. satisque constat, eum extremis temporibus, licet rem familiarem fortunæ publicæ inopia non parum premeret, tertiam salarii partem pauperibus erogasse. confirmaverat in eo hanc voluntatem, præter comitatem innatam, communis Patriæ miserratio. cujus inauditas calamitates, consecratus publicis curis animus, non potuit insuper habere, aut parca manu juvare. Honestissimum quippe jacturæ genus est, imo ex conditione temporis lucrum, necessitarum suarum parte carere, ne alii omnibus careant: mitigatque, quod intollerabile videretur, victrix adversitatum constantia & animi magnitudo. Qua egregie munitus fuit Noster. Duo enim illa, plane supra exempla veterum, supra humani propositi fidem in eo licuit admirari: Industriam laborisque assiduitatem portenti simillimam; & invicti ad omnia fortunæ tela roboris patientiam. Fallor an per multas duræ fortis vices exercendo homini inter principia nascendi illam tam rari exempli firmitudinem, fatorum industria circumdedit: qua longe plus valeret, quam fictitio Deorum opere clypeari, quos gentilitas heroës jactat. Luctari cœpit cum adversis rebus, sub initium adolescentiæ, paterni ob religionis veritatem indicti exilii dannorumque pars & comes.

mes. comprehenderat illum is casus alienissimo tempore : cum instincta Argentoratensi disciplina studia ejus inprimis ferventer, arque festinarent, igitur quem nulla difficultas retentare, nulla poruisset abstrahere sollicitatio, pietas erga parentes morata est. ad quos maturato itinere feliciter per-  
 vectus, utilitatibus eorum, quam debebat, operam dedit. Reversus ad solenne virtutis suæ stadium, cum inclaresceret subinde, non potuit invidiam effugere. Quæ atrocius etiam in virum, & publico admotum, consurrexit, scilicet non æmuli, non maledici, non iniqui desunt magnis viris : neque certius ingentis meriti indicium, quam odium & ob-  
 rectatores. quorum ope præcipuus hostis publici egregii diabolus, virtutum ac bonarum rerum efficaciam nititur in-  
 tervertere. Atque ne quid uspiam reliqui fieret, quod ad tentandam viri magnanimitatem pertineret, etiam cum mon-  
 stris, ut Hercules, luctandum habuit : exortusque in Apol-  
 linem Marsyas, inquinatissimi sine exemplo oris vecordiam, non quidem curis detractio, ut est in fabulis, aut recte, cujus candidatos probis æmulabatur, sed æterna ad omnem posteritatem luet infamia. Accedebant valetudines neque pau-  
 cæ, neque modicæ : donec ante hos quatuor annos, exhaustum diuturna laboris curarumque vexatione corpus, morbis con-  
 fertum incumbentibus cessit, lectumque pro musæo dein-  
 ceptis plerumque habere vir diligentissimus coactus fuit. Ve-  
 rum tantas hominis molestias multa interstinguebant pro-  
 spera : quasi & illæ in experimentum virtutis, & hæc in præmium, ex æquo dispensarentur. Nam & admiratio eru-  
 ditionis, publice nobilem ; & officia, plerisque maximis vi-  
 ris carum ; & delati quos Academia usurpat honores cun-  
 cti, venerabilem reddidere. Multis ad magnam pace belloque claritudinem princeps extitit : multos à paupertate, periculo, errore vindicatos, gratiæ vinculo sibi obstrictos numeravit. Juventutis benevolentia semper & inter primos floruit : cu-  
 jus & magnam partem sola nominis sui celebritate huc ex-  
 civit. Copiosissimi autem ad omne doctrinæ genus instru-  
 menti auctorem, verissima prædicatione posteritas colet. cu-  
 jus

jus felicitatis complementum ex provisis generi in rempublicam literariam artibus, & ostensis in familia subsidiis, sane quam luculentum, par est intelligi. Inter quæ conjunx, qualis, ut semel dicam, vel levamento vel adjumento viri tam serio occupati conveniebat: filiorum major natu, vivo parente, publici honore muneris ac inito prospere matrimonio conspicuus; ceteri egregiæ spei non capaces modo, sed feraces: filiarum altera, maternæ bonitatis exemplar, auspiciatissime elocata; altera, per signatum tam pulcre domesticis virtutibus tramitem ad ipsam muliebris decoris metam processura, non vulgaris fortunæ nomina sunt. Quorum reputatio multas ægritudinum acerbitates mitigavit apud Nostrum. qui & illud inter prosperitatis suæ elogia, subinde invisentibus commemorabat: quod pertinacis morbi malignitas nec constantiam uxoris piissimæ ac officia, nec fidem medici ac industriam fatigasset. Erat is Nobilissimus noster *Sebizius*: cujus felicissimæ dextérité cessisset hand dubie malum, si humanis artibus quicquam ultimi vicinitas fati reliquisset. Deficientibus igitur indies viribus, quæ natura jam negabat rerum agendarum instrumenta, nullo defectura momento virtus subministrabat & inexpugnabilis morbo animus. itaque legebat, respondebat, dictabat, anagnosten audiebat: vicissitudine laboris & mutatione, tanquam medicamento utebatur. Quod si inter hæc paululum a doloribus respirare licuit, generosa carcerem suum fuga ultus, in mediam immortalitatis æternique operis officinam ad sueta munia properabat: juventutem sibi, se juventuti vindicans. quam, ubi rursus, velut in certamine, morbus prævaluisset, vel domi suæ docebat, vel exportatus vehiculo, in campi apertis & re præsentis, Geometricas demonstrationes exsequebatur. Hæc enim ultima maximi Præceptoris disciplina fuit: tum aliorum, tum vel præcipue Celsissimi & ad omnem fastigii sui laudem lætissima virtutis indole efflorescentis Principis, *Sylvii Nimrodi Württembergici*, quo & auditore, in Tacito, utebatur, desiderio data. In his curis extinguere gloriosum & clarissimum


sumi cujusque veterum votis celebratum erat : nisi quod imbuto Christi disciplina animo, nihil sine Christo vel ad gloriam insigne, vel ad mortem beatum potest videri. Hujus ut perpetua, ita postrema in terris, supra terras memoria, non tam finit mortalitatem, quam aternitatem inchoat: neque interitum viventis comitatur, sed victuri perpetuat solatia. Quorum pignus & fides, ineffabile corporis ac sanguinis Dominici sacramentum, Berneggero, ad sanctissimæ religionis, cujus olim professione, nunc fructu gaudet, supremas metas tendenti, vires; & animos & vitales in morte delicias inspirabat. Quarum penitus compotem pro Argentoratensis dignitate civitatis, calorū domicilium; pro cathedra professoria, thronus regalis sacerdotii; pro amplexu necessitudinum, brachia Redemptoris & ter maximi Numinis sinus exceperunt. Atque ita, qui tot gentium linguis mortalibus utilia loquebatur, nunc Angelicis vocibus immortalem Dei gloriam concelebrat: qui Prudentiæ arcana è profundo temporum eruebat, nunc arcanorum fontes in immensa aternitate haurit: qui favore bonorum, judiciis florebat doctorum; nunc sanctissimis cælitum sapientissimisque fruitur consortiis: qui artium & scientiarum attigerat culmina; nunc sublime discit & salutare novæ eruditionis rudimentum, *quod in terris nihil sciatur*: denique sidus illud humanarum laudum ac splendor, à radiis infiniti Solis veram & perpetuam lucem mutuatur. Balbuzientis hæc verba sunt: dum crescente argumento, exundans in sperata nobis gaudia cogitatio, præpeditam suapte imbellia vocem ultro absumit. Itaque ad vos reverter, Auditores Optimi, quorum animis (ut in cantorum turba, qui præcinit, cæteris personandum relinquit, quod vocis exordio prælibatum est) rectissime commendavero, quicquid ad laudem viri & præclaras recordationes perorandum superest. Vobis enim non affectus in salutem publicam deest, ut quantum illa amiserit, docendi; aut quantum ejusmodi jactura doloris mereatur, sitis excitandi. Quod si autem apud vestras aures amplius loquendum mihi in-

rellexero, ut cum generosis, fortius agam, & quæcunque extincta tanto casu videri aut adempta solent, nullo unquam tempore, vel inter æterna hujus urbis decora extingui, vel utilitatibus publicis adimi posse ostendam. Habet hoc illustrium virorum claritudo, ut non perpetua minus quam gloriosa, ævum pariter ac spacia orbis emetiatur, tam ignara cœceri mortalibus induvis, quam dedignans exuviis commori. Attollitur fatalibus incrementis Reipublicæ hujus celebritas: atque, ne quid ad emendatissimi moris disciplinam, ad consiliorum felicissimorum gravitatem, ad civilem, quæ nescio quibus locis & hominibus propria credebatur, peritiam hætenus deesset, tum civium, auspiciis fortunæ suæ obsequentium, industria; tum præclarissimorum ingeniorum varia virtus atque diversarum merita artium efficere. Quod autem earum litterarum cultu, in quibus ad fastigium aliquid superesse, difficulter credebant, qui cupiebant soli eminere, venerabilis esse Argentina incipit, unius Berneggeri munus est. tanto illud quidem nobilius & suavius, quanto cultiorem orbis partem necessitudine quadam nobis conciliat. Quoriescunque enim, qui ubique sunt & semper erunt, docti ac boni, quantum huic viro debeatur, memorabunt, toties in partem gratiæ & famæ Argentoratum veniet: neque jam opere & altitudine admiranda turris, præ eruditionis Berneggerianæ apice; vel horologii mathematicæ structi artificium, præ summi scientiæ mathematici; vel ubertas soli & amœnitas, præ deliciis, quarum jucunditas fructusque ad omnes terræ angulos pertingit, publico sermone prædicabitur. Aude tandem tuis temporibus favere, civitas nobilissima: nec despectos patere, qui tuo honori se ac sua impendunt. Nihil hic in utramque partem sine magnis auspiciis geritur: atque, ut studia sapientiæ eorumque professores florentis reipublicæ non indicium modo, quod nec vulgus nescit, sed pignus sunt, cujus custodia publicis fatis longe propius est innexa, quam Palladii imaguncula, aut vigil perpetuo flamma, aut lapsa cælo scuta, Romanorum statum credebantur susten-

stentare: sic contentus tam arcani boni neglectusque, id est, perpetuum felicitatis & copiae malum, ea portendit, quorum etiam vocabulis in hoc consensu mihi abstinendum censeo. Cum Athenienses decus suum & lumen Solonem, clamitarent, insanire: mox everfione libertatis & status, quid tam dirum sibi praesagium vellet, cognitum est. Neque plura nunc adduco: quippe qui lata potius & fausta omnia in perpetuum malum ominari. Quid enim non polliceamur nobis, de augusti Senatus prudentia, de nobilissimorum Scholarum cura, de bonorum civium voluntate? Nam nostri ordinis homines (simpliciter agam & citra arrogantiam) hactenus vitae fortunarumque securi omnium, in publica vota laborant, sudant, vigilant, & aliquando non mollius quam agunt, patiuntur. Sed & in posteritatis hortamenta ac aemulationem, si alia desint, Berneggeri exemplum ibit. cujus nulla vitae pars egregii operis laude vacat. Igitur cum perennis famae gloria, quae, ut ab initio aiebamus, infantiam nostram interim solatur, mox supplebit, virum singularis ingenii, incredibilis studii, rectissimi moris, optimarum artium principem, saeculi sive politici splendorem, sive politioris auctorem, efficacis naturae dicam, an copiosae virtutis ostentum, admirationi omnium ac venerationi exponet, summa felicitis memoria in amorem publicum & *Boni communis* cognomentum desinet. Quod non meritorum modo apud universos dignatione, sed officiorum in singulos abundantia eximium, longe supra divinitatem & consecrationes ambitionis, supra titulos & ingenium adulationis, supra conatus artis & figmenta, in simplicitatis quodam delubro dedicatum, nulli aetati, nulli hominum ordini vel ignorabitur vel invidetur. Nam cetera, quibus famam placare aut inflare solent, quos adversum aspernationes aliorum & blanditias, nulla causa aut sui fiducia communivit, nullum hic locum habent: ubi cordata posterorum libertati, sine fuco & ambitu, omne proxus iudicium transcribitur. Interim quod Academicis Patres, quorum aliqui Berneggero Praeceptore, quidam intimo amico,



amico, omnes collega usi sunt, desideria sua testantur: quod juvenus mœsta, luctum ob erepra sibi tot præsidia, tot delicias, recordationibus defuncti emollire quodammodo & egere perseverat: quod nec humanitatis monumenta publice, nec privatim pietatis officia, finem inveniunt aut admittunt, ad superstitem potius munia, quam defuncti honorem referendum est. Cui licet tum doctissimorum præconiis, tum optimorum testimoniis, iusta ubique & semper celebrentur, plus erit, quod ex se ad sui æternitatem conferet, abunde sibi sufficiens, nomen & meritum MATTHIÆ BERNEGGERI. De quo, dum pietatis professio spectatur, hætenus loquor non sine plena fiducia, si ultra, & ad laudes eundum est, reverentius egero, si plane conticescam.



## X.

## ORATIO SÆCULARIS,

habita

publico nomine, anno cId Id cxxxviii.

Jubilæo Scholarum Argentoratensium.

*Generosissimi Domini Comites & Baro, Eminentissimi Scholarcha, Amplissime Consiliarie, Magnifice Rector, Spectabiles Decani, Excellentissimi Clarissimique Cti & Medici, Reverendi Ecclesiasta, humanissimi Curiarum moderatores, Nobilissimi, florentissimi, ornatissimique Auditores ceteri.*

**Q**uod & majoribus nostris, recordatione nobilis incepti, gloriosum: & posteris, si qui erunt, exemplo pietatis sit salubre; fata Argentoratensis Scholæ, ab ipsis, ut sic dicam, incunabulis, per varias Sapientiæ velut ætates ac studiorum auctus, sæculari decursu

ad nostri temporis gaudium propagata; festivis vocibus, festivis animis, coram Deo, festivitatis, qualem nec vidit nostrum quisquam, nec videbit, auctore, rite meditaturi, solennem hunc locum frequente congressu implevimus. Dicenda sunt, quæ nunquam sunt dicta, ut semper dicantur. Memorandus est unus annus, ne centum taceantur: imo centum repetendi sunt, ne unius felicitas ignoretur. Quod superiores sibi pariter ac nobis ætates optavere, quod nos post futuris optamus sæculis; ejus voti vel finem vel initium, complementum vel specimen, prout respicere juvat aut prospicere, hodiernus dies dedisse putandus est aut daturus esse. Quo, sicut non una nos salus beavit; ita non unius curæ circumstat difficultas. Sive enim, quod nobis lætitia publica imposuit, officium spectamus, loquendum erat, pro dignitate incomparabilis festi, magnifice; pro circulo perfecti temporis, accurate. Sane nec solus videtur peccare, qui in cominuni causa peccat; nec ullo potest sæculo deleri aut corrigi, quod singulis tantum sæculis admitti potest. Sive eos cogitamus, qui non potuerunt, quæ ante nos nobiscum voluerunt: suppleta erat & religio, quæ gravissima; & facultas representanda, quæ futura haud dubie maxima intelligitur fuisse. Sed & ventura dies vix erit ut nos absolvat, si dandi potius quam accipiendi Templi, seu mentem seu causam sibi relictam esse judicabit. Inter hæc pericula destituto Oratori vel timido vel ambizioso, quanta trepidandi, tergiversandi, excusandi, deprecandi materies exoriretur; nemo est, quin mente secum veluti per imaginem ex re præsentī queat peragere. Nam si res tota dictis exæquanda est, nemo fortasse hoc implere argumentum poterit: si laus eloquentiæ à fastidiosis hodiernæ censuræ judiciis speranda est, fortasse nemo audebit. Ego, Auditores, quo minus vanitate hujus aut spei aut metus movear; præter consuetudinem & institutum quoddam naturæ, conspectum hunc vestrum, & in eo venerabile illud publicæ auctoritatis instar, pro munimento mihi datum prorsus intelligo. Caput gloriæ & summam, vobis obsequi; vobis confidere, securitatis præcipuum semper existimavi. Sed & levis est  
jactu-

jactura, quantum ad religionem nostri instituti pertinet, si desit aliquid orationi, quam solus sustineo: cum nihil deesse animorum commentationi possit, quam omnes susceperere. Denique quicquid in nobis displicere potest, placitura omnibus materia facile pensabit. Quam neque per Parnassos, Pindos, Heliconas; neque per Apollines, Minervas, aut quicquid deorum earumve augusto studiorum nomini vetus superstitio circumposuit, vobis conciliabo: Matrem vestram, eandemque Filiam, Amicam, sociam; decus vestrum & voluptatem, gemmam Reipublicæ, splendorem terrarum; domum sapientiæ, sedem humanitatis, magistratam felicitatis, non ficto titulorum honore præfero. Vel, si simplicissimo pariter ac divinissimo nomine utendum, Schola est. hæc ad vos procedit, hæc conventum sibi hunc dari petit: hæc aures vestras mentesque, memorabilis magnique diei præmio paciscitur. Res nec auditas huic ævo, nec audiendas allatura, cupit suo animo, cupit vestro, satisfacere. quem ut non uno sibi nomine deditum satys novit, ita variæ comitatis obsequio vicem redditura, jam nunc omnes in mutuos amplexus provocat & officia: quorum hodie tam optatam occasionem obvenisse, publicis privatisque desideriis in ipso limine gratulatur. Agite ergo quicumque cordatum ad hæc sacra animum attulistis, efficite, ut per quatuor sæcularis matronæ ætates euntibus (tot enim non curiosa numerorum æqualitas, sed insignes incrementorum gradus constituunt) ipsa nostra pietas, ipsum testandæ gratiæ studium augeri, & ad robur quoddam ascendere videatur. Interim venia suscepto debetur operi, si ad tam sollennes cærimonias quadam compendiarii ambitus veneratione imbuamini. Præcipuam operum humanorum vim in animo esse, ejusque iccirco culturam vitæ potissimum conducere, gentium pleræque jam olim consensere. Sed nitebantur maximam partem via vel abrupta, vel obliqua. Qui enim bellorum peritiam & discrimina hoc fine petebant, rem tanto pretio minime emendam affecturi sunt; ut & morem ipsi humanum exuerent, & publicam felicitatem, quæ pacis comes est, exemplo armorum corrumpèrent. Jam qui artificiiis varie excogitatis aut passum juvare,

aut levare negoria, aut supellectilem aggressi sunt ornare: illi nec animum supra corpus valde extulisse, & huic potius quam illi studuisse queant videri. Rectiore sunt usi consilio, qui virtutem unicum mentis humanæ bonum arbitrati, hujus adipiscendæ gratia de sapientia primum, mox de sapientiæ studio, denique de certa studii ratione serio cœperunt cogitare. Verum hæc diligentia erravit aliquando in agris, nonnunquam latitavit in sylvis, aut habitavit in casa: est cum sordido involuta pallio, lucem fugeret: est cum infantia suæ vel fletu immodico, vel risu notas daret. donec paulatim adolescentior convenit in domos, elegit familias, fecit cœtus; intravit oppida, ædificavit auditoria, & benignissima libertate, vitam mortalium ingenuis artibus erudit. Hæc origo scholarum & nativitas vulgo celebratur. Quorum splendor ac frequentia diutissime Orientem beavit. Proxima Meridiani fors est. his magistris proficere postea Occidens visus. ultima Septentrionem, sed ea copiosissima felicitas respexit. Germania certe nostra & antiquitus inscitæ nomine infamis, & ante ducentos scilicet annos, vehementer illiterata, nunc tot ferme scholas, quot oppida, numerat. Quæ sane res tum ceteros, qui hoc à divina manu donum acceperunt, tum angustam hanc Urbem, gratissimæ pietatis debet implere. Quot enim sunt & quanta beneficia, quorum hic annus, quem ab exortu scholæ nostræ centesimum, non tam numeri perfectione, quam fastigii colimus, vel fecit nos conscios, vel facere debet memores? Quanquam nec ante hoc sæculum literatis penitus caruere institutionibus nostra civitas; cujus ut sunt pleaque aternitate dignissima; ita nescio quo fato multa minus liquidò ad nos pervenerunt. Primum licuit reperire, qui juventutem (præter vernaculas educationes, quas mature arbitror cœpisse) litteris imbuir, Ottonem Brunfelsium; hic antequam de Monacho medicus fieret, in Cænobio Carmelitarum, anno quem à Servatoris nostri adventu cō 10 xix. Christiani numeravere, ludum instituit. Nam quæ de septem in Franciscanorum monasterio classibus, mentio rerum Alsaticarum compilationi est inserta, neque temporis, neque ullius præ-

præterea rei habet indicium. Clariora sunt, quæ clarissimam in omne ævum memoriam prorogare debebant, rei scholasticæ Argentoratensis verissimo auctori, provisorio, amplificatori Martino Buceo. Ad hunc enim virum, Lutheri spiritu exemploque in fatales maximarum rerum curas animatum, pertinere, quicquid felicitatis hodie commendamus, ipsi quoque, si viverent, confirmarent, quorum & mox in orationibus nostris magnifica, & deinceps in mentibus perennis merito extabit celebratio. Ille cum apud se graviter expendisset, quantum & renascenti ecclesiæ, & Republicæ crescenti, bonæ spei adesset per divina omina, quantum abesset per literarum inopiam virium, magno animo utriusque bonum publice adornatis honestissimarum artium officinis sibi promovendum duxit. Igitur adiutorem nactus Wolfgangum Fabricium Capitonem, literis Græcis Hebraicisque eximie doctum, juventutis studia æmulatorum cœtus duos collegit. Quorum uni in Dominicanorum, quos vocabant, seu Prædicatorum collegio præfectus Joannes Sapidus, Selestatinæ, id est, patriæ scholæ pridem administratione cognitus: altera institutio ad D. Thomæ ampliori moderatione, & disciplina gaudebat uberiore. Illic Sapidus administrante *ὁ πρόεδρος* cuiusdam (provisorem vulgo dixere) opera, linguarum cognitione ad humaniores artes puerorum animos præparabat: hic veluti per gradus Latina, Perrus Dasypodius; Græca, Iacobus Bedrottus; Hebraica, Georgius Caselius, cujus partes postea Michaël Delius suscepit; Mathematica Christianus Herlinus; sacrorum vero rudimenta, cum cura docebant Capito, Bucerus, & socia hæcenus instauratæ religionis indultria denuo monstratus, Casparus Hedio. Matthiam Zellium, memorabile inter primos veritatis religiosæ propugnatores nomen, neque tum neque postea in scholis versatum invenio. quem tamen, cum Junius laudatis modo auctoribus socium dederit, de consilio hortatuque viri gravissimi non est quod dubitemus. Duraverat jam Bucerianum institutum annis admodum decem, à sæculi ante nominati sexto & vigesimo numerandis, cum novus emerfit ad D. Petri senioris ludus. non debet enim gratiam præclaræ voluntatis

tis perdere & laboris impigri Ioannes Suebelius; ex collega Sapidi, mox imitator. Vidi descriptam scholarum præfectis, quam usurpauit, Henrico Zello ad iutore, docendi rationem: quæ & studium tam strenuorum temporum, & obertiam exercitati magistri, iucunda mihi cogitatione insinuabat. Ita enim est, Auditores: cum principia hæc intueor, occulto quodam gravitatis sensu pertentari animum, & assurgere deprehendo. Id quod alias adeo contra fit, ut facundissimus scriptor jam olim timuerit, *primas operis sui origines proximaque originibus minus præbitura voluptatis plerisque legentium* esse: quorum ad nova scilicet & magna, vitio humani ingenii, propendet cupiditas. Atqui & maxima nobis merito videri debent, sine quibus ad nihil magnum pervenissemus; & causarum abunde est, cur venerabundæ reputationis nostræ publicum hic edamus testimonium. Quam enim illud lætum, quam omnis angusti plenum, quod in idem tempus restituta pietas & instituta eruditio conveniunt: quod eosdem schola præfert auctores, quos ecclesia patres agnoscit. Quorum ut mutuas esse operas fatentur plures quam intelligunt: ita venerabile hoc & sacrum pignus societatis, amicitiae, studii, laboris, utrique ordini fataliter datum, ac, quod sine superstitione dico, cum occulta publicæ salutis tessera custodiendum, lubentes, amplectimur, & (Deus faxit) semper amplectemur. Cæperat in Saxonia Lutherus religionem, Melanchthon scholas purgare: inusitata res utraque & difficultatis erat & fortitudinis: sed destinata heroibus & heroicis conatibus ætas, hic illic suppare, atque inter primos, Argentoratensem Bucerum invenit, ac postea Sturmium. Quos ut inter patriæ nostræ titulos ostentemus, meritorum obtinemus iure: non immemores interim, quantum Buceri, Rhenani, Sapidi nomine, Selestadium; quantum Sleida Sturmii Sleidaniue celebritate instauratis literis queant imputare. Igitur acta quidem res summa contentione, excitato ardore, sociata fide, quasi uno exemplo omnes in posterum docendi essent, quam nihil otiosum esse debeat in tractatione litterarum, quam nihil remissum, in condenda publice disciplina. Aderant ubique, instata-

stabant; collegas consilio, juventutem auctoritate ad beatioris sæculi curam advertebant. Quod cum pulcre quidem, tardius tamen quam pro voto succederet, Bucerus assuetam sibi causam, majoris patroni ope attollendam ratus, ornatissimæ nobilitatis virum Jacobum Sturmium adit. diu sibi dispectam venisse occasionem ait, qua pulcerrimi decoris gloriam, scholarum amplificatione respublica posset obtinere. Agere in Academia Parisiensi Joannem Sturmium; cujus consummata in litteris eruditio, & in omni scholastica re studium, quin posset Argentoratum traduci, ex urbe crudeliter id temporis superstitionis, nihil se dubitare. Accederet modo senatus auctoritas & evocatio: cui suam quoque, si qua esse posset, operam non defuturam. Idem jam suasisse ac promississe Erasmus Episcopum Urbis, & Ludovicum Carinum: quorum petitioni nihil illum, de quo sermo esset, negare posse. Jacobum Sturmium & semper alias eximia singularis genii dexteritas ad profutura posteris consilia instituebat, & tum lætissimæ approbationis plenus, omnem secutæ felicitatis imaginem animo præfagiente figuravit. Itaque consentiente mox senatu, consultorum opera, Prætoris inquam & Buceri, anno cło 1537. invitatur, & sequentis initio venit Joannes Sturm. Tantum hospitem, & deinceps ex hospite parentem, nunc quoque gratulabunda excipe, juvenus literata. hic est ille, cujus ingenio non minimam splendoris sui partem Respublica, celebritatis suæ schola, utilitatum suarum plurimæ nationes debent. hic est ille, cujus consilium ita Argentorato conditione præsentis proprium fuit, ut orbi universo perfectione sapientiæ esset commune. Quod cum in ædibus primum Bucerianis, hoc est in hospitio suo, maximis saluatoribus Jacobo illi Sturmio, Nicolao Cnibisio, Jacobo Mejero, (hi studiorum causam Senatu mandante susceperant) tum Matthiæ Pharrero edissereret, nemo fuit, qui non de meliore constituendi ludi ratione & edoctus satis, & abunde exhilaratus, inter approbationes gratulationesque discessit. Inde relata res ad senatum facile perfecit, ut Scutum nonis Martiis fieret, quo Scholarchis cura tam ardui negotii, & potestas pro-

promovendæ novæ disciplinæ permittebatur. cujus saluberrimæ rationes, ut scientiæ publicæ judiciisque clarius commendarentur, edito *de litterarum ludis recte aperiendis* libro omnis doctriinæ disciplinæque species ac forma, cum studiorum præfidiis ac utilitatibus, à Sturmio est descripta. Atque ita rebus probe deliberatis, eodem anno feliciter contractæ, quas in urbem varia præceptorum conditio dispersebat, scholæ sunt: novumque JUVENTUTI RELIGIONE CHRISTIANA ET DISCIPLINIS INSTITUENDÆ LUDUM, in contigua nobis, quæ à Dominicanis olim monachis nomen habuit, sede, S. P. Q. ARGENTORATENSIS FIERI FECIT. Ex hoc tempore Argentina novos in annalibus titulos sortita, & laudatæ antea integritatis gloriam cumulavit, & laudatæ deinceps constantiæ omen præbuit. Describebantur primo teneri cives in curias novem, singulis magistris tanquam moderatoribus commissas: nisi quod infima duobus vitæ indigere. Ad has deductus quinque aut sex septemve annorum puer, cum quotannis in superiorum tribum addisceretur, latine græceque doctus, tum artis dicendi disserendique compos, post novem annos expletos, publicis auscultationibus (hæ alteram constituiebant scholæ partem) ita utebatur, ut septem Professorum ope non Logicas tantum, quas vocant, artes, Grammaticam, Rhetoricam, Dialecticam, Historiam, Poëtas, cum Mathesi, sed altiores etiam scientias, Theologiam, Jurisprudentiam, Medicinam, intra quinquennium, partim excolere plenius atque exercere; partim eatenus addiscere, ut in posterum magistro non indigeret, potuerit. Maturuere cum ipsa ætate studia, æquarique annis profectus pulcherrima connexionem suis incrementis congruebant. Classium inferiores, memoriam; judicium, mediæ; duæ superiores, culturam utriusque, repetendo concoquendoque disciplinam ceterarum spectabant. Doctrinam exercitatio roborabat: exercitationem doctrina provocabat: utramque industriæ varietas absolvebat. Pueritiam ingenui pudoris plenam, classium moderatio; adolescentiam à licentiæ studio gravitas publicæ disciplinæ, sanctarumque reverentia legum continebat. Denique,  
ut pie-



ut pietas christiana, sinceritate incorrupta, sapientia locuples, eruditione venerabilis, oratione robusta, publice valefceret, summo studio provisa erant omnia atque ordinata. Hæc prima ætas viris & laboribus gloriôsè strenua *brevis sic effloruit, ut*, quod Historicus \* noster annotavit, *non solum extremi Germani, sed extera quoque nationes huc confluerent.* Nobile spectaculum! In scholæ Argentinensis curias, florem ipsum juventutis ex illustrissimis Principum familiis, ex Comitibus, ex Nobilibus, ex omni hominum terrarumque genere, ad instar litterati orbis, certamen quoddam generosæ mentis contraxerat. Quid Gallus, Danus, Hungarus, Bohemus, Moravus, Polonus, Anglus, Scotus, Suecus in litteris posset; quæ ingeniorum ubique nascentium vel felicitas vel varietas esset, locuples & jucunda cum nostratibus contentio monstrabat, nihil pulcrius, quam in opere conspici: nihil optatius, quam festinantes antevertere; exercentes studio, majores conatu, celebres laude, industrios præmio superare. Cujus rei tum perpetua in classibus exempla, per varias artes Præceptorum solertia incitavit; tum examina, vel bis per septem inferiores, vel semel per omnes curias quotannis celebrari solita ultro suppeditabant. Præsertim, cum sub vernum tempus (quem adhuc cum fructu morem usurpamus) disposita in agmen amabilis pubes, in conspectum scholastici Magistratus producebatur: ut haustam ex illius vultu ac reverentia alacritatem, inspectanti honoratissimo amplissimoque cætui approbaret: ut audiretur, ut appellaretur, ut donaretur, ut præmia sua, & præmiorum causas, sedulitatem & sedulitatis invitamenta, inter gratulantia ora & pios cantus, & bonas spes, civitatis conscientie, modesta quadam gloria imputaret. Nec de publicis exercitationibus, ac editis præclare monumentis jam quicquam dico: quibus quanta debeat celebritas, rectissime æstimabit, qui clarissima ejus temporis nomina Buceros, Capirones, Hediones, Fagios, Martyres, Zanchios, Vogleros, Balduinos, Hottomannos, Tuppios, Mastarios, Erythraos, Dasypodios, Beutheros, Tremelios, Bortos, Sapidos, cogitaverit. Sed difficilior est scholas feliciter administrare, quam præclare constituere. consi-

b b

lio

\* Sleid. 12. comm.

lio ordinantur, providentia & labore continentur. Rem miseram loquor, sed veram: quo præstantioribus institutis coaluere, eo faciliori corruptione tentantur. Cujus vel ideo nota infestior, quia occulte, & per miros tramites istæ labes inoriuntur: usuque hic venit, quod in fidibus ad exactissimam soni concordiam temperatis: ubi cum uno alterove impulsu levissima tenori cantus remissio intercessit, everberatæ statim aures, quarum delicatissimum est judicium, perpetuo reconcinnandi labore fidicinem fatigant. Igitur, quanquam obtigisset scholæ formæ, qualem nec viderat Germania, nec æquaverat nobilis eo tempore literarum studiū Gallia, nec provocare ullius gentis audebat industria; quanquam custos hujus formæ, idem qui auctor, cura, provilu, opera ubique, per annos paulo minus triginta advigilaret: deprehensum tamen est, quædam potius obvia tam profundi consilii imitamenta, quam penitiores rationes, & vim ipsam ad usum adferri, atque in docendo retineri. Quod cum inter primos observasset Petrus Sturmius, magno illi Jacobo, ut natalium, sic ingenii, laboris, officii germanitate junctus, stimulum Joanni Sturmio idem de ea re sollicito addidit, ut viginti epistolis, quas ipse Classicas vocat, tum decem curiarum moderatoribus (nam adjecerat unam novem illis ab initio constitutis) tum publicarum Doctoribus disciplinarum, rationis à se institutæ, inoffensam facilitatem, compendiosam ubertatem, præcipue autem solidam omnis scholastici operis tractationem de integro explicaret atque describeret. Quo non contentus, ipse obivit curias, atque, ne adhortatione subtilior quam effectione videretur felicior, expositum diserte consilium, exemplo illustravit. Ea res tristis, quod dixi, fati memoria effodit animos; cujus obiter tamen mentione defungemur. vix unum licet ab illo tempore lustrum invenire, quo non & magistratuum curas, & magistrorum labores, tentatæ vario successu deliberationes & correctiones fatigavere, nec attinet Sturmianas huc querelas, comprehensasque frequentibus scriptis Præceptorum sententias afferre. de nostro enim, uti, qualis nunc est, cogitantibus, ubi sic remediorum multitudine labora-

boratur ut olim vitiorum, silentio potius ad operiendum, quam voce ad refricandum opus videtur. Sed tum quidem reddito studiis vigore, diffusa jam in tot terras gloria, Urbi ac posteris conservata est. Neque jam quicquam ad universæ eruditionis laudem, & perfectum scientiarum orbem deerat, præter Imperatoriæ auctoritatis munificentiam, Studiorum namque honores, commoda, immunitates, jura, non sub Theodosio demum & Valentiniano, quorum in Codice Juris laudabilis extat provisio; sed inde ab Augusto, Vespasiano, Trajano, Antoninis, Alexandro, in partem Principalium curarum, augustissima summæ sedis majestas receperat: vel per se, vel delegato optimaribus favore effectura, ut imperium sapientia partum, sapientiæ domiciliis tanquam æternitatis suæ pignoribus, passim exornaretur. Cum ergo Argentoratenses viderent, non minimum scholæ tam illustri incommodum ex eo creari, quod plerique non contenti doctrinæ copia, quam hic consummabant, etiam doctrinæ titulos, quos hic more alibi recepto non inveniebant, quanquam non sine ingenti studiorum & temporis sui dispendio, peregre peterent: expositis Maximiliano II. Imperatori invictissimo, comitia tum in Vindelicorum Augusta habenti, desideriiis, tam prolixum experti sunt Cæsareæ benignitatis favorem, ut ad promittendum liberalior Princeps, quam Legatus noster ad accipiendum promtior videretur. *Firmas esse ac ratas jussit, leges, quas tulissent hætenus scholasticas, quasque laturi essent: quam ante hæc, Gymnasii nomine, scholam dixissent, in posterum Academiam haberent. Baccalaureos quoque ac Magistros (honore à quingentis circiter annis recepto) crearent. Omnes, quos vel docendi vel discendi officium scholæ accenseret, jure & antea usitato gauderent, & novis, ad exemplum Heidelbergensis, Tubingensis, Friburgensis, Ingolstadiensis, antiquissimarum in Germania Universitatum, privilegiis fruerentur.* His solenni diplomate perscriptis, eodem anno (erat autem clō Io LXVI.) Sturmio in mandatis datum à senatu, ut confectis Academicis Epistolis, quid prioribus curis in amplificata jam schola accedere posset aut deberet, libere ostenderet. Sed & ceteri paulo post Doctores senten-

riam super omni negotii suscepti tractatique ratione, rogabantur. Quæ cum gravi consilio provisæ essent atque pensitata, omnis veluti Respublica Academica, perenni lege consignata, & mansura monumentorum fide consecrata est. Primum celebritatis auctæ specimen in eo datum, cum Cæsareo beneficio ac jure, Magistri publica auctoritate creati sunt, qui doctrinæ præstantia strenuos se multorum annorum in scholis classicis publicisque magistros probaverant. rationibus de cetero ita ordinatis, ut primus à curiis ad Professorias auscultationes accessus Baccalaureatum; duorum deinceps annorum studium, Magisterii honorem posset mereri. Communicato quippe consilio, qui Philosophiam tradebant, operas in hæc spatia dissipaverant, quibus omnes disciplinæ ex optimis quibusque auctoribus (horum principes Plato & Aristoteles erant) abfolverentur. Quæ ratio ipso usu salubris apparuit: satisque constat, doctiores fuisse, qui industria audiendarum lectionum vivam clarissimorum virorum vocem magistræ totius scientiæ habuere; quam quorum obscura hodie diligentia domi inter persuasiones suas hoc successu educatur, ut auscultationes publicas vel sedulo fugiendo, vel fastidiose ac raptim idque ipsum rarissime obeundo, publica luce semper habeatur & sit indigna. Longe tum alius temporis studiorumque splendor; dixisses Cæsaream benignitatem omnibus arcanum quoddam gloriæ calcar admovisse: tam severa contentione de attollenda schola, de amplificanda eruditione, de ornanda patria pro se quisque laborabant. Atque huic secundæ ætati, ut ingens decus addidere, illa non Argentinæ tantum suæ sed orbis literati lumina; Pappi, Marbachii, Giphanii, Obrechtii, Planeri, Hauenreutteri, Golii: ita vulnus atrox ab intestinis est discordiis instictum. Quarum commemoratio, nec serenitatem hujus gaudii obfuscamdam esse censemus, & piis à Deo precibus omnes contendimus, ut exemplum tam triste omni in posterum exemplo, omni careat exempli noxa; suoque intentus quisque operi aliena aut altiora nec affectet ingenio, nec ardore disceptet, neque quicquam tanti habeat, ut res turbare compositas malit, quam tranquillissimæ pietate,

ad publicum egregium recto tramite grassari. Complexi iam sumus annos tres & quadraginta : id est, duas ætates illas, quas vere Sturmianas posse appellari nemo abnuat : cum Gymnasium per annos xxviii, Academia per xv, sub moderatore Sturmio ac Rectore cœpit adolevitque. Sed posterior ex his ætas casu abrupta, tertiæ durationem utrique ferme parem efficiet. quam deinceps usque ad novam celebritatem & præcellentiam scholasticæ fastigium sumus strictim commemoraturi. Amat cœleste Numen, ubi mutatione quadam subhorrida mortalium curas ad diligentiam exacuit, suppeditatis subinde novæ spei instrumentis, aut pensata mitioribus fati, duriori sorte, rerum conservationi providere. Igitur Sturmio admodum sene ad privatam solitoque labore vacuum vitam redactæ, quæ secuta sunt tempora, in Melchior Junio, quem senatus ei succedere voluit, ferine alteram felicitatem Sturmianam resumere. Inter exercitationes publicas, quibus studia moresque excolerentur, nobilissimi erant generis, Declarationes, Disputationes, Dramata. E quibus hæc quidem, in curiis pueros primo imitationi & litteratæ recreationi destinata, tum in eum splendorem, Academica ope & alacribus ingeniis effloruere, ut ludi non alibi facile magnificentius apud Germanos instruerentur. Declamandi autem consuetudo, quæ antiquorum nonnullis ad formandam eloquentiam vel sola sufficere credebatur, jam Argentoratum sibi patriam, & præsertim hoc auditorium, quod in ipso ejus studii flore, anno xci, cum theatro isto extructum dedicatumque est, veluti templum ac novum quoddam Athenæum elegerat. Erat audire & videre singulis ferme dierum septenas, certe mensibus, rerum gravissimarum judiciorumque ac consiliorum proximas veritati imagines : has omnis studii sectatores præmonstratore Junio elaborabant : has apta decoraque recitatione in ore splendidissimæ coronæ quasi animabant : in his Principum, Comitum, Nobilium, ne de ceteris dicam, quibus turpe fuisset his exemplis vinci, nosci volebat strenuitas. In hac Academia, fata gentium, fortunam augurabatur imperiorum : quos Pericles, Themistocles, quæ decora, quos viros, orbis Euro-

pæus plurimis locis hæcenus cognitus est habuisse, tum intelligebatur habiturus. Ergo tantæ utilitatis industriam fama, ut solet, secundissima per lætos applausus, meritarumque con-celebrationes laudum, mortalium favori passim commendavit: nomenque Junianum & nominis honestamenta libri, inter ea cœperunt clarescere, quibus schola nostra semet visa est & ceteras superasse. Rem ipsam dico auditores: eloquentiæ fuit & disciplinæ gravitas, quæ palmam diu nostris rebus meruit, diu obtinuit. Fatalis boni rationes ipsi putate, ipsi vobis explicate. Potuitne aliquid fieri felicius, quam sapientia, eloquentissimum; & eloquentiæ, sapientissimum magistrum statim ab initio habuisse? Non errat, sed nec parum dicit, qui omnia Sturmium ad-eloquentiam autumat retulisse. Sed eloquentiam ille nulla re nisi sapientia usu desinebat; sapientisque non otiosam volebat cognitionem esse, aut humanis usus rudem, sed conscendere suggestus, audiri in curia, placere in populo, splendescere in schola. hinc, quæ separatis ut nominibus, sic studiis, infelicior sapientia postmodum disunxit, oratoris exercitatione ritu veteri complexus, ipsum robur Academicæ eruditionis putandus est instruxisse. Quæ res perpetuam scilicet imitationem merebatur. Sane si curiosius agendum hic aut prolixius esset, possem vobis, auditores, nescio quid fatale, in rebuspublicis, scholis, claris societatibus aliis, ex rerum memoria demonstrare: quarum unicuique proprias quasdam dotes ac suas fuisse, cumque earum declinatione omnia in pejus sublapsa, nunquam deinceps rediisse ad vigorem cerneretis. Sed contentus ero hoc ad cogitandum nostræ juventuti objecisse, quantæ sit res & turpitudinis & noxæ, à majoribus cum laude partum decus, per ignaviam prodigere; splendorem Academicæ pristinum pedibus conculcare, utilitates Reipublicæ fastidio, posterorum curam inertī stupore transmittere. Ad disputationes jam, ut supra cœpi dicere, veniendum. in quas multa, consuetudine locorum & ingeniorum, vitia omni tempore irrepsisse, vel prima illa Academia, cujus titulum honoris causâ hodie inter præcipua studiorum insignia usurpamus, argumento esse potest.

est. cujus cum omnis mos æmulatione & cupiditate vincendi, adeoque contentionum studio, non disquisitionum, inflammaretur, dissolvi cœpit ac interire. Eas igitur, cum bonis legibus probe munitas, præmiisque insuper adornatas, primo menstruas ex lectionibus proponi senatus Academicus vellet; idque officium Theologo, Jurisconsulto, Medico, Ethico, Physico, Dialectico præcipue assignaret (nam Beutherus Historicus sponte suscepit: Oratorem plerique utiliter facere posse & per leges debere aiebant) subinde incrementa sumserunt: donec nostro tempore ad quarumcunque scholarum laudem vel frequentia vel severitate pervenerunt. Ceterum priores hujus tertie ætatis anni (ad cujus seriem ex diviticulo liberiore revertimur) magno concursu ornatissimorum hominum ac nitore inusitato pervigebant: unoque tempore quadraginta duo Comites ac Barones, cum aliquot Principibus, partim classicæ partim Academicæ juventutis decora memorantur. quorum numerum frequentibus supplementis Austria præceteris integravit. Sed nec aliarum rerum quidquam gravitati ejus status deesse visum: quem ego tranquillitate & successu pæne judicaverim præcipuum. Finem ejus insignivit felicissima Jubilæi magni lætitia: cum anno hujus Christiani sæculi decimo septimo multa festivitate, ob instauratam ante centum annos Lutheri potissimum opera religionem, grates Deo passim agerentur, & Academicæ hac in re studium, concionibus, orationibus, disputationibus, omnique pietatis apparatu explendesceret. Cujus sollennitatis memoria sigillatim, ne qua intercideret, pridem est litteris prodita atque custodita. Rectorem eo tempore habebat schola Casparum Birschium Jureconsultum: cui hoc divinitus obtigisse muneris putandum est, quod duos clarissimos lætissimosque studiis Argentoratensibus dies, non professorio tantum applausu obijt, sed Rectoris auspicio celebravit. Rursus enim gerebat eam dignitatem anno XXI: cujus mense Augusto accepta denuo ab Imperatore Ferdinando II, venerabilis memoriæ Principe, privilegia amplissima publica sunt auctoritate ac sollenni paratu instructuque promulgata. Magnificam ejus diei speciem,

nova-

novaque aut novata instituta ne hic edisseram, tum temporis ratio, quo nimis angusto urgeor, tum occupata singulari libro hæc opera, vel suadet vel imperat. Contenti quidem ad id temporis fuerant nostri Proceres iis, quos audivimus, honoribus: at vero plurima erant, quæ iustam absolvendæ eminentiæ curam providentissimo Senatui, quem suis ipsum incrementis, quo successus fatalis ducebat, par erat favere, ad-moverant. Et invenit tamen illa res, ut felicitas nulla magna simul & obvia est, moras perplexamque asperitatem non unam. Donec ambiguum fortunam eventu oprato explicatam dedit, vir confessione omnium maximus & *Civitatis suæ*, ut veteris Fabii elogium ad recentia merita appropem, vere *Princeps, Franciscus Rudolphus Ingoldius*. Protruserat eum patria ad tempora causasque difficilimas, apud Electorem Moguntinum, industria solita, de qua tot exempla jam loquebantur, expediendas. Ibi cum denique de hac quoque Argentoratensium petitione, interprete Moguntino, Cæsari concilianda ageretur, multa & magna Serenissimus Elector est causatus, quibus amicæ Reipublicæ voluntati nec facile, nec prorsus, nec aliter (acceperat enim jam munus cum exceptione Theologici Doctoratus tradendum) posse satisfieri testabatur. Sed contentente Nostro, & pro sua urbe ac peculiari in literas affectu officioque, nihil quo caussa juvaretur omittente, non inventa ad extremum ratio est, qua diutius efficacissimo Oratori, novi & perfectioris beneficii procuratio denegaretur. Igitur hoc ille quidem xenio redux patriam impertivit: gratiam autem neque nos idoneam excogitamus, neque satis dignam ultra viro posteritas reddiderit: cujus plurimum scilicet intererit, tum semper hujus nominis laudibus existimationem suam ab ingrata negligentia vindicare; tum sæculares, quas olim ab initio hujus quoque beneficii metietur, cærimonias, cum meritum tantorum bona fidelique recordatione conjungere. Atque hæc est quarta ætas, plenissimo jam jure, ad exemplum nobilissimarum, quas vocant, Universitatum, nobilis; ac præter gradus pristinos, Doctorum in omni doctrina ac studio, ut & Poëtarum creandorum potestate, id est, ipso Cæsareorum benefici-



beneficiorum fastigio, eminentissima. In qua quantum studiis & gloria profectum sit, malo silentio transire, quam laudatione merita quidem sed honorifica id assequi, ut præsentium stupore abreptus plus meo videar affectui tribuisse, quam notitiæ posterorum. quorum incorruptis scilicet iudiciis lubenter meritoque cuncta reservamus. Gymnasii qualis hinc conditio fuerit, commodius opinor dicetur, ubi breviter, quæ de regimine scholastico disciplinaque scitu sunt necessaria, à primis initiis ad hoc tempus deduxero. Primam scholæ formam tres Scholarchæ, ex summis Magistratibus (unum enim ex Prætorio nobilium ordine, alterum ex Consularibus, tertium ex XII viris, aut XV viris summebat Senatus) auctoritate ac imperio curabant. ne quid ædificia, reditus, disciplina detrimenti caperent, ut magistri Professoresque conducerentur idonei, tum alia quædam sub ipso dignitatis titulo intelligenda, ad hos pertinebant. nisi quod in legibus ferendis, & si quæ similia incidebant, senatus universi nomen præscribebatur. Propior erat Re-  
 ctoris cura: qui tum collegarum omnium consilium in gravi-  
 ori deliberatione sibi adjungebat; tum tres Visitatores, ut vocabant, quorum duo ex Professoribus, tertius ex Pa-  
 storum ordine allekti id munus curabant. id est, erant faciendorum factorumque inspectores, examinumque, tam publice in classibus; quàm privatim, quotiens nomen & sacramentum recens advekti scholæ darent, arbitri. Con-  
 stituta postmodum, sicut diximus, Maximiliani munere Academia, in Scholarcharum instituto nihil mutatum, nisi quod duo iis in conciliis Assessores tanquam consilarii dati: perpetuis & majoribus unus ex Magistratibus, alter ex sena-  
 toribus, migratura utrobique ad alios singulis bienniis dignitate: tum Prætorius Scholarcha, in posterum, Cancel-  
 larius, id est, privilegiorum nomine Cæsareo interpres & dispensator esse iussus. Cæterum Academico corpori non Professores tantum publici, sed classici quoque Præceptores aggregati. Quorum nemo publicis conciliis, quæ Rector auctoritate Scholarcharum menstrea, aut si quid præsen-  
 tioris

tioris consultationis incidisset, crebriora convocabat, excludebatur. Sed & cætera tam indivulso nexu curiarum scholas cum Academia copulabant, ut separatim de iis vix ulla suscipi narratio possit. Rectorem primo Sturmium, qui ab initio statim scholæ suæ moderator datus, in Academica quoque celebritate retinere, is præesset scholis, quamdiu Senatui videretur: cujus arbitrio relictum erat, cui, & quanti temporis auctoritas post Sturmii obitum mandaretur. Hic cum annos quindecim Academiam, in universum annos XLIII. Scholam, Rectorio nomine gubernasset, successus in ejus locum Melchior Junius est, quo & ipso continua functione per annos duodecim uso, deinceps annui Rectores usque ad novæ tempora Academiæ sequuntur. Erat autem Rector legum custos, arbiter publicarum exercitationum, totiusque scholasticæ rei præsentaneus auctor: laborum adjutores habebat Decanum & tres denuo (ut ab initio scholæ) Visitatores, qui tum singulis diebus seorsum, tum initio hebdomadis simul, curias omnes, statis quoque temporibus vernaculas civitatis scholas, sedula inspectione obibant. Præter hos scholarum inspectores, totidem collegiorum Ephori; duo quidem ex Professoribus, tertius ex Theologis Urbicis constituti. Erant enim veluti seminaria scholarum, tria Collegia, & alumnorum certis legibus viventium conciliabula. Prædicatorum vocabulo unum innotuit, cum ipso scholæ exortu his usibus destinatum: tum Marcianorum stipendia: denique Wilhelmicum contubernium, cujus auctor anno M D XLII. idem, qui plurimarum in hac urbe rerum bonarum, *Casparus Hedio* fuit. Ejus opibus, etiam per uxorem, etiam per generos, deinceps salubris sustentatio invaluit. Huic juvenuti, curæ ejus, quam dixi, inspectionis consecrata, eodem ritu in hunc diem servatur. In conferendis honoribus Cæsareis multa severitate res acta. Invitabantur edicto Decani, si qui Magistri titulum desiderarent. Professores nomina, examen subibant: cui moderando cum Rectore, Decano, Inspectoribus, duo præsertim solenni iuratoque nomi-

ne Examinatores destinati, Sed & affixa rursus publica denuntiatio, candidatorum nomina communi notitiæ censuræque exponerentur: si qua labe in vita cuiusque ac moribus Academicos Patres fessellisset, ut indicio bonorum virorum monerentur: ceterique nec studia sine moribus, nec mores sine studiis ornari debere, intelligerent. Dignum hoc fuit, quod meditationibus sæculi in ipso transcurso ad ultimam scholæ formulam, obijceretur. Imposita est illa, anno quem antea parentem absolutæ, quam nunc obtinemus, omnis dignitatis memoravi, si retro putetur, ab hinc septimo & decimo. Hic cœpit Gymnasium ab Academia & ejus jure separari, nisi quod filia Academiæ mansit, quæ antea consors fuerat. nam Rector, cujus nunc semestre imperium est, cum Decanis quatuor Facultatum, consilii sanctioris collegis, stipulationem obedientiæ à Præceptoribus accipit, curiarum disciplinam invisit, jubet, monet; cum opus est, deliberat. Ceteroquin Gymnasiarcham propior inspectio postulavit, primumque anno vigesimo quinto Brülövium, Poëseos Professore honorarium, accepit, is hortator operum & socius, legum exactor & interpret, tum per se, tum collegarum auxilio utilitates classium tractat: difficiliora, aut majoris momenti ad Rectorem Academiæ devolvit, providerque omni studio, ut tales efficiat discipulos, qui auditorii publici lucem & mereantur profectu, & exornent studio. Verum inter has provisiones & constitutas optime rationes, passum tamen est Gymnasium nescio quid occultæ tabis, extenuari solidiorem doctrinæ speciem, disciplinæ nervum remitti ac dissolvi, non vanæ jam querelæ sæpe occinebant. Nec præterit ea res vigilantiam Illustris Nostri Senatus: qui, quantum dedecoris imminutio extructæ à majoribus gloriæ haberet; quantum item præsidii in conservata publici boni officina esset, & semper judicaverat optime, & tum crebro testabatur. Igitur ejus auctoritate decretoque ante hoc quadriennium, de oblivione antiqui moris, in pristinam efficaciam, consilio & opera Clarissimorum virorum, *Derschei ac Dannhaueri*, ex-

citata omnis institutio classica atque instaurata est. quæ res eo pertinebat, non ut tollerentur Sturmiæ rationes, sed ut earum vel prudentia tanquam repetita declaratione exhauriretur, vel utilitas, cui non æque sunt pares mutati cum ævo animi, genio temporis quadam facilitate attemperaretur. Neque mutatio videri debet, numerus curiarum è denario in septenarium contractus. Hunc enim Sturmiano quoque iudicio, rem temporis ac frequentię nemo ignorat: & moles nostræ paucitati esse cøperat, quod superiorum ætatum celebritati vix sufficiebat. Jam illud salutaris haud dubie consilii, unum aliquem esse, qui per quatuor superiores curias ambulatoria docendi ratione, Latina, unum, qui Græca tradat: & ad hoc exemplum, unum Poëtam, Logicum, & Rhetorem. Nunquam deerunt tamen forsan, ò collegæ, quibus maceremur, novi labores, nova continendæ vagantis filiolæ consilia. Cujus rei culpam, qui in schola tantum quærit, iniquiore quam decet, sententia utitur. Quid enim? ego tibi in media civitatis disciplina, in animis parentum, in votis & consuetudine sæculi ea ostendam, absque quibus esset, facili negotio obtineremus, quod in Sisyphia hac obstaculi toties exantlati revolutione nunquam assequemur. Quod si enim cum animis nunc singula reputemus nostris, auditores, & imaginem quandam futuri temporis præcipiamus, poterimusne voti, quod unice nobis cordi est, fiduciam assumere, poterimusne sperare, futurum, ut expleto feliciter huic scholastico sæculo, sæculum accedat alterum, aut posteritas serior: ut gloria sequens priorem vincat: ut cum annis incrementa certent? Hic ego neque quicquam ominabor tristius, neque audacius iudicabo. Vos ex eo, quod ad cogitandum proposuero, quicquid libuerit prævidete. Brevissima studiorum fors est: & inter caduca omnia creberrime scholarum fata mutantur. quarum nunquam felicitas est suspensior, quam ubi ad summum ascendere. Recedit à perfectione, quod non procedit ad fastigium. Est quippe omnis ea res in perpetuo assiduoque motu: nescit stare, ubi

ubi de gloria contendit ; nescit manere, ubi gloriam obtinuit. Minimo distant eruditissima tempora, & ignavissima studia. tam velox ab istis ad hæc lapsus est : quæ jam diuturniora sunt. *Subit quippe, quod exemplo suorum temporum observavit vir prudentissimus, etiam ipsius inertia dulcedo : & invisa primo desidia postremo amatur.* Doctissimos se mortalium Græci ferebant. Sed quæ nobis jactitant summorum virorum ingenia, quam plerumque in brevissimas ætates arctantur ? quas rursus tenebræ excipiunt, aut similia tenebris contortæ futilisque sapientiæ caligo. Romanos quoque instar fulguris magno festinoque lumine felicissima illustrare studia : hinc mutatio, inde mutationis ex varia novitate libido, ad postremum præceps corruptio sequitur. Germania nostra, uno paulo amplius sæculo, profundam barbariem multa eruditionis copia mutavit, ite per vestra quisque studia, mirabimini celeres celebresque auctus & certantia antiquis decoribus fastigia. Sed fallor an fastidit sua incrementa : quodque vehementer aliis sibi que approbaverat, dedignatur. Atque istud Deus averruncet omen ! Est enim, auditores, est profecto omen, nescio cujus rei inominatæ, novitatis assiduæ studium ; quod cum meliora sibi proponit, ubi optima provenire, degenerem primo sobolem, postremo abortum parit. *Inesse cunctis rebus quendam veluti orbem, quo volutentur omnia & florere desinant aut incipiât, vere Historicus sed obscure dixit.* *O* *bis* enim iste hominum vanitas est & inconstantia : quæ res incredibili cupidine paratas, negligentissimo projicit fastidio : votorumq; suorum sicut modum non habet, ita non sentit fructum. Jam quid de abusu dicam rei sanctissimæ ? An Deo credimus hoc futurum connivente, ut sapientiæ studia, in humanæ instrumenta libidinis vertantur ? talia videlicet sunt, quæ non advertentes populos efficacissime percellunt. Ac nostra quidem Academia floret artibus virisque egregie : at si cogitemus, quæ succrescat ætas, multa opinor erunt, quæ paucos nobis Pappos, Marbachios, Wegelinos, Taufferos, Tupprios, Obrechtsos, Giphanhos, Meieros, Birschios, Loca-

maiores; Junios, Hauenreutteros (nam viventium exempla in obvia cogitatione posita sunt) promittant. Aliter illi ad laudem nitentur; aliter nituntur nostri, sive potius non nituntur. Quæ olim in primis collocabantur, hodie vix habentur in postremis. Denique nescio quis *NOVA ERUDITIONIS* genius plerosque ceu contagio invalit. nihil admodum scire; plurima admodum jactare; difficultatem à literis, laborem à studiis, id est, perfectionem à sapientia, incunstanter & bona fide seponere. quæque alia intelligi rectius quam audiri hodie debent. hæc quis à scholis nostris prohibebit? Gymnasium certe, cujus ex factis potissimas sperandi timendive causas haurimus, post summam superioris ævi gloriam, videtur nunc, quod bellatores nonnulli post egregios triumphos solent, quæsitam potius laude frui, quam de quærenda cogitare. Qui morbus ubi invaluit, nolo dicere, quæ pericula sequantur, præsertim ubi domesticam imbelliam, foris contemptus excipit aut paupertas: quibus, nulla tam strenua sunt studia, quæ non possint dissipari. Verum hos metus mortales ex iis, quæ vident aut videntur, conscientia memoriam temporum excitante, commentantur. Nobis potius convenerit, pio fortique animo ad eum converti, cujus nutu scholæ scholarumque fata dispensantur: cujus vel benignitate sæculis artes donantur, rebus publicis artium emolumenta; vel indignatione tempora tenebris, gentes inscitie relinquuntur. Ille minitanti dirum in modum omina, innoxia reddere; ille ingruentem ad hostes sui nostrique nominis barbariem relegare; ille sæculorum exemplis potest amplificare, quam unius sæculi experimento nostræ pietati commendavit munificentiam. Cujus hætenus nec historiam (id enim operis justum non orationis fuisset) nec laudes, quæ ingenium & facundiam longe requirunt majorem, descripsi: Sed ipsos rerum apices rudibus lineis signavi, omnibus præsertim iis segregatis, quæ aliorum collectione & opera, ipsiusque Sturmii monumentis notuere. Eloquentiæ nec locus hic fuit, nec ut esset volui. si quibus tamen potius specio-

speciosos scholarum fructus, & doctrinarum miracula, quam scholasticos docentium labores placet audire: illos intelligere velim, quam non optime hac venerint instructi. Simplicitatis hic dies & bonæ mentis est, non pompæ. Debetur hæc scholæ reverentia, ut splendoris obliviscatur, quicunque ad ejus arcana admittitur. Legistis non unum ex Romanis, imperio flagrantissime gavisum, imperii speciem in Sapientum auditoriis dissimulasse. Et fallor, an Generosissimi, quos coram cernitis, Comites, an viri eminentia, auctoritate, scientia, præcipui, tantisper desierunt (quatenus quidem per naturæ indolisque radios licet) prælustres, clari, sublimes, magni esse; dum festivitati nostræ, suæ modestiæ decora & fulgorem mutuarentur. Agnoscimus, inquam, eam comitatem, tum in ceteris; tum in gravissimis viris, quos schola & semper suorum commodorum patronos habuit, & hodie, suæ celebritatis nacta est præsides. Ad vos enim, Amplissimi Scholarchæ, nostræ nunc reverenter accedit oratio: quorum auspiciis sic studia nostra vivere cernimus ac vigere, ut propriam vobis laudem, perpetuam esse ac immortalem, & cupiamus & precemur. Illustria plane sunt vestra merita: admirabilis meritum constantia & multitudo. Quam si ab ingentis animi consiliique viris, qui ante Vos id muneris gesserunt, repetamus, neque dies hic ad enarrandum, neque vox ulla ad commendandum sufficiet. Quanquam quid excogitari possit, quin omni artis ornatu sit ornatus, omni orationis splendore per se splendidius, nomen inter gaudia hujus festi præcipua numerandum *Jacobi illius Sturmii*? Felices vos, ingentes animæ, *Nicolae Cnibsi, & Jacobæ Meiere*! qui cum *Argentinae* vestræ, viris illustribus tum maxime florentis, singularia essetis lumina, ille felicitati cumulus accessit, quod in utilitatis incomparabilis negotio, cum incomparabili collega sociati, Reipublicæ, famam; virtutum studio, præsidia; posteris tum alia, tum hæc ipsa, quæ recognituri adsumus bona, primi fœnerati estis. Existimat vis in principe gentium Republica princeps, unum studio-

rum genus instaurasse, laudem habere omnibus triumphis, omnibus anteponendam trophæis. Ergo quantum vobis debeatur, per quos literæ patriam universæ ac spiritum recepere, omnis meditari deinceps memoria, omnis exprimere ætas, diligenter quidem, sed fortasse non nisi conabitur. Summa hæc felicitas, ut ceteras ceterorum glorias anteceffit, sic peperit, tam maturo proventu, ut proxima pertineat ad proximos. nisi quod *Petrus Sturmus* Jacobi fratris successor, post decennium expletæ dignitatis fato præventus, non aspexit nobile Academici augmenti munus: quod in *Henricum Mulhenium*, simul cum primo, ut vocant, Cancellariatu; *Carolus Miegium*, *Fridericum Gotesbenium*, triginta annorum universim Scholarcham atque sex Prætorum collegam, incidit. Hos sequuntur *Wolfgangus Sigismundus Würmserus*, *Arbogastus Rechbergerus*, *Johannes Philippus Kettenheimius*, *Johannes Philippus Bæclinus*, *Johannes Simon Brumbachius*, Prætores & Cancellarii. Ex Consulibus *Joannes Carolus Lorcherus*, *Abrahamus Heldius*, *Jacobus Kipsius*, *Henricus Baumgartnerus*, tum quindecimviri; *Nicolaus Hugo Cnibsius*, *Josias Rihelius*, memoratus modo Consulis nomine, ad quod postea ascendit *Baumgartnerus*, & *Christophorus Kollæfeli* postea tredecimvir. Quibus vario meritum genere nobilitatis, tertia celebritas scholastica, acceptis ab Imperatore summis privilegiis, claravit tempora *Adami Zornii*, *Petri Storckii*, & cui novum, mox ad famam momentum gratulabimur, *Francisci Rudolphi Ingoldi*. Nam post surrogatos ex eo tempore Prætores, *Bernhardum Kagenecium*, *Jacobum Sturmi*, *Joannem Carolum Prechterum*, nunc te, *Joannes Christophore Draxdorffere*; post *Joannem Hellerum* & *Johannem Petrum Storckium* Consules, te, *Joannes Jacobe Meiere*; te *Ingolde*, qui totum illud spatium meritum copia occupas, augusta hæc sæcularis circuli solennitas, cui gravitate maxima præsidetis, prioribus vel anteposuit singulis, vel universis æquavit. Et fortunam quidem omnes agnoscunt, omnes gratulantur. Verum habet hoc magnorum meritum contemplatio, ut expectatione majorum imbuat animos,



mos, neque quisquam imparatus ad plura credatur, qui plurima jam potuit contulisse. Quid existimatis, Domini, cœtum hunc jucundissimum, vestræ venerationis, amoris, admirationis, solenniter, ut ita dicam, impletum, cogitationis volvere, imo quid spei, cum in vestros vultus, sanctitate festi sui augustiores, avidissimo oculorum conjectu intuetur; cum vos vivere, vos lætari, vos bene rem gerere, egregio animorum ardore (tales enim aut attulisse aut accepisse pietatis interest) precatur? scilicet irur per majorum imagines, variaque comparationis industria, alii *Sturmios*, *Bælinos*, *Brumbachios*, tuis Nobilissime *Draxdorffere* exemplis instaurare: alii amplissimum consulem *Meierum*, tum primi illius Scholarchæ cognominis, tum *Cnibsi*, *Miegi*, *Storckii*, *Hellers* comparatione cupiunt attollere. nonnulli octodecim *Ingoldi* annos ad octoginta amplius superiorum speciem examinant, ultraque progressi *Henricum Ingoldum* consulem, summum literarum ante literas penitus in hanc urbem receptas Patronum, voluntatis laudatissimæ, cui materiam non satis tempora præbebant, complementum in familia adeptum pro fatali & vere sæculari bono interpretantur. Denique cum in hoc ipso auditorii ornatu, omnium, quos venerati antea sumus Patronorum, insignia ostendente fenestra noscantur: nemo est, quin sic picturam sibi intuendam credat, ut totius simul sæculi merita complexus, eadem audeat in vos expectatione, voto, iudicio transferre. utque maximi hodie debitores ipsi fatis, illud efficit, quod munificus vester ordo omnes nos jam pridem habet habebitque debitores. Qui cum tantorum honorem beneficiorum illustrare satis nostra pietate non possumus, neque nobis tamen neque adeo vobis inglorium fore existimamus, si nova petitione gnaviter pro Republica rursus contendamus: ut constantia præclarissimæ voluntatis vestræ, futura quoque tempora doceatis, qua cura literarum studia sint erigenda, qua liberalitate sustentanda, quo favore vegetanda. Res est tenerrimæ conservationis schola: hanc ne barbari contemnant, avari destruant, su-

d d

perbi

perbi conculcent, vestrae cautionis esse Deus immortalis voluit. Res est verecundissimi floris & profectus schola: hanc ne paupertas intercipiat, labefactet invidia, calamitas opprimat, in vestra manu est. Res est benevolentissimae curationis schola: extinguit nobilissima ingenia, qui negligit, & habet profecto nostra aetas viros, quorum in omni studiorum genere scientia & laboribus (ut hoc obiter praefiscini dicam) possint ex Argentorato plusquam Athenae, plusquam Roma fieri. Verum magni conatus magnis indigent fautoribus, nec Virgilium prius Roma quam Augustum tulit, nec sine Mæcenate Horatium. Res est, Domini, negotiosae industriae Schola: sed negotiorum instrumenta non magis ex se habet, quam miles arma, sclopos, gladios; cui toties ista damus, quoties fortibus factis opus habemus. Quo magis praedicanda est, communis instrumenti Bibliothecae Academicæ instructio: quam à *Jacobo Sturmio* inchoatam atque ultima quasi voluntate, hereditariae laudis causa ad successorum curas propagatam, tum alias alio, tum nuper Mathematico locupletari paratu vidimus. Nimirum quod à majoribus acceperatis, id successoribus jam dedistis exemplum: quos ut seros habeatis, id est pluribus interim exemplis instruendos, communia nobiscum desideria à supremo numine impetrabunt. Ecquid enim virtutis vestrae terminos anguste metiamur, Domini? Quam si omnia nobis praeccludant, humanitas explicabit. Illa facit, ut agere inter nos hodie simplicissime, ut nos tanquam patribus loqui, vos tanquam filios audire, nihil mutuo dubitemus. Illa facit, ut in societatem alloquii, totam huc Gymnasii vestri pubem advocem, succinctusque impetrabili grege ipsa vestri penetralia affectus scruter: sitisne pares nostro amorì, sitisne satis ad aliquid negandum fortes. Meministis, viri gravissimi, cum in primaria nuper aede Deo Conservatori conservata per saeculum schola veluri sisteretur, cum Israël super effosso sapientiae fonte choros duceret, grates cantitaret; cum Chrysostomus noster laudibus, precibus, ardore, votis, omnia incenderet, multos etum-

erumpentibus lacrymis victos fletum non tenuisse. Et erant sane multa, quæ instigato exuberantique hoc repagulum affectui laxabant; sed super cetera efficax teneræ juventutis aspectus, spem civitatis, spei pericula, periculorum passim in Germaniæ cladibus obvia exempla, vices rerum temporumque, multa ex præteritis, multa de futuris, intento in diversa horrore repræsentabat. Idem nunc ferme patior, Domini, & quorum vobis nomine gratias agere, quorum voce Gymnasium ejusque sustentationem, estimationem, Præceptores commendare, pro quibus fausta omina & bonas preces jactare debebam, eorum me cura aspectuque ita debilitari sentio, ut bonitati vestræ cogitandum relinquere opus habeam, quod mea voce exponendum hoc tempore videbatur. Discet eo exemplo tener & literarius iste populus, religiosum esse quicquid vestris auribus publico nomine allegatur: cumque primas hic reverentia obtineat, proximas obsequio partes, sermoni postremas, sæpe & nullas convenire. Quem & schola maluisset alicubi universa alio transferre: atque, nisi fas non est, eosdem interpretes mentis adsciscere, qui ingenio & studiis contigere fautores; jam nunc enixissime, Domini, rogamus, ut Amplissimus Reipublicæ ordo, ut collegæ vestri, Patriæ Patres, per vos resciscant; Gymnasio suo, & Academiæ inter has sæcularis pietatis curas, & divini numinis honores, & Mæcenatum laudes, quas in solidum ipsis religio festi consecratum iverit, animos vehementer crevisse, studiumque illustrandæ Reipublicæ recentissima denuo alacritate auctum, promittere quoddam veluti scænus piæ literatæque juventutis, promptioresque subinde publicarum utilitatum ministros, cum perenni augustæ urbis gloria, cui tot exteros hac ratione vestigales heri, inter ea utique ponendum, quibus gentium, salutaris humanitati, quam quæstuosæ barbariei deditarum, sueverit semper felicitas consummari. Porro nusquam munificentiam rectius collocari aut felicius, neque certius florentis Reipublicæ signum, quam institutas pulcre artes, erogata animose stipendia,

divisa benigne salaria. quorum tenuitatem duas res literis liberalibus & humano orbi noxiosissimas alibi semper protulisse : negligentiam Professorum, & quæ horum auctoritate niti debebat, scholasticæ destructionem disciplinæ; dum aliis destituti præsidii, juvenibus convictoribus, non mensam tantum, liberali justissimeque fructuosa humanitate, sed & mensæ vitæque Liberalia per invitissimam indulgentiam quodammodo coguntur gratificari. Dictum est in gravissimo orbis terræ consilio, in regnatrice gentium curia, nec dictum modo, sed approbatum: *bonas artes nemini gratuito contingere; omitti curas familiares, ut quis se alienis negotiis intendat, nihil à quoquam expeti, nisi cujus fructus ante præviderit.* Sublatis studiorum pretiis, etiam studia peritura. Hæc & talia quemadmodum beneficam per se tot jam ætatibus, tot experimentis Procerum nostrorum indolem monere non possunt: ita testimonii causa & venerationis, ejusmodi elogiis non fraudandus esse splendidissimus ordo videtur: cui volenti scilicet erit, per sui agnitionem meriti audire; hæc esse illa monumenta, illa gloriarum templa, illa æternitatis, & salutis publicæ verissima pignora, quibus patriæ fama cælum pridem ascenderit: sic priores consules egisse; Prætores sic egisse, priorem senatum sic egisse. qui Rempubl. amant ita sentire: qui patriam amant, ita agere. Et quandoquidem triumphatus vester ad sustinendam exempli magnificentiam delectus est, Felices vos judicio senatus. Felicem scholam vestro imperio: quod vobis senatus detulit fortiter agite: quod vobis senatus detulit, libenter accipite, sic vos Deus amet; sic vos Deus sospitet: sic vos Deus servet. nam hoc ex veteris ævi affectibus & affectuum formulis, ad quas ipso pietatis calore fumus delati, optimum nostroque instituto convenientissimum acclamationis genus invenimus, ut vestræ salutis pactione nostrorum summam votorum complectamur. Efficacis ea ratio compendii, quod verborum contractione nemo ambigat pietatis amplificationem spectare, utinam & in cetera nobis decenter contingat: quæ cum orationis mereantur, temporis non inveniunt

niunt partem. Compellendus nobis cum cura esses ac honore, Vir Magnifice, *Melchior Sebizi*, Rector Academiæ, Gymnasii Patrone: nam quis strictim memorare potest, quod meritis inter eos qui diutissime; ingenio inter eos qui maxime; felicitate inter eos qui celeberrime, & antea scholæ vel profuisti vel præfuisse, & jam quartum summæ dignitatis compos, auspiciis sæcularibus gaudiis primus facis, exemplique hætenus non usurpati edicto, scholæ ac tui memoriam gratulaturæ posteritati consecras. Quæ res adeo visa antiquitus est honorifica, ut cum sæculares Romanorum ludos annorum terminus ad seniores differret carimonias, nonnullorum ambitio Principum suæ ætati anticipatam prærogativam vindicaret. Et erant illi quidem quod dicebantur, ludi, & superstitiosæ mentis ludibria. quorum summa in votis pro populo plerumque latrone, id est, pro ceterarum exitio gentium suscepti. Vestro honori (nam ad vos quoque, qui Rectori assidetis, spectabiles Decani, istius decoris sors pertinet) vera & magna æternoque acceptissima numini pietas innititur. Scilicet decebat Viros omnibus honoribus & oneribus scholasticæ salutis sanctos sapientiæque omnigenæ pridem antesignanos, illustrissimo, quod quidem studiis Argentoratensibus illuxit, tempori præesse. cujus notationem, non moris tantum recepti causa, sed ad ornamentum insuper, ut Rectore quem dixi, ita Decanis, *Schmidio, Tabore, Salzmanno, Elpichio*, insigniendam fuisse, nobiscum prudentissimus quisque posterorum judicabunt. Neque tamen nulla exabit ceterorum cum bonis gratibus memoria, quos eruditio antistites, literæ auctores vel nunc habent, vel olim habuere: quorum pars Gymnasii laboribus immorati, pars ex eo translati ad Academiam, pars in ipsa Academia auctoritate consilioque juventutem spei patriæ præpararunt, aut etiamnum expectationem orbis Germani, sic in Argentinam, quasi in residuam litterarum arcem, & invictum adversus Martis barbariem castellum intentu, laudabiliter sustinent. Hos, inquam, omnes & singulos, quatenus nunc

nominare non licuit, perpetuo posterorum favori, novo non Minervæ sed æternitatis peplo insertos dicabimus. Intereane quid, Humanissimi viri, Gymnasii moderatores, juvenus vestra detrimenti capiat, etiam atque etiam providere. Hac vos potestate DEUS immortalis, hac nostri Scholarchæ tum alias instruxere, tum ambiguo studiorum tempore, & creperis ævi tam consternati rebus ultro armatos cupiunt. nihil vos favor cujusquam, nihil invidia moveat. ego didici experiendo, cui in fungendo officio, religio pro muro, conscientia sit pro telo, adversus eum hoc posse malignitatem, quod adversus ignem stipulæ, aut nebula adversus solem potest: quæ hoc pretio se lumini obtendit, ut dissipetur; hoc successu obstitit, ut consumatur. Concordia modo adsit, quæ molestias domat, quæ consilia communicat, quæ propulsat invidiam. Gravis est, quem toleratis labor, ac prope dixerim immensus: quem si rhetoribus describendum daremus, Augiæ stabulum, & Labyrinthi, & prisca miracula, mora nulla esset, quin renascerentur. Certe cum nec æstimare profanus, nec credere indoctus, nec ferre delicatus, nec perspicere doctorum quilibet potest. adeo in umbra sua & pulvere latet sæpe involutus. Sed est æternum lumen, illud beneficum, illud prælustre, quod clarabit olim, quæ vobis nunc molesta est, caliginem. Veniet illud tempus (confidite modo) veniet illud præmium, quod veram vestram & augustam celebritatem, non per perituræ titulos æternitatis, non per consecrationis affectatæ radios, quibus sibi eruditi, quoties ineptire volunt, placent, sed in vere perenni gloriæ ac numinis sinu, splendori temporario exprobrabit. Atque hoc est illud fortitudinis & magni incitamentum animi, quo sustineri grande & horribile malum, contemptus ac fastidii potest, quo communiter despiciamus, qui scholæ, id est, optimo publico vitam operamque impendimus. Quod si ea aliquando mentibus humanis mansuetudo rediret, ut ii tantum, qui Gymnasio nostro aut Academia, cum fructu usi sunt, favore tralatitio & societati omnium quæ vivere gen-

gentium recepto, ad sua primordia respicerent, nihil statu nostro esset honoratius, nihil felicius. In Curia Patrum & ministrorum plerosque; in Ecclesia, Theologos omnes; in civibus ceteris honestissimum quemque scholastici repetitio commentarii inter nostros numeraret. Sed DEO quidem Ter Opt. Max. sui muneris, nostræ Reipublicæ, sui quod accepit depositi existimatio curæ erit. illud interim pro oraculo ausim agnoscere; inter plurima quæ barbariæ populis minantur, superbam illam & insultantem contemtionem bonarum artium, præcipui ad hunc casum roboris fore. Præsertim cum & monstra id portendant. quid enim aliud esse dicam, quod plurimi scholarum subsidio aut pennæ, unice provecti, nil nisi pennatas contumelias; & scholarum splendore ac titulis elati, nil nisi humilitatem ac sordes scholæ loquuntur: cui naribus semper aduncis & interdum unguibus illudere inter artes habent? quos si suo vicissim irrifu schola dignaretur, si theatralia eorum ora, & histrionalem ante omnia animum orbi ostenderet, cercopitheci publice fierent, qui nunc ambulant pro Catonibus. Scilicet verissimum est, egregias artes bonis mentibus ad omnem laudem virtutemque duces esse: inanes autem ac stolidos animos, cum in eos aliqua litterarum species incidit, inaniore etiam reddi stolidioresque. Quæ cum dico, non id specto sane, quasi voce ulla tam fausto præsertim die prosequenda sint inauspicata ista prodigia, sed ut adolescentes nostri ac discipuli mature intelligant, quanto sibi studio annitendum sit, ne in officina eruditio- nis, ventosas persuasiones; in sede scientiarum, copiam vanitatis; in disciplina modestiæ ac humanitatis, inhumani- num fastum; pro meris denique rebus mera somnia, cum injuria civitatis publica, cum suo privatim dedecore, mortalium ut ineptissimi, sic adversus DEUM hominesque ingratiissimi sectentur, optimæque rei abusu, malorum Iliada patriæ consciscant. Id enim venire usu solet; ô carissima cordique nostro proxima pubes, quotiens labor vitatur, quo solo venale est quicquid habet orbis pretiosum: quo-  
tiens

tiens disciplina exuitur, sine qua exui deinceps bestia & barbaries nequeunt: quotiens præmatura festinatione vota præcipitantur, quorum cruditas cum fœditate maxima in publicum denique evomitur. Verum non explico vobis delicta vetera, quos ad novas laudes cum exorituro mox feliciter novo sæculo properare, nullus dubito. Est in oculis, in auribus, in mentibus vestris majestas & vox Patriæ: quam veluti præsentem in hoc ipso loco, fidem vestram & industriam & conscientiam & judicaturum omnia numen testari credite, ne spem suam deseratis, ne fallatis expectationem, ne sua tempora negligatis, quibus per varias adversitates fatigatæ sibi aut nullibi, aut in præclarorum virorum humeris, in cordatoris sæculi gremio requiescendum sit. His vos sanctissimis vocibus obtestantem Rempublicam, ut debito revereamini obsequio, nemo adest, quin optet; nemo quin speret. Cum enim illustre hoc auditorium, diversos non una humanitate ac officio hominum ordines acceperit, nec pauciora fortasse judicia; divinitate tamen festi evenire intelligendum est, ut in felicem communi unanimique consensu definamus clausulam: ut per bonas preces & pia vota, Deum immortalem sapientiæ auctorem, scholarum conservatorem, ac Reipublicæ hujus Præsidentem Statoremque, ob accepta pariter beneficia veneremur, atque de speratis imploremus. Cernimus, atque utinam possemus id quod cernimus capere satis aut laudare, munus ingens ac cæleste: Scholam non donatam modo urbi nostræ, sed amplificatam, sed defensam, sed servatam, sed ad sæculum jam alterum multa cum laude, multo cum populorum fructu propagatam. Hic est hortus quem plantavit Dominus: hic est paradisus, quem elegit: hic est flos, quem adornavit: *flos virtutis, flos gloriæ, flos perpetuus ac immortalis*. Nam talem fore pollicetur nobis tam cumulata benignitas tua, Domine. cui in posterum quoque salutem Argentoratensis Reipublicæ, fata studiorum, tutelam scholarum, incrementa artium, labores docentium, juventutis profectus, pietatis & gloriæ tuæ inter nos habi-

tantis



tantis illustrationem, quanta possumus pietate, ardore, gemitu commendamus. Et quoniam in hoc sæcularis summa felicitatis vertitur, fac Æterne DEUS, ut sic novum agitemus sæculum, quo constet omnibus, nos prioris bona agnovisse.



## XI.

## ORATIO

habita

*Kalend. Octobr. Anno cdo Idc XL.*

Cum publice Magistros & Bacca-  
laureos crearet:

*In qua*

*De Typographia, Argentorati inventa, divinitate & satù, Seculari  
pietate differitur.*

**I**Nter vetera, quibus principes politæ antiquitatis Athenienses, Academiæ suæ gloriam quærebant & gravitatem, instituta, illud quoque posterorum cognitione dignum Ælianus judicavit: quod ridere in tam solenni loco, nemini licere voluerunt. Cum enim virtutis, industriæ, bonæ artis mentisque propria & veluti consecrata sedes illa esset, prorsus debuit omni præsertim contumeliæ, lasciviæ, petulantia, denique ignavia, non specimine modo, sed specie intacta, tam augusti nominis deus illibatum conservare. Non decuerit, Auditores, vel nos in ista sapientiæ parte vinci, ab iis, quibus in universum antestamus: vel hoc ipsum Academici honoris domicilium, inferius majestate disciplinæ, cujus veram vim Attica affectatio ignoravit, unquam existimari. Verum,  
cc ut ob-

ut obtineatur veneratio publica, publicis opus est meritis, publico meritorum honore: quo fit, ut nemo contemnere audeat locum, quem à solo splendore, à præcipuo splendoris genere, novit. ubi Virtus & Doctrina, rerum dominæ, suas opes exponunt, sua theatra instruunt, edunt munera, agitant festa, proferunt pomœria. Quid hic irrisor improbus, illusor ineptus, scurra mimicus? quid ignavum pecus, aut petulcum animal? nonne una voce, tanquam profanos, exesse, longèque abfistere dissimilimarum rerum transactionibus, tum cetera loci religio, tum nostri hujus diei cærimonia jubet? Qua producti in medium Novem honestissimarum artium compotes Juvenes & Adolescentes, sub auspicio & numine, non Apollinis alicujus Attici, sed DEI Ter Opt. Max. facultatem præbente Inclyto Academico Magistratu, faventibus & gratulantibus omnibus piis, bonis, doctis (tales enim hospites & spectatores huc venire fas est) in ipso Eruditionis Templo, inter pias preces & festos cantus, præmiis solennibus ornandi, & alteri quidem Baccalaureatus insigni, alteri titulo Magisterii quod vocant, & privilegiis donandi sunt. Veniat huc Anniceris aliquis, vitam in ludicris & risu agere, præclara vero omnia fastidire & ignorare doctus: næ is Platonem suum mox inveniet, aut si operæ pretium nemini cordato videbitur, à tyrunculis utilium studiorum & sapientiæ pullis, cum ineptiis suis ridebitur. Sed nos ordiamur, cum bono DEO, quod suscepimus.

Tuum enim, ante omnia, nomen, Deus ter maxime, Domine noster, non fausti modò omnis loco, festive inclamamus; sed, ut autorem nostræ tum felicitatis, tum festi, reverenter appellamus. Te largitore ac conservatore, Respubl. nostræ bonorum præcipuis hæcenus floret: tibi inter fluctus Civitatum nationumque plus quam decumanos, ancoram & stationem debet hac navis: tibi religionem, templa; prudentiam Curia; artes Schola, & propterea vocem & grates, omnia Auditoria, omnia suggesta & pulpita debent. Ipsa Te hujus diei pompa loquitur; tuam hospitalem nobiscum decantant organa, balbutiunt pueri, ostentant insignia, denique vel cacutientibus allucent cerei. Tui muneris est, quod hic con-

veni-

ve nimus : quod bonas artes prosequemur , colimus , honoramus : quod amplificanda Nominis tui gloria instrumenta consecramus : imò vero quod tibi consecranda adducimus ac pie commendamus. Respice benigniori oculo, Pater Optime, Sex illos Juvenes, tres illos Adolefcentes, ut artes, quas didicere; honores, quos petiere, tibi devoteant in solidum dedicentque : ut his tanquam stimulis instigati, ad plura, ad majora tendant : ut obsequio hoc devincti, ad ea strenue proficiant, quò consilium tuum destinavit, & mox providentia viam præbit : ut mysteriis hujusce initiati, tua voluntatis placita, tui nominis laudes, in omni vita actu, in omni functionis opere, investigent, meditentur, intelligant, sequantur : ut pro Reipublica Argentoratensis, & Schola incolumitate pia quotidie vota nuncupent, atque ita sic diei hujus & pramiorum semper meminerint, prout eos decet, qui ad novissimi & magni diei gratuita, eademque aeterna pramia sedulo adspirant. Exaudi vocem nostram Domine : illumina faciem tuam super nos & benedic nobis, Amen!

### Post interpositos concentus Musicos.

Preces & religionem, qua hoc festum inchoandum fuit, pietati dedimus, Auditores : dissertationem quæ preces sequitur, honorum distributionem antecedit, mori Academicum dabimus & solennitati. Nec erat sane quærenda nobis ex abdito materies : ipsa hujus Anni veneratio, qui duo admodum sæcula complet, ex quo humano generi exoptatissimum, literato orbi utilissimum, Argentorato autem nostro perpetua celebritate gloriosum, *Typographia inventum*, auspiciis divinis, exordio hinc sumto gentes usquequaque politas peragravit ac devinxit, jucundæ auscultationis, debitaque in DEUM pietatis potuit nos admonere. Præsertim cum publica Magnifici Rectoris ac Senatus Academici, aliquid tale mihi demandantium auctoritas accederet : non sine magna ratione pro se & posteritate sollicita, si vel patriæ laudis curam negligenter ageret, vel ignorare venturas ætates pateretur, quam confidenter alii nostram laudem hætenus sibi vendicarint; reddita Auditoribus rei præclarissimæ ea gratia, ut & nomen eorum &

artem suppressum, quantum in ipsis erat, ac obliteratum irent. Scilicet in omni re humana dominatur ambitio: neque negotia modo, dum geruntur, perturbat, sed gestorum plerumque veritatem corrumpit aut obscurat. Eo facilius id sane, atque ut multis videtur, excusatus; quod speciosiora conatibus suis vocabula sive callide imponit, sive liberaliter circumponit. Ipsi veritatis vindiciæ, & nescio quæ jura intenduntur, ut aliena interim quisque deprædatur clanculum, ac pro suis ementiatur. frustra deprehenderis eam artem: quæ dum semper metuit deprehendi, id in primis cavet, ne deprehensa etiam, erubescendum habeat. Amore & studio patriæ nihil esse honestius; nihil ad periclitandas ingenii vires illecebrosius; nihil ad figurarum commentique veniam impetrabilius. Ita cœpit hoc malum antiquitus: & à tam plausibili initio ad æmulationes, inde ad certamina præcellentiae inter gentes; hinc ad contemptus mutuos & superbiam; denique ad odia profectum est: quæ nunc unusquisque intendit aut remittit, prout famæ utilitatisve spe concitatur, aut diversæ fortis metu sufflaminatur. Quo fit, ut rem simplici æstimatione in vanitatibus vulgi ponendam, inter doctorum magnorumque virorum vel arcanas artes, vel festivos lusus hodie reperiatis. Nisi quod haud dubie gravius meretur appellari, cum neque probris, neque convitiis abstinere, & injuriam, quam aliis factum it, cum apparatu, paratragediantium ritu, in publico ostentat. Interesse famæ gentium aliquot ac civitatum, nihil tale, in re typographica, quam vocamus, evenisse. Hanc dum multi ambiunt proci, fit, ut nescio quo amoris stimulo instincti, neque sibi, neque alii, neque adeo amicæ ipsi, quæ per isthæc jurgia non parva interim contumelia afficitur, parcendum ducant. Nobilissimæ Harlemensium Urbi non invidemus suam gloriam, sed gratulamur: auctiorem tamen existimamus fore, si de aliena nihil decerpit, aut decerpentem privata opinione ausuque popularem suum, publicæ existimationis periculo propugnet. Moguntia facilius ignoveris: decepit eam rumor vulga-

vulgaris famæ, ut in talibus solet: quo incertior, eo confidentior. Accessit doctorum id affirmantium numerus, junctæque umbone phalanges. Sed revera, numerus. Consideret quæso splendidissima civitas, ad quantam paucitatem, si vim & arma singulorum spectes, grande illud agmen tot nominum redigatur. Quis enim eruditorum ignorare potest, veluti traditam in manus alterum ab altero istam opinionem accepisse? plane sicut & alias consuevit fieri, ubi rem dubiæ arduæque investigationis, malunt plerique aliena quam sua fide asseverare, præsertim cum obiter & ex occasione hæc talia alterius argumenti tractationibus inferuntur, neque tractantur. Igitur sæpissime quidem proditum aliquid hujus generis invenias, demonstratum nusquam. Nimirum aliis voluntas probandi, ut alieno loco; aliis tempus laboriose conquirendi probationes desuit: quosdam argumentorum inopia aut desperatio ad alia præverti jussit. Equidem satis de nonnullorum ingenio constat, qui vel cum certo intempestivæ & affectatæ digressionis periculo, suis scriptis insulsiissent, si quid super re tanta odorari testimoniorum potuissent. Traxit postea error errorem, qui, cum temporis progressu radices in animis hominum egit, ac incrementa sumsit, jure præscriptionis non tutus modo sibi, sed invictus videtur. Verum enim vero, nobis in præsentia non tam quid alii de alienis vel sentiant, vel dissentiant; quam quid nos de nostris sentiendum hoc tempore habeamus, curæ est. Qua in re omni exceptione major est, ut alia quæ supersunt, cuncta desint, annalium publicorum fides. Hi JOHANNEM MENTELIUM, civem Argentoratensem, artem imprimendarum suscipi charactere litterarum librorumque, primum in Patria excogitasse atque protulisse memorant: Hi Annum Saculi Christiani quattidecimi quadagesimum definiunt, annique solennem notitiam Consulatu Nicolai Schanlitii, Pratura Spiegelii, Müllenhemii, Treubelii, Endigeri insigniunt; hi perfidiam famuli Gensfleischii, & herilis arcani enumerationem, & sociata cum Gutembergio plagii consilia, & fugitivo immisissam ultore Deo cecitatem, diserte & bona fide denarrant.

Ex his adeo habemus Auctorem inventi nobilissimi; habemus tempus & locum; habemus primam & furtivam demigrationem artis; qua effectum est, ut statim circa iniuria Moguntinorum Civitas & nomen, operis typographicis inclaresceret: habemus hæc & plura, inquam, non ex vago & veteri rumore, non ex ambitiosi scriptoris ingenio & lusu; non ex fallacibus aut ambiguis inscriptionibus; Sed ex ipsis Reipublicæ nostræ commentariis & instrumentis: quorum nec auctoritas detractari à modesto homine, nec simplicitas suspectari à bono, nec perspicuitas declinari, à sano potest. Nam cetera argumenta, oculosque testes, monumenta, & quæcunque jam aliis collecta sunt, non attingimus; Accommodantes scilicet nostram Orationem propius ad institutum Inclytæ Reipublicæ, quæ, cum antiquissimis optimisque rebus plurimis ita abundet, perpetuoque suarum rerum in hunc diem incremento eo progressa sit, ut nihil minus quam de claritudine laborandum habeat: eam fortunæ suæ benignitatem tam generose didicit & æstimare, & ferre, ut neque de ceteris suis bonis, neque de hoc ipso, quod nunc celebramus, contendendum cum quoquam, aut ambitiosa vanitate altercandum censeat. Nam nec ignorare, quæ luculenta Dei bonitas nobis contulit, munera possumus: nec, quæ aliorum esse voluit, nostra fieri desideramus. quorum & illud stuporis sit; & hoc pæne sacrilegii. Dimicare autem cum homine, imo cum ambitione, de eo, quod sicut divinum est, ita arbitria pariter affectusque humanos excludit: irritum, inane, præposterum. Sicut respondere ei, qui neget te accepisse à divina manu, quod accepisti, & ut scias te accepisse, neminis potius interest, non esse nisi dubitantis de præsentis favore Dei, merito dixerim. Quid igitur opus est, jacere dictoria, detonare minis, probra cumulare in quemquam, qui cum Nostra sibi vindicat, secum potius, quam nobiscum pugnat? Nam aut quod nescit, scire contendit; aut quod scit, aversatur scire. Nobis omnia prorsus consecratione tam inquietæ præstantiæ & imitatione profani moris, hoc agendum est.

est, quod agitur. Ad rem, inquam, & Auctorem rei respicimus, felicemque annum, cujus, qui nunc volvitur, sæcularem memoriam renovat, singulari, novo, inusitato, Dei artium artificis, magisteriorum magistri, munere; adeoque laudibus, gratibus, æstimatione, pietate signamus. Quæ & multa nobis & seria, & magna suppeditat. Si ad fata Civitatis Nostræ, connexamque divina non gubernatione magis quam beneficiis temporum seriem; cogitatione prævertamur: non sæculorum modò, quæ antiquissima civitas hand pauca numerat, sed ætatum singularum ornamenta præcipua; nec, ut iis placet, qui eventum inania potius, quam causas auctoremque scrutantur ac observant, vicenarias, tricenarias, quinquagenarias periodos, sed prope modum annos, amplificatis Reipubl. opibus, gloriæ præstantia memorabiles possumus dare. Cumprimis autem postrema duo sæcula, maximis augustissimisque nominibus dicenda sunt: quorum altero, inventi post hominum memoriam celeberrimi felicitas; altero, & hujus & ceteræ felicitatis consummatio & fructus, institutione Scholarum, cum ipsis Reipubl. progressibus strenue efflorescentium, nos beavit. Antecessit integro sæculo Scholam Typographia; illa Scholarum passim plurium mater, & amica & adjutrix futura: antecessit, ut nuntiaret felicioris ævi ortum, civesque nostros de festinantibus ad majora civitatis successibus admoneret, imo ut locum illis metaretur. Antecessit, ut splendore suo, de secuturis talem Dominam pedissequis, quid pedissequas loquor? de opibus, paratu, divitiis, quas, ut in pompa sigillatim traductas, in Schola denique conjunctas stitit consecravitque, publice & in antecessum veluti testaretur. Quanquam potiora sunt, quæ ad communis Germaniæ fatum pertinent, omina. Cujus majestatem Imperii huc translata sedes primo celebravit: mox accessere bonorum, artium, monumentorum præcipua, donec ad summum jam fastigium properantia augmenta, hoc instrumentum sui operis viriumque adepta, facile suo statui adjecere quod deerat:

erudi-

eruditionis videlicet & clarissimorum studiorum dignitatem atque copiam, id est, ipsum pignus & robur potentiae ad altissima profectae, quo Romani, quo Graeci nominis magnitudo aestimari censerique olim voluit, cum circulum suae felicitatis complevisset. licebitque perpetua observatione, copulatas florentissimis publice rebus, gentiumque validissimarum opibus literas animadvertere. Atque hic regredimini paulisper mecum, Auditores, à publico Germaniae statu, ad nostram Civitatem, quae iisdem, quibus Imperii totius claritudo, temporum spatiis crevit: nisi potius monendi estis, ut progrediamini ad universae fata Europae, quam nihil aequae ac Typographia illustravit, exexit, nobilitavit. Subest arcani majoris ratio sanctior. Cernitur dubio procul in omni humano orbe satis evidenter, divinae gubernationis administratio: sine qua nihil attolitur, nihil deprimitur: nihil reperitur, nihil aboletur: sed compendium tam diffusae curationis, sive, ut rectius loquar, officina interior secretiorque caelestium operum in Ecclesia quaeri debet. Et, sicut ad ceterum orbem omnia referunt Politici; ita ad hunc selectissimum coetum, tanquam ad verum & totum in orbe isto orbem, Christiani suam Philosophiam exigunt. Quae statim nobis ostendit, institutionem sinceræ Religionis, Lucem evangelicam, diffusionem tenebrarum, & quae obsederant Ecclesiam passim, papalium superstitionum. Ut hæc conversio fati Ecclesiastici, hoc tantum & tam singulare singularis provisionis negotium, quo DEUS ultima hæc tempora beavit, promptius succederet, ut præparatu facile, instrumentis locuples, præsidii copiosum redderetur; Typographia opus erat: Hæc præludit operi: hæc paravit notitiam, præparavit industriam; communicavit consilia; publicavit decreta. Ut non minus Bezalelem in Templo Christiano instaurando, Mentelius Germaniae præsertim præstiterit, quam instruendo Judaico ille fecerat, quem peculiaris ad id cœloque missa sapientia instruxerat. Licet adhuc altius ascendere: & quodammodo pia minimeque curiosa sedulitate



litate coram DEO disquirere, sitne hoc artificiorum inventorumque, quibus humanam tum juvare, tum ornare voluit vitam, fastigium, apex, complementum, terminus? post quem (intelligo autem, & huic suam moram periodumque datam,) finis omnium ut rerum sic artium insitet, quoniam reperta est una, quæ omnes juvaret, omnes contineret, doceret, amplificaret, consummaret. Nondum sustineo dimittere utilissimas cogitationes: quæ mihi divinam bonitatem non copiose modo ostentant, sed ex abdito insinuant. Obsederat terras profunda passim barbaries, & post literas suis sedibus ejectas, omnis elegantix, eruditionis, sapientix amor evanuerat. Audebant paulatim aliqui rem publice neglectam in decus quoddam & cultum revocare: sed privatis aut dispersis conatibus, communis seignities obstitit. Non enim jam vel Principes suæ fortunæ opibus dignam rem esse literarum studia intelligebant, vel hominibus ad adipiscendum tam operosa bona satis constantix ac industriæ supererat. Illa enim sicut eruditi sæculi propria virtus fuit, ita ad exortum ignorantix & tenebrarum evanuit. Ergo de optimis quibusque omnium linguarum & artium monumentis, de instructis Bibliothecis actum erat: dum vix reliquix honore aut cura sustentabantur; adeo de amplificanda ea felicitate nihil consilii susceptum est. Verumenimvero, in quo humana industria partim cessavit, partim desperavit, id DEUS Opt. Max. velut ex machina restituit subito & exornavit. Decreverat nimirum æterna summi Rectoris voluntas, gloriam pariter & bonitatem suam oculis mortalium & mentibus per illustria monumenta, copiosa adjumenta, efficacia instrumenta, si caperent, denuo infundere; si cæcutirent, allucere; si stuperent, inculcare. idque literarum ac studiorum beneficio: quæ à diffusis ambagibus in compendium, ab arduo paratu, in faciles usus, à parca suppellectili in parabilem amplitudinem, ab impensis ingentibus, in moderata pretia, simul & semel missa cælo Typographia vindicavit. Intuemini paulisper mecum, Auditores, bonum vere

ff

cæleste,

caeleste, vere divinum. Unde enim arcessemus id litterarum propagandarum arcanum, quam ab eo, qui primus Adamum humani generis parentem litteras edocuit? qui postea in Adami posteritate litterarum unitatem conservavit, usque ad Giganteas Nimrodici agminis molitiones, & immanes prodigiosæ turris substructiones. Ea enim rebus convertendis occasio & causâ fuit: confusis primum ab irato Numine linguis, mox singulari Providentiæ consilio discretis. Inde Linguarum (& quidni etiam Litterarum?) varietas ex pœna in donum versa, secundum orbis millenarium illustravit. Tertius incomparabile rerum operumque divinatorum monumentum, Mosis manu in litteras relatum, futuris ad finem usque temporum, ætatibus transmissit. Nam quæ ipsius DEI, scripturæ omnis auctoris & artificis, digito duabus ex lapide Tabulis inscripta sunt elementa, sicut Mosaicis libris antiquiora sunt, ita, quantum ad Litteras attinet ac lapidem, certo tantum tempore, auctor sapientissimus manere voluit. Hinc consignari cœpere varia ingenii humani sollertia, & rationibus subinde diversis, multa sacra, multa profana. Ferro, cera, in foliis arborum, in libris arborum, in plumbo, in linteis, in membranis, in chartis, iisque non uno modo confectis, varie scripturam elaborarunt, tot sæculorum, usque ad majores nostros, inventa. Frequentissima præsertim & usitatissima denique membranarum volumina librisque fuere. Hic perennaturi Auctorum labores, magna diligentia describebantur. In his custodiebantur jam æternæ veritatis arcana & fœdera, in his Græcia eruditionem suam, in his Latium suam sanâ & operâ posteritati trans mittebat. Verum, ut diximus, tantum requirebat ea res laboris, quantum non nisi strenuissima ætas suscipere; tantum impensæ ac sumtuum, quantum non nisi beatissimi erogare possent. Temporis quoque mora in serum differebat, scientiarum pariter & librorum copiam. Hæc & alia incommoda, tam præsentī ope abolevit Typographia, ut omnibus, & cito, & semper loquatur, quisquis per impressa monumenta in publicum aliquid loqui-

loquitur. Prodere arcanos mentis sensus, notarum quibusdam judiciis, & quo vox non pertingit, literis loqui ac scriptura, divinum quidpiam esse agnoverunt, quicumque ullum unquam divinitatis sensum habuere. At vero tam multa, tam repente, tam compendiose, tam late disseminare, unoque & eodem tempore Orienti, Occidenti, Meridiano, Septentrionibus loqui, quanto est divinius, quanto perennius, quanto utilius? Arripiuntur celerrima typothetæ manu, è capsulis, quibus discretæ sunt, literulæ: coalescunt in voces, dividuntur spatiis, terminantur versibus; quorum singuli contigue sibi invicem accrescentes, ubi columnam, ut hodie loquuntur, sive modum quem facies paginæ habitura est, explevere, colligantur; donec diviso locis idoneis numero columnarum, formas, quas vocant, clauistro quodam ferreo, tanquam munimento circumposito, arte coactas, prælum chartæ superimpositæ imprimit. Ita quæ in formis sinistra, in chartis dextra apparent: quæ in formis atramento, peculiari arte confectæ, non colorata magis quam obscurata erant, in niveo chartæ æquore, liquido ordinata ac distincta lucent & interlucent. Denique ut divinitatis typos quosdam & characteres, verba nimirum & sensus, cum ipsa ratione, mens humana suscepit: ita per insigni artis, quam laudamus, miraculo mentis ipsius notæ in charta repræsentantur. Nil potest tam subtiliter à quocumque cogitari, nihil tam eloquenter apud audientes pronuntiari, quin exactâ elegantia, legentibus statim & ubique exhibeatur. Ut mille exempla publicandi operis, mille hominibus statim distribui possint, simplici, nec amplius, mora opus est, dum unum perscribatur: quod sæcundissimo pariter celerrimoque partu in quantumvis numerum multiplicatur. Adeo citius & copiosius diplomata sua per terrarum orbem divulgat Rex æternus, quam edita in angulos, ut sic dicam, suarum ditionum dimittunt nostri Principes. Huc enim, quod jam sæpius monui, semper respiciendum est. Quicquid laborari, perfici, adornari hujus artis beneficio curavit DEUS, illud auctoris gloriæ

ff 2                      debuit


debuic fervire. Cui soli si studeant homines, saluti suæ studeant utique: quæ extra Auctoris gloriam nec quæri nec inveniri potest. Porro sicut in grata usurpatione divini beneficii, complementum gloriæ, quam DEO debemus, consistit: ita initium ab agnitione beneficiæ provisionis fieri par est. Cujus commentationis in plurima diffusæ, nunc paucissima delibabimus. Frustra inventa erat ars, post homines natos præclarissima, nisi accessisset idonea artis administratio: frustra ad capsulas typothetæ, ad prælum excusores sudabant, nisi eruditi correctoris laborem istum emaculasset emendatio. Fallor an plus incommodi quam emolumenti datura fuit rebus humanis Typographia, nisi divinis auspiciis instincti viri quidam cordati eruditique, omnium librorum partim male scriptorum, partim ab operis typographicis male lectorum, partim ab iisdem inevitabili quadam corruptione temeratorum, curam castigationemque, antequam prælo excuderentur, suscepissent. Illi cum viderent, non labore modo ad eam rem maximo, sed eruditione insuper diffusa minimeque fucata opus esse, immerferunt se in omne genus doctrinæ, linguarum studium singulari cura tractarunt, non omiserunt disciplinarum arcana & penetralia scrutari, ut edendis veterum in lucem publicam scriptis pares essent. Ex hoc genere Manutios, Stephanos, Cujacios, Erasmos, Gruteros, Casaubonos (non enim lubet plurimos enumerare) nominare possumus: quorum absque ope fuisset, non haberemus hodie tot Latina, tot Græca; tot sacra, tot profana monumenta: aut certe haberemus ea corruptissima, & omnino talia, quæ nec legi sine molestia, nec intelligi prorsus possent. Id quod exemplis docere promptum esset: si id jam instruissemus, Talium virorum critica opera, factum est haud dubie, ut non Typographica minus quam literaria res convalesceret. Verum ut præpostero iudicio, divina munera mortales æstimamus, quos DEUS ut Heroes altioris fati consiliis destinaverat, per quos ipsam Typographiæ orbi concessæ animam, ut sic loquar, & vigorem voluerat vegetare, hos, cum

egregie

egregie & excelsæ sapimus nimirum hodie, probris contemnimus & disertiis. Quæ res non parum debilitat fati typographici momenta, id quod pauci vident, proh dolor! cum pauci revera sint, qui videre non possent. Sed antiqua scilicet & obsoleta est illa magnanimitas, qua suo quisq; loco, attentus semper ad publicæ sortis fortunam & intentus fuit: nunc dum privata quisque respicit, & ambitioni miro servitio mancipatur omnis eruditio, publica paulatim, imo confertim, ignorantur. Ex quo enim homines nulla bona arte instructi, cœperunt negotium posteritatis & sæculorum inepto ausu atrectare, rem totam vidimus degenerare, declinare, id est, si prudenti & necessaria divinatione utimur, ad exitum & barbariem festinare. Et qui possit aliter? Quæ in sanctissimos usus concedit terris bona DEUS immortalis, non patitur dissimilimis rebus inquinari, aut inquinata subvertit. Quam justitiam fati, cum tot sæculorum à condito orbe decursus, per feriem nobis exponat: mirandum est, plerosque tam hebetes ad hæc talia & rudes inveniri. Fervebant ab initio præla publicandis divinissimis oraculis, sanctissimis doctrinis, honestissimis artibus. successere plaustra ineptiarum, volumina nequitiarum, libri flagitiorum, calumniarum, contumeliarum, quibus non viles modo & abjectæ animæ, optimis quibusque rebus pessime uti solitæ, sed eruditi & clari viri operam dedere. Atque utinam præterisset istud tempus, quo hæc accidere. Speraremus sane, concussam potius rem literariam fuisse, quam conversam. Sed cum nihil hodieque reliqui fiat, quod ad contaminandam nobilissimam Typographiæ artem, ad chartas commaculandas, ad eruditionem profanandam, ad eruditos infamia notandos pertinet, existimamus hanc perniciem ad ipsa vitalia tendere, & salutis recuperandæ spem omnem præcidere. Valde enim infirmum diuturnitatis vinculum præstat ambitio: cujus aperto furore aut occulta vafritie pleraque ab operum scriptoribus ac editoribus geruntur. Accessit quæstus & lucri cupiditas, librariis negotiatoribus familiare

liare malum. itaque ergo, præter alia, quæ hinc subnascuntur, incommoda, optimorum librorum (qui vel revocandi vel promovendi in lucem suo merito essent) nulla habetur ratio; quin potius *Annalibus Volusi* & nescio quibus deliramentis imprimendis setvent officinæ. id aucupium auspiciatum, is quæstus habetur maximus. Tales chartæ emtorem mox inveniunt: meliora, raros amatores habent. Dixi aliquid de pravitæ & abusu, quo res Typographica temerari premique solet: unde merito, & Divinæ Providentiæ respectu, ne opprimatur, verendum habeamus. Superfunt autem & alia in ipsis Reipublicæ visceribus & temporum fato, quæ hunc metum augere nobis debent. Alterum ex his omen in publica inopia; alterum in publico erga literas fastidio reponendum est. Scimus omnes, quantis opera typographica, librorumque editio impensis indigeat, id est, talibus, quas vix Principes hodie & Proceres (præsertim in Germania nostra) nedum privati tolerare queant. Hinc est, quod ad paulo majoris voluminis mentionem trepidant & tergiversantur Bibliopolæ: hinc est, quod gravissima Patrum scripta, quod Historicorum, Philosophorumque opera aliquid amplitudinis habentia nemo, licet distractis jam omnibus prioribus exemplis, recudit. Quid futurum porro sit, nemo est qui non animadvertat. præsertim cum literariam rem omnem, non modo non æstimari amplius, sed prorsus fastidiri publice, satis constat. *Sublatis studiorum precis, ipsa studia peritura*, vere Romanus scriptor dixit. Quid, ubi cum pretiis, ipse favor, ipsa tralatitica benevolentia, literis ac literatis apud eos perit, qui auctoritate, subsidio, sed & officii nomine, unica erant rei tam pretiosæ fulcra? Sed quid differo, quod majus est, & ad convincendas securas futuri mentes evidenti-  
 tius, exprimere? Invitus equidem id ulcus contrecto. Deumque meliora omnia publica voce posco: verum nimis istud verum videtur, quod dicam. Videtur, inquam, Patria communis nobilissima Germania nostra, octo amplius sæculis ad summa rerum fastigia evecta atque celebrata,  
 nunc

nunc urgeri fatis suis, & nescio quid magnæ conversionis (neque enim everſionis adhuc dicere ſuſtineo) Europæo orbi, quem ſuis fatis innexum habet, parturire. In hoc rerum cardine, ne id etiam volvatur, quod tantam pace belloque claritudinem Germanis attulit, valde timendum eſt. Cedunt ornamenta Germaniæ & recedunt: Ornamentorum reſtat maximum, ſi recte æſtimamus, & pulcerimum. Reſtat ſane, ſed inter pericula, inter minas, inter fulmina. Quæ & cogitationes noſtras & orationem, attonita conſternatione ad ſilentium uſque exterrant. Niſi quod pietate, precibus, lachrymis, nunquam deſiſtemus, ſupremum numen pro conſervatione tanti boni interpellare.



## XII.

# ORATIO DE FASCIIS,

Quibus involvuntur Arcana Majestatis.

Habita

*Mense Januar. Anni cdo lxx XLIII.*

*Cum poſt ſerías Natalitias, & nundinales, ad leſſiones publicas ordinarias rediretur.*

**O**Rnatiffimi Auditores. Non decet nos publicos hujus anni labores, ſine auſpicio operis, ſine voto ſucceſſus, ſine induſtriæ regula ordiri; ne ſine Deo ordiamur, in cujus nomine iſta omnia continentur. Sed ut Deus nobis ſit, quod quærimus, neceſſe eſt ut nobiſcum ſit, ut in nobis ſit, ut noſter ſit. Noſter autem eſt in Filio: ad cujus præſepe nuper ſedimus, & cum

cum simplici pastorum genere, totas divinitatis opes, in nostros artus & angustias humanæ carnis, nobis è cælo demissas pio stupore demirati sumus. Replicavimus fascias, quas Angelus nobis tanquam quædam reperiendæ salutis pignora demonstraverat: vidimus in humili spectaculo invisibilia, tetigimus in fragibili corpusculo Deum, intelleximus latere in tenuibus fasciis, quæ orbis iste suo ambitu nunquam clausisset, nunquam clausurus esset. Replicavimus fascias, ad reperiendum: convolvimus, ad venerandum. neque replicantibus, quod caperemus defuit; quippe ut capi à nobis immensa possent, fasciis includi voluere: neque convolvendi causâ deesse potuit, ut quæ nec fasciæ, nec cogitationes nostræ caperent, tanquam in conclusarum fasciarum mysterio, reverentia atque consternatione obsignata custodiremus. Replicavimus iterum fascias, ut post ceteram pietatem, hujus anni fata scrutaremur, ut auspicia capteremus. ut colligeremus omina, ut attenderemus præcepta salutis. Deprehendimus, nullam Saturni & Jovis coitionem timendam esse, ubi Sol justitiæ, hujus & omnium annorum præses, è terris nostris & cunis suis, toti cælo ac sideribus cunctis moderatur. Amplexi sumus, divini fulgoris radio expressum in fasciis symbolum, quod regii generis vates Esaias admiranda Immanuelis appellatione jam olim præmonstratum voluit, ut auspiciū perenne credentium, ut tesseram beatitudinis, ut omen & pignus æternitatis. id nobis artem facile persuaserit & rationem, qua fascias nobis, nos fasciis implicari liceret, & cum isto virtutis præsidio, in isto sinu securitatis adversum cæli terrarumque minas, tumultus, & (si hoc in fatis foret) ruinas perennare. Animadvertimus, in istis fasciis omnem sapientiam latere: & cum involucro infantis, omnium doctorum volumina permutavimus. Nihil jam scire cupimus, præter fascias ejus qui scit omnia, postquam ex iis, nihil nos scire, intelleximus. Neque hoc dico, ut amorem sapientiæ & studium, cui vos rotos consecratis, eximia Pectora, cujus causâ hunc locum frequenti con-



congressu celebrare soletis, extinguam in vobis aut deminuat: sed ut sub exemplo vobis ostendam, omnia gravioris sapientiæ momenta pendere ab elementis eruditæ ignorantæ, neque ullo successu contendere ad Palatia Musarum & montes, quæri citharas, ambiri laureas, si prætereatur salutaris spelunca & præsepe fasciarum receptaculum: quarum simplicitate quæcumque non imbuatur sollertia, stultitia est. Nihil Deo, nihil patriæ, nihil nobis sapiemus, nisi hinc sapiendi auspicia repetierimus. Atque, si humano more de sapientia loquendum est, ubi sunt abdita scientiarum, ubi recondita doctrinarum, ubi secreta artium? unus ista omnia pannus involvit, unæ concludunt fasciæ, quæ Sapientiam Dei, sive potius Sapientiam quæ est Deus, concludere. Inexhausta esse Sapientiæ mysteria, tota gentiliū credidit antiquitas: sed periculose credidit, quia haud raro in profundas voragines incidit; sed frustra & vaga fide credidit, quia ad vim & spiritum & usum mysteriorum nunquam penetravit. Quid gentiles loquor & paganos? Electa Deo & dilecta gens præ omnibus, desideravit penetrare quæ nos introspicimus: optavit introspicere, quæ nos palpamus. Vidit fascias arcanorum sapientiæ conscias, & adoravit, sed tanquam in tremendo & inaccessu arcæ fœderalis arcano inclusas. quæ nunc patent omnibus, quæ mysteria sua pastoribus æque pandunt ac regibus: quibus involvi rudes properant, ut discant sapere; quas evolvere sapientes gaudent, ut involutas sapientiæ opes admirentur. Primus ad sapientiam gradus est, admirari sapientiam. Admiratur autem, qui ignorantiam suam agnoscit, à cujus professione, ut antea cœpimus dicere, tota hæc disciplina ordiendā est. Meditabimur unum specimen, ut de omnibus erudiamur: & fascias illas nostras denuo complicabimus, ut replicemus; replicabimus, ut complicemus. Qua veluti sapientiæ resera, miscendam sollertiæ simplicitatem, cognitioni venerationem, iudicio stuporem, statim & serio indicamus. Plurimum sibi & splendidissime videntur sapere, qui fastigia imperantium, jura imperii, decora Majestatis

& insignia & *Arcana* interpretantur. hac enim voce libentius utuntur, & crebrius abutuntur; eodem utrobique sine, ut auctoritatem sapientiæ & summam præferant. Equidem sunt omnino regnorum arcana, sunt rationes in alto secreto repositæ, sunt intini recessus penetralia, quibus majestatis imperatoriæ præsidia & ornamenta custodiuntur. sed illa suspicantur potius quam sciunt, qui extra fascias infantis Regum-regis quærunt. *Hæ sunt fasciæ, quibus involvuntur Arcana Majestatis*: quia eum involvunt, qui majestatis auctor est & conservator; quia eum ambiunt, cujus majestas omne lumen & radios mutuatur majestate fulgentibus. Incipiemus ab auspiciis regnorum: quibus nihil sublimius esse, nihil sanctius, etiam ii observarunt, qui nec sibi nec aliis, quid essent regnorum auspiciæ, explicare potuerunt. Retineatur in gratiam illorum appellatio sane profunda, & significet nobis illam Majestatis verendam vim & divinam amplitudinem, quæ in omnes actus imperatorii partes valet & splendet, humano orbi venerabilis, sacrosancta, inviolabilis, Deo proxima. Hæc fortunam agentibus, consilia deliberantibus, civibus leges, terrorem hostibus dispensat. hinc jurata obsequii vincula pendent, hinc reip. dignitas & securitas emergit, hinc grande illud societatis humanæ corpus vitalem spiritum haurit. Hæc est illa origo Legum Majestatis, quæ ceteras leges tuentur. Hæc origo jurium majestatis, quorum custodiam proficentur leges majestatis. eo districtiores, quo sanctioris rei patrocinium susceperunt; imo eo justiores, quo districtiores: quia nec clementiæ uspiam nec justitiæ locus erit, nisi hoc utriusque fundamentum statuatur. Hæc sunt sacra regni, à quibus consilium in adversis & spes; in secundis decus mutuatur & vigorem respublica: hæc neque odisse hostes, neque non amare cives possunt. hæc faciunt imperatorem mille luminibus oculatum, omnia arbitrari, omnia audire, omnibus intervenire, omnibus adesse, omnibus aliquid sui aspirare. Meministis, Auditores optimi, talia vos aliquando legisse. verum enim vero quæso vos, ne facite,

cire, quod plerique profecto faciunt; ne putate hic sub-  
stendum esse, ubi incipiendum fuerat; ne credite ad sum-  
ma, ad arcana vos pervenisse, donec arcanorum cubilia in  
præsepio Bethlehemitico scrutati fueritis. Iterum dico:  
*Hic sunt fasciæ quibus involvuntur arcana majestatis.* si arcana  
majestatis auspicia quæris, hæ fasciæ fata & jura regia cir-  
cumdant, quia regem circumdant, quia Regum-regem cir-  
cumdant, quia propter reges circumdant. Si arcana re-  
gnorum sacra vestigas, ecce & regias & sacras fascias, &  
sanctitati regum à sanctissimo rege consecratas. Acceda-  
mus propius & evolvamur, quæ arcanis fasciis involvun-  
tur. Exemplum nobis præbeat Imperatoris omnium quot-  
quot fuere, maximi majestas: sub quo nasci voluit Deus,  
sub quo fasciis includi voluit, ut & ipsi & omnibus imperato-  
ribus fascias majestatis accommodaret. Sedit Romæ Augustus;  
ex illo imperii ac majestatis suæ domicilio, pacem & leges  
suas terrarum orbi dispensat: timetur à populis, ambitur,  
colitur, donis & obsequio placatur. & quod nullius un-  
quam arma impetraverant, unius viri nomen efficit, ut  
servitium orbi pro libertate placeat. Atque hic magnifice  
jacent scriptores, vim Romanam, Augusti magnitudinem &  
& artes: quibus omnes, potentiae tantæ & caussas & vires  
adscribunt. Adulatio etiam viventi ἀποδοῦναι facit, con-  
secrat conditorem tam diffusæ dominationis, templisque  
& cærimoniis colit. Qui cautius aulæ & Principi placere  
cupiunt, divinitatis aliquam opinionem novo Principatui  
vehementer conducere judicant; sed dum simulacra talis  
famæ & commenta adornant, nihil ipsi divinum credunt  
aut sciunt, quasque ad populum phaleras concinnant, domi  
secum rident. Magistri dominationis illuc tandem deve-  
niunt, ut arcanis facinoribus & flagitiis arcana majestatis  
tuenda arbitrentur. Ipse Augustus sentit quidem fortu-  
nam suæ majestatis, videt splendorem, sequitur auspicia,  
& pæne intelligit esse ab altioribus auspiciis: sed in ipso  
magnitudinis intuitu hebescit, & ad se tantum respicit,  
sibi auspiciorum virtutem tribui cupit, & hoc ipsum inter

arcana majestatis, & auspiciorum excogitat. Inter hæc alibi fasciæ pueriles, majestatis Augustæ & auspiciorum Romanorum unum & verum auctorem involvunt : & infantis subditi auspicio terrarum imperator invalescit. Hoc est illud immanis miraculi arcanum, hoc majestatis tuæ & auspiciorum auspiciū, ô Auguste, quod Rex æternus, Regnorum omnium conditor & arbiter, civis tuus nasci voluit, quod in orbe tuo hospitium quælivit, fascias admisit, è præsepio suo omnes ditiones tuas, omnes provincias, venerationis tuæ implevit. Nunc intelligo, divinum aliquid esse Majestatem, cui Deus se submisit : nunc video auspiciorum sacra, & cærimonias quas nascentis Dei auspiciū instauravit. Nunc apparet, cur ministrorum omnium & adjutorum fortuna ad Principem referenda sit, cui fortunam Deus soli destinavit. Non miror jam, impios dici, qui majestatem violant. Deus est enim in regibus, quidquid majestatis & auspiciorum nomine signamus. Non miror jam sacros titulos, sacra jura : quæ, cum aliis pluribus arcanis, in sacris nostri Regis & Dei fasciis continentur. Quas qui non revolvit, jactare arcana imperiorum facilius potest, quam intelligere. Unde tot errores gentilium, qui vel divinitatem, quam non credebant, affectabant, vel, quam suspicabantur in opere, non reperiabant in origine. Et quid mihi arcana dominationis ac domus confingitis ? Unum & primum arcanum imperii domusque latet in fasciis ejus, qui imperium domumque Augusto & successoribus descripsit. In illis fasciis longe certiora, quam in libris linteis Romanorum, lego imperantium tempora, casus, seriem, exitia. Illæ fasciæ nihil admittunt tam versutum, tam perplexum, tam involutum, qualia sunt commenta aulicorum, & quæ in aurem Augusti Crispus ille Sallustius & callidissima feminarum Livia instillavit. Quibus dum auscultat Augustus, corrumpit sacra Majestatis, & offendit simplicium fasciarum habitatorem : qui jam pœnas ejus rei meditatur, & arcana tyrannorum longe antea quam fierent prævisa damnat. Ma-  
china.

chinatus est postea Tiberius mira arcanarum artium involucria, & velamenta, & facinorum, ut ita loquar, pallia: loquitur ne intelligatur, tacet ne non intelligatur; loquitur, nec loquitur; tacet inter loquendū & loquitur inter tacendū, ne unquam introspiciendum se aut quidquam sui præbeat. Apage tam molestas fascias, quæ nec occultant, quod occultant, nec debent convestire, quod laborant convestire. Nostri fasciis Arcana Majestatis involvuntur, quæ sunt vere arcana, quia profundissimæ meditationis sunt; & sola arcana, quia quidquid in ceteris boni est includunt; & suprema arcana, quia nihil majestate est superius; denique arcana, quæ non cupiunt latere ad fallendum, sed amant recondi ad investigandum. Utinam vobis dux esse possem in ista investigatione, & altissimi eloquii secreta, perspicua sili tenuitate designare. Majestatis enim profundissima est notitia: ut solet in rebus, quæ ipsa magnitudine sua & splendore humani intellectus aciem obrundunt. Multum dicunt, qui de summa potestate & summa dignitate hic pronuntiant: sed utriusque fontem, ipsumque majestatis genium nondum assequitur, qui ista audit. Nos ut altius ascendamus, rursus descendemus in speluncam Bethlehemiticam, ad eum, qui nostra causa è cælo in tam angusta hospitium descendit, ibique denuo fascias admirandi Infantis tractabimus: quæ solæ continent, quod nulla capiunt Palatia, ingens decus majestatis. Illæ fasciæ non regem modo vinciunt, sed qui Rex ab æterno, ex regia stirpe rex in tempore natus est, ut regibus regna daret, & quæ ipsis regnis est augustior, regiam majestatem. Nemo meretur potestatem in alios: nemo dignitatem supra omnes. omnis à Deo potestas, omnis à Deo dignitas sit necesse est. Quidquid autem à Deo homines accipiunt, propter Christum accipiunt: qui homo natus est, ut hominibus omnia daret, sive ut per ipsum omnia possent homines accipere. Magnus ille David non fuisset rex, nisi eundem habuisset dominum, quem habiturus erat filium; ideo


dominum & domini largitorem, quia filium, id est, quia hominem. cujus nativitas & antequam nasceretur, omnibus omnia dedit, nec minus postquam natus est, omnia omnibus erit in æternum. Neque tantum dedit Regibus majestatem noster Infans, sicut omnia omnibus dedit, sed sicut Rex Regibus, ad exemplar quoddam suæ majestatis. Hinc illi characteres, si hac voce uti licet, magnitudinis, sanctitatis, splendoris: quibus non tam Reges in imperio præfulgent, quam Deus in regibus. Quam cognitionem, si ab ipsa & sola divinitate vellemus arcellere, majestas haud dubie sui vestigatores obrueret. Maneamus cum Deo, qua humanus obtutus admittit, quia homo est, & simul Deitatis arcana nobis revelat, quia Deus & homo est. Hic qui in præsepit angustis puer jacet, omnes mundi terminos implet ac terminat: regnat in cælo & vagit in pannis: clauditur maternis ulnis, cui angusta sunt regum domicilia: ubique præsens omnia cernit, omnia audit, omnibus actibus, omnibus cogitationibus miscetur, omnia moderatur; in bellis victoriam, in pace fortunam disponit: atque inter hæc ipsa & per hæc ipsa, ut propius ad rem loquamur, Augusti imperio majestatem is addit, qui sine honore inter jumenta projectus videtur: & principis Romani purpuram, infantis Berthehemitici panni illustrent. Gaudet novo sanctoque nomine *Augustus*: ejusque gratiam S. P. Q. Romano se debere credit. Erras Auguste, dixerunt te Romani, non fecerunt Augustum. neque te fecisti ipse talem: sed qui te Augustum voluit, jussit, nec agnoscitur in tua aula, nec colitur. & interim tamen (vide bonitatem ignorati tibi numinis!) quod orbis pleramque partem sub ditione tua continet, quod nomen tuum gentes venerantur, quod institutum à te imperium non tam annis, quam sæculis numerabitur: id omne munus est ejus, cujus nomen necdum nosti, cujus imperio sic tamen subes, cujus robore totus sustentaris. Quantum & fasciarum & majestatis arcanum est, majestatem in fasciis latere, è fasciis dispensari, extra fascias ignorari? Infaustæ ignorantiae

tiæ exemplum non tam de temporibus istis memorandum, quam in nostris deplorandum est. Adhuc in spelunca jacent fasciæ, cum omni sua majestate, non ingrediuntur in aulas, non reponuntur in augustale & majestatis templum. Quo magis admonendi estis, Generosi juvenes, quorum studia reip. & aulis & majestati imperiorum destinantur, ut ad gubernacula rerum admoti, aut juxta Principum latera constituti, prima majestatis sacramenta & auspicia & consilia ex fasciis, quas nunc meditamur, repetatis. Præcipuum boni consultoris & administri opus est, majestatis decori & usibus se in solidum dedicare, id est, quæ majestatis origini & naturæ repugnant, sedulo semper evitare. Malarum artium brevis gratia, infelix præmium, æterna turpitudine est. Misera sunt arcana, quæ apud male moratas aures, quibus solis placere possunt, perire optant, nec posteritatis conscientiam audent sustinere. Pro quibus Vos, ô mei, arcana majestatis sanctiora suggerite Principibus vestris & demonstrate: *Dirigere præcipua rerum ad famam, sed quæ ex virtutis merito nascatur; divinitatem imperii pietate tueri, justitia firmare, clementia ornare: adeoque magnum majestatis arcanum reponere in justitia, majus in clementia, maximum in pietate; jura imperii, severitate adversus contumaces, gravitate apud amicos, prudentia ab insidiatoribus vindicare; neminem unum exebere supra præcipuam legem majestatis, quæ Principem imperio, imperium alligat Principi; pravi magistris accensere, qui Principem ad ignorantiam privati redigere, se vero in arcana Principatus cupiunt collocare; solam rationem status credere, quæ est ratio majestatis; nihil fructuosum putare, nisi quod honestum; nihil regium, nisi quod magnanimum; nihil gloriosum, nisi quod sincerum: neminem sepiro amicum credere, nisi qui Deo sit amicus; adulatorem, ut majestatis inimicos, aula pellere, adulationem excludere animo, qui nunquam simul majestatem, simul adulationem amare potest; nemini aliquid debere, ut facinorum ministro aut reperiatori; neminem premio fidei & virtutis defraudare; benevolentiam civium pro muro amplecti, illustres viros pro præsidio, sapientia doctores pro thesauro.* Quidni enim hoc adjungam, quod negle-

neglectum nostro ævo, calamitatum Iliadem dedisse, posterorum temporibus barbariem daturum esse, omnes videtis? Revocate in memoriam vestri sæculi, veteres imperatorum pro imperii majestate curas, & *Oecumenicum magistrum, cum duodecim collegis, omnis doctrina, & sapientia consultissimis*, præcipuum quondam orientalis imperii & majestatis regnatricis ornamentum. unde tanquam ex oraculo, disciplinam rectiorem cives, consilia graviora Principes petebant. Quod sapientiæ sacrarium cum immanis ille & sola feritate mensuram sui nominis implens Leo combussit postea, quid aliud obsecro egit, quam arcanum Romanæ majestatis, & sanctissimas atque in ultimos casus profuturas opes eodem illo igne abolevit? Ostendite in publico tam infames temporum notas, quotiens licebit: replicate annalium monumenta, & vitandorum stimulos objecta male consultorum fœditate adhibete, quicumque principum commodis consulturi estis. removete à Justiniani latere turpissimæ rapacitatis magistrum prætorii præfectum: qui infausto commento quæstus, stipendia doctorum & præmia studiorum sustulit, non alio successu, quam ut orbem Romanum agrestis inscitia & profunda nox ignorantiae obscuraret. Hæc dehonestamenta sunt majestatis, hæc regii nominis maculæ. Vos, ut majestati & regibus pia suadeatis ac decora, semper recurrite ad fascias, arcanis pariter & insignibus majestatis refertas: inde, quicquid evolvere potestis, conferte ad splendorem & vim imperii. inde diadematurn, coronarum, sceptrorum, purpuræ, gladii, Palatii decorem arcessite. Colunt illa insignia imperii, & in sanctitatis speciem adornant ostentantque, quicumque aulas & fortunam Principum sequuntur. Sed plerique nec fortunæ ejus, nec sanctitatis auspicia intelligunt, morem pro ratione, adulationem pro judicio usurpantes. Vobis convenerit venerari Palatium, ut majestatis sedem, quia novistis auctorem majestatis jacuisse in stabulo, ut eodem tempore Palatium Augusti consecraret. Splendeat etiamnum in purpura majestas, quia unus & idem majestatis Dominus sibi pannos, regi-



regibus purpuram circumdedit. Coronentur regum capita, quia ejus regis caput coronavit regum regnator, ex cujus domo ipse rex nasci voluit. Armet vindicem justitiæ dextram gladius, quia eadem opera se fasciis, imperantes gladiis accinxit vitæ necisque supremus arbiter. Idem nimirum, qui sua sceptrâ, suam imaginem regibus inde ab antiquo communicavit. Penetravi quidam hujus arcani sensus ad gentilium nonnullos; unde sceptrâ à Jove deducit regi que suo accommodat princeps Poëtarum Homerus. Videbant nimirum sacra esse & divina, quæcunque majestatem adornarent, nec videbant, quomodo: quippe qui ignorarent fascias, quibus religio majestatis & sanctitas consecraretur. Omnia autem hæc majestatis pignora, gloriæ instrumenta, venerationis insignia, sanctitatis arcana, longe felicius suum decus, suas vires tuebuntur, cum in generosi & pii consultoris fidem inciderunt. Hic faciet, ut divina videantur, quæ non aliunde quam à Deo arcessit: hic faciet, ut in oculos humani generis exsplendescant, quotiens majestatis interest, ostentari majestatem: hic faciet, ut intra fasciarum arcana volumina custodiantur, quotiens ad majestatis decus pertinebit, secretiora majestatis ignorari. Denique tantum arcanæ sapientiæ in unico fasciarum nostrarum volumine inveniet, ut nunquam ei ad consilium prudentia, ad actum constantia, ad ministeria dexteritas defutura sit. Satis dixi sapientiæ cupidis: quorum institutio hinc incipiet, ubi nostra oratio deficit.



## XIII

## ORATIO

habita à J. H. B.

Anno clō lōc XLVIII. d. XX. Octobr.

In Brabenterio Academia Argentoratensis, cum ejus Rector secundum renuntiatus esset.

h h

Ades

**A** Des ergo propitius & clemens, Benignissime Maxime DEUS! &, quem inclytæ hujus Reipublicæ civem, Academicæ doctorem, & clarissimorum virorum collegam fecisti, atque hætenus mandata pro virili capeffentem munia, consilio, opæ, successu, contra tot mala sæculi, per memorabilem ætatis humanæ circuitum, potenter juvisti; nunc porro respice servum tuum: ut Rectoris officio, quod mihi venerandi ordinis Academici suffragia, & præsertim augusti Senatus iussa, secundum imposuerunt, fungar ex voluntate tua, pie; ex voto civitatis, decore; ex usu studiosæ juventutis, feliciter! Vos, Auditores, sua quisque dignatione, stemmate, merito, officio, doctrina, virtute, indole splendidi atque honorandi, quin vestras cum meis, pro Republica, pro Academia, preces conjungatis, justissimasque vobis in hæc nomina, necessitudinis causas existimetis nullus dubito. Itaque, inter sollennia hujus diei vota, invicem vobis omnibus ac singulis bene precamur, cunctaque fausta & exoptata ominamur. Et quoniam initio capeffendi hujus muneris, orationem à me aliquam expectari, intelligo: materia mihi sermonis ad Vos, Auditores, erit, nec à professione mea, nec ab exemplis ævi nostri, neque adeo ab eo ipso, quod diebus præterlapsis inter commilitones tractavi, argumento aliena. Dicam enim de præcipuo boni civis in Rempublicam ejusque statum officio; & expendenda vobis, exempli loco proponam, celeberrima Theramenis & Lysiae consilia, quibus uterque, circa mutandum aut tuendum Reipublicæ Atheniensis statum, ad eandem optimi civis laudem, via & constantia non eadem, atque idcirco, eventu valde dispari contenderunt. Hinc Therameni, mutabilis consiliorum varietas, ex tegumento pedum, utrique pedi diversoque sexui congruente, *Cothurni* cognomen indidit: Lysiae vero propositum consiliumque, non in alium dixeris hominem convenire, quam qui sit vere (ut de Græcis civibus Græco elogio, id quod quærimus efferamus) φιλόπολις sive φιλόπολις, vir patriæ studiosus ac diligens, denique com-

communi voce, sed eximie accepta, optimus civis. Qua in re animadvertenda, si exigui temporis audientiam mihi comitas vestra fecerit, Auditores venerandi, operam dabo, ut, postquam prudentiorum judiciis summam totius rei permisero, non inutilia interim profectui studiosæ juventutis videar attulisse. Incidit uterque, & Theramenes & Lyfias, in tempora Reipublicæ suæ, omni perturbationis genere inquieta, vereque fatalia. Bellum contumax & diuturnum; pactiones infirmæ aut infidæ; hostis prævalidus, & ad extremum, victor: nulla foris in amicis spes: nulla domi concordia. hæc miseram Athenarum civitatem in eum adduxerant statum, ut malis suis, & malorum remediis juxta laboraret. Tali rerum habitu, gerere rempublicam, ut sit res publica, quàm sit arduum, vix animo concipi, extra præsentis discriminis casum, nedum exprimi verbis potest. Interim primoribus civium, quique civilium rerum administrationi se dederunt, eoque suas curas & officia semper retulerunt, non licet à gubernaculo navis jactatæ diffugere, & cum agitantur omnia, se ad quietem compressis manibus componere; quo minus omni divina humanaque ope, præcipue quidem in portum, aut, si vi majore prohibeantur, in stationem non infidam, enitantur navem Reipublicæ subducere. Sed hoc ipsum scilicet momentum fati, fortunæque publicæ libramentum, ut sic dicam, satis discerni & notari interdum vix potest. quo sit, ut stationem circumspiciamus, ubi portus nondum desperari debuit; aut nimis ad portum adspiremus, ubi statio pro portu nobis poterat sufficere. Inter hæc ancipitia, cum & flagitiosa desidia, & periculosa est industria, non regulis aut formulis, quibus nec alias semper magna negotia se patiuntur illigari, expeditur reipublicæ tractatio: sed consilio prudenti, animo magno, præsentis virtute, imo, ut semel dicamus sine quo frustra dicuntur alia, divina quadam felicitate. A cujus sensu, magnus alioquin vir & ad negotia reipublicæ quodammodo genitus, plurimum devertit Theramenes: tum in cetero tam periculosi temporis tractatu; tum in iis præ-

sertim consiliis, per quæ de ipsius reipublicæ disciplina statuque dubitatum est. Regebatur Athenarum civitas imperio populari: cuius tam studiosa fuit, ut institutam, inde à Regibus, populi potentiam, licet tyrannide Pisistrati, & post magnum intervallum paucorum dominatione, de qua nunc dicendum erit, interjungeretur, semper instaurarit, atque, sub Macedonum quoque opibus, ad vim Romanam usque conservarit. Unde non aliud temere nobilius exemplum populi liberi, scriptoribus doctrinam civilem professis in ore est, quotiens de imperio populari disputant. In hac itaque multitudinis potestate, quin multa evenerint, quæ libertatis modum egrederentur, atque id regiminis genus, viris præsertim claris ac illustribus grave ac acerbum facerent, nemo inficias iverit. Sicut nec illud obscurum esse cuiquam potest, qui literas Græcas attigit: in rebus arduis & creperis, sæpenumero nihil moderati compositique vel consilii, vel actus, per licentiam multitudinis expediri potuisse. Verum hæc atque talia, cum valeret respublica, optimus quisque, rerum humanarum fragilitate, & comparatione incommodorum, quibus nullus imperii cujuscunque status vacat, solabantur: ceteros, quibus suum dolorem, ante caritatem patriæ ponere, nulla religio fuisset, publicæ opes vel deterrere, vel contemnere poterant. Res adversæ facilius mentes civium alienant, aut alienatas detegunt. id quod Atheniensibus usu venit, cum in bello Peloponnesiaco, male gestis in Sicilia rebus opes eorum senescerent; Lacedæmoniorum autem, cum quibus hætenus de imperio certatum, mox de salute certandum erat, auferentur. Hic enim non distulerunt, mutandæ reipublicæ & à populo ad optimates transferendæ, consilia agitare, ac publicè mentionem inferre, quibus præsentia maxime displicebant. Sic effectum est, ut summa reipublicæ quadringentis viris permitteretur, & jus populi in paucorum concederet arbitrium. Auctor tanti operis inter præcipuos Theramenes, apud priscum Aristophanis Interpretem, & Lyfiam, & cui hæc in re tota plurimum debemus credere,

credere, Thucydidem, memoratur. Licet enim, exul tum temporis & hostium rebus immixtus Alcibiades, Pisandrum Atheniensium prætorem, qui apud Samum exercitum habebat, in hujus rei molitionem impulsisset, isque plures sibi adjutores comparasset, Athenis tamen, in ipso negotii tractatu, Theramenis opera magni fuit. Aderat viro auctoritas ex meritis; robur, ex dignitate parentis; fides ad populum, ex civilitate & studio libertatis, quod semper præ se tulit; eloquentia autem, quæ res asperissimas mitigaret, & ingratisissimas in omnem gratiarum speciem adornaret. Operæ pretium fuerit forsitan, Auditores Venerandi, rem per monumenta veterum dispersam, summatim cognoscere: ut appareat, quid pro consilio Theramenis, & qui in eadem fuere sententia, adferri, quidque dici contra possit. Exaggerabatur ante omnia periculum Reipublicæ, prope ad desperationem redactæ, & unicum ostentabatur remedium, ex mutato statu: sive gerendarum rerum expeditior ineunda ratio esset, sive externa quærentur auxilia: esse copiam amicitiae Persicæ, & quendam veluti è machina Deum, hanc indidisse Alcibiadi exuli mentem, ut suam patriæ offerret operam in conciliando Tissapherne, regis opibus, quibus Lacedæmonios juvabat, præfecto: ita instaurari posse res prolapsas, si Persarum regis auxilio Lacedæmonii priventur, Attici confirmantur. aliud consilium superesse nullum. Itaque Alcibiadem in patriam revocare studerent, quicumque rem Atheniensem non extinctam cuperent. illius auspicio, fortunam cum insigni munere opum Persicarum, mox in partibus fore. Frustra autem de Alcibiade restituendo ac reconciliando agitari, nisi Respublica ab optimatibus administraretur. quippe, ut in partes trahi Persa posset, nomen popularis imperii abdicandum, regibus cum libertate populi parum convenire; paucorum auctoritati plus fidei inesse. Intempestive ac pæne inepte de administratione Reipublicæ disputari, ubi de salute Reipublicæ agendum est. Tempori cedendum, quod civitatis disciplinam adeo sibi attemperat, ut optimum imperii genus

decernat, quod rebus instantibus ordinandis accommodatissimum est. Lacedæmonios quoque multum de hostili odio remissuros, imo in pacis æquæ fidem facilius conven-turos, si populus ejurata priore potentia, unice hætenus illis suspecta & invisa, ultimum patriæ casum remittat. Componendi belli tam diutini, tam ancipitis, nullam dimitti occasionem oportere. interim ad subita casuum, & ardua consiliorum, inhabile multitudinis arbitrium: pauciores, & quasi ex intractabili mole delectos, promptius præsentiusque commoda populi provisuros, ac munia Reipublicæ executuros accuratius. Esse ad manum viros, nulla hætenus nisi populari arte spectatos, & civilibus commodis promovendis innutritos, quibus citra hæsitati-onem committi possint, quæcunque recte curari, Reipublicæ intersit. Ne quid tamen præter salutem civium agi videatur, quadringentis optimatibus præsto esse, & communes curas capessere debere, quinque civium millia, ex iis scilicet, qui non corpore tantum, sed etiam pecunia, adeoque cum equis & scutis, ut ajebat Theramenes, juvare Rempublicam possent. Nam in hoc multum sibi placuit ille, magnamque suæ defensionis partem in eo collocavit apud Xenophontem, si temperatæ potius mixtæque, quam eversæ popularis libertatis auctor haberetur. Semper, inquit, ab illu peraque dissensio, qui popularem negant constitui Rempublicam posse, nisi homines servi & inopes, quique ob paucos numos rempublicam proderent, domi militiaque rerum administrationi adhibeantur: & ab illis, qui optimatum imperium nihil esse aliud arbitrantur, quam ubi paucorum tyrannide libertas opprimitur.

Honestæ oratio, si prætextum causæ potius, quam ipsam causam inueniatur. suberant enim omnino, quæ publica præscriptione rebus privatis obducebantur. Quantum enim ad Alcibiadis promissa attinet, diserte ex Trogo Justinus prodit, ea nihil aliud spectasse, quam ut aut concordante civitate, dux belli ab omnibus legeretur; aut discordia inter ordines facta, ab altera parte in auxilium vocaretur. Itaque, qui ei suffragabantur, veluti communis spei pactione illecti, populi potentia

*potentia non amicos ; & optimatum fautores* se præbebant, quod in Pisandro, diligentissimum scriptorem Corn. Nepotem non præteriiit. Præcipue autem, omnes mutandi status auctores actoresque hac descriptione insignivit gravissima *Thucydidis* historia, quod suæ quisque spei tendere, suæ dignitati & potentiae locum atque nomen struere, non dubitaverint. In Theramenem seorsum hoc nomine acriter invehitur *Lyfias* : quem causæ suæ servire opineris forte, nisi oratoris fidem, historia ultro tueretur.

Ea propter in consiliis talibus nulla potuit esse constantia, sive, quam Græci elegantius dicunt, *εὐσέβεια*. Occupato enim vi & fraude dominatu, sublati etiam clam è medio, qui libertatem populi defendebant, populoque palam exterrito, quadringenti non aliis, quam quibus quæsierant, artibus, potentiam egerunt, multaque impotenter & superbe patnaverunt. Hinc occulti primo questus, & perlata ad exercitum in Samo tyrannidis facinora effecerunt, ut egregiis viris, *Thrasylulo* præsertim & *Thrasyllo* auctoribus, milites pro libertate vindicanda in tyrannos, conjurarent, *Alcibiadem*que, in omnia pararum & mobilem suis partibus adjungerent. Ita is, qui paulo ante reipublicæ à populo ad senatum transferendæ suavor & auctor extiterat, commutato animo, *Athenas* mittit, *ex continenti se cum exercitu venturum, recepturumque à CCCC. jura populi, ni ipsi redderent.* Erat autem ea de *Alcibiade* opinio, ut vix dubitaretur, plus momenti esse in ea parte, ad quam ipse se contulisset. Itaque novis discordiis denuo implicita civitate, cum tyrannorum factio omnia pro retinenda dominatione conaretur, milites è Samo, & qui *Athenis* eorum auctoritatem respiciebant, excutere illud jugum summa ope niterentur, post mala ingentia, foris ab hoste, domi à civibus, inter infausam contentionem, illata, quadringentorum tandem est abolita potestas.

Qua in re, quomodo se gesserit *Theramenes* noster, ad quem revertendum est, nunc porro inquiremus : si prius in hoc transitu monuerimus, quid in abrogando populari imperio

imperio antea sit ab ipso peccatum. Primum igitur, sacratarum legum, quibus Athenis sancita erat libertas populi, major ipsi religio esse debebat, quam, ut vel suæ vel alienæ libidini quidquam de Republica gratificaretur. Indignum certe fuit viris tam gravibus illud commentum, quo novæ legis specie, viam sibi ad antiquanda jura, quibus respublica continebatur, muniverunt. Hoc piaculo, ambigi non debet, quin triste sibi ad res gerendas auspicium, omnisque in posterum successus intertrimentum consciverint. Quæ deinde honesti consilii ratio patitur, in summo Reipublicæ periculo, & desperatione omnium salutis, suas opes privatim extruere, sibi que ex miseriis patriæ, auctoritatem quærere? Neque ex Alcibiade conciliando, adeoque Persicis auxiliis arcessendis, idonea repetitur defensio. Potuit in patriam restitui, sicut optabat, Alcibiades, & reconciliari, sine ulla reipublicæ mutatione. nam, quod ipse optimatum administrationem postulabat, Regisque in eo votum sensumque prætexebat, id nobis longe aliter *Thucydides* interpretatur, qui, in gratiam eorum, quos jam tum Athenis à populari statu alienos Alcibiades noverat, hæc jactata observat. facilius ille se per viros populo gratos restitutum iri sperabat, si veluti præmium suffragationis honoratorem in Republica locum, & communis potentiae societatem, non pro se magis, quam pro ipsis pacisceretur. De cetero ingenium viri & proposita satis testabantur, nihilo pluris ipsum facere statum optimatum, quam populi, dum modo cupitis potiretur. Quid? quod prudenter cogitantibus suspecta non immerito fuissent magnificæ amicitiae Persicæ nomina. Quis enim crederet, Regem Persarum, Peloponnesenses, hætenus amicos, & diffusis opibus intra terminos regni sui inhærentes, inconciliare sibi velle, ut Athenienses, quibus plurimum diffidebat, conciliaret? Amplecti autem inanem auxilii speciem & umbram, atque interim civitates socias, id est, quidquid supererat auxilii, à se novi status terrore abalienare, à veræ prudentiæ consultis longius recedit. Inprimis animadvertere debuit, cum fo-

ciis,



ciis, quod paulo post, sed sero conquestus est Theramenes : non duraturam in statu paucorum , præsertim tam perturbata civitate instituto, vel pro Republica modestiam, vel inter ipsos concordiam, ita optimatum singulis majus è collegis periculum, quam à populi imperio imminere. ibi indemnatos ac indefensos per vim ad necem abstrahi : in populo , agitatius civilibus judiciis , certius confugum esse. Hæc si pleraque Phrynichus & alii, ante quam fierent, præviderunt ; Therameni, quo nemo sollertius credebatur cogitare, debuerunt utique in mentem venire, ne consilia capesseret, quorum Athenienses publice, ipsum privatim mox poeniteret.

Ordinata enim in quadringentos Republica , donec honore & auctoritate præcelluit inter collegas Theramenes, opus consiliumque suum omni industria tuebatur, nullaque in re novo regimini deerrat. At vero , cum Pisandrum & Callæschron & alios sibi præferri ; speique partem non modicam intercipi animadverteret, altius jam reputare cœpit, minusque probare, quæ agerentur. Inde, cum accederet exercitus Samii conjuratio, & Alcibiades conjuratis priorior, & impatientia populi, facinora tyrannorum non diu laturo ; jam manifesto deseruit Theramenes priores socios, Antiphontem, Pisandrum, Aristarchum ceterosque, optimatibus, quorum pars erant, deditos ; & cum Aristocrate aliisque collegis quibusdam, patrocinium populi denuo suscepit, ducemque se iis præbuit, qui de quadringentorum imperio sequius opinabantur. In quo rursum varietas consilii ejus & vafrities deprehensa est. Nam apud optimates, quorum ruenti fortunæ, quamquam collega & auctor ejus status, permisceri nolebat, excusavit durum necessitatis telum ; neque Alcibiadi & militibus resisti posse, docuit. Ad captandum vero favorem populi, asseverantius jactavit : mutari præsentia oportere ; temperataque paucorum potestate, quinque millia non verbo & specie, ut hætenus, sed reipsa in communionem publicæ administrationis adhiberi : id stabile ad concordiam, id

æquandæ libertati fore. cumque diffisi rebus suis quadringenti, murum in Eetionea loco valde opportuno extruerent, ut vel arcem eam dominationis haberent, classis scilicet & mœnium compotes; vel, si restitueretur populus, ipsi hostes possent intromittere, atque cum iis quomodo-cunque, certe de securitate sua pacisci: Theramenes mature pericula ex illa collegarum munitione civitati impendentia denuntiavit, & post in diruendo muro, egregiam navavit operam. donec eo ad extremum res deducta est, ut summotis à Republica quadringentis, quinque millibus permitteretur administratio, omniaque in statum ordinarerentur bene pro rebus præsentibus compositum temperatque, sicut *Thucydides* judicat. *Idem*, qui in negotio tam specioso annotat: curam Reipublicæ obtentui sumtam; ceterum Theramenem & socios, ambitione privata optimatum imperii pertæsos, si uni collegæ (nam suo quisque die per vices præerant) ceteri omnes, ut impares, obedire cogerentur; prætulisse libertatem populi, ubi magistratus eligi mos tenet, neque species repulsæ, tanquam à paribus factæ, locum habet.

Sicut autem ille status afflictam rempublicam quodam modo recreavisse visus est: ita post hæc, fractis apud Ægosspotamos rebus, dedere se victoribus Lacedæmoniis coacta civitas, in easdem ambages recidit. Jussa enim suis legibus vivere, vix jam se ipsa agnovit: nonnullis, populo Rempublicam permitti, aliis per optimates eam gubernari, verius & antiquius esse, contendentibus. Tandem Lysander, durioribus jam conditionibus propositis, Spartanorum nomine, dominationem paucorum instituit: suggerentibus tamen id consilium, & adjuvantibus nonnullis Atheniensibus, inter quos iterum Theramenes notatur à Critia apud *Xenophontem*; & à *Lysia*; qui singillatim arguit: sponte Lacedæmoniis pollicitum esse Theramenem, se curaturum, ut status Reipublicæ commutaretur; concionemque de ea re distulisse in adventum Lysandri; tum Lysandro, Philochare, Miltiadeque præsentibus, vim & persuasionem juxta attulisse,

attulisse, progressumque jussisse: Rempublicam triginta viris tradi, eamque formam regiminis institui, quam Dracontides præscriberet: nominasse postea decem, qui & ipsi alios decem crearent; parem vero numerum populus ut ex se deligeret, permissum. Adjectas etiam adversum abnuentes, minas, non à Theramene minus, Lyfandri eo in negotio satellite, quam ab ipso Lyfandro, vim & terrorem victoriæ intentante. Hæc à magno viro & cive Atheniensi, in consessu judicum Atticorum, non videntur dici potuisse, nisi res aliter se haberet, quam *Diodorus Siculus* credidit: qui Theramenem restituisse Lyfandro acerrime, & vix mortis metu à tuenda populari libertate deterritum, memorat. Apud *Suidam* certe, disertis verbis, Theramenes XXX. viros constituisse, statumque popularem dissolvissè refertur. *Plutarchus* quoque in *Lyfandro*, acceptas condiciones Lacedæmoniorum, auctore Theramene docet. neque desunt aliæ rationes, quibus hæc quoque versatilis ingenii mobilitas demonstrari potest. Verum hic status ipsi auctori fatalis fuit: fuisset & Reipublicæ; ni Thrasylbulus cum egregiorum exulum manu, sævissima tyrannide XXX. virorum oppressam civitatem liberassent. Quis hic non miretur Theramenem, quod prioris dominationis oblitus, novam instituit: & cum institutæ jam particeps esset (fuit enim in XXX. rectorum numero) unum resistere se posse credidit tot collegarum sceleribus: quæ ne admitti unquam à paucis possent, antea provisum oportuit? Fuit itaque causa mortis satis speciosa, quam, tyrannidi refragando, & collegarum facinora coarguendo contraxisse sibi videbatur; sed, qui consilia ejus propius introspecterunt, justas inconstantiae & calliditatis in gerenda Republica dedisse pœnas; & nisi tum scelere Critiæ occupatus esset, liberato deinde per Thrasylbulum populo dare debuissè, existimant. Sicut enim varius in vita fuit, ita sententiis discrepant, qui de eo scriperunt. Infamatum quippe à plerisque, magnopere videntur commendasse *Trogus*, *Cicero*, *Diodorus Siculus*, & *Aristoteles*: qui Niciae atque Thucydidi, tanquam opti-

mis civibus, & paterna benevolentia populum complexis, Theramenem junxit tertium. Sed *Plutarchus*, qui in *Nicia* id tradit, non esse hunc æquandum ceteris monet, ob versatilem & temporarium in republica gerenda animum, qui pridem ei *cothurni* appellationem peperisset. *Cicero* autem, mortem potius viri, & alibi eloquentiam, quam vitam laudat. Pulcrum quidem dictu, & singularis sapientiæ elo-  
gium videtur, quod ab *Aristophane* positum, in proverbii formulam abiit:

Ταῦτα μὲν πρὸς ἀνδρὸς ἐστὶ  
Νῦν ἄριστος, καὶ φένας καὶ  
πολλὰ περιπλανήσας,  
μισακυλισθεὶν αὐτὸν αἰεὶ  
πρὸς τὸν ἐν περὶ τὸν τοῦτον.  
Μᾶλλον, ἢ γὰρ ἐσμὲν  
εἰκότ' ἐσάναι λαβὼν ἔν  
ἡμῶν. τὸ δὲ μεταστρέφει  
πρὸς τὸ μαλθακώτερον  
Διὲς πρὸς ἀνδρὸς ἐστὶ καὶ εὖσι θνητοῖς.

*Viri est sapientis & multis rebus experti, circumagere se & in latius felicius inclinare potius, quam statua ruri, uno semper loco, una forma subsistere. Nimirum inter ancipitia converti semper in partem molliorem, viro demum sollerte & Theramene aliquo dignum est.*

Sed in deformem clausulam definit, cum *Iuxerpes* addit: modo illi, modo isti factioni eorum, qui in Republica versabantur, se applicuit, & temporibus inservivit Theramenes, τὸ Συμφέρον αὐτῶ τὸ πρὸς ἀπολάττων, dum utilitate, non fide officia metitur.

Atque hic vos convenio, & in Theramenis exemplum inspicere jubeo, Commilitones & Amici carissimi: ut, quocunque studiorum genere, Rempublicam suo quisque loco estis olim ornaturi, boni civis nomen mature discatis intelligere & amare. Ea ad sapientiam pulcherrima, ad conscientiam tutissima disciplina est: cumque cetera partitim singulis commendanda sint, hoc ad omnes pertinet, qui aliquid humani habent, Est quidem doctrina civilis tam liberaliter diffusa,

diffusa, & tam alte recondita, ut nec ab ingenio, nec ab instituto cujusvis studium ejus debeat exigi: sed affectus in Rempublicam ejusque statum, & fides, decretum est naturalis, ut sic loquar, Politicæ; quam Deus mentibus hominum, in civilem habitum formatis, insevit, & latis legibus commendavit. Ab hac quæcunque recedit, non stulta modo, sed infelix sapientia est. Neque tamen diffiteor, rem paucis verbis conclusam, & quasi in obvia faciliq; intelligentia positam, multis involvi difficultatibus, cum ad ipsa negotiorum discrimina ventum est. Sicut itaque, quibus hanc personam Deus non imposuit, ut civilem statum vel inter ambigua interpretentur, vel inter impedita expediant, rectissime fecerint, si fidem pro Republica semper quidem in promptu; temeritatem vero, quæ se majoribus rebus ingerit, procul habeant: ita quos muneris sui ratio, sive docendo demonstrare, sive tractando sustinere jubet periculosa illa negotia, etiam atque etiam animadvertere oportet, quam officii civilis legem sibi constituent. Loquimur nunc tantum de illis temporibus & negotiis, ubi de forma statuque Reipublicæ dubitatur, sicut aliquoties jam professi sumus. neque enim alia disputatio propius ad civis officium, aut interius ad publicam salutem qua civilis vita constat, refertur. Qua in re ego, non alienam modo sed nullam reor Politicam Theramenis, qui Rempub. suam ingenii sui lulum, & spoliū temporis, & materiam alienæ ambitionis, quotiens libuit, fecit.

Possit quidem alicui in mentem venire, Theramenem immerito talem censuram pati, fortunæque potius apud posteros, quam culpæ in vita id crimen esse. Rebus publice confusis, optimum quemque & innocentem, in suspiciones & iniqua hominum judicia incurrere. neque ex eventu consiliorum de animo pronuntiandum: multa patriæ juvanda fieri, quæ privatis rebus data creduntur. de futuro neminem satis callidum; & inter ancipitia præsertim videre semper, quid factu optimum; supra virtutis humanæ modum esse. denique, temporis imperiosam vim obsequio

potius quam contumacia propitiandam, omnium pragmaticorum hominum præcepto contineri. Verumenimvero, quatenus se prodat ipse Theramenes; & quomodo historia retexat subtilem illum & varium sapientiæ temporariæ contextum; quidque existimaverint ii, quibus cognitiōa fuerunt omnia, satis ante ostendimus.

De cetero nimis sane verum est, optimorum quandoque civium consilia, pro non optimis, imo pro impiis, perturbatione temporum reprehendi. Primum itaque boni civis votum est, ut Respublica sibi constet ac valeat, neque de statu suo vel domi vel foris in disceptationem vocetur. Proxima civilis officii pietas Deum venerabitur, ut inter perplexa temporum & motus rerum, mentem à sensu boni publici, & fide civitati debita, irretortam conservet. Est enim, est profecto singulare Dei munus, ingenium civile, & prudentia à civitatis amore & publico egregio divertere nescia; quam nemo sibi præstare ipsi potest. ex illo fonte vigorem ac salubritatem habeat necesse est, quidquid semel inde dimanavit. Hæc ergo demum, à Deo erudita in Rempublicam fides, non patietur te ignorare, quid debeas, & cui debeas. Cum à Deo discefferis, sanctissimum Respublica nomen est: sive societatis titulum, sive formam regiminis spectes. Si Regem Deus Reipublicæ custodem dedit, religio tibi sit plurium exoptare imperium: si primores, aut populus summam rerum acceperunt, nefas esto, præferre formulam, quam Deus non dedit, illi quam dedit. Qui enim instituit, ut esset inter homines Respublica, etiam, ut tali disciplina esset, instituit. Igitur in Deum impius, in Rempublicam injurius est, qui consiliis operam dat, cum instituto Dei, & munere quod Respublica maxime divinum habet, pugnantibus. Insigne Hebræorum flagitium fuit, quod, fastidito regimine Dei, quo ipse rerum arbiter auctorque, veluti ex oraculo, gubernationem omnem peculiariter dispensavit, Regem, quamvis dilectum præcipue Deo, & illi populo jam destinatum imperii genus, exposu-  
laverunt, neque dubitandum est, tyrannidis facinoribus  
non

non semel punitos esse postea, qui Regnum non pie experiverant. Sed cum acceperint jam Regis imperium, jussi sunt, hanc formam regiminis colere, neque de illa mutanda, in maximis etiam Reipublicæ malis cogitare. Ejusdem regulæ interpretes & auctor, cum in terris ageret, Opt. Max. Servator Noster fuit. nam, cum Cæsari dari jussit, quæ sunt Cæsaris; quis non videt hoc eum præcepisse: ut Romanis Imperatoribus (manebimus enim in exemplo) juxta potestatis, quam haberent, modum, adeoque dum maneret eadem Principatus Romani formula, omnibus eodem modo; at vero, cum distractione imperii aliaque fatali conversione, in novum habitum Principatus ille se composuisset, singulis Imperatoribus juxta disciplinam à Republica institutam & ab Imperatore comprobatam, illi, qui sub ditione eorum, aut ejusdem Reipublicæ membra sunt, honorem, obsequium ceteraque per totum formulæ publicæ argumentum, bona fide præstarent? Quis item neget, Sanctum Apostolum, cum tam distincte tribui vult, quod cuique imperantium debetur, simul improbare eorum studium, qui Deo auctore discreta, confundere, & cui non debetur, quidquam tribuere, aut cui debetur, adimere, non verentur.

Si hæc dicerentur in Musæo Politico apud Germanum Patientem (cujus nomen nemo bonus civis sine affectu audire debet) quas ille vobis historias, Amici, & in historiis tragædias memoraret? Omissis forte ceteris, diceret: Tribus fere ab hinc sæculis, Romani imperii apud Germanos eum coaluisse statum, qui ab antiquiore multum diversus esset. latam super eo regiminis genere legem publicam verendæ sanctitatis; adjecta juramenta, & quidquid inter homines, præsertim Germanos, fidei colendæ validum aut decorum. Hinc civilis officii munia adeo deinceps pependisse, ut civis nomine indignus haberetur, qui latum unguem ab aurea illa formula excideret. Jactas quidem subinde voces ab iis, qui fortunam potius quam utilitates Principum colunt, de laxandis legum vinculis, & intendenda vi

da vi imperii : sed accessisse præsertim ex peregrino & late spectante consilio fatalem stimulum, quo effossæ mentes & inquietatæ parturire cœperint opus, cui totius Europæ scena, pro materia incomparabilis, & plusquam tragœdiæ, vix sufficeret. Ex eo tempore novam Politicam exortam; quæ partim ex veterum, Theramenis, Alcibiadis, & id genus hominum commentis, partim ex nuper repertis artificiiis, otiose disputaret de optimo reipublicæ statu, & facilius quemvis ei præferret, quo Germania utebatur : quæ stilum & formam publici sermonis commutaret, verbisque & exemplis præteritis, rerum præsentium habitum describeret : quæ sæcula transferret, & proxima remotis, in eundem cumulum confunderet : quæ figuras & simulacra & honoris magnificentiam, longe aliis de causis apud omnes Rēpublicas receptam, de ipso imperii jure & vi potestatis acciperet; atque ex diverso, veluti mutatis vicibus, sacra Reipublicæ ad inanem majestatis speciem referret : quæ omnem de Rerumpublicarum formis philosophiam nescio quibus captionibus eluderet : quæ mitissimum Religionis nomen in atrocis teli genus converteret, quo, tanquam Alexandri gladio, omnia divina humanaque vincula disrumperentur. Huic mirabili Politicæ, cum generosi cives & homines patriæ studiosi, opponerent preces, literas, monita, libros, lamenta, jura denique Reipublicæ : in discordias & arma itum esse. ut jam nostrum fecerit calamitas temporum, quod de simili contentione Romanus Poëta extulit :

*Hæc quantum terra potuit pelagique parari,*

*Hoc, quem civiles hausserunt sanguine dextra!*

Silentibus deinde inter arma legibus, admirando Dei consilio tandem factum esse, ut, quam externa sapientia in Res Germanicas induxerat Politicam, externa vis oppugnaret, civisque Germani jura, citra ambages peregrini disserterent juxta ac tuerentur. Nunc pacem & leges & pristini status morem, in spe & oculis esse, si Deo visum fuerit : cujus justitiam vindicem sicut nimis strenue in caput nostrum irritavi-



tavimus, ita nimis segniter in hunc diem studuimus placare. Hæc & id genus alia, ille, quem dixi, animo, studiis, fato vere Germanus, vobis, jucundissimi commilitones, explanatè commentaretur, si attentos auditores nactus esset: & magnis experimentis casibusque collectam de boni civis officio sapientiam, talibus ferme notis summatim insigniret: noxium publice & nimine civilem esse morem, civitatis statum, ejusque descriptionem, variis interpretamentis, conjecturis, ratiunculis, & privata disputandi lubricine vexatum ire: Leges de Republica sanctiores habendas, quam ut simplicitas earum, fucò oblini, aut curiosorum civium examine in dubium vocari debeat: impie eos facere, qui cum Theramene vel clanculum operam dant mutandæ Reipublicæ, atque interim studium patrii moris palam jactitant; vel incusato apertius præsentī statu, commoda alterius & utilioris extollunt; esse enim hanc ex illis disputationibus, ad quas sine scelere perveniri nequit; quæque non controversiæ modo, ut loquuntur, sed totius civilis ordinis ac Reipublicæ statum pervertunt. Temporariam illam calliditatem, ac Theophrasti πολιτικά τῶν καιρῶν, sive *Politicam Temporum*, in tuenda Reipublicæ disciplina semel institutā, & ad eam accommodanda omni civili administratione locum habere; non in disceptando & debilitando præsentī statu. In quovis statu legitimo, si valeat, id est, si non desint cives


*qui consulta patrium, qui leges jurag, servant,*  
recte geri Rempublicam posse. Tempore autem fatalium calamitatum ingruente, longe alias Ciceronis Romani, quam Græci Theramenis artes observari, quibus meruit, ut ab Augusto, post obitum, verissimo elogio φιλέτατος, sive *optimus civis* celebraretur. Nec majores, nec posteros cogitare, qui defensam per infinita discrimina Rempublicam, adeoque servatam ex atrocissima tempestate navem, in portu demum desperare instituant. Beneficia, favores, opes, honorum fastigia, & quidquid de Republica contra Rempublicam sperari potest, mera infortunia esse. neque

k k

facile

facile civium cuiquam impune unquam fuisse vel cogitata, vel conata, de Reipublicæ statu mutando. Atque hoc ipsum est, quod adeo mihi persuasi, Commilitones, ut credam non deesse rationes & exempla, etiam cum à Theramene discesserimus, quibus alius quoque, præsertim pio civilique sensu præditis, persuaderi posset, quod sentio, si id agendum foret. Romani ap. *Dionem Cassium* annotant: *per septingentos ab sua urbe condita annos, neminem, qui collegam suum magistratu & honore deieceret, per unicum annum supersuisse.* possetque illa observatio fatalis vindictæ, insequentis ævi exemplis augeri. Quid de iis opinandum est, qui non collegæ sed reipublicæ statum violare, quocunque modo audent?

Sed tempus est, sermonis hujus finem facere, & in alium locum disferre *Lyfiam*, qui nunc contra *Theramenem* statuendus erat, ut memorabili civilis officii consilii-que exemplo amplius vobis declararet sapientiam, Rerum-publicarum tranquillitati, unice, ni fallor, necessariam. Quam propterea vobis, Commilitones suavissimi, quanto possum opere commendo: atque, ut interea civilis animi rudimenta in civitate Academica, vitæ morumque pietate ac modestia, serioque studiorum profectu, sicut spe vestra & sæculi dignum est, capessatis, omnes ac singulos amice cohortor.



## XIV.

## ORATIO

De

C. CORNELII TACITI

Historia, ac multa scribendi arte  
judicioque.

Anno clō Idc xxxvi. *private Annalium interpretationis  
præmissa.*

Qui

**Q**Uæ rerum gestarum memoriam posteris tradidere, Auditores, non paucis semper vel conflati difficultatibus, vel abrepti esse erroribus deprehenduntur. Cum enim in curanda publicorum monumentorum fide, non eadem sit omnium ætatum industria aut constantia; & vero rerum humanarum plurima non in cortice videri; sed quæri in medulla, nec tam facie inspecta possint agnosci, quam ex umbra debeant interdum conjectari: ideo primum ex investigatione verî laborem scriptoribus nasci existimandum est. Quo cum accedit ex actionum indole orta diversitas, sit adeo, ut nec omnibus ita videantur gesta, quæ ita gesta sunt, & ab ingenio cujusque ac captu formam non unam ac habitum nonnulla nanciscantur. Quæ res miram sæpe scenam exhibet: dum nonnulli de peregrinis, ut de domesticis, autumant; alii de iisdem nihil minus quam eadem produnt; quidam ipsa sequioris sententiæ fuga, ac judicii, cui impares sunt, affectatione, in culpam feruntur. Nam de iis nihil attinet dicere, qui, cum temeritate potius rerum gestarum monumentis incidant, quam ad ea sobrio moderatoque judicio accedant, id plerumque satagunt, ut quo, quemadmodum, progressi sint aut progressuri, & ipsi dubitent denique quærantque, & alii nesciant. Illud satis constat, à judicii rectitudine, ex qua cetera in hoc negotio pendent, & labi plerisque facile, & deflecti nonnunquam cordatissimos posse. Interventit fors levissimæ cujusdam rei ignoratio: adest credulitas, variis artibus, ipsiusque sæpe modestiæ nomine bonis quibusque conciliata: sollicitat ingenii cura ac eruditionis, cujus suavissima est, qua obrepit, fascinatorio: denique se ubique ferme inferunt illi ab omnibus libris proscripti, nec non admissi tamen aut retenti callidissimi rerum mangones, amor & odium. Quorum causas, etiam cum non recentes, etiam cum nullæ sunt, quisque sibi approbat aut invenit. Hæc, inquam, omnia & singula, ut valida sunt ad abducendum à vero scriptoris judicium, ita veterum recentiumque, plerosque impulere non-

nunquam, vel in devia subduxere. Nisi quod unus omnium ea in re & absolvit conatus, & curam est supergressus. Is est C. Cornelius Tacitus. cujus nec sublimius quicquam iudicio aut rectius, nec eloquentia gravius, nec ubertate fertilius, tota gentilium habet eruditio. Adeo non historiarum tantum dignitatem perfecit, sed mensuram omnis ferme sapientiarum, qua hominibus licet, explevit. Qua de re, quædam paulo altius hic repetere nobis constitutum est. Quamquam enim nec laudes summi auctoris nostra capere tenuitas, nec præstantiam explicare ullius possit eloquentia, supervacanea tamen videri non debent, quæ veluti quædam initia, quoquo modo possunt ad interiorem nitentes prudentiam juvare aut commonefacere. cum & sera hic plerumque, quanquam sollertibus ingeniis, sua cuique industria per usum magistra sit; & multa ideo raro aut nunquam observentur, quia jam alia quædam sunt neglecta, quæ tanquam instrumenta observandi intelligendique ac adminicula, ante cetera fuerant notanda. Quemadmodum autem, qui è subterraneis metallorum specubus pretia rerum ac divitias effodiunt, non levibus ad eum quæstum impensis, machinis quoque ac substructionibus, tum laboris improba contentione, ante omnia vero animo constanti ac fiduciæ pleno opus habent: ita nisi quis ad Cornelianum illud prudentiarum aurum investigandum, vividam & acribus habilem industriam, cum ingenio erecto iudicioque adferat, nisi impendium temporis tantæ spei destinet, illi ego, ut totis abisteret sacris, auctor fuerim. Perennes venæ, inexhausta lucra: illæ coli, hæc excoqui volunt; ne in non minora degenerare incipiant damna ac deficere. Quotusquisque enim non in limine impegit, aut propter cubicula tot opum ac receptacula oberravit? quotusquisque in Tacito ipsum invenit Tacitum aut agnovit? Quot autem vel abripuit vel continuit ultra citrave metam opinio, vel majestas cæcavit, vel severitas arcuit, vel non admisit subtilitas? Dictio tota sublimis, ignea, & accuratior quodam studio exacta. Quam, cum, ambitu

fuit,

stricto, membris arctis, solide compactam, forma splendorque superbissimo magnus artifex induit, oculos plerisque aspectantium ac sensus præstrinxit. Itaque cum paginam cogitas, rem voluminis exhibet; tum vocem, sententia est, monitum est, doctrina est. Nemo in tam parvo corpore tam robustus fuit: nemo tantam vim minore molimine ostentavit. Egregia, rara, occulta ubique profert, sed prolatis plura includit. Sapientiam ubique & modis variis ostendit, sed magis sub ipsa & in ejus penetralibus insinuat ac commendat. Quo artificio, prohi fidem prudentium! qua concinnitate? Verba delecta, apta, idonea, rebus paria, quodque commendationem præcipuam meretur, summa ubique felicitate prompta ac parata. Textum ipsum pari severitate ac rectitudine, magnificum, idemque nativum, in quo cum laboris speciem singula videantur habere, omnia rectius ingenio scriptoris indolique tribuuntur. Qui cum per seriem rem edisserit, nullibi magis sæpe, quam ubi minime videtur, narrationem connectit. cujus non teneorem minus quam materiam prodesse voluit. Attentum ob id memoremque suo jure lectorem flagitans: qui ut in partibus totius usum negotii, ut ipsas inter se pariter & cum tota re pervideat, ut rerum in speciem minimarum non exigua momenta, in ipsa sæpe-dictione ac stilo penetret, sagacitate insuper & bona quadam fortuna opus est. Cum enim, ut & cœpimus dicere, & postea clarius explicabimus, arcanam ubique prudentiam contineat, non admirabile minus est & arcanum isthæc talia exprimendi subji-ciendique genus. In quo, ni fallor, nemo ei nisi longo proximis intervallo est, aut haberi potest. Græcorum felicitatem & ingenium, à solo ad Latinos translatus dicas: adeo nihil est in toto sermone, quod non vastæ illi menti, exactæ illi & pæne plusquam imperatoriæ sagacitati examissim respondeat. Atque hæc est illa pompa, quæ antiquis tantopere probata, invidenda huic scriptori præconia peperit: Hæc est gravitas illa, quam Quirites sui non capiebant, maximi doctissimique viri non satis mirabantur.

Hoc est illud instar, ac species, quæ & diffusam Livii amœnitatem lacteumque fontem, & Sallustii splendorem ac numeros, & aliorum virtutes singulas, uno eloquentiæ tenore æquare an superare creditur. In qua, cum asperitatem aliqua videantur habere aut insuetam speciem, nihil majestati tamen officiant, sed ejus robur absolvunt. Quam hæc talia non minus decere existimanda sunt, quam horridæ leonis exuviæ Herculeos olim humeros ipsa monstri specie commendabant. Rursus, quemadmodum ejusdem Herois cothurnos nequicquam impari aptaveris; ita suum ista veluti dominum agnoscunt, nec alienis tractari manibus, aut judicio dissimili sustinent. Quod ut in eam perfectionem in Tacito excresceret, non oratorem modo clientibus ac patronum, sed egregium præclarumque civem rei commodaverat publicæ. cujus emolumenta, quantum quidem infestis virtuti temporibus res ferrent, cum laude non semel administravit: re edoctus & factus, quæ post illa universos doceret. Quem enim fuisse & quantum credimus, Auditores, cujus non constantia frangi, cum exhaustas clarissimi populi vires & bonorum sanguinem & ingenuos spiritus tyrannis quotidie effeiret: nec deprehendi prudentia, cum conquirendis pulcris animabus nimis sufficeret furoris ingenium; nec averti à salute communi & servitutis miseris, animi intentio, cum non oculis jam, non auribus, non præfagis gemitibus, ut erumperent, usus sui aut spatium superesset: cujus, inquam, immota mens inhiberi inter tot difficultates non potuit, quin in mediis calamitatibus ejus auctoribus æternam meditaretur infamiam; quin ad posteros de tuenda republica in extincta jam, salutaria monumenta destinaret. Quod, assurgente cum maxime nova beatoris sæculi luce, incomparabiliter præstitit. Resumebat itaque spiritus, & toto pectore vires colligebat acris & vivida indoles: ibatque pulcerrimis passibus per memoriam tot rerum, quas in ipsa quiete sua & inertia gesserat, per diffusam omnis vitæ factorumque intelligentiam; quæ à majoribus usque repetita, ac tot casibus

causibus perspectis aut observatis aucta iisdem terminis, quibus vita hominum & actiones, continebatur. Surgebant denique Historiarum primò, mox Annalium exactissima & perennia opera, quibus & consilia reipublicæ & regimen humani generis, tanquam in bibliotheca quadam omnis sapientiæ civilis & armario, utilitatibus sæculorum & admirationi consecraret. Quod institutum, ut capacem tantæ molis æmulum neminem metuit: ita rationes plerorumque ac consuetudinem invertit. Nullam hic larvarum congeriem, aut, inutilem sæpe, rerum nitentium lustrabimus scenam. Bellorum strepitus & triumphales pompas, quibus libri omnes, omnes annales delectationem quaerunt, penes otio abundantes & festivos relinquemus: Bellorum tamen jura ac vias, cum honorum insignibus, cum Tacito expendemus, penetrabimus, dijudicabimus. Situs gentium, locorum amœnitates, claros eventus, exitusque varios, & quæcunque specie vel jucunditate valida; aliunde petemus, cum ad ea diverti commodum erit: ex hoc scriptore ingeniorum temporumque sapientiam, & interiora Principatum, successusque ac fata rerum conquiremus ac pertractabimus. Introspecturi res primo aspectu leves, minimeque fecundas: sed quæ ad maximarum nobis momenta (quod divinitus ab ipso Auctore monetur) viam sternent. Quas, si clarius agendum est, & ipsas continent. Punice Romanæque acies, intra scriptoris artem & ingenium ferme subsistunt, in suis sibi campis placent, hic se efferunt, hic exultant: mœsta hæc & tristiora rerum, lætissimo proventu in omne ævum diffunduntur. Manet eadem species ac similitudo: ex cujus occurfu quisque se ac sua velut in speculo agnoscit, quisque docetur, laudatur, arguitur. Idque non in aperta tantum & obvia factorum facie: sed per abdita quæque recessuum, per anfractus actionum & contextus, per omnem honesti turpitudinisque ambitum, per noxæ commodique latentes plerunque semitas instrui hic datur ac perfici. Quæ rarissimi mortalium per se capiunt, aut inusitata ac cœlesti prudentia ipsi sibi distant, Noster

Noster autem sine exemplo mente ac stilo est complexus. Jam primum, supremam sibi legem ipsum fixisse apparet, nihil vile & ad vitam inefficax immiscere. Quod ut Historicum inprimis ornat, ita a solo expectari Philosopho poreft. Cujus est de actionibus hominum ac utilitaribus sententiam ferre, & ad eas omne studium, scripta omnia exigere. Quo neglecto, otiosis narratiunculis seriæ expositioni locum adimi, aut fœdari seriem necesse est. vicio ut satis frequenti hodie, ita decori speciem apud incautos habente. Itaque historias nonnulli tanquam pueris scribunt, aut mulierculis; nonnulli tanquam fabulas legunt. Quos si quis de fine sui negotii interrogaret, dubitare primo inepti mortales & temporis prodigi inciperent, dein nescire. Cujus ne quid simile cuiquam hic eveniat, prospectum est opinor capacibus ingeniis à scriptoris tanti dexteritate. Quid enim ille inconsultum, quid alienum narrat? Imo quid omnino narrat tantum? cum sensus omnes, omnia loquendi genera, nescio quid *περὶ πάντων* ubique præferant: cum informare vel referendo soleat: cum factorum usum ab eorundem notitia ac cognitione nunquam sejungat. Quam nec obscuram ulla ex parte aut imperfectam esse sinit. Unde initia rerum structa, quæ occasio & causæ, rationes progressuum ac vias, eventuum æqua aut iniqua, quid debitum sinisteritati ac prudentiæ, quid fato & calibus interruptum turbatumve, denique animata vivaque actuum imago, velut in tabella exprimitur ubique & proponitur. Quis deprædicet satis hanc industriam? quis item illam? cum in origines intimas ac ultimos rerum fontes sese porrigit oratio; cum parum tradidisse sibi summus doctor videretur, si tradendum aliquid superfit: cum in auctoritatem doctrinæ habet, nihil erroribus, aut quæ copiose apud Politicos subnascuntur, interpretamentis relinquere. Idem qui, cum ratio operis ac institutum fert, aut gravitatem res postulat, tanquam ex augusto tribunali incorruptissimus judex severam & idoneam pronuntiat sententiam. Cujus ideo nec tempus certum, nec locum sibi præscribi




feribi patitur. nisi quod ubique in tempore, ubique in loco mera est concinnitas: sive ille judicia præmittit narrationi, sive continuat ac includit, sive explanationi pondus subjicit. Quod cum & aliquando suspendit aut differt, vere ad priscam illam seu modestiam seu circumspicientiam accedit, qua non liquere sibi, in causis dubiis iudices testabantur. Id quod historiarum conditori non in ultimis habendum. cujus est, nihil veritati detrudere usquam aut officere. Igitur temeritatis notatur, qui in ambiguis facile pronunciat; malæ fidei, qui rem dubiam vel pro certo affirmat, vel pro plano transmittit aut negligit. Quamquam mirificam, & ad argumentum sui ingenii sat efficacem, inter hæc præcipitia rationem ac medium quasi iter ingreditur Noster: cum tutissimo conjecturarum aliquot nomine, una earum & quid sentiendum sit, ceu vir prudens ostendit, & varietate, ut Historicus, dissimulat. Ne aut judicare sine monumentis, aut in factorum nube videatur cæcutire, quod hebetudinis videri possit ac imprudentiæ. Ceterum rectius hanc prudentiæ partem in rem præsentem rejecerimus: ubi & sub exemplis clarissime hæc expediri, & quomodo nullum varietatis istius membrum, etiam cum amovendum à scriptoris arcano judicio est, etiam cum præter speciem, quam diximus, nihil videtur habere, sine usu sit, ostendi potest. Dicendum jam aliquid esset, de narrationum ipsarum artificio, & quam eleganter Græci vocant, *εικονισμός*, illa peculiari, illa latente & ad usum ex arte facta; ut & de arcana interiorique docendi instruendique ac judicandi ratione; tum de similibus nonnullis; nisi ea esset talium ratio, ut observari facilius, perspectis meditatisque probe singulis, nec minus contentione ex arte & judicio instituta, ac pertendi industria possint, quam verborum subtilitate deduci aut explicari. Dudum enim nos vocat præcipuum majestatis Cornelianæ instar ac specimen; densitas illa, inquam, &, ut sic dicam, complexus sapientiæ multiplicis, sive sapientiam in se collectam & suo ore loquentem dicere malumus, dignum certe nomen vix assi-

gnabitur. Inter cetera, quibus divinum Stagiritæ ingenium censerî visum est, interpretes numerant, copiam sensuum sententiarumque & cumulum, id quod in illo philosophandi genere ac severioribus Musis, facilius sane & commodius poterat locum habere. Eam tamen ipsam laudem quis in Nostro requireret? quis tanta ubertate quæret, aut inventam, quanta est, capiet? Nobili acie & aquilina opus est, ad sustinendum hunc diem, hos, quibus vere magna ingenia explorantur, ignes. cum ex uno radio multiplex & velut numerari metuens offusa prospectui lux, oculos laceffit & fatigat mentem: cum sub uno effato tot alia, sub paucis rebus tot majores emicant. Nisi quod splendorem suum nonnulla minantur potius apud recte suspicantes, quam primum intuentibus ostendunt. Igitur non videndum modo quod adest, sed eruendum quod subest. Ubique enim & illud agit, quod instituit; & aliud tamen innectit, quod cum diversum à re ipsa sit, sine eo tamen rem intelligi noluît. Habet nimirum hoc solida fundataque eruditio, ut ubique sibi occurrat, ut ubique, cum modo tamen & fructu, tantarum rerum fruges exsplendescere jubeat, quantas in suam sibi amplitudinem collegit. Quid enim fuit usquam aut cogitari potuit, quod lateret Nostrium, de quo parum perire & accurate judicaret? Ingenia rerum ac naturam nemo tali acumine penetravit: nemo tali concinnitate ad usum & lucem transtulit. Animorum præsertim prudentissimus, & humanarum molitionum conatuumque ad miraculum sciens. Semel hic monendum est, non exiguum in hoc Auctore, ut & in omni vitæ sapientia esse momentum, perspectas habere in plerorumque eventuum similitudine mentes, habitusque animorum, & cogitationum solitas in iisdem rebus vicissitudines. Hinc fontes imperandi regendique multitudinem detesti, hinc consilia in futurum præcepta, hinc natæ personarum descriptiones accuratissimæ; ex quarum una plurium sæpe rerum momenta petantur, quam ex integro præceptionum libello. Huic perspicaciæ debemus, deprensas passim artes domi-

dominationis ac fraudes, & occulta aulae, quæ egregie Tacitus in apricum protrahit, Atq; hic si vellem orationi indulgere, vereor, ne, dum ad singula respicerem, universa nunquam exhaurirem. Comuniſſima noſtra ætate regiminis forma Principatus eſt. De eo multa multi; aliqui præclara, aliqui ſubfrigida, aliqui imperfecta. omnia autem & abſolute & graviter & utiliter complexus eſt Tacitus. Idem qui de aularum bonis praviſque, proſperis vel adverſis omni commentariorum mole opulentiſſe peregit. Denique, ſi cui ſcire curæ eſt, quid interſit inter hunc & Politicorum vulgus, primum quidem vix tulerim tam iudigne eum comparari; rem tamen ita æſtimari poſſe auctor fuerim, ſi Apellis alicujus aut Protogenis tabulæ proponantur. Accedent pictorum plurimi: alii ne judicare quidem de impenſiſſimo artificio poterunt. nam quid præclarum in eo eſſe? figuram ubique notam aut obviam, præter obſcuritatem & implexum quiddam, novi nihil habere. hic addi aliquid debuiſſe, hic lucis pluſculum, ibi parum. Modetiſſimi ſecum murmurabunt, ſibi quidem hoc artis hætenus non liquere. Plane quod Noſtro uſu venit. Nemo tamen, arbitror, cordatiorum, ob aliorum imperitiæ, præſtantiſſimo artifice artem denegabit potius, quam ſoli ſine exemplo & comparatione adſcribet. Sed enim iſthæc cuilibet penſitanda relinquo. Redeundum enim eſt in viam. Quam priuſquam decurramus, obiter delectationis alicujus, & quæ lectores condimenta laborum hic maneant & diverticula, mentio eſt facienda. Inter quæ orationes illæ, variis de rebus inſtitutæ, quam diſertæ ſunt, quam graves, quam ſœcundæ? ſeverum aliquem & priſca illa majeſtate gravem ſenatorem, ſententiæ loco in curia perorantem audire mihi videor, quotiens in illas incido. Adeo grande quid ſpirant omnia, & cum ſua ſibi magnitudine veluti certant: exhausta ſemper, quam pertractant, materia. Argumenta valida, pulcerrimo aggeſtu cumulata ac diſpoſita: rationes intimæ, penetrantes: pondera quovis ſtimulo acrius fodientia animum. Sed & lineas

tantarum rerum duxisse, nonnunquam operis instituto satis est. In quo, mira felicitate, paucissimis verbis non materię tantum amplitudinem ostendit, sed absque omni eloquentię affectatione ejus exornandę rationem insinuat. Omitto varia omnis prudentię scita, opportuna subinde illustratione animis legentium conciliata: tum renovatam passim non sine utili interpretatione veteris ævi memoriam, Quod si perfunctorie fiat aut inconsiderate, oneri ac impedimento esse incipiunt, quę non nisi ornamenti locum in hac scena possunt sustinere. Jam ubi à rerum ordine paululum declinat, quod raro, & minime ex quęsito facit, nihil aptius, jucundiusque reperire est usquam ac videre. Nec cessatı speciem induunt, quę ut requiem animo aliquam præbeant, dignitati tamen rerum & loco exigenti reservantur. Tum ea plerunque discuntur, quę cum ad omnem operis cœpti historiam hoc pacto conducant, lætum ac bonę spei plenum ad reliqua lectorem dimittunt, aut ad priora exactius imbibenda revocant. Cujus rei nec providentia paucis explicari, nec fructus laudari jam totus potest. Nec enim ignorare quemquam velim, unum illud mihi hac oratione quęsitum esse, ut prægustum aliquem tanti Auctoris munus expertis præberem: ne in graviora opinione cuncta delati, aut obhærescendum scopulis, aut indicata difficultate, sine obfirmato adversus eam animo ingrediendum hoc iter, possent existimare. Claudemus igitur pariter ac repetemus dicta, gravissimi in politiore literatura viri, deque Tacito Nostro optime meriti, judicio. Sic autem ille: *Non est in Græcis aut Latinis, & fidenter dicam, non erit, qui prudentia omnigena laude huic se comparer: adeo non veremur, ne quis anteponat. Singula pagina, quid pagina? singula lineę dogmata, consilia, monita sunt: sed breviter sape aut occulta, & opus quadam sagace mente ad odorandum & assequendum, sicut non omnes canes, feram; non item lectores virtutes hujus dotesque aut indagant, aut capient. Viris opus est, & cum ingenii quadam subtilitate, judicii rectitudine: & ut verbo dicam, natura bonitate. Qui non habet, me audiat, & alias res agat. Quod tanti viri judicium ne se-ro credatis, sua cuique cautio aut industria præstabit.*



XV.

## ORATIO

*Anno Christiano clō lōc xxxv.**privata*

## VELLEJI PATERCULI

interpretationi præmissa.

**V**ELLEJUM PATERCULUM, politissime eloquentem virum, & brevitatis eruditissimæ Historicum, etiam eo tempore suspicatus sum, quo credere aut judicare nondum potui, id est, cum primum legissem. Rapiebat me per scriptores quos sæpe laudari audiebam, puerilis cupiditas: ita enim potius dixerim, quam industriam, quæ in ætatem istam nondum competere poterat. factumque est, ut uno ferme tempore *Florus & Vellejus* obtingerent. In illo timidius, & cum horrore quodam profundioris genii versabar: in hoc lætiora erant pleraque, faciliusque admissurus videbatur meam cogitationem, etiam cum non admisit. In *Floro* oratoris gravitatem panegyricam, quia capere fas non erat, ut sunt animosa & in longum jaciuntur puerorum vota, audebam optare: In *Vellejo* latere videbatur omnis diligentia Historici & artes; quamquam animo ad elegantiarum novitatem prono, supra historicum placebat. Hærentem ergo inter voluptatem, quam suavis gustata commovebat; & desiderium, quod variæ opinio artis excitaverat: transversus, ut sic dicam, turbo plane de statu, quem moliebar, repulit. Frustra & inepte amoris & judicii rationes erant subductæ, postquam in summi Viri & Criticorum ferme principis censuram *Vellejus* pridem, ego ex quo æstimare *Vellejum* cœperam, incidimus. Nisi quod, tacite &

plus miserabar conditionem optimi doctissimique viri, qui cum primus Vellejum edidisset pariter & laudasset, industriae præmium apud omnes, culpam laudationis apud præcipuum judicem adeptus est. Exercuerat jam frequens ejus rei cura meam disquisitionem, nec comparare eruditorum sententias interim aut detrectare decebat: cum ex nec opinato mitiorem factum, quem reverebar, Censorem, notamque prioris severitatis, alibi elogio plane magnifico inductam animadverti. *Serium, doctum, quantumvis opus*, eo magis serio, quia sero, appellabat, quod antea nulla magnopere laude dignabatur. Igitur Rhenani quidem vicem impenitus lætabar. quem licet fortasse aliquando officiosæ obsequium manus & in confragoso nitens opera amplius quam optabat evexerit: tamen cetera viri virtus, & cuius vel inter errandum ostendebat vestigia, judicii rectitudo, *rifu, explosione, convitiis* haud dubie superiorem alias quoque debuerat fecisse. Verum, ut Lipsiani stili aculeos, toties in tam melleis scriptis obvios inquirerem, non permisi mihi: quippe cuius profectui utilius videbatur ac convenientius, in ipsius rei momenta animum intendere, & quicquid in Vellejo laudaretur, paulatim iudicio delibare, commentando excogitare, observatione penetrare, ratione complecti; adeoque ad primi affectus mei propensionisque accuratum examen inter summorum hominum approbationes legitimo quasi tramite procedere. Crevit cum ætate ac disciplina id studium: quæque in Historicorum præcipuis commendabant eruditi, ea clanculum ad Vellejum contendere, & pleraque accommodare institueram. Quamvis enim utilitas majorum operum conditoribus artes, angustioris scripturæ modus excludat, neque ostendi tam copiosa eruditio posse videatur, ubi non potest explicari & quodammodo expandi: vix tamen licuerit aliquid nominare, cuius hic non reperiantur specimina, eximia propositi sollertia, velut in compendio concinnata. Quod ut amplius intelligatur, ante cetera totius formam operis & consilium indagabimus. Brevem sane, ut prædicimus,

ximū, ambitum designavit Auctor : sed quo tamen amplissimæ commentationis ubertas concluderetur. Non ut in angustiis, diffusa per terrarum orbem Romana celebritas arderetur, scriptiōem contraxit : sed, ut in unum collecta æstimeretur populi principis magnitudo, scribendi nervos & momenta compegit. Nimirum, ut alii splendoris Romani decus, cum pompa & paratu in oculos humani orbis disperferunt : ita Vellejus lucis ipsius utilitates, cum cura & arte, prudentissimi cujusque industriæ accommodavit. Quæ in re prorsus miror, dissociabiles laudes, artis quodam commento ita copulatas, ut, cum rerum compositioni solum videatur vacasse, nihil omiserit ornamentorum : neque magis compendio expositionum alios vicerit, quam exponendi genio instructuque æquarit. Jamprimum ipsa rerum series, quam est accurato ordine distincta, quam facili tenore continuata, quam utili opportunitate interjuncta, quam diligenti designata notatione temporum ? Quæ ut provide & ex usu lectoris dispenseret, aliquando eruit ex abdito, nonnunquam scrutatur ex vestigio ; alicubi antevertit, est cum differt aut suspendit. Neque ita *turbare temporum seriem aut negligere* dicendus est, quod nonnullis animadverto in suspiciōem venisse. Cur dispergeret temporibus, quæ cognitio argumenti connectit ? cur misceret describendo, quæ nec describi nisi sigillatim possunt, neque misceri, nisi confundere instituas, debent. Scilicet non tempus, sed indoles gestorum ; non intervalla actuum, sed affinitas negotiorum, non eventuum supputatio, sed cognatio principiorum, causarum, momentorum, conjungunt aut separant, aut miscent historiam. quæ si in diversa tendit, cavebit ne unum videatur finem præferre ; sin ab ejusdem generis primordio ad eandem metam proficiscitur, melius miscebit narratio, quæ proposito cohærent, neque tam seorsum conferendo aliena, quam vicissim propria ordinando, stabile continuumque opus persequetur. Utriusque rei exemplum in Nostro habemus. qui non magis carpi debet, cum in diversis, rerum integritatem tempori anteponit, quam cum

cum attinentium cohærentiumque membra temporis respectu serieque discriminat. Quod ille quidem tanta præstitit dexteritate, ut inter consummata ejus artis exempla esse mereatur. Sicut & in ceteris. Inter quæ non minimæ rem curæ semper arbitratus sum, constituta recte & decenter aptata historiæ principia. Nostis, Auditores, quid in Sallustio desideret summus Criticorum Fabius. De aliis nil permittemus nobis hoc tempore, vel suspicari, vel judicare. nisi quod omnino paucos præci recentisque ævi eo nomine mirari possumus. Equidem, qui accuratiorem ab alto noticiam moliuntur, facile superflui aut molesti apparent: sicut rursus, qui propiore ingressu opus ordiuntur, aliquando de gratia pariter & prudentia periclitantur. Verum adhuc facilius incipitur hæc tela quam pertexitur: fitque haud raro, ut à laudabili origine petita principia per anfractus aut ambages morose potius circumducantur, quam ad institutum constanter deducantur. est ubi saltus & præcipitia observes, nec rariores lapsus. quosdam crassior per suscepta rapit spiritus; nonnullis delicata mollietates generosæ aggressionis impedimentum adfert. Et, quandoquidem à longinquis aliquorum molitionibus non abhorreere talis comparatio videtur, post reductam ex alto naviculam, sæpe in ipso portu naufragium aditur. Dicas, prorsus in irritum ardui laboris exorsa recidisse, quotiens invita concinnitate operi adhæseres, aut in ipso connectendi articulo obhæseres. Noster, sicut nec alienum suo volumini principium arcessivit, ita nec novum affectavit: sed, unde plerique Romana cœperant, à gentis nobilissimæ conditoribus Trojanis, eorumque post excidium demigrationibus, ita progressus est ad institutum, ut in simili conatu sic tamen plerosque præfandi nobilitate superaret. Cujus consilii rationes sigillatim arbitrari potest, qui advertit, quam & gentis ipsius admirationi, & Historiæ totius usibus propositoque singula convenient. Ut constaret de admiranda fatorum provisione, in excitanda urbe regnatrice, quædam tam efficacis curæ præludia, ut sic dicam, spar-

pru-



prudentissimus scriptor, dum tot urbes, tot gentes, ex ipsis Trojæ cineribus, unde caput urbium gentiumque Roma tandem emersurum erat, suscitatas exortasque commemorat. Jam ipsi gentium, quos subtexit, casus, translationes, profectiones, exilia, unam sedem, unum quæerunt in Latio terminum, ubi non *regna* modo *Troja resurgerent*, quod poëta ait, sed regnorum fata, ut in domicilium & officinam, coirent olim indeque terris dispensarentur. Æquum enim erat, ut qui maxima omnis fortunæ exempla erat daturus populus, è mediis fortunæ casibus, & si cum ipsis gentilibus hic loquendum esset, è lufibus fortunæ variis, post alternatas sæpe vices, post mutata sæpe discrimina, denique ut miraculum omnis ævi & humani generis stupor, existeret. Vix tempero mihi, Auditores, quin in hoc limine subsistam parumper, & libero cogitationis prospectu in altum istud & tremendum Providentiæ æquor intuear; in quo alii per mille mortis specimina ad vitam & salutem tendunt, alii inter ipsa faventis cœli ventique beneficia gurgiribus hauriuntur; quidam errant, plures fluctuant, plerique aliquid timent aut patiuntur, neque pauci interim in errore patriam, in fluctu quietem, in formidine securitatem inveniunt: adeoque, ut ad institutum redeamus, non Troës modo ex ruinis suis spem mutuati, ejusdem auspicio, per varios metus, *illum in Italiam portant victosque penates*; sed Romani, Trojana propago, expletis potentiae fati, Italiam suam, ad Iliacæ origines & communionem fortis revehunt: ut vel sic natalium sinceritatem parentibus probent, à quibus fragilitatis exemplo non degenerassent. Fallor an præcipua, certe prima hæc est Historiæ disciplinæ philosophia: ex qua nisi cetera intelligantur judicenturque, nulla sine nube cognitio, nulla sine vanitate utilitas procedet. Quo illustrioribus notis signandum sibi hunc tranfitem Vellejus existimavit. cujus Principium, non rumorum fabularumque varietatem, neque otiosas super consilio fabularum disputationes, sed eminentissima quæque civilis sollertiæ medita-  
 m m Roma-

Romanam dignitatem accommodat, ut alii verborum honore eam exornasse, hic argumentorum splendore videatur ostentasse. Quod si aliquis, plura quam necesse erat huc conducta forte conjectare velit, eum ipsa totius operis tractatio in progressu ad ingressum reducet, atque ita docebit, præmunitionis verius necessariae, quam jucundæ præfationis id consilium fuisse. De quo neque nunc dubitare audebit, qui de sola temporum ratione & notis cogitabit. quæ cum egregium historiæ lumen commodent, singularis prorsus hic Velleji cura elucet. qui ut Urbis epocham, quam dicunt, certa designatione posset constituere, à Trojæ excidio, id est, à solenni & omnibus usitato charactere auspicandum habuit: ne in multis hæreret lector, quæ non aliunde deducuntur. Sicut & ab Olympiade. cujus primordia ignorare, est Romæ paulo post nascentis tempora ignorare. Cumque fato quodam singulari hujus studii, inde ab antiquo, summa scriptorum in notandis temporibus occurrat dissensio: veluti filum quoddam Ariadnes putari debet, ætas aut exitus magnorum virorum, mutatio rerumpublicarum, successio imperiorum, instauratio urbium; quæque alia vel annis definiuntur, vel comparatione ordinantur, vel indiciis investigantur, vel argumentis disquiruntur. Quorum nil omisit Vellejus in exordio, donec per tam cognatas utilesque notas ipsa Urbis & suæ historiæ initia non tam accedit, quam continuat. Solemus in eximiis rerum conditoribus non parvi æstimare, interposita de gestis judicia, insertas opportune sententias, ostensam graviter disciplinam, cruta solerter arcana, causasque & consilia eventuum non minus, quam eventus, explanata. hæc enim ut ardua cumprimis philosophia est, ita non potest aliunde melius peti, quam unde historia prodit; è pectore, inquam, plus peritia quam litteris, imo sic litteris, ut peritia fecundo, omnisque civilis ac militaris actus artibus instructo: quale nimirum ad scribendam historiam adferri debet. Hinc profundæ Taciti gravesque sententia, hinc Sallustii incitata severitas, hinc Livii disertæ interpretationes,

nes, hinc suavissima Curtii & tempeſtiva diſciplinā, hinc eximia monita, ut è fonte, manaverunt. hinc Vellejanæ quoque prudentiæ accincta & nitida inſtitutio derivanda eſt. cur enim eum omitteremus, qui ut apparatus, quem dixi, ubertate à ceteris vincitur, ita habilitate compendii & ſapiendi nervis, omnium artem aſſequitur aut æquat, nonnullorum etiam antecurrit? Diſta jacet, ut quædam fulguris tela: quæ & lumen & vires ſuas in animo capacis lectoris relinquunt. aliquando geminat, interim cumulat. Atque licet ſæpe id faciat, nec deſatigat legentem, nec fatiat. namque ne tædio locus ſit, opportunitas efficit; ſatigationi, dulcitus & agilitas, ſi permittitis ita loqui, Auditores, ſententiarum obſtat. Subeſt ſecretioris prudentiæ deſenſio: &, quod ſeveris operum judicibus vel in diſſuſioris ſcriptionis corpore ipſa frequentia diſplicere poſſet, in hoc tranſcurſu rerum non potest non placere: quia pars narrationis, dicam amplius, pars compendii eſt, ſententiarum diſciplinæque aſſiduitas. Quam & tum proſitetur, cum perſonas nihil aliud quam deſcribit. Hujus laudis propria quædam excellentia Vellejo debetur. qui, quod accurate & ad morum ingeniorumque ſapientiam accomodate viros memorabiles velut interpretatur, communiſione artis aliis jungitur: quod autem una eademque opera tam ſignate, tam lucide per moris boni pravique notas & characteres, adhibito inſuper quodam novitatis, inventi, elegantiae commento, facies, ut ita loquar, vitæ morumque diverſas exprimit deformatque, ejus rei exemplum non inveniſſe ſed feciſſe credendus eſt. Multis obrenditur unaquæque natura involucris: & in tanta moris humani varietate crebra aberrandi occaſio præbetur. Dixerim, non Ariſtotelem philoſophando, non Theophrastum notando, non deſcribendo Hiſtoricos eam prudentiam exhaustiſſe, non longævorum vetuſtiſſimos vivendo eas obſervationes impleſſe. Hinc eſt, quod ingenio & ſagacitate doctorum quotidie plura eruuntur: in quorum ſcriptis inter argumenta profundioris ſapientiæ pono, quicquid tale obſervo. Cum-

primis autem singularis industria requiritur, ut civilis vitæ proprietas ubique attendatur, ut ab ethico commodata Politico serviant; ut quæ illi originem debent, huic debeant faciem & imaginem. quod negotium rursus periculo non vacat, nam & arte profundiori opus est, & nitore civilis cultus. unde videas interdum alteri studentes alterum dimittere, id est, ipso suæ scriptionis decore excidere. quæ nisi jungat talia, auctoritas Historiæ obtineri non potest. in qua nihil humile, scholasticum, affectatum, sed nec ineruditum quid aut rude locum habet. Accedit nova ex temporum fortuna & fati publici habitu difficultas, quo perturbato, ut pleraque alia, sic hominum ingenia studiaque obscurantur aut occultantur. unde bonus aliquando apparet, cujus inter malos astutia est occultior: aut vitiosus suspectatur, cujus vel in latebris securitatem quærit virtus, vel in minus grato opere invidiosa fatigatur industria, vel sublimitate instituti non intelligitur prudentia, vel adjutorum solitudine caussa proditur. Sed nec à privatis morum notis, publica æstimatio satis ubique distinguitur: cum tamen in personis ipsis, hominumque indole ac studiis, omnis publicæ rei semina reponant necesse est, qui ad fecundam civilis peritiæ frugem votis ac opera contendunt. Semper sunt in magna civitate aut imperio alique, quorum spiritu publica instantur, impetu præcipitantur, ardore incenduntur, motu agitantur, vi sustinentur. hos cum Vellejo notasse, & suis quibusdam lineamentis discrevisse, est ipsius status viscera inspexisse. nam cetera multitudo, pars sequuntur antecedentes, pars fluctuant circa conspicuos, rarissimus quisque sibi aut suæ reip. seorsum sapit, Licebit nobis, Auditores, in hac Vellejanæ prudentiæ parte, ipsam clavem totius disciplinæ constituere, atque ex tam accurata ingeniorum descriptione, non actus modo ipsius indolem propositumque condiscere, sed ingentia illa & nunquam modicis sideribus agitata Romæ fata, ex his veluti primordiis surgentia & progredientia animadvertere. Hic Paullos & Scipiones, viros in tantum laudandos, in  
quant

quantum intelligi virtus potest, ipsam Romanæ potentiae magnitudinem non illustrasse modo suis ingeniis, sed condidisse observabimus. Hic Gracchorum optima, sed inquieta ingenia, nihil immotum, nihil quietum in Repub. cernemus relinquere. Hic non Drusos citius & Sulpicios à laudata indole, quam remp. à sua pace degenerare reperiemus. Hic Pompejus & Cæsar sui ingenii fortunæque magnitudine laborantes, in societatem morbi remp. trahent; quæ ut tantam indolem fidelius ac ex more sequatur, premi & ipsa volet suæ magnitudinis onere. Hic aliquis vana & stolidi pravitæ, alius ingeniosa nequitia, miros publice ludos dabunt. Denique ad Octavii ingenium omne imperii corpus circumagetur, movebitur & quiescet. Verum hæc suis ipsa momenti conspectiora, longe eminent. cetera per singulares morum variorum notationes, designata perite discrimina; etiam per comparatas inter se subtiliter naturas, in ampliorem sapiendi circulum patent, quam sine exemplis & extra rem præsentem dici aut intelligi potest. Faciliorem habent intelligentiam egressionem, & historiæ quædam diverticula. quod proprium alias majoris operis ornamentum, utilissima suavitate mutuatus Noster, res cognitione admirandas, temporibus involuras aut dispersas, opportunissime collegit & sub veram ac genuinam æstimationem dedit. Ita enim satis fortassis non ad defensionem modo, sed ad commendationem hujus industriæ dixerim. Nam qui prorsus eam Historico adimunt, semper mihi parum vel comiter vel eleganter opinari visi sunt. sicut aut delicatè est aut importuni, præsentiam ac ingenium scriptoris, post unum & si forte alterum excursum, in ordinem redigere atque ad reliqua coercere. Quæ nequaquam ideo monemus, ut ineptos rudesque nonnullorum conatus, qui alienissimis nugarum ambagibus utramque paginam opplent, excusatione & venia dignemur: sed ut maximorum virorum auctoritas, quæ si non invenerat, certe fecerat rationem, citra invidiam nec extra laudem

constituatur. Vellejo ipsa observationis & annotationis novitas gratiam addit. Quam est enim jucundum, modo conductâ in unum ingeniorum artiumque miracula contemplari? modo indagare congregati ejus, ut sic dicam, fati causas, ambitum, terminos? modo colonias, modo provincias, ex omni memoria & tot veterum commentariis, velut ex fuga recolligere? Quo factum est, ut nec in vulgari aut nota aut inani expositione videretur tam seria festinatio scriptoris hæsisse; nec posterorum quisquam carpere auderet, cujus soli Vellejo deberet notitiam. Ac cetera quidem, quibus majores illi perfectæ historiæ scriptores vel ornamenti vel artis & disciplinæ causa usi sunt, imitatus est felicissima dexteritate, & in minore forma non minus tamen ad vivum expressit omnia. nisi quod orationibus inferendis sibi temperandum duxit. idque eo magis, quod nec contextus arctata narrationis, pertingit ad occasiones habitatum ultro citroque orationum, sed factorum eventuumque apices directio transcurfu stringit. Neque interim eloquentiam ostendere non potuit: quæ undique exsplendescit. Miratur diligentissimus Rhenanus facundiae nomine, erumpens illud è Vellejano non affectu magis. sicut ipse veniæ petendæ præfatur, quam judicio, orationis telum, pro Cicerone in Antonium tanto vibratum impetu, tamque efficaci ictu infixum, ut cum ipso, quem vindicat, certasse videatur, si quid post infestas Philippicas, infestius jaculari in parricidam liceret. Equidem oratoris facultatem, quam in Historico requirunt eruditi, non hic tantum, sed in omni scriptura Vellejana, valde otiosus sit qui non agnoscat. Quare & verbis hic parcendum arbitror: nisi velimus ea commemorare, quæ nostræ commentationi propiora sunt: nitorem eruditioni, gravitatem suavitati, simplicitatem arti tam permista commode, ut novum quodammodo dicendi genus, & proprius venustatis character inde concinnatus, simul ævi eloquentissimi genium spiret, simul scriptoris ingenio, reperti tum primum decoris gratiam debeat. Videor mihi in eo reperisse specimen

cimen dictionis, quod prudentissimi oris Politicus optaret, quoties ad elegantiam & novitatem quandam apud teretes & eruditas aures accedendum, nec à civili tamen dignitate discedendum est. Multi post ipsum idem cupivere, idem tentavere : sed quantum interest, inter facultatem sapientis & conatum rhetoricantis ! Quo plerumque corrumpitur purior eloquentia : cui nullum majus, quam ab imparis imitatoris studio, periculum imminet. Namque, ut semel hoc experimentis temporum notetur, non tam quaeritur sollicitudine scribendi & arte, quam in ipso scriptoris ingenio nascitur diserta & victura oratio. Quare, cum nihil ex arte ignoret, qui ita scribit, sapissime, tanquam ignoraret, scribit. Ut vel ideo frustra sint, qui serviliter in ordinem cogunt scribentis calamus, & modo aliquid demum verbis aut sententiæ, modo additum vellent. Imo quod volunt, audent aliqui : & quoniam illud potius probant, hoc ex suo ingenio reformant. quasi Vellejo id agendum olim fuerit, ne à cujusquam consuetudine & judicio uspiam recederet. Longe generosior est mascula & civilis Historici eloquentia, quam ut ubique scholam & rhetorem metuat. cui nisi subducatur mature manum, tam longe à robore & virili cultu, quam prope ab artificio & mollitie aberit. Suffocatur, & non spiret libere, vivida indoles : & si ubertatem omnem excludas, maciem induces : sicut contractior facies, ampliando in monstrum diducitur. Atque hæcenus quidem tum laudari abunde, tum optima ratione defendi meruit Vellejus. quamquam in utroque ita sumus versati, ut parce & rudiore Minerva ( quippe qui nec ipsi libertatis in scribendo & simplicitatis immemores simus ) pleraque delibaverimus. Veniendum nunc est ad nævum tam pulcri corporis, tot jam doctorum probris infamatum. Cum enim illustres sane & magnificæ sint in Historia prudentiæ eloquentiæque laudes : Veritatis tamen decus interius est, & antiquius. Ut propterea parum suæ existimationi consuluisse videatur Vellejus, dum ceteris dotibus præcellere maluit, quæ propter unam placent, quam neglexit.

Adu-

Adulatur Tiberio, sub quo scripsit, sub quo demi militiæque dignitates adeptus est: adulatur Liviæ Sejanoque; sed his propter Tiberium, in cujus gratiam, immortale etiam ejus temporis decus Germanicum parum honorifice, id est, parum ex fide & merito memorasse creditur, si ita scripsit, sicut vulgo legitur. Male id factum: quis enim bonus vir dissimulet injuriam veritati in ipso regno, ut sic dicam, suo illatam? sed bene habet, quod non amplius, quam dictum est, patet hæc deformitas: cetera incorrupta venustate præfulgent. Nimirum hoc non tam Velleji, quam humani generis vitium est, præsentia & nostra cum prudentissime pensitamus, non sine studiis partium affectuque æstimamus: aut cum recte judicavimus, metu temporum judicium abscondimus. Itaque Historicum in hunc diem novi neminem, qui principis sui superstitis, ipse superstes, vitia evulgarit, nisi quod prudentium non nemo in eo sibi cavit, ne, quod liberius litteris consignaverat, ante suprema sua publicaretur. Dicam quod res est: Nemini, qui res suæ ætatis scripsit, usquequaque & adeo credendum est, ut odio & amore, spe & metu plane immunis, id est, homine major habeatur. Neque potius absolvenda credulitas hic lectoris videtur, quam scriptoris infirmitas. Qui si errore magis quam consilio verum corrumpit, jam veniæ locus est: sin contra sententiam animi falsa pro veris tradidit, rum vero sicut legentium reprehensionem merito incurrit; ita simplicitati rarius imponere potest, præsertim ubi aliorum opera, rerum fides ita in lucem vindicata est, ut facilis veri falsique sit dijudicatio. Id quod in Vellejo etiam accidit, qui non minus irritis quam vanis encomiis ornat, quos se veriora & plura publicæ auctoritatis monumenta gravius notavere. Unde hæc talia etiam alias potius petenda fuerant, quam ex eo scriptore, cujus & opera aulæ obstricta, & veneratio Principi debita, & affectus, ac per hunc ipsa ratio judiciumque, ad Augustæ domus splendorem inclinatam, neque silentii neque expositionis planam facilemque viam habuit. Nam quod Vir doctissimus hic excipit, *Neminem silentii*



*silentii causam reddere* : fortasse vix locum habet in scriptura Velleji. qui in hoc historiae ambitu propositoque si omisisset Tiberium, haud dubie suspicionem in se principis & aulicorum, non sine periculo concitasset. At cur operi suo, inquis, non posuit angustiores modum? non enim credam fore, qui increpet, cur non plane omiserit historiae totius consilium? Equidem, si brevii alicujus indolem cogitamus, rursus aut indocta aut suspecta est partium temporumque detruncatio: nec videtur consultum, ut propter pauca, quae non audet retegere, ceteris quoque abstineat Historicis, quae visa sibi aut perspecta, praeter aliis accurate potest interpretari. Debent haec vestros quoque animos admonere, Auditores, & circa praesentium studia temporum erudire. Nihil magis in ore, in votis, in conatis hominum est, quam historia nostrae aetatis. Eam cum rerum amplitudine, consiliorum judiciorumque varietate difficillimam, hoc quidem reipublicae statu ne tentandam quidem autumant prudentes, & ob amota jam bellorum vastatione non pauca subsidia, vix in pace, & subvenientibus partium commentariis ac auctoritate publica, sine periculo processuram credere possint: imperitissimus quisque, nec minus literis quam modestia vacuus animo agitat, & mox certatim attaminabit. cujus vanitatis praeludia jam & specimina habemus. Verum his nos extra considerationem nostram rejectis, de idoneo tanti operis conditore videbimus. qui facilius optari quam reperiri poterit. Etenim ex iis, qui rerum actu splendent, quotusquisque satis eruditionis ad hoc institutum adferet? Ignoscent spero viri summi (quorum artes non minus alias & aestimare & venerari soleo, quam eorum quisquam, qui ex propinquo quidem, sed fortunam plerumque non animum res illustres gerentium intuentur aut intelligunt) si tot artium, quibus ad posteros valere consuevit Historia, cultum copiamque, vitae tam occupatae rarius existimem convenire. Non dico, nullum ex hoc genere esse talem: sed an, qui talis est, suscepturus sit in se id onus; an partim potius quam universim

sim suscepturus sit; an, cum susceperit, sufficientibus partium instrumentis usus sit: hæc & talia non minimam habent dubitationem. Superfunt ergo eruditi: qui in studiis vitam, non quibusvis sane sed talibus potissimum, agitant. Inter eos, si hoc ævum spectes (nam quid postea futurum sit nil attinet divinare) non desunt forte, qui ea, qua hic opus est, benevolentia adjuti, industrie usurparent id muneris, nisi quod ævi genio & civilis vitæ fastu quam sollicitissime ab ejusmodi opera remonentur. Quo sit, ut alii omnibus rebus impares, sed Politicis nominibus tumentes, præferantur instructissimis viris. quorum solida & ex puris fontibus hausta prudentia, à convitio & probris tam hodie abest prope, quam olim ab honore & præmio. Id quod non tam ipsorum quam posteritatis interesse, sciri debbat. Dicamus interim: non deesse viros animo, studiis, stilo nostris temporibus dicendis pares; num existimamus, tam invictæ veritatis ullius manum fore ut æque secus gesta summorum principum, quam præclare factitata; æque arcana aularum, quam speciosa interpretamenta, plane pleneque deformet? nam hoc Velleji caussa, cœpimus quærere. Non fiet istud, ô mei, non fiet. Etiam cum non supererunt, quorum auspiciis consiliisque omnia gesta sunt, posteritas eorûm timebitur. Atque ut cedat timor, ut desint adulationis studiique & odii nomina: ipsa sæculi indoles non capiet hanc simplicitatem. Aulicarum aurium animorumque quotidie delicatius sit iudicium: atque dum honestissimis titulis & gravi supercilio, majestatem imperiorum in sublimius & majus interpretantur, qui ex officii decoro id facere possunt, prudentissimus quisque, cum ratione mavult obsequi ad majorem sceptrorum reverentiam vocantibus, quam cum periculo modestiæ novum quidem sed plausibilem morem detrectare. Ita crimen paulatim habere incipit, quod aliquando in laude ponebatur: atque ut olim adversus veritatis, qua posteritas & totus orbis erudiri debebat, privilegium, nulla majestatis exceptio valebat; sic, postquam majestatem in multis ipsa revereri


veritas

veritas didicit, nemo scribentium, publicarum & aulicarum  
offensionum tam erit avidus, ut quæ inter nova regnorum  
secreta hodie asservari novit, eliminare in publicum con-  
tendat, cum præsertim pro inepto & imprudente sperna-  
tur, qui à civilium, ut volunt videri, magistrorum, & viro-  
rum eminenti auctoritate publicas res tractantium sapientia  
discedit. Ita paucis, si modo cuiquam, adversus sæculum  
mens constabit. Neque enim Poëtarum tantum &  
Rhetorum ludus, aut sub tyrannis metus est, ut Nerones  
& Domitianos, mera monstra insolentis potentatus & pro-  
digia, bonorum principum laudibus honestent; sed mol-  
litie temporum & imbellia animorum, à virtute & veritate  
sub ipsa virtutis opinione deficitur: succedunt novi mores,  
nova sapientia, nova eloquentia. cui nec simulationis jam  
& negligentiae superest occasio: cum in partem officii pu-  
blici recepta est, quæ olim adulatio dicebatur. Eum sane  
nec laude amplius arbitror nec venia dignum Historicum,  
qui sub speciosæ commendationis velo, rerum turpium de-  
testationem astute abscondere instituat, quale commen-  
tum in Poëta Lucano, ingeniosius suspicari quam gravius  
persuadere, summo Viro libuit. Faciendum ergo non mi-  
nus in nostris, Auditores, erit, quod sæpius meminisse  
monuisse, in antiquis tenendum esse, ipse scriptorum dissen-  
sus & à vero discensus, ad verum nos deducet: præter Cæsarem,  
Diones, Tranquilli, ceterique liberioris stili homines con-  
sulendi erunt, in quibus ipsis tamen supra aut intra veri  
fidem aliqua observabis, ut sic ad genuinam veritatis fa-  
ciem ipsa comparatione diversitatis pervenias. Nimirum  
qui adipiscendæ causâ prudentiæ memorias rerum & an-  
nales tractat, non contentus erit unius partis tradita co-  
gnovisse: sed adversæ etiam aut diversæ partis commen-  
tariis ad ipsa conjectationis & iudicii civilis fundamenta  
constituenda indigebit. Sed hæc commentatio longius  
nos incepto abduxerit. Igitur ad Vellejum redimus: qui  
eam operis sui, de qua disseruimus, labem multis magnis-  
que redimit virtutibus. Quarum adhuc illustrior erat su-

tura admiratio, si totus ad nos pervenisset. Quam ille nobis ingenia regum artesque luculente notaret! quam accurate momenta institutæ libertatis, & semina certaminum publicorum, suis quæque locis disponderet! quam animose festinantem ad victorias externas populum sequeretur, quam provide victorem admoneret! quantum in ipso felicitatis cursu latere periculi animadverteret! Quam ubique fortunam suæ civitatis & indolem in numerato haberet; easque veluti per gradus vigoris & potentiæ ad fatalem excisæ Carthaginis terminum deduceret! sicut ab hoc momento relabentes, in iis, quæ habemus, per singulos lapsus, celeriter quidem sed notanter præcipitat: & quæ non sentientibus Romanis clanculum obreperant, aut veloci frequentia percussos cæcaverant, in apertam ordinatamque vindicat notitiam. cuius rei causa subsistit aliquando, & obervationis civilis epocham, ut sic loquar, unde in posterum processura sit fati publici disciplina, statuit. Ita Gracchanum tumultum cædemque gravissima nota signat: *Hoc initium*, inquit, *in urbe Roma civilis sanguinis, gladiatorumque impunitatis fuit.* *initium* ideo, quia exemplum, quod non ostendit modo flagitia, sed auspicatur. Ab hoc initio maxima quæque & continua mala pendent: ab hoc initio ad calamitatum extrema fiet progressus: ab hoc initio ad finem status ac securitatis publicæ proficietur. Eo celerius, quia impune. nam ut malorum, ita *impunitatis* hoc initium est: qua non ad turpitudinem morum, ad petulantiam, ad luxum, ad contumaciam cōsuetur per indulgentiam, sed qua supervesta suppliciorum auctoritati scelerum atrocitas, commendari per imbelliam non potest. *Gladiatorum civilis sanguine* rubentium *impunitas* est: quam temporis necessitas commendavit primo, mox depulsa necessitate civitas retinuit, sive expellere non potuit. Ex hoc sanguine natæ sunt quædam civiles Furie, quæ nihil sanum deinceps, nihil intactum reliquere. Abominamini fors tam diram imaginem: verum ut comparisonem molliam, in argumento nihil occurret modicum, Est morborum quoddam genus, quos

quos acutos vocant medicorum filii. hi statim nobilissimas  
quasque corporis partes ipsamque vitæ ac vigoris sedem  
invadunt : jecur incendunt , cerebrum onerant , cor debili-  
tant. atque hæc omnia celerrime , & tanquam ad mortem  
festinandam , videmus fieri. Prorsus tale aliquid Roma ab  
hoc initio , de quo diximus , experitur : dum *jus vi obruitur*.  
ipse spiritus vitalis , quo salus publica vivit vigetque , ipsa  
virium & roboris origo , haud dubie in jure & legibus in-  
telligitur , juris beneficio est respublica : jure ordinatur ,  
jure regitur , jure stabilitur , jure conservatur , jure continetur.  
Quamdiu juri sua auctoritas , tantisper civitati sua  
constat sanitas. Igitur quantum à jure disceditur , tantum  
à republica degeneratur , quæ amittit se ipsam , cum jus a-  
miserit. Ab hoc nisi vis omnis diligentissime arceatur & va-  
lidissime , mora nulla est , quin una oppressione confestim  
obruatur. Ex eo tempore nihil ordinatum , nihil mode-  
ratum , nihil honestum supererit. quos merita virtutis con-  
tulerant honores ; dignitates , quas judicia consensusque  
bonorum tribuerant ; Magistratus , quos suffragia civium  
demandarant , vis in posterum dabit , *priorque ceteris habebi-  
tur* ac ad principale in republica fastigium ascendet , qui  
opibus , factione , audacia , *potentior* erit. Nemo jus dicenti  
auscultabit : nemo feret monentem. neque minus consi-  
lium sapientis , quam legum auctoritas , repudiabitur. Ita-  
que ergo *discordia civium* , *ante conditionibus sanari solita* , *ferro*  
*judicabuntur* , id est , bellis omnia ardebunt pariter & mi-  
scebuntur. Quid enim inter violentos unquam concors ?  
quid inter eos moderate discors ? conditiones rationis &  
juris filiæ sunt : sicut ferrum ab omni ævo ministerium vio-  
lentæ infamavit , illis obducuntur vulnera , hoc rescindi-  
tur : illis sopiuntur lites , hoc exasperantur. sed præplace-  
bit tamen ferrum bellumque , postquam senel jus displicuit.  
Sufficiet imo ipsum belli nomen , ut pax & quies  
spemantur. neque quisquam , cujus causam sequatur , sed  
cujus vim & prædam , cogitabit : sicut nec suscipiendi bel-  
li causæ expectabuntur , sed spes & cupiditas arripiuntur.

hæc sunt Velleji nostri, *bella non caussis inita, sed prout eorum merces fuit.* Quibus verbis ipsam morbi ad perdendam rempublicam properantis vim & impetum, expletis jam augmentis, toto nocendi instrumento vehementem, demonstrat. una scilicet interpretatione centum circiter annorum fata complexus: quibus in mutationem sui demersa respublica vix tandem in novam faciem emerfit. Sed quid uni exemplo hujus curæ prudentiæque immoror, quasi non satius esset in ipso Auctore communi observationis & commentationis studio, omnia complecti? Huc enim potius nos vocat instituti ratio & industriæ nostræ: quam, omiſſis sive dilatis laudibus Vellejanis ceteris, in rem præsentem strenue transferemus, auditores.



XVI.

## EPITAPHIUM

*Illustris & Generosi Baronis,*

WOLFGANGI JACOBI

de GERA, &amp;c.

---

*MM. SACR.*

E

*Principibus Juventutis Academica,**Perillustris & Generosissimus*

WOLFGANGUS JACOBUS

*Dominus de GERA,*

LIBER BARO,

*Argentorati Kal. Novembr. clō Idc XLVI.**letho datus est:**Et San-*

*Et Sanctorum omnium festo,  
 sanctissimis caribus officiisque  
 matutinum auditorem,  
 socium, collegam  
 in caelo sistendum se praeuit  
 Servatoris sui manibus,  
 quibus beatum spiritum  
 moriens commendaverat.*

*Nimirum*

*dum Ecclesia ex ore summi Doctoris  
 Beatorum elogia, & spes  
 & titulos,*

*cupide audit aspiratq;  
 ille in libro vitae coram legit  
 suam beatitudinem;  
 in domicilio vitae*

*beatitudinis vitalis pramia auspiciatur;  
 in origine & causa vitae,  
 aeterna beatitudine acquiescit.*

*Beatus ille, qui Beatus omnibus  
 nexu salutis jungitur!*

*Annos vivendo explevit XXII.  
 menses pane VIII.*

*atque ita in ipso matura juventutis vigore,  
 omnia aetatum humanarum spatia,  
 vel complexus est virtute,  
 vel fortuna emensus.*

*Post preparatam majoribus studiis pueritiam,*

*Sora primum,  
 inde Roslochii,  
 deniq; Argentorati,  
 optimis litteris, scientiis, artibus  
 operam dedit,*

*pie, cordate, laboriose:  
 Hostis otii, amicus modestiae,  
 socius sapientiae,*

**PERIT**

*verum & magnum Academia nostra  
Ornamentum.*

*Ita faustum est,*

*quod vixit :*

*Perenne, quod vivit.*

*sive est aliqua fama perennitas,*

*sive hoc est sola nomine digna  
aeternitas.*

**V***Os, quibus eximios solida virtutis amores*

*Vs alta mentis suscitavit ;*

*Gratibus officioq; pios celebrate supremum*

*Manes, & ultro dicite :*

*Non opus est planctu dare iusta, nec omine tristi*

*Turbare ritum funeris ;*

*Quod lugubre nihil, sed plena munera laudis*

*Sortisque fausta vindicat.*

*Floreat hic tumulus, revirescant ossa, resurgat*

*Illustre corpus denuo :*

*At pius in caelis exulet Spiritus, orbem*

*Laus nominis perambulet.*

**D**Ebui hoc, qualecunque est, officium Generosissimi Juvenis memoriae, quæ mihi semper erit venerabilis. Impreslit hunc affectum animo meo, non tantum cultus tam illustribus familiis debiti studium, sed quotidiani insuper commercii & literatæ familiaritatis consuetudo : cujus recordatione nunquam non jucundissime perfrui licebit. Possem, si id nunc agendum esset, interiorem excellentis ingenii præstantiam, & rectissima bonæ mentis proposita, quatenus è propinquo introspicere datum est, deprædicare : neque sane ullo officii genere rectius, quam per verissimas laudes & memoriam virtutum, celebrari tam acerbum funus potest. sed quia partitim Academia confert sua elogia, nihil adjiciam publicis laudibus, præter pauca quædam privatæ notitiæ monumenta, nullis tamen inter nos aliis, quam publicis causis




caussis usurpata. Cum enim se totum iis dare constituis-  
set artibus, quibus illustre ingenium ad Reipublicæ pariter  
ac Familiæ usum decusque excoleretur, non potuit non ve-  
hementer incitari, ubi nostram ingressus Academicam, &  
exempla nobilissimorum juvenum, præclara studia æmu-  
lantium, & faciles Musarum aditus, omniaque discipulis  
prona & gloriosa offendit. Interpretabar tum è cathedra  
Suetonium: his ille recitationibus assiduus auditor inter-  
fuit. Lectionibus extraordinariis, ut nostræ mos Acade-  
miæ tenet, Taciti annales ipse flos Academicæ juventutis  
mecum tractabat: inter horum primores rursus Genero-  
sissimus noster Baro præfulgebat. Publicabant persæpe sua  
studia tam strenui commilitones, atque nunc perorando,  
nunc more certaminis literati disputando, auditoria fre-  
quentabantur: nunquam defuit Noster, quin vel præsen-  
tiam congressui, vel operam exercitationi commodaret.  
Biennium amplius fluxit, quo in hunc modum invicem  
nosci & noscere potuimus: cum contracta propioris com-  
mercii consuetudine, pæne quotidie domum meam ven-  
titavit, atque privatim suas necum horas partitus est,  
donec totum absolvissemus Cyprium. Nihil hic dicam  
de attentione ejus singulari (quam, nec immerito forte,  
inter artes numerare soleo) nihil de studio sciscitandi, de  
cura meditandi: quæque sunt id genus alia, sine qui-  
bus non vigor studiis, non anima, ut sic loquar, constare  
potest. Illud saltem non omiserim, quam nostri laboris  
regulam, quam profectus legem sectati simus. Inter mala  
sæculi nimis eruditi est, quod veræ eruditionis vel natura  
ignoratur, vel salubritas non percipitur. cujus labis origi-  
nem ita poterimus æstimare, si quantum à disciplinæ stu-  
dio (nolo enim nunc cum nonnemine Veterum, *discipulum*  
appellare) curiosi moris vanitas absit; aut quid à bonæ  
mentis proposito discrepet, securus sui operis successusque  
animus, pensitaverimus. comparasse sibi notitiam quorun-  
dam librorum; audisse varia hominum, de variis studiis  
rebusque judicia; alieno ore, mente interdum nulla, o-

mnium eruditorum censuram profiteri; declamare, quæ nunquam legæris; ostentare, quæ nunquam habueris; suo se arbitrio suffragioque novum auctorem facere: hæc profecto plerumque sunt, quæ homines ab omni seria doctrina alienos nec ullius disciplinæ penetralia ingressos, in tantam de sapientia sua perluasionem adducunt, ut propediem nomina sua aureis litteris inter elogia Panfophorum (ne plus scilicet cum modestia Philosophorum veterum, quam cum doctrina commune habeant) dedicaturi videantur. Hæc una nostri fundi calamitas est. accedit altera, quod à sciendi cognoscendique studio, omne boni moris propositum, & sanctioris sapientiæ præsidium adeo sequestratur, quasi sine virtute Respublica, sine divina ope Reipublicæ gubernatio stare posset. Adversus istas seculi pestes, cum mihi jam ab annis non adeo paucis, ratione publici muneris, decertandum sit, magnum sane operæ pretium visus sum fecisse, postquam capaci & sponte ad rectissimas sententiæ tendenti animo, tam alte, quæ cupiebam, insediisse animadverti, ut non possem non eximia omnia Generosissimæ familiæ, & communi patriæ de excellentissimo Juvene ominari. Erat nobis in manu argumentum, quod dixi, sæcundum, ac plenum interiore prudentia; de Imperii Perfici destructione, de vitiis, quibus affliguntur Respublicæ, de casibus, quibus agitantur, de vicibus, quibus permutantur. Videbamus Dei opera, in iis quæ cadebant: nec minus in aliis, quæ resurgebant, heroicas Alexandri dotes à cœlestibus auspiciis arcessebamur: fortunam in tot miraculis edendis occupatam, ea parte intuebamur, qua gentilibus non datum est intueri. Aulæ ambages, elegantias, artes, arcana, mores, flagitia, pericula, sub tam accuratum stili acumen venisse mirabamur: sed non semper nihil nobis permisimus ultra gravissimi Scriptoris iudicium. qui sicut profundam subtilitatem politici actus nobis interpretari potuit: ita aliquid esse, quod ab ipso frustra expectaretur, satis meminimus. Narravit ille nobis fata aulicorum: nos fatorum causas, non ex Stoica illa sexie, quam Curtius

texit,

textit, sed ex divina ordinatione, quam sacer Codex descri-  
 bit, indagavimus. Libuit subsistere, ubi aliis libet præte-  
 rire: nec penituit introspicere, quæ plerisque vix aspici-  
 untur. Vehementer fallor: aut viderat ille Noster, in stu-  
 dio civili, viderat profecto viam, quam ingressos Deus du-  
 cit, prudentia comitatur, successus non deserit. Nec late-  
 bat eum contextus ille sapientiæ & vinculorum series, qui-  
 bus mutuo sibi innectitur profundior rerum intelligentia.  
 quo tamen instrumento discendi utebatur, non ut ex omni-  
 bus aliquid audaci jactantia & quodam vehementis sapien-  
 tiæ impetu imperitis vendicaret; sed ut generosa profec-  
 tus gravitate bene conjungeret, quæ male disjungi constat.  
 Quo factum est, ut in unoquoque disciplinæ necessariæ ge-  
 nere, de idoneis sollicitus esset auctoribus: quorum sub  
 ductu qui semel fideliter meruit, ei facile sub manum ce-  
 tera militiæ hujus munia succedunt. In juris Romani stu-  
 dio, laboris bene dispositi assiduitate, ad egregios profectus  
 ascendit, sub explanatissima institutione celeberrimi nostri  
 JCTi GREGORII BICCII, cujus etiam hospitio fortuna  
 eum affixerat. Debentur plenæ quoque gratiæ JOACHI-  
 MO PRÆTORIO, qui non modo rectoris prudentiam, &  
 comitis fidem, sed unicum & supra hæc nomina affectum,  
 Baroni Suo præstitit, prorsus qualem parentes optare fas  
 est, cum liberis animo suo, opera aliena, cupiunt consulere.  
 Dum in hunc modum res apud nos geruntur, dum industria  
 & spes, mutuis stimulis incitatæ, ad pulcerrimarum rerum  
 fructum contendunt: Deus operum nostrorum inspector  
 & arbiter, subito laboris & expectationis mortalis hæcenus  
 terminum esse jussit, carissimumque sibi pignus ad beatam  
 immortalitatem transtulit. Magna luctus ac desiderii ma-  
 teries in orbitate Generosissimæ familiæ, in jactura publicæ  
 spei, in calamitate Academiæ. Sed, quam felix est ille,  
 qui felicitatæ immortalitatis præmio honoratus, amplissi-  
 mum privilegium accepit, quod æternum immunem præ-  
 stat ab infinitis periculis & fatis nostris: quibus cum ge-  
 nio postremissimorum pessimorumque temporum tam ini-

qua conditione luctandum est, ut non pietas, non virtus, non doctrina, nisi quatenus superioris nomina sunt, quemquam ab invidia, injuria, contemptu vindicent. Nunc pietas tua in portu est: nunc eruditio perficitur: nunc modestia extollitur: nunc spes expletur: nunc fulget nobilitas, eminet magnanimitas, coronatur justitia; nunc, o beata anima, incipis vivere, postquam mori desisti. Vixit satis, qui sic vixit, ut nunquam intermoreretur. nec de Supremi Numinis voluntate queri possumus, quod cælo vindicavit animam, terris autem reliquit bonam recordationem, memoriam & exemplum vitæ per virtutes actæ: quæ suprema mortalis ævi præmia creduntur.



## XVII.

## CONSOLATIO

Ad

*Generosum Nobilissimumq̃,*

JOHANNEM SILBERSTERN,

Secretarium Regium, Holmiæ;

*cum*

Filio unico GUSTAVO, ex Academia

Ubsaliensi in cœleste beatorum confortium evocato,

*Exequiam irer,**Anno Christiano clc lxc LI. m. Maj. d. xi.*

**E**tsi Te, Vir Nobilissime, exequias Filio euntem, neque consolatione, neque sapientia aliena indigere, explorata firmitudo animi Tui, & gravitas morum, egregiis adjuta literis abunde declarat: tamen

tamen & societas pæne ægritudinis, & eximia tua erga me benevolentia, non desiverunt me hortari, ut fungerer illis officiis, quæ huic tempori tribui oportere, ipso etiam humanæ sortis commercio admonemur. Ut autem te nunc referas ad placita eorum, qui præcipuo quodam dolore neminis animum hominis angi in vulnere domestico debere, arroganter & moleste disputant, non ego certe suaserim; qui expertes veræ gravitatis spiritus & ignaram solidæ virtutis elationem, pridem didici non tam in auctoribus suis, hominibus paganis, quam in declamatoria imitatorum vanitate odisse. Neque fieri potest, ut sacramento melioris sapientiæ rogatum deceat, relicta & fastidita Optimi Auctoris sanctissimæque disciplinæ formula, semper ostentare & occinere decreta illius Scholæ, quæ quidquid boni habet, à nostris acceptum oraculis, fastu & ignoratione divinæ humanæque conditionis depravavit. Videmus maximos omnis memoriæ Deoque conjunctissimos viros, Jacobum, Davidem, alios, valetudine excessuque liberorum graviter indoluisse: quorum mœrorem non incusatum profecto, sed levatum à Deo perfanatumque, nemo, nisi qui temeritas pro ingenio est, imbelliæ mollisque animi convitio verberaverit. Sive enim rebus adversis & tristibus, castigari nos à summo parente credimus; quis laudaverit stuporem non sentientis plagam, quæ imponitur? Sive inter muncra divinitus accepta reputamus liberos; qui convenerit, amissionem rei tam caræ absque omni desiderio veluti negligenter transmittere? Nam quod illi subinde crepant, dolorem nec decorum viro sapienti, & præterea inutilem esse, id more cavillatricis sectæ magnificis verbis inanem veri speciem ementitur. Quam si quis melioribus oraculis eruditus nolit ejerare, is, non video, quomodo non, post infamata cetera sanctissima nomina, ipsi Servatori Optimo Maximo vel fictæ simulationis vel admixtæ culpæ dicam impingat: cujus dolores & mœstítiam & lacrymas, non uni causæ datas, sub honore exempli legimus ac veneramur, quotquot tam ex disciplina,

. 0 0 3

quam

quam ex usu seriae pietatis compertum habemus, CHRISTIANORUM sapientiam dolendo plurimum adjuvari. Non mirum ergo, si mœrorem admittas animo, præferas vultu, quando unicum acerbo funere filium effers. Hunc Deus Tibi ante XVI. amplius annos, spem familiæ, delicias domus, & hætenus materiem pulcerrimæ semperque in majus proficientis expectationis indulserat. Ingenii doctes, per jucunda pueritiæ rudimenta, in adolescentioris ætatis cultum feliciter emerſæ, modo recti probatique moris, modo studiorum liberalium speciminibus, in dies magis efflorescebant. Jamque Deo & Succiæ debitas fruges, paternæ cura proviſuque in formam & habitum componere, quantulo minus quam parabas? Suffragabatur tuis votis Academia, favebant amici, gratulabantur omnes: cum exorta velut ex insidiis valerudo, omne industriæ speique argumentum Parentibus & Filio præcidit. Jacet demefſus amœniſſimæ gratiæ ſoſculus: & in ipſo Veris regno, vernale decus injuriam patitur. Mœrent, qui plantarunt: anguntur cuſtodes: hortus ornamentis ſuis ſe orbari, tantum non lamentatur. Ubi ſollenne & debitum tempori carmen hortulani: *venite, qui amatis natura ſuperbientis ſpectacula, ut eamus & videamus, ſi ſtoruerunt lilia?* Imo vero unde illa neſcio cujus rei triſtis nuntia vox accidit auribus: *Floruit ſos agri: & pertransiit ventus: & ager ſtorem ignoravit?* Opportuna nobis ſorum mentio evenit, ut ad ſolatia Te vocem, ex illo horto repetenda, qui plantis ſemper virentibus recreat oculos, confirmat animos, componit affectus. Hætenus nec Patris, nec Chriſtiani nomen dedecere dolor potuit: nunc patrio vulnere, Chriſtus ipſe medicinam faciet. cujus ſaluberrima divinis tradita literis ratio, nullum adverſitatis genus ſine ſolatio reliquit. Et, quandoquidem ſimilis fortunæ caſibus non ſemel exercitus, ne pietatis quidem arduis operibus intentæ ſenſa, momenta, vices ignorare debeo, in hujusmodi fere ſtatim cogitationes tuas componi arbitror: *In muneribus tuis, mi Deus, qua largâ ſemper manu in me contuſiſti, Patrii nomen aliquoties*

quoties partum, jucundius mihi etiam tempora facere debuerunt, quibus pars domestica civilisq. fortuna fuit, educare Optima Principi cives & servos, nullo verissima libertatis bono carituros. Grattas tibi ago immortales. quod filio ingenium, amorem scientia, obsequendi studium, & eos mores tribuisti, unde tibi devotum, patria dedicatum, familia utilem futurum. considerare potuimus. Jam, quod visum est tibi cum nostrâ spe & filii fortunâ, compendio transigere, id quoque benignitatis tue fidem nobis facit: qui, sicut diviso tam suavi pignore non possumus non ingemiscere, ita absit à nobis (& profecto aberit) ea mentis perturbatio, quæ gratas tui consilii recordationes solet obviundere. Quidquid in filio amavimus, & speravimus, eo sine stetit, ut Tibi viveret, Tibi moreretur, Tibi æternum jungeretur. Ut huc perveniret, nos longiorem viam, ignorantia futuri, & more dicam an errore humana opinionis, animo concepimus. Nunc breviorẽ, quæ Tibi placuit, etiam in hac caligine posui, subductus ex omni parte rationibus, certius utique præferendam. Multum erroris habet circumductum per humana iter: multa in vitæ ambagibus insidia: multa in cursu temporum præcipitia, multi casus. Quantum gaudet privilegiis, qui in adolescentiâ portum attingit senectutis; & Servatori suo ex ephebis sociatus, neque necessitate peccandi alligatur, neque consuetudine vivendi occallescit, neque mortalitatis fluctibus involvitur? Non ego præposterum naturæ morem, non sinistram satorum cursum eriminabor, quasi filio faciam, quod filius mihi debuisset facere. Relinquerem Te, Fili, quandocunque Deus jussisset, superstitem: sed in periculis & tali conditione constitutum, ut plus tibi timerem, quam gratularer. Quis est enim ille tanta sapientiâ & virtute præditus, qui virtutis & sapientiæ deliquio se immunem arbitretur, in saculo confusa calamitatis, & desperatissima improbitatis? Quid nobis tandem agendum est, quos hac scena tot prodigiis, tot terroribus exercet? Religio, virtus, modestia, in bonis, criminum nomina; in malis, turpitudinum velaumenta sunt. Fanaticorum deliria, impostorum publicorum flagitia, discordia gentium, nescio quam novam malorum Iliada avo nostro portendunt. Et quid conor dicere, quæ vel cogitatu tristia ac formidolosa, semel evasit Filius, qui nunc in tuo sinu, ô benignissime Deus, & proficit, in quibus nos desicimus; & cernit, in quibus nos caligamus; & possidet, quæ

*nos concupiscimus.* Ita sentis, nec dubito, Vir Nobilissime, de excessu Filii; ita parentas manibus carissimi capitis; & hanc necessitudinis pariter ac pietatis regulam, quam ego attigi, plenissimo affectu studioque exequeris. Unum superest, ut in lacinia memoriæ funebris, amoris mutui, qui me filio tuo conjunxit, qualecunque monumentum statuam, sepulcroque brevem titulum inscribam.

## S. S.

*Hoc tumulo  
quiescit corpus  
jucundissimi Adolescentis*

**GUSTAVI SILBERSTERN.**

*Huic  
nato ex Parentibus Optimis,  
nobilitas,  
ingenium,  
mores  
abunde contigerant.*

*Quibus  
dum poliendus  
&*

*ad usus publicos adornandis  
in Academia totus vacat,  
Legis Annaria veniâ  
cælitus impetratâ,*


*supremo omnis laboris studiique humani  
premio  
beatatur:*

*cum numerasset mortali ævi  
annos XVI.  
mens. VI.*

*Tu, qui legis ista,  
Felicitaris immortalis  
Auctorem*

*&  
Compendium  
mœstatæ.*





## XVIII.

*Cum Nobilissimi Adolescentes,*

Fratres REMCHINGERI,

Depositionis, quam vocant, Academicæ  
ritui se subjicerent.

*Serenissime ac Celsissime Princeps ac Domine,  
Domine Clementissime.*

*Viri Generosa Nobilitate, Meritis, Auctoritate, Dignitatum titulis  
Præclarissimi: Nobilissimi Præstantissimique Studiosi: Et vos,  
quibus nunc demum vera oris habitusq; species rediit, titulis  
postea decorandi, Adolescentes.*

**B**ONUM FACTUM: Regina Sapientia edixit,  
NE QUIS IN SUUM REGNUM ADMITTATUR, NISI  
DEPOSITA OMNI ALIA SERVITUTE ITEMQUE DE-  
FORMITATE ET ABSURDIS MORIBUS. Id Edictum  
primo per orbis terrarum Regna, per provincias, per oppida  
promulgavit: Denique ad valvas Academiæ perenni  
schemate proposuit, ut tanquam apud templum suum &  
officinam secretiorem accedentes statim sui veneratione im-  
bueret, & de symbolo aulæ sollenniter admoneret. Factum  
ergo à vobis præclare, Adolescentes eximii, quod hujus  
Edicti reverentia concupivistis mereri, ut in sedem liberalis  
Musæ reciperemini: quam non profanus aliquis Apollo,  
non illa ex Poëtarum potius quam Jovis cerebro nata Pal-  
las, sed, ut dixi, Sapientia cælo missa, quæ vitam hominum  
non pateretur inhumanam esse, habitat. Itaque jamjam  
se componit Janitor ad aperiendas fores, si tamen quædam  
vobis, ut rite intretis, ut ordine ambuletis, monita suggesse-  
rint, qui ab exterioribus sunt admissionibus, Fecit sane id


ex parte is, qui vos ad hoc limen deduxit, sed sub ænigmatē & imaginibus, à quibus nunquam plane abhorruit erudita & Sapientiæ operata Antiquitas. Expōsita sunt in conspectu vestro instrumenta nescio cujus fabricæ: dolabræ, ascia, forcipes. Oſtēsa sunt vobis & corpori vestro applicita, quæ vix hominis, certe non sani hominis personam vobis relinquerent. Ingesta sunt auribus vestris nomina, nullius linguæ ingenio à barbarie redimenda, communi sensui adversa, abnormia, bacchanalibus denique quàm festivitati literatæ convenientiora. Quid hæc aliud sunt, quam symbola servitutis, quam servit vulgus hominum, vulgus, inquam profanum & quod procul abesse hinc jubetur? servitus vitiorum est, quam dico: cujus habitus deformis, conditio misera, exitus tristis. Equidem *vitia sola inducunt servitutem hominemque personis & rebus, indebito famulatu subjiciunt; & licet servitus personæ quandoque miserabilior apparet, vitiorum servitus longe semper inferior est*, inquit nonnemo è nobilibus Reginæ nostræ familiaribus. Quæ quoniam ipsa est optima, ut quam optimis imperitet, providere cupit. Nemo autem bonus est, nisi qui liber ab hac servitute, quam non vox modo Sapientum vestris animis, sed ludus ille, quem modo lusistis, oculis quoque subjicit. Estote ergo liberi: liberisque corporibus & animis, ejurata omni servitute vitiorum, ad serviendum ei Reginæ, quæ servos non alios agnoscit, quam qui vere liberi sunt, vos comparete. Absit arrogantia à vobis, absit fastus, & contemtor animus, quem non capiunt palatia Sapientiæ: absit protervia & impudentia mentis, quæ agrestium tuguria quoque dedecet, adeo non decet regiam tam nobiliter instructam: absit luxuria & ingluvies; nam sobriorum hæc aula est: absit licentia & petulantia; nam compositæ disciplinæ hæc sedes est: absit insanientis sapientiæ vel impietatis vel pravitas; nam in ipsam majestatem reginæ nostræ injurius est, quisquis insignia ejus quocunque falso habitu, mentiri audet. Maſti estote hac libertate, o juvenes: maſti hujus libertatis ornamentis & instrumentis, quæ nunc amplius

amplius vobis commendo. Delicati sunt Reginae nostrae oculi, accuratum ejus judicium: qui in conspectu ejus serviunt, elegantiae morum periti, oreque, & habitu corporis roto ad exprimendam honesti imaginem exerciti esse debent. ejusque rei gratia, fidas vobis magistras, praestantesque ordine Musas disposuit, quae vos per commentarios & instrumenta hujus aulae circumducant, & ex actis regni condiscere jubeant, quicquid elegans, quicquid honestum, quicquid eximium, quicquid publice aut privatim utile aut decorum. Haec si vobis cordi sunt eruntque, jam exterioris officii admissionales nihil vos morantur, quo minus ad propioris admissionis officium pergatis. Ibi breve sed magni momenti praecceptum est, quod haurire fida aure, & mente alta reponere vos oportet. Quia enim generoso & nobili sanguine & egregiis majoribus orti estis, Regina nostra studiose vos monitos cupit, ne tam claris natalibus quicquam indignum aut male conveniens cogitatis faciarisque, nec minus virtutis praestantia quam genere ceteros studeatis anteire. Alias vix erit, ut tueri, quem vobis ipsa tribuerit in sua aula locum, queatis. Sed ventum nunc est ad proxima. Itaque, quod felix & faustum sit inclytae vestrae domui atque vobis, ego vos, auctoritate ac vice viri amplissimi, jurisque peritia & virtutum eximio ornatu praefulgentis, *Gregorii Biccii*, quem valetudinis causa nunc absentem, in Academia Argentoratensi, tanquam in aula sua, magnifici Rectoris nomine, hoc tempore praesse jussit Sapiencia, ab omni nominum morumque turpitudine, quam nescio quis detorta & barbara voce *beanissimum* vocavit, libero; & in studioforum, sive eorum qui Sapienciae suam dicare constituerunt operam, numerum recipio. ejusque rei pignora vobis adhibeo *Salem Sapienciae*, & *Vinum Latitiae*. quorum illud symbolum de nomine suo dici, hoc de munere suo commendari, utrumque de regni sui maiestate voluit intelligi Regina nostra. Qui habet Salem, nihil infulse facit. Sale vita constat; Sale virrus conditur; Sale mores custodiuntur. Qui cum grano salis accipit, quae graviora sunt.

sunt, levius digerit, salubrius percipit. Turpe illud Epigrammatistæ: *nulla in tam magno est corpore mica salu*. Sapientiam voluit dicere, cum salem dixit: quia Sapientia sale vires suas, salibus amœnitates suas vult æstimari. Jam vero quantum est, quod vobis symbolum vini pollicetur? Lætitiâ enim cum dicimus, vitæ animam, fructum virtutis, felicitatem conscientiae, munus & donum Sapientiae dicimus. Antiquum illud non fallit: *solum Sapientem semper in gaudio esse*. Quot aularum splendidissimarum mœtiores, luctus, trageedias denique, Historia vobis memorat? sed aula Sapientiae, absque tumultu, absque planctu, veluti cœlesti quodam hilaritatis genio omnia recreat, fovet, permulcet. Ecce, quod frustra investigant Medicorum filii, ecce vobis nepenthes Homericum, primum Reginae nostrae munus, quod tranquillitatem vobis & à doloribus immunitatem pollicetur. Dictum sapienti sat est! Nunc enim tradam vos Reginae nostrae: illa suo conspectu animis vestris ad præclara omnia natis vigorem & alacritatem aspirabit: illa suo nutu vestros mores actusque moderabitur: illa vos amplexibus suis, si merebimini, admotos omni secretissimarum artium instructu adornabit. Sic politos formatosque in aulas magnorum Principum dimittet, & jubebit decoris obsequiis majestatem sceptrorum propitiare, ornare cultis moribus augustarum gravitatem domuum; fidem consilio, industriam actu, modestiam animo approbare: modo publicis utilitatibus dignum os commodare, & sacra regni gentibus interpretari; modo apud aures potentis domini salutis publicae mysteria, nunquam exitura in vulgus sollertia insinuare: ubique autem & quacunque occasione ornare patriam, certare meritis, non pace, non bello deesse civibus, semper denique Sapientiae, id est, Reginae vestrae meminisse, ejusque insignia non nisi cum vita deponere. Id precor & ominor vobis, Generosi Nobilissimique Studiosi, quos primus hoc nomine compello, atque adeo nunc ad spes præclaras erigo. Surgite, & qua vos monstrata ducet via, ite: auspiciatque ominis loco, illu-

strem

strem hunc confessum & in eo genita ad omne decus Sapientiae & utilitatum publicarum nomina flexo poplite veneramini. Ita non poterit non in animis, in votis vestris esse vetus illud & strenuum à Lacedaemone symbolum, ut vobiscum ipsi cogitatis: *quales hi sunt, tales erimus, si Deus vitam bonaeque mentis constantiam suppeditaverit.* Accipite ratum, & in Exempla, quæ nunc colitis, succrescite.



## XIX.

*Post absolutum, in privata Annalium  
Taciti interpretatione,*

Anno clō lcc xxxvi,

## PRINCIPATUM TIBERIANUM,

velati

Επιχειρητικῇ ἀνακεφαλαίωσις.

**P**Opuli Romani, quo nullus in terris majora utriusque fortis documenta tulit, si quis libertatem consideret; ut ex humili initio in immensum se sustulerit, ut munita opere ac ingenio steterit, ut oppugnata varie, dein expugnata, denique subversa jacuerit ac proculcata: arcu cuidam robustissimæ non absimilem inveniet. Surgebat post ejectos Reges pulcherrimum ædificium. Concordia popularis & virtus fundamentorum explebant vicem: detestatio regis libidinis & injuriarum memoria pro vallo erant: accesserant tribunitiæ munitiones ac tela, quæ vim arcerent, quæ in perpetuam arcis proficerent ac excubarent. Hanc astus & ambitio optinatum adoritur, nec capit. quamquam longo tempore, nec impetu modo, sed fraudibus omnia experta. Atrocissime conflictatam constat, cum jam munimenta quoque

pp 3

in cu-

in cuniculos, & præsidia in everfionis instrumenta vertissent. Nam sub tutorio nomine plus nocebant, qui præclaram modo potestatem, sibi gerere occæperant. Sed & ipsi, qui custodiebantur, non moderationis sæpe, non industria memores, fidem denique & manus pretio ac emptoribus permisere. Secutus est Marianus Cinnanusque furor, &, quæ longe lateque stragem dedit, Syllana tempestas. Et quod fuisset periculum, si quantum impetus isti homines tantum habuissent vel calliditatis vel perseverantiæ? Hactenus non vincitur libertas, sed ab ipsis plagis animos ac opes ducit. Donec fatale humano orbi nomen Julius, immensas vastissimi ingenii artes, cum non minore potentia primo, mox cum oppressione Reipublicæ conjunxit. Expugnaverat tamen libertatem, nec ultra victorem suspiciebatur. Augustus moderatione & prudentia paulatim dominum pati docuit, qui aspernabantur modo dictatorem. omnia sic adgubernante fortuna, ut in ipsa servitute læta tamen publici status facies maneret, nec quisquam ejus detrectaret imperium, cujus non capere satis ac mirari virtutes universi poterant. Ultima igitur servitutis post Augustum sensit Roma. Non satis erat, occupatam præsidio, libertatis arcem obtinere: subruī cœpit, & everti, & sanguine, ferro, dolis exæquari. Nullum ejus vestigium, nullæ superesse reliquiæ. Agnoscitis opinor, Auditores, Tiberianas artes, quibus instructus Proteus ille pari exitio Romanæ rei vigit ceciditque. Qua de re ex Auctoris nobilissimi, qui hactenus nobis in manibus fuit, prudentia & judicio pauca jam repetenda sunt: Vobis, ut existimo, non abnuentibus, ea penitus ac veluti uno sub aspectu posita intueri, quæ collegisse passim dispersa curæ pridem habuistis. Qui Augusto destinari successores poterant, duo admodum erant, Germanicus & Tiberius: ille virtutibus, hic ætate præstantior. Ille vigore, animo, sanctissimis artibus, & virtutem Julii & Augusti prudentiam æquaturus sperabatur: hic merus tenebrio, quid expectandum omnes haberent, nemini patere volebat. nisi quod

pru-

prudentissimus quisque, quantum esset malorum, quod tam inusitatis artibus tegeretur, secum ipsi cogitare. Ille verus Augusti sanguis: hic licet adoptione alcius, prævaluit tamen in animo tanti Principis. manifesta factorum ira: quæ in Rhodiensi secessu tempestatem hanc & fulmina pridem populo Romano conflaverant. Præteritur spes unica Romæ, id est, quid nisi ipsa salus despicitur, ac veluti reverentia quadam à contactu mox interituræ gentis remotetur. Eligitur Tiberius: sed electionis iniquitatem eligentis arguit excusatio. Eaque quo acerbiora essent, muliebri ambitio poterat. ut omnibus constaret, non meritis evectum, sed ex uxorio sinu immisum Reipublicæ principem. Sive nec illud de nihilo erat, quod optimus ille quidem, sed idem famæ ac posteritatis longe studiosissimus Princeps facile prospiciebat, æternum clarumque suum nomen non alia magis ratione fore, quam si, ut desideraretur ipse, dissimillimus successor efficeret. Certe non latuit solertiam viri hic sanguis, hoc lutum, in quo obhærescendum deinceps Romanis esset. Et jam antea socium curarum non delegerat, sed admiserat. Nisi hæc ipsa fortasse pretendendi, quæ occæperat, causa fuit: ut iudicium videretur, quod necessitas fuerat. Sueto principibus more, ut errori dissimulando, sapientiæ de lapsu gloriam concinnare satagant. Præceperat animo Tiberius, quanta invidia, digniore repulso, ipse esset Principatum aditurus: igitur suo ingenio ut jam uteretur, tempus esse secum reputabat, simulandi dissimulandique summus post homines naros artifex, fraudumque omnium ac offuciarum abyssus. Recusare incipit Principem, Augusti iudicium deprecari, excusare imperii molem, tenuitatem suam ac modestiam. idque tam continuo & pertinaci instituto, ut nec occulta jam occultatione nimia cupiditas esset, & adulatio tamen per infimas obrestationes genibus ejus adfusa, sic imperanti quasi vix imperaturo supplicaret, rei que Romanæ & sibi pereundi licentiam denique impetraret. Non immoramur multam admirationem pariter ac risum præbituræ materiæ,

nec

nec putidam histroni larvam cum Asinio Gallo detrahare instituimus; majora enim & plura sunt, quæ ut locum suum in oratione hac nostra queant tueri, parsimonia quadam dicendi in plerisque opus esse video. Nisi quod obiter tamen cunctationis hujus causas introspicere lubet. Tumultuabantur milites (nam de Germanico omnibus ad imperandum ut virtutibus ita viribus instructo diximus) aspernabaturque adeo novum Principem pars Romanæ rei validissima. Eventus in incerto: & deteriori jure nixi raro meliora sperant. Quarendum itaque spatium fuit, ut nec victus tam succumbere aut pelli videretur imperio, quam privatae studium vitæ sponte sequi; nec firmatus parum auctoritatis ad Principatum adferret, qui inimicorum quoque suffragio denique esset prælatus. Annotatum est, vulpeculam viri crebris per id tempus vicibus morbum simulasse, ut domui, veluti speluncæ affixus, ex occulto fortunæ momenta specularetur, nec quidquam agendum dicendumque ei tale esset, quod nisi perpetuitate gloriam non auget, & majorem postea creat contemptum. Sed & fraudibus ac iniquo juri omnis iniquitatis, omnis fraudis suspicio obstabat. hæc amovenda fuit. id est cogendus fuit vir, si quisquam, imperium averfatus, ac supra omnem ambitionem prisca quadam modestia constitutus: quam nec philosophi in Principe quondam agnovissent, nec in illo quisquam hæcenus quæsierat. Forte interim plerique ex misera plebe, seu præfagio quodam imminentium malorum, seu studia sua etiam in iis blandiuntur populo, quæ nec spem admittunt, nec reliquere spei causas, indignari, averfari Principem, & quia alterum mallent, sperare hunc cessurum meliori causæ. quam incauti generis simpliciter cunctatione ista, ex destinatione ac voluntate Tiberii, fotam satis constat. Nisi quis credere mavult, *aqualem potius civem quam eminentem agere voluisse Principem: folique huic contigisse pene diutius recusate Principatum, quam ut occuparent eum, aliis armis pugnarent. Donec ratione tandem magis quam honore victus sit, cum quicquid non suscepisset tuendum, petiturum*



*Peritulum videret.* Quam scriptoris Romani, indignam Romano homine adulationem cum lego, prorsus triumphum Tiberio gratulari mihi videtur. quasi si planius quis ita ageret: Augusto ad superos muliebri fraude promoto, iisdemque artibus Germanico depresso, regnoque ac regni spe excluso, optimis quibusque deceptis, patribus delulis, excacata plebe, sapientibus tædio ac mora suspensis, TIBERIUS, quod felix faustumque æternæ servituti sit, imagine regni simulanda exsolutus, sibi suisque artibus regnare incipit, brevi virtutibus ac libertati ex ordine funus, pro facultate ea, qua potest polletque, facturus. Adeo nihil eorum vaserimus ille omittebat, quæ omitti à se omnes credere volebat: multumque facta nihil minus quam cunctabunda, à suspensis & eluctantibus verbis disjunxerat. Itaque non ibat in flagitia sed ruebat. primumque facinus novi Principatus ac specimen, Postumi Agrippæ cædem Tacitus narrat. argumentum scilicet eorum, quæ deinde multos per libros continuarentur. Adeo, ut cum alii facta Principum descripsisse, hic scriptor regna narrasse latronum videatur. Inter quos primas merito suo Tiberius tener, cujus cruentum perpetua civium strage imperium, non mitiora potuit habere auspicia. Scilicet, simplicissimi hominis exilium, callidus bellicosusque Princeps metuebat. vitima igitur securitati Tiberianæ cadit, sed ut inferias nepotis istas sibi Augustus mandasse diceretur. Nec enim ingenium sceleris, quam audacia, minus est. Sed aversatur tam dirum omen, neque in limine tristitiam induemus: ad quam neque sero nos hic Principatus deducet, neque parum detinebit. Considerandum nunc est, quid animi Tiberio aut artis ad imperandum, Romæ ad serviendum fuerit. Quorum utrumque partim in simulatione Principis ac vafritie, partim in adulatione Romanorum ac ignavia habemus. neutrum, quod videbimus, cum modo. qui ut plane excluderetur, fatali tantum ope factum dicunt, qui causas investigare negligunt. Jamprimum magistratibus ac senatui fucus objectus reliqua vel traxit, vel in se jam continuit.

Oculos enim si eripias corpori aut obveles, nullum à trunco periculum est. Persuadendum, inquam, erat Reipublicæ, ut se esse, quod nec esse jam posset, & crederet & lætaretur. Quo ludo nec fabulæ quicquam ineptius habent. Et apparabatur tamen studiose ac ornabatur, comitque immodico prostabat, illud arcanum pariter ac fundamentum omnis novæ dominationis, imago antiquæ. Quod à Julio & Augusto in artem, ab hoc in artis perfectionem redactum est. Ex cujus præscripto, consulibus honor, senatui auctoritas, civibus jus & humanitas adesse visa. Assurgebat Consulibus; Patres multo verborum honore percolebat: *dominus* denique appellitabat, qui servorum munere prompti volentesque jamungebantur. His auctoritatem, his prudentiam adesse dicebat; horum ad sententias minima vocare Principem & maxima, inde consilium petere debere, inde præsidium. Atque sic libertatem sentiendi, quæ vellent, dicendique incautis velut offam objectabat. Certabatur sententiis, & rixæ curiam personabant: *Audiente Tiberio ac silente*. Audiebat: sed ut hac occasione in animos quorumlibet ac sensa penetraret; ut falsa adulatio-num ad materiam sæviendi conderet altissime servaretque, sivebat, ne intercedere cujusquam verbis in præsentia videretur, qui mox intercessurus intimæ mentium libertati erat. O silentium quavis objurgationum superbia immanius nocentiusque! ô senatorem, nulli minus quam senatui faventem! Quod ut occurreret, non sententiam modo suam post reliquos sæpe promebat, in suffragia ibat: sed sperni etiam, quæ censuisset, hætenus gaudebat, quo sensum eo perveniret, ubi nec nutus ejus aut cogitata impune negligi, nec pro scelerebus sperni scelera possent. Jam levissima quæque operose senatui excusata, maxima autem facinora, nec inculpationem invenisse, nec eguisse exculpatione, somnii simile est. Adeo nec ad oblivionem tant sciti histrionis, nec ad incogitantiam applaudentis scænæ commode & penitus potest referri. Nemo enim eorum, quæ semper & ex summo studio agit, parum memor est: nec libertatis amissæ, id est, spiritus vigoris-  
que

que intercepti parum penetrat conscientia. Nisi quod omnis philosophia ac ejus usus, ubi ab uno dominationis ergo, à reliquis morbi causa & fatalis ignavia, omnia dicuntur aliter, aliter fiunt, penitus expirat. Atque hoc est illud scilicet, cujus ope nisi quis pleraque in Tacito sub hoc Principe gesta sibi explicuerit, non video quomodo ulla in re intelligi aliquid possit ac videri. Talia sunt, cum subinde inania adornat Tiberius, & minimis quibusque magnam induit speciem, ut volentibus Romanis imponat, qui nullo magis vim imperii ac majestatem eminere credebant, quam relicta sibi pro corpore intercepto umbra. Diceret utrinque certamen constitutum, ut alter callide falleret, cupide alteri fallerentur. Itaque miseri mortales, & quod • fœdus ipsa miseria est, miseriae suae amantes, honorem sibi addi & opinabantur, & affectabant: principatus autem vim minui ac potestatem, ne non credere viderentur, studiose dabant operam. Qualem enim hujus viri modestiam esse? honores tot repudiatos, quot ab aliis vix impetratos: Patri Patriae cognomentum ex officio & meritis decere Principem: id deprecari quid nisi majoris humano animi argumentum? civicam quoque coronam per consuetudinem Palatio additam, nunc per magnanimitatem habitantis Principis abesse. Cœlestes porro religiones neminem justius usurpare us, qui cœlesti in terris proximi essent majestati. Recusatos igitur merito dolori esse, ne modestia tanti Principis ingratum Romani orbis animum damnet. Frustra multiplicari honores & reperiri, nisi sit qui inventos, qui cumulos recipiat. Hæc erat sollicitudo Romanorum, indigna vel Persa homine, aut si qui addictius olim regnabantur; tum decora, & pæne necessaria Principi terrarum populo, cujus scilicet intererat, ne minus studiose illud Princeps ageret, quod unum insatiabiliter, sine exemplo, supra vota singulorum, fidem omnium, vulpes ista parabat. Vobis, Auditores, rectius ista intuentibus magis propitia fuit intelligentia. Nec enim imensa honorum cupido sub profunda affectatæ modestiæ ambage latens, vos

sefellit; nec progressus non docuit, anxietatem istam conscientiae sese reformidantis fuisse. Non enim factus est deum Tiberius in firmato imperio cruentus, sed quæ ante acceptum occultaverat mala, potestas illa patefecit. Prædem ille everfionem libertatis, & cædes, & licentiæ omnis sævitiam hauserat animo. cujus rei documenta & indicia nec exigua nec pauca juvenilis quoque ætas & Rhodiensia imitamenta dederant. Igitur talis jam animo, qualis postea factis extitit, facile per se providere poterat, tanto plus ignominia à posteritate metuendum, quanto plus honorum præfens ætas in immerentem & mox manifesto futurum, qualis latuisset sub dissimillima facie, cumulasset. Utut enim gloriam venturi temporis famamque cupiebat captabatque, fiduciam ejus, qui sui non haberet, concipere animo non poterat. Egregio scilicet præmio post illa mandandus: ut quem Patriæ Patrem laudatum constaret, publica execratio pro monstro traduceret: ut per adulationem servatorum gloria civium circumdata, in æternum publici hostis monumentum transfiret: ut templa pro sepulcris, statuæ pro Furiis, religiones pro diris omnibus mox spernerentur. Porro ad demerendum populare studium, fallor an haud alia res efficacior jure & justitia, sine ambitu & oppressione humiliorum ac innocentium ministratis. Quippe rem ab omni ævo sanctam omniumque pectoribus alte insculptam, illud quoque hominibus commendat, quod nullo acrius plerique, quam contemtu ex inæqualitate orto, tanguntur atque irritantur. cujus sensus quo tenerior in animis multitudinis, eo est diuturnior. Nec de jure ultionis ambigendum censeret, qui suo jure per vim & iniqua est depulsus. Quare nullo non tempore magnum inde Principum securitati ac famæ vel subsidium accessit vel periculum, si jura dicerentur diligentius, vel infra injurias essent constituta, quæ supra omnes injurias, Deus & natura constituere. Atque satis constat, quosdam imperantium haud parum profecisse, si ex ipsorum ore sua quisque merita pronuntiata acciperet. nam ministros & affecti-

affectibus privatis magis obnoxios credi par est, & eorum peccata in Principem deinceps competere. cujus tota hæc est invidia. Quorum gnarus Tiberius, non Patrum cognitionibus modo adesse, sed *judiciis assidere in cornu tribunalis*: neve quidquam temere statui videretur, Consiliarios, Augusti exemplo sibi asciscere, cujus & in ceteris imitator videri magis quam esse volebat, efficaci in publicam fraudem arte, si pessimus Princeps optimorum ubique nomina & exemplum præ se ferat. Igitur in omnium ore & oculis erat justitia, & Princeps ejus patronus: quo coram non ambitum, non potentium preces quidquam valere reputabant. Verumenimvero ut nihil in hoc Principe & Principatu sincerum est reperire: ita hoc quoque veritatis patrociniū aliud tegit, quo non ipsa in posterum juvanda, non jus præsidibus juris in præsens integrum. Pridem audivistis inter artes expugnandæ libertatis non extremam, munia magistratuum, legum, ad unum delata, quæ pluribus debebantur. Quod cum specie ac imagine juvandi populi ac innocentiae tuendæ sit, nullo adversante compos sit omnium, qui auxilium omnibus ostentat. Non audiemus igitur mirantem Romanum adulatorem, *quanta gravitate ut senator & judex, non ut Princeps, causas pressius audiverit* Tiberius: incorruptius Noster, *Dum veritati,* inquit, *consultitur, libertas corrumpebatur.* Dum senatorem, dum judicem simulat, insidiatorem juris publici ac senatus agit. Nam populum alio quoque visco illicere sategit. Faciles accessus, obvia humanitas, ceteraque populariter facta, hominem nihil minus quam civilem aut comem, in speciem faventis plebi benignique Principis ad tempus composuerant. Matrem quoque homo mitissimus, ab arrogantia muliebri ad populi gratiam captandam traducere visus, latibulum sibi quæsitum, ex quo magnitudinem ejus paulatim ad humilia detraheret. Omnes ineptias superat, quod populo histrionis manumissionem petente, domini voluntatem caussatus, longe à se, ut in alieno servo quidquam ipse statueret, abfuturum professus est. Idem, qui

interea, optimo scilicet jure, unicum populi Romani peculium, ipsamque adeo vitam, cujus sine libertate manca est possessio ac infrugifera, deprædabatur. Inter enim tam speciosas bonitatis, clementiæ, fidei simulationes, inter tam occultas regni ac dominationis dissimulationes, nihil eorum, quæ firmando regno sunt, omitti. vis principatus ubique intendi, & sub recusatione inanum vera potentia augeri. Ab initio statim, post excessum Augusti, miles ascitus conciliatusque, in forum, in curiam comitabatur: nec excubiæ, cetera aulae posthabita: exercituum fides litteris postulata: cuncta ut in imperio, ut ab imperatore gesta summa ope ac parata, priusquam de utroque cogitare credi volebat. Postea, magistratus qui & quales essent & quamdiu, Tiberii erat arbitrium. Horum creatio impediri, muna distineri, dignitas differri, vis alio transferri. Senatus in rebus gravibus nihil aut parum posse; cujus inclinatio adversandi irritamentum Principi esse, dissensio pertendendi: & lex omnium, quæ gererentur, ac finis, voluntas unius. Quæ ad miraculum usque anxia & suspicax, nusquam sibi sine oppressione aliorum satisfacere visa. Hinc adeo factum, ut dignissimis dignitas, sapientissimis censendi facultas, eloquentissimis sermonis usus negaretur. Notaveratque cum cura Noster, quoties diu expectatione honorum ac imagine suspensi plerique ac delusi, nullam ob causam sint, nisi quod omne eximium dominanti periculosum, & intutus sibi pessimus quisque videtur inter meliores. quibus ob id nervi incisi, manus alligatæ, animi depressi, ex arte & præscripto, ut iniquo, ita pridem recepto, impotentia regnatricis, passim leguntur. quod etsi non obstarent dominanti, tamen obstare existimarentur. Quare nec innoxia clarissimorum virorum paupertas, miserationem aliquando aut præsidium invenit his temporibus, quæ ceteris omnibus proculcatis aut jacentibus, nihil erectum tulerunt, nihil erigi aut surgere passa sunt, præter absolutam dominationem. Quæ ut altissimas radices ageret, ac incrementis augeretur non modicis, quidquid usquam liberum oc-

culte-

currebat aut ingenuum, premi cœpit ac exhauriri. Cujus rei fundamentum in adulatorio dedecore, quod malofum ultimum Roma tum tulit, quærendum est. Fidem pariter atque admirationem excedit, quantum adulationis sub hoc Principe ingenium, quod ejus os, quæque detestanda fuerit fœditas. Igitur non tanto studio, agitatus olim injuriis fessusque regio furore populus, ad libertatem vindicandam est annixus, quanta tum cupiditate, quibus festinationibus Romæ in servitium ruebant *Consules, Patres, Eques*. dum sua cuique claritudo, ut olim libertatis, ita tum serviendi instrumentum erat ac irritamentum. Qualis ejus diei facies? cum novo more, velut in Lanistæ verba plebejæ ac crudelis voluptatis victimæ solent, Tiberii sacramento juratum caput certatim populus Romanus alligaret: cum de magistratibus veluti gladiatores, de civibus redigerentur mancipia: cum publici pudoris ex coactione veniam, voluntas quoque servientium præveniret atque corrumperet. Ab hoc tempore, & facere & pati turpia, Romanum est. Sedebant jam in senatu, non amplissimi viri, & majestate suæ exteris timendi, suis venerandi, sed unius servi, ex vultu, ex nutu domini ambitiose pendentes: censebant non quid Reipublicæ, quid imperio, quid foro ac judiciis, quid domi forisque conduceret; sed quid unus his perdendis mutandisque natus fieri vellet, aut ne quid, huic fini impetrando, non vellet. Quod si quid egregium tyranno patratum, si subversa claritudo innocens aut depressa, si placuisset uni, quod in omnium perniciem erat iturum, grates conquiri ac honorum nova inveniri: eodemque tempore urbs injuriis ac facinoribus, curia plausibus gratibusque compleri, certante in eo solo ingenio Patrum, quis ad palatium domini quidquam excogitaret aut condiret. Nonnulli timere videbantur, ne vel umbra Libertatis forte fortuna delicatissimi Principis conspectui oblata, parum ex dignitate dominantis & securitate servientium esset. Itaque veluti arcentia sacra fieri cœperunt, ut post rem suspicio quoque rei tolleretur penitus ac expiaretur. Nisi quod

erant

erant tamen, quibus imago libertatis, pro adulationis artificio incrementoque placeret, generosi mortales, illoque sæculo, illo Principe prorsus digni. Quamquam ipsum quoque projecta adulationum sceditas & patientia multiplex tædio denique affecit ac nausea. Quod prodigio proximum. Quæ enim illa servitus, quod erat obsequium, cujus eum, qui hoc unice agebat, piguit? Qui, veluti dedignaretur victoriam statim paratam, nec ex auctoritate viri tam imperandi veteris crederet, in vacuum possessionem sine vi ac labore induci, non semel efficaci ad ignominiam istorum temporum voce, simul *homines ad servitutem paratos* miratus exosusque, simul flagitii sui ac iniquæ dominationis confessionem mortalium admirationi objecit. Non deerant quidem inter hæc, qui auderent liberam nonnunquam vocem mittere, sed sua eos paucitas, & imperatoris compefcuit sævitia. Tanquam enim si in scopulos impegissent, tanquam cori allisum ferri acumen, ita cum dolore nec sine noxa voces retundebantur, & auctorem suum in præsens periculo, in posterum formidine cumulabant. Unde nova mentium trepidatio, & tutandi sui potissima cuique cura. juxta periculoso, seu tu quid ex mente Principis, sive ab ea diversum quidquam censuisses. Nam mirificus morosusque dominus, & indignabatur, à quoquam suas cogitationes intelligi; & adversa tamen illis si decernerentur, in deminutionem sui accipiebat. Neutrum cum mediocri commotione, aut periculo paucorum, cum in altero securitatem sibi fundasset, in altero periculum ejusdem suspectaret, in utroque sæviendi instrumentum, quotiens & ubi vellet, inveniret. Sed nec silentii minima libertas cuiquam concessa: atque ut loqui periculosum, ita tacuisse noxium erat. Denique & nullis adulationibus & *piis* ex æquo offendebar, & cum libertatem nollet, servitutem sæpe averfabatur. Quæ omnia solitis sibi ambagibus ita implicabat, ut & ipse in ceteris omnia intelligeret, ut erant magis, quam ut dicebantur; & ceteri neque quæ diceret ipse, neque quæ vellet, possent penetrare. Atque hoc



hoc est mirabile illud caput, in quo *ιδιωτάτης τὴν φύσιν* recte Dio agnoscit, quam & exactissime describit. Lubet hic miserari conditionem earum gentium, quibus non leonina crudelitas, non fetitas barbara, sed nocentius his certissimoque sed lento generis humani exitio repertum genus, *vulpes rabie & viribus belluarum immanium instructa* imperat. Nihil ibi cuiquam certum gnarumve, nihil tutum. omnia fallunt, omnia pendent. plurima fraudum imagine territus animus spem metuendo, metum sperando corrumpit. ubiq; Principis terror, nec ubiq; terroris species. fata non modica sæpe, nec minor fatorum occultatio; & morte omni, omni cruciatiu miserabilius, expectatio utriusque. Quid enim tu credas, imo vero quid non credas, ubi lex omnium occultatio singulorum? Nec immerito erecti acerrimique animi Heros inferorum limine nocentius increpuit malum, linguam actionesque à mentis secreto discrepantes. Et certe ut quisque majore animo, ut quisque generosi spiritus haud parum possidet, Achillem in ea re aut Alexandrum imitari mavult, quam Philippum aliquem aut Ulysssem. Nam Tiberius & conatus ceterorum & malitiam longo post se reliquit intervallo. Talem si velle aliquid putas, non vult; si nolle, discupit, odisse credis? amat; amare? odit. Ita apparet? lateat tranquillitas, æquitas ostentatur? invidiam regit ista species ac indignationem. Blanditur iis, quos evertit, & in venia offensæ gerit imaginem, neque amicum vultu neque inimicum discreveris. Quod si in istas fraudes penetras, exitium erit penetrasse: si aberras, erroris quoque culpa nocet. Quæ omnia denique in infestissimam & exquisitam sævitiam tendunt. quæ quo lentior, hoc acerbior; quo occultior, hoc existit nocentior. Id quod in Tiberio plus satis agnoscimus omnes ac videmus. Sumto enim à necessariis ac propinquis sæviendi initio, supra hominem efferari paulatim cœpit: & ut feræ quædam semel gustato humano sanguine in maiorem asperantur immanitatem; ita ille scitum tuoris penitus receptam non nisi inundatione quadam ejus potuit restinguere. Nam

de Germanico quid aliud dicam? quam, quod verum Augusti germen, unicum antiquitatis specimen, meritis in rem Romanam, fide in Tiberium invictus, dissimillimus denique Tiberio, tantarum rerum præmium invenerit ac finem, odium & percussorem Principem. Acerbitates ceteras cum insidiis, quæ miserrimam ei vitam, mortem vero concinnarunt pessimam, vel ex ultimis ejus questibus, vel ex historia repetere, ignoscite Auditores, si per mollitiem quandam animi non possum jam, aut nolo, si possum, per indignitatem. Non rudes post hoc scelus, non segnes ad omne facinus manus Principis esse poterant: tantumque jam sævitix adolefcebat Tiberio, quantum superstes Germanicus pridem formidinis ausuro injecerat. Ibat utique in cædes clarissimorum virorum, & cum maxime innocentium. Quidam protegere suas virtutes servili obsequio ausi, vix ad tempus requiem, plerique usitatum ea tempestate boniviratus (ut scriptoris Afri voce utar) præmium tandem reperere. Divitiæ quoque, & promptus animus, ante omnia autem egregiæ sanctissimæque artes, & magna aut prospera ex meritis fama, à suspicione in exitium petebatur, nec tutus quisquam erat, ex quo vel concupiscere aliquid vel timere tyrannus posset. Nihil eminens, nihil clarum, nihil virtuti simile aspici jam usquam aut nosci poterat: adeo omnia, veluti per lufum, unius libidini ceciderant. Qui inter hæc, tanquam papaverum calices excuteret, adeo nihil pensi habebat, aut eorum formidabat quidquam, quæ mox abunde est expertus. Itaque excidium omnis boni moris meditati, virtute monstratos infringere, inter artes erat. Hi officiis arceri, aut ostentato honore deludi: hi velut in custodia ætatem degere, denique è medio tolli. Inertia interim & segnities, & deterima quæque præmiis attolli ac dignitatibus, solique perpetua felicitate mactari, qui infelicitatis publicæ se minifus præbebant. Ventum jam eo erat, ut nec obscuritas cuiquam sua latendi fidem faceret; satisque clarus esset, quem virtus ulla, suspicacissimo homini fecerat formidabilem.

bilem. Cœpit inde observari, ingentis fore consilii, multique ad eam rem momenti, *sicam majestatis*, quæ, veluti paria cum suspicione ac immanitate Principis faceret, ira quosvis eo meliores ruinæ destinabat: multique, cum se reos ignorassent, pœna sunt experti. Erat crimen istud, quod *impietatis* novi sycophantæ appellitabant, & *majestatis*, veluti sepes ac custodia injusti Principatus. Quod agitari primum à vilissimis hominum ac inquietis cœpit, qui cum bonis artibus non possent, calumniis sævo Principis ingenio adrepentes, clarissimis quibusque periculum primo, mox exitium machinabantur. Tum vero, varia accusationum nomina struis clam deferri, in majus & maligne augeri: frivola, & inania, (quibus nec memorandis vocem aut tempus impendere libet) quæstione tam atrocis legis tractari, nullumque jam certius innocentie signum esse, quam incusatum istud crimen, quo simplicitas familiarium sermonum, & jocus, & natura, & virtus, gravia majestati Romanæ ac iniqua censebantur, prorsus quasi imperatoria magnitudo cladibus, & terrore, & dolis, regis videlicet facinoribus, ostentanda esset. Inde in urbe ipsa, nefas! miserum, atrox, inexpiabile, sine hoste tamen bellum, cui ciendo non tubicines, non faces deerant. Exorta enim vis illaudatissimorum hominum audacia, improbitate, mendaciis omnia opplebat: omenque mortis ac pignus erat repertus delator. Quos flagitiis commaculatos suisque involutos fraudibus, in publicum exitium saginabat pariter atque illiciebat Tiberius: & *ut quisque districtior, ita sacrosanctus veluti habebatur*. Versa ex eo omnia: emebatque quotidie ac vendebat fata cujusque, venalium grex nebulonum, quibus pejus nulla vidit ætas quicquam, nulla timuit. Horum simultatibus innocentiam dedi, horum sceleribus civium sanguinem hauriri, carcerem præclaris viris impleri, uncus carnificum fatigari, jam inter mores esse cœperat. Nihil questibus omnium, sententiis singulorum profectum, custodes legum, fulcra disciplinæ, firmamenta Principatus dicebantur. quæ omnia si salva quisque vellet,

tanto accusatores foveret. Qua re factum est, ut miseria in degenerem malitiam versa, ipsi Senatores, virique dignitatibus compotes quæstum jam eum ducerent uberriorem & sequendum sibi, quo ceteros ad interitum agerent. Sed nec propinquus sanguis aut caritates à mutuis delationibus quosdam absteruere, quin omnes ad suos opprimendos artes conquirerent: annotatusque accusator filius, & senio fessus pater in squallore & sordibus. Atque satis constat, nullum ab insidiis locum, nullum à pœnis diem vacasse. Igitur in Tacito, per hæc tempora eunti, non tam diligentia ac judicio, quam obfirmata adversus continuam inæstimationem patientia opus est. Vix præterveſto, quibus nihil adjungi potuisse crederes, miseria, occurrunt priores metus, dolorumque ut numerus sic atrocitas crescit, & cum tempore scelera festinant aut proveniunt. ut in levibus habenda jam sint maxima illa quidem, sed solita tum tyrannidi facinora. Equidem si bellorum incerta & fœdas subinde clades noscentem, fatigari quodammodo animo necesse est ac perturbari, quanta existimamus sollicitudine obtundi mentem ac velut restringi, in continuis innocentium funeribus, publicoque ipsius, ut ita dicam, virtutis parricidio? Qua in re ut qualecumque levamentum sibi aliisque prudentissimus Scriptor pararet, ipsam nonnunquam temporis seriem interruptit, anticipataque externarum rerum commemoratione, quietem à domesticis malis aliquam captavit. Quorum assiduo tamen conspectu nondum Tiberius, nondum accusatores fatiscabant: cumque quodam quasi incendio, extantia quæque & obvia pervagatus esset furor ac popularis, non frangere se denique, quod alias solet, non cadere visus est. Omnes pœnarum modos, omnia irarum genera expleta satis liquet, cum nondum iræ, nondum pœnis modus adderetur. Quare in ipsa morte mortis compendium miserrima denique sollertia invenit: felixque vocabatur, qui sua manu, suo jaceret gladio. Ut perpetuos timores & inevitabile odiû, ut publici exitii faciem, ut perplexam criminationum acerbicatem, ut carnificem ac contumelias,

melias, ante omnia autem sævum Principis ingenium effunderetur, semel cum vita tali & molestis transigendum, semel communi omnium bonorum & plusquam hosti mortes suas rapiendum multi censuere. Spectaculum immane, horrendum: tot fortissimi viri suimet ipsi interfectores, sui carnifices, quodque omnem diritatem superat, sibi percussores ipsi, sed à Principe immitti. Ut enim pretio quodam emerceretur plures adversus seipsos, bona talium publicari post mortem, quod in damnatis solebat, prohibuerat. quasi vel damnati non essent, quibus in timore, in periculo certum jam erat exitium; vel absolvi ab eo potuissent, qui pridem semel atque uno veluti edicto innocentiam omnem condemnasset. Adeo cruenta bellua, in suas cuique manus redundaturam mortis invidiam, inepte putabat, quæ non illo tempore eum deseruit, non ullo apud posteros deseret. Consumta erat jam sævitia, si ingenium malitiæ metam ex se aut terminos, ante quam fato cohibeatur, nosset. Maximis igitur majora, tristissimis succedunt tristiora; cædibusque quod ultra cædes, ultra mortem malum est, ablata moriendi facultas. Horribile commentum! parcebatur morti pereuntium, ut tempore diuturnior, dolore esset acerbior, ut sentirent se mori atque viderent, qui nec mori poterant. Illud quoque miseriis accessit, quod non dolere jam liberum non gemere; facinusque vocari cœptum, quidquid natura erat. Inter quotidianas tempestates & tyranni fulmina cum nemo inveniretur, cujus non commota domus esset aut convulsa, nemo quin aliquam lugeret mortem, nemini tamen aspicere suorum mala, nemini in medium deslere licitum, lacrymæque matris in nece filii morte multatæ. Trahebantur corpora, onerabantur Genionia; opplebatur Tiberis cadaveribus eorum, qui confossi, lacerati, truncati, varieque in ipsa morte erant sædati. quid ad ista civitas? ut tutius moreretur, laudabat. De cetero enim injectæ mentibus ipsique naturæ compedes, morte ignaviorem effecerant vitam superstitum. Quisque omnia & omnes, se vero maxime ti-

incre : ne pietatem vultu proderet , ne adlisteret perituris , ne colloqueretur , ne misericordiæ ulliusve humani affectus daret indicia. ultimo quoque sepulturæ officio , quod nec hosti hostis invidet , consanguineorum pietas arceri : eripique adeo *fortis humane commercium* , urbsque ipsa velut in custodiam data premi undique ac teneri. Nam & ipsa ædium secreta plerisque in periculum verterant. nullo sermone tam arcano , nullo tam semoto loco , quin perfida custodum sollertia rimaretur ac deferret. Ut jam solitudo ubique infausta , ubique tacentes loci , & in tanta urbe mera appareret vastitas. Non devenio hic , quod forte expectatis , Auditores , ad enumerationem insigniorum calamitatum ; nec Agrippinæ , Drusique miseras , criminationes , mortes , probra post mortem , deploro : non Sabini casum miseror aut Arruntii , non infelicem Nervæ constantiam adduco in medium : quæ & facundissime Noster est executus , & vestram absque dubio recenti memoria conscientiam verberant. Et quis in perpetuis non mortibus , sed cladibus & multiplici strage , ad singulos sufficeret ? Adornati tamen interim prætextus ; neque tam injustum quidquam patratum , quin velamento justitiæ publice prostaret. Cæca enim perpetuo furore crudelitas , fidem , quam omnibus fallit , à plerisque vano rumore & specie exigit. Et latibulum à loco accedebat. Abditus enim in Capreeni secreteo Romanus Princeps , & meditandis acerbitatibus magis sufficebat , & audacius ex longinquo feriebat , ac ut ipse putabat , tutius. Nam libidinibus ejus & infanda Veneri , nolo castas aures offendere : cum in tenebris suis inter stupra & molliem Romano orbi Romanisque exitium moliretur , neque ad voluptates unquam ita esset intentus , ut tyrannidis oblivisceretur. Possunt Sejani quoque flagitia , id est , præcipui furoris Principalis administri , brevitati nostræ condonari : quod & alibi ista rectius tractantur , & ex ingenio domini simillimus minister facile æstimator. Superest , ut peculiaria quædam in Tiberio , & vel admiratione vel dignitate materiæ valida addamus. Nam & an-

nosa

noſa vulpes calliduſque cautor (ut antiqua voce utar) nonnunquam captus eſt : & prudentiæ gnarus aliqua parum prudenter , imo ad delirii uſque infamiam imprudenter geſſit : & ea denique paſſus eſt , quæ partim ab ingenio , partim à quiete omni & ſecuritate eum demoverunt ſeu projecerunt. Neminem non decepit ipſe, decipi à nemine diu potuit, denique à Sejano circumventus & pæne ſubverſus eſt. Cujus rei tanto majus eſt miraculum, quod deprenſi quoque conatus & artes novæ, quod affectata matrimonio Principali magnitudo , perſtrinxit quidem animum ſuſpicacem, ſed priori fiducia non dejecit. quo cum præſertim caſus paulo poſt accederet , idem erat ruruſum Sejanus, quem cupiebat eſſe Tiberius & haberi ab omnibus volebat. Scilicet multum poteſt è morum ſimilitudine nata familiaritas : animuſque ſceleſtus, ut ſceleribus ſuis adrepentes, ſed impares mox dejecit, ita validos ſimillimoſque propiori ſibi fide copulat. ſive non potuit jam cautum teſtumque ei ſe præbere , qui genium omnis nequitia, & ſuæ, pollideret, ac, niſi demerendo, ad mutuam fidem obligari non poſſet. Poſſunt & alia interveniſſe, de quibus in præſens ſermoni non indulgeo aut frena laxo. Illud infaniæ proximum vulgus quoque judicavit, cum homo obtegens ſui & occultator, denique flagitia ſua & manifeſtabat, & manifeſtari gaudebat. Adeo quos flagrans ſævitia ſcleribus ſuis obrenderat parietes, eos vecordia ſclerum ac amentia in publico dimovit. patuitque in Senatu , in populo, quidquid oculis utrorumque ſeceſſus Capreenſis ſemoverat. Sive enim libertatis alienæ illa oſtentatio fuit, ſive famæ poſt infamiam nulla cura, ſive aliquid aliud ſub eſt ; nemo non videt, quantum illa res odium populi plebiſque Romanæ aſperarit. Itaque eo tandem ventum, ut nemo eſſet, quin carnes Tiberii dentibus ſuis diſcerptas laniatasque cuperet, quod ad miraculum poſteritatis ſcriptor Græcus annotavit. Ferunt morſu canis rabidi, ipſam quoque in corpus violatum rabiem, tranſire : idem tum accidiſſe videtur Romanis. qui cum cædibus continuis quaſi infecti

infecti essent, nihil quam mortes, & funera, & præcipue cædenti interitum agitare poterant: cum interire & interficere non scelus, non miseria, sed jam sæculum esset. Verum enim vero non ita odium publicum, non detestatio singulorum vellicabat Tiberium, ut internus ille tortor & implacabilis, qui jam immanitate cum ipsius Tiberii indole certare instituerat, adeo continui in animo tyranni icus, nec intervalla doloris aut spiramenta, & sæviores quotidie, quam cuiquam ipse inferre poterat, mortes. singulaque jam flagitia in carnifices, in supplicia auctori suo verterant. ut non in ipsa quiete quies, non in voluptatibus voluptas, non in latebris securitatis fides superesset noxio: denique ut pessimis se exemplis perire senatui quoque literis testaretur. Prodigiosos vero dolores, qui tam horrendum occultissimi pectoris vocem elicuere seu potius extorsere, ut suas ipse pœnas infensis & majora imprecaturis aperiret! Nimirum quantum nocuerat, tantum timebat. &, quid circumspicienti aliud poterat occurrere, quam scelera quæ fecerat, nec minus quæ facturus erat? quibus plenam conscientiam mirum non est sæpe timuisse mortem, sæpe optasse, invisorem sibi quam servientibus. Quo factum est, ut & de Rep. tradenda, quemadmodum sero ita frustra cogitarit. cujus rei exemplum Sullana quoque historia habet. Scilicet anxius suis vitiis animus metuere vim aliorum, non evadere deponendo suam potest. id quod propterea in Sulla, dictatori Cæsari notatum constat. Tiberium huc quoque redegit conscientia tandem, & senium, & minores fama vires, ut Getulici arma formidaret, & tueretur potentiam; minime id quidem facturus, si per publicum odium aut opes proprias obviam ire potuisset. In fine sermonis hujus lubet cum Tacito mirari, cur *meliorum gnarus & qua fama clementiam sequeretur, tristiora tamen & infanda maluerit* Tiberius. Vir erat, artibus egregiis non minus in bona validus, nisi deteriora prævertissent. Prudentia diuturnis ac insignibus experimentis in immensum pæne provecta; nec moderari non poterat, cum veller, Denique



que regnandi artes ei non defuisse, primis imperii speciminibus deprehensum. Ivit tamen in præceps: abruptaque & inhumana maluit, quam laudata & tranquilla. Causam si quaeritis, ambitionem dabo & summam regnorum licentiam. quæ convellendis mutandisque animis valida, memoriam virtutis & studium obscurat primo, mox ejicit. Nam & in universum crudelis ac sæva indoles, frenis temperata virtutis speciem induit, potentia ac felicitate deregitur amaturque: & Tiberius, superstite Germanico ac Druso meliora gessit, Principeque digniora, donec eorum morte cuncta verterentur. Plus enim jam pudore remoto ac metu, ei licebat, qui ad licentiam sponte nitebatur, quam adeptus suoque ingenio redditus bellua fuit, quem intra humanum jus quædam quasi vincula continuerant, insigni documento, quanto pronior in mala & fortior sit vis humanis mentibus, quam in bona studium. Itaque cum magnas virtutes implere Tiberius posset, vitiosissimus esse maluit ac consceleratissimus. ex Principe tyrannus; ex iudice calumniator, *novique juris repertor*; ex tutore publico publicus hostis factus. ut jam pro curis imperii mæsta adesset vigilantia & meditatio injuriarum; pro clementia subversio innoxiorum ac cædes; pro fide perfidia Romæ ac latrocinia grassarentur. Donec morte, seu naturali sublatus, seu Macronis officiosa in herum fides maturavit *ἀποστέων* seni, ne iis quidem luctum reliquit, quos & ministros scelerum habuerat, & approbatores. Nec mirum populare gaudium, quod Tranquillus tradit, non continuasse se, quin *Tiberium in Tiberim* plerique clamitarent, quin unco trahendum, quin in Gemonias rapiendum censerent. Scilicet *hostis patriæ, parricida senatus, qui innocentes occidit, qui innocentes occisurus fuit, unco trahi dignus erat. Unco trahi dignus erat, qui omnes occidit, qui omnem ætatem occidit, qui utrumque sexum occidit, qui suo sanguini non pepercit, qui testamenta delevit, qui filiis abstulit hæreditatem, qui omnia sæve, omnia crudeliter fecit & facturus fuit.* Quæ talia & plura, non minus tum de Tiberio usurpari poterant, quam sequior ætas de

Commodi increpuit tyrannide. Nos à callidis initiis, per ambigua & fallacia, ad infandos Principatus Tiberiani exitus delati hic subsistimus: nullo clariore exemplo unquam docendi, quantum larvæ virtutis ab ipsa, bonus Princeps à callido domino, clementiæ fata à fine sævitæ disjungantur.



## XX.

*Sequuntur Pœmata quedam.*

## CHRISTI SERVATORIS FASCIÆ.

**D**Um furit, ac totum quatit aut circumtonat orbem  
Mars, unus plerisque Deus, Martisque sorores  
Impietas, Turba, Confusio, dira Cupido  
Omnibus excludunt populis jus fasque Deumque,  
Et Te, nate Deo JESU; cui tecta domosque  
Non iterum Bethlema suas, sed plurima passim  
Terra, tuus licet aula benis & nomine, claudit:  
Dum sibi, dum nobis discordia publica mundi  
Pugnat, & ipse mihi vix inter tanta relinquitur  
Turbamenta; tuis advolvor, maxime, cunis,  
Insans, plena Deo venerans præsepia, plena  
Cælo: quod jungi terris non distulit, ex quo  
Junctum homini vidisse Deum mirantibus astris  
Contigit, & grandis sæcli novus ordo cucurrit.

Hic ego, qua sperare pius, qua cernere felix  
Atque tenere potest, teneo cernoque, nec avi  
Mortalis curas inter tot pignora cæli  
Curo, interque mea tanta instrumenta salutis.  
Hic mihi, qua nullis spatiis potuere vel oris  
Claudi, qua nitidis aterna supervehit astris

*Majestas,*

*Majestas, angusta suis cunabula monstrant  
Fimibus, & parvo capiunt immensa recessu.*

*Hic me multa simul mundo, hic mihi plurima mundum  
Subducunt, rapiuntque mihi me singula totum.  
Singula quid memoro? mea mens vix sufficit uni,  
Atque inter Pannos, quæ te Puer Inelyte, texic  
Fascia, quæ tenerum cinxerunt lintea corpus,  
Involvunt mea vota sibi sensusque morantur.*

*Excipiat Regem subolem sua purpura, cunis  
Intactam ac habitu privatae sortis; at istum  
Vulgaris tela circumdant vincula Regem:  
Vincula sic angusta tamen, potioraque magno,  
Quo summi convexa poli velantur, amictu.  
Sit diadema sacro populi venerabile cultu,  
Candida purpureos distinguat fascia nexus,  
Splendeat in toro majestas tota tiara,  
Et pars magna Dei: nemo Deus editur & Rex.  
Hunc præter, qui regna Deus dedit atque tiaras  
Regibus, & cujus panni diademata sacrant.  
Imperat Augustus Roma, pacemque togata  
Gentis in obsequium mundi dispensat, & inter  
Agmina fidorum Reges videt aula clientum.  
Hoc tibi pignus erit, qui magni Principis aulam  
Et sedem cupis imperii ac penetralia nosse.  
Hic etiam extremis Indus memorabit ab oris  
Obsequium, & Parthus regum rex esse modestus  
Incipiet, regemque pari. sublimia cuncta,  
Cuncta decora tibi signent dominantis honorem  
Augusti, & rerum fastigia tanta loquantur:  
Interea meus in stabulo Rex nascitur, ille  
Augusti dominus, sacrorum conditor, auctor  
Regnorum, & regum moderator, pignore nullo  
Imperii, verum pannis noscendus, & ipsa  
Paupertate thori. Notabunt lintea Regem,  
Lintea, quæ partum primo involvere recentem,  
Signa dabunt natæ vobisque orbique salutis.*

*Angelus hac memorat Pastoribus. audiat orbis;  
 Audiat, & lato moveatur ab omine terra;  
 Audiat, & fessos nunc cælum alluceat ignes:  
 Dum cæcis oculis caligas. & auribus ista  
 Transmittit surdis dea gentium & arbitra Roma,  
 Dum stertunt altum populi, dum vana profanos  
 Ambitio sumos & fucos vendit enitque.*

*Me quoque (proh tenebras vita!) vagus error in istam  
 Abriperet turbam, medio ni rure locatum  
 Inter pastores reperisset fulgor ab alto  
 Missus, & in pannis docuisset quærere Regem.  
 Hos ego dum simplex tracto spectator, ad ipsa  
 Regnorum penetro prima & verissima sacra,  
 Infantisque rudi video à velamine pictas,  
 Prætextasque togas, diademata, sceptras, coronas  
 Pendere, & Pueri de cunis surgere totas  
 Majestatis opes. Dum grandis cura fatigat  
 Mentem, Auguste, tuam; quo sit moderamine victus  
 Orbis in obsequio retinendus, quisque legendus  
 Successor, domui que munimenta paranda;  
 Dum tibi secretas tua Livia suggerit artes,  
 Ipsaque calliditas tibi Crispi voce probari  
 Affectat: nil ipse tibi, uli consiliu orbi.  
 Sed qui te terris, tibi terras servat, in orbe  
 Vix reperit sua tellus tuo, vagique juvencos  
 Inter, & obscuris sua lumina fundit in aulas  
 E laribus, legesque tuis ac tempora ponit  
 Consiliis, ferrum Cajo, sinemque Neroni  
 Atque tua domui jam nunc decernit eundem,  
 Romano durante tamen per sæcula regno.  
 Quamvis ille feros jam cernit cuncta tyrannos,  
 Adversum lectos cæcis & sacra suorum  
 Moliri. quos exilio variaque tremantes  
 Clade, suis penitus cupiens involvere pannis,  
 Perpetua præsese sinum jubet esse salutis.*

*Huc veniant lacrymis persusi & sanguine: panni*

*Abster-*

*Abstergent lacrymas, siccabunt sanguinis indrem.  
 Huc veniat sapiens & cælo deditus: ipsa  
 Et cæli & terra latet his sapientia pannis.  
 Huc veniat rudis & simplex: mysteria primum  
 Simplicibus pendunt, quæ celant maxima panni.  
 Quem sua majestas involvit nubibus olim  
 Et flammis circum vestivit, fulminibusque  
 Terribilem supra mortales extulit ausus  
 Conspectusque Deum; nunc andeo adire, videre,  
 Tangere, complecti: dum panni cuncta revelant,  
 Quæ velant. O magne Puer, Deus & Puer, Infans  
 Et Deus, & cognate mihi, idem frater & auctor,  
 Incola præsepis, mundi arbiter, Inclyte JESU,  
 Quanta tui documenta dabunt, quos volvere pannos  
 Cæpi! declarant hominis cumabula panni.  
 Humanum est, quidquid tegitur. primordia nostra  
 Nascentumque aras se tali tegmine munit;  
 Tegmine, quod fragilis præsentia pignora monstrat  
 Natura, ac inopis vita præludis signat.  
 Involvit pannis homines, exutus amictus  
 Justitia: dirum panni mortalibus omen  
 Et pelles fuerant: ni nostris claudere pannis  
 Justitia ipsa suos artus, corpusque sacratum  
 Ipse Deus voluisset: homo Deus, & Deus Infans,  
 In pannis homo & in pannis Deus, unus & idem  
 Sarcina pannorum sacramentumque. Notavit  
 Angelus in pannis mundi recubare salutem.  
 Quod recubat pannis, hominem indicat: arrha salutis,  
 Præsentis dat signa Dei. Præsentis adoro  
 Numen & amplector. nam cum mortalibus, orbi,  
 Cæloque & terris nullo non tempore præsens,  
 O JESU, fueris, mihi præsentissimus esse  
 Incipis in pannis, mea quos fiducia tangit,  
 Explicat, involuit, replicat, scrutatur, honorat,  
 Diligit, & totis includi tota laborat.*

*Spirent astra minas , eructet terra cruorem  
 Aut sitiat , diras pestes diffeminet orcus ;  
 Non penetrant pannos , quos incolo , cuncta nocendi  
 Ingenia ; in flammis mediis suavissima pannos  
 Guttula , Chrisse , tuos , cælo irrorante , tuetur.*

*Quid foliis nudi pratexere corporis artus  
 Eois coner , cum me vocat atque requirit  
 Et Deus & Judex ? pannos conspexerit ille ,  
 Et Deus esse meus , nec iudicis ora tenere ,  
 Sed faciles vultus volet usurpare Patroni.  
 Jam dixi causam , cum te dixisse probavi.  
 Qui mihi victricis causa documenta dedisti  
 Pannos : non quales luctum sordesque reorum  
 In pullos habitus involvunt , sed quibus almi  
 Pignus & innocui candoris inesse videmus ,  
 Quis indutus ego contemnere singula possum ,  
 Que splendent gemmis , qua cultu ornata superbo ,  
 Mirantum retinent oculos animumque morantur.  
 Purpura regalis ( pietati ignoscite reges )  
 Pulcra quidem , sed pulcra minus , quam fascia simplex ,  
 Quam mihi sunt panni , quos intra vivere vitam ,  
 Cum quibus in tumultum condi , tumultoque redire  
 Surrectus cupio . Da JESU , da mihi tuto  
 In sanctis latebris per tempora sava receptu  
 Fulmina bellorum vitare , dolosque maligni  
 Infestos Satana , qui totum opponere mundum ,  
 Meque ipsum mihi , non cessat . Deserviat extra  
 Hos , quibus incingor , pannos , quodcumque furoris  
 Vel parat invidia , vel dira calumnia constat :  
 Donec ad aternas sedes , & candida cætus  
 Agmina , CHRISTE , tui pannis subveclus in istis ,  
 Mortales pannos pariter gemmasque triumphem.*

Anno sæculi à nato CHRISTO

septimidecimi  
quinquagesimo

S.

**A** Nne , decem lustris titulum impositure beati  
Temporis , & sæclo fata dature novo ,  
Sic tua per celebres signentur nomina fastos ,  
Et referat sanctas qualibet hora notas ;  
Ut te CHRISTINAM studio servasse perenni  
Obsequiisque juvet demeruisse tuis.  
Hanc faciles Hora , placida cum Pace , quietis  
Auspiciis terris consiliumque locant.  
Hanc colit alma Fides ; hanc pleno Cópia cornu  
Consequitur ; nec abes , juris amice , Pudor ,  
Hanc latis , solito Sapiéntia cultior , ulnis  
Stringit , & æterno sedere Musa ligat.  
Anne , decus rerum , tibi cælo mittitur omen ,  
CHRISTINA ut felix auspice totus eas.  
Quicquid amat pectus Fortuna reponere fastis ,  
Materies unum splendida nomen erit.  
Anne , sacros propera diademate cingere crines ,  
Officioque præi sacula cuncta tuo.  
Non alias simili decus hoc in vertice fuit :  
Nec , quod huic nomen comparet orbis , erit.

OPTIMÆ. REGINARUM.  
CHRISTINÆ. AUGUSTÆ.

CUM.

AD. SUSCIPIENDA. REGNÍ. INSIGNIA.  
URBEM. HOLMIAM. INGRESSU-  
RA. ESSET.

O, cujus

O, *Cujus facies in publica gaudia toris  
 Sidere inocciduo sufficit agminibus;  
 Cujus ab ore pis repetunt oracula cives,  
 Cujus inexhaustâ dextera pollet ope;*  
 O sacro decus omne tuo, REGINA, serenam  
*Temporibus frontem gratificare bonis.  
 Jam solito Phœbus sua fert augustior orbi  
 Lumina, luminibus mixta vel aucta tuis:*  
 Jam parat æternis ingentia nomina fastis,  
*Et mundo faustum constituisse diem,  
 Quo caput augustum cœloque affine, sacratus  
 Ornet & imperii pignore cingat apex.  
 Ingredere æternam (per Te sic audiet) Urbem:*  
*Et cape felici sceptrâ paterna manu.  
 Et vive, & longis patriam successibus orna,  
 Et meritis imple sacula cuncta tuis.*



*Illustrissimi Ducis*

## LINNARTI TORSTENSONII ELOGIO

*præmissum.*

**H**ic est, irato qui Suecica fata deosque  
*Opposuit Marti, secumque in prælia duxit  
 Fortunam, CHRISTINA, Tuam: cladisque pudere  
 Ingentes animos ac arma potentia solvit.*

*Hunc, per commissas acies modo iussa serentem,  
 Vimque suam, modo munitis expellere clausos  
 Tentantem castris, non sustinere virorum  
 Robora, non vallum, non ferreus arcuit imber.*

*Idem, quam placidus victor, quam suavis amicus!  
 Strabat composito tranquilla modestia vultu,*

*Verbis*



*Verbis, plena fides, & solum fortis in hostem  
Dextera, pacandis spes haud instrenua rebus.*

*Post patriam meritis impleam, laudibus orbem;  
Post titulos & bella suis inscripta trophæis,  
Nunc corpus tumulo, mentem super astra locatus  
Cælesti æternos agitat de Pace triumphos.*



## ODE PINDARICA,

*scripta anno 1634.*

In acerbissimum funus Juvenis, ingenio,  
doctrina, moribus, singulariter excel-  
lentis,

PETRI SAMUELIS THIEDERICI,  
nefario grassatorum nocturnorum scelere  
trucidati.

### STROPHE I.

**R**egina mentis ignea,  
Herois ingens officina  
Spiritus, Siren melior marinâ,  
Pieri, seu te lenta minorum  
Cobors Quiritum, non habilem teri,  
Repulit, seu tibi savi obstrepit horror  
Martis, nec lituos inter juvat esse sonoram;  
Injuriosâ forte venustior  
Surge, modosque graves & invi-  
dam demum chelyn expedi,  
Nec dithyrambos obloqui ferro time, &  
Carmina pugnis.

tt

ANTI-

## ANTISTROPHE I.

*Turbant, minantur omnia,  
 Nec jam per infestos apertus  
 It Furore, sacram domuum quietem  
 Ac urbes infame pererrat  
 Scelus. manus furtiva, profana, Sty-  
 gia, Natura quod, & quod tremuit aether,  
 Quod refugus toto sol averfatur & horret  
 Vultu quam inauditum peperit nefas!  
 O tenebra! ô quibus expiata  
 Nox sacris repetes tuum  
 Censum? paventis macula jungi temporis,  
 Et fuga, & horror.*

## EPODOS I.

*Nil Thiedericô majus occidisse,  
 Nil vixisse pari decore,  
 Nil tristibus  
 Æque deminui repente fatis,  
 Vidit priorum cura, vel gens postera  
 Lugebit, si tristibus ullis  
 Hic usus tamen, aut causa doloribus.  
 Planctibus sepulcrum  
 Multoque fletu, quinquis ab exitu  
 Non vim Libitina ac imperium  
 Evitare potest, repetat: sua gloria vates  
 Eximiosque viros tuetur.  
 Morte in media vivere gestis  
 Aurea virtus,  
 Seculorumque potens, suis  
 Ævum triumphis computat,  
 Et vano superimminet orbi.*

## STROPHE II.

*Ille & canoras sidera*

*Iussa*

*Iussit fides mulcere ; solem ,  
 Qua vebit , prompto comitatus ausu :  
 Ille auro & libavit habenis  
 Orbem , novus Tirynibus , ac amor  
 Populorum. Taceat Thracius Orpheus.  
 Vixta suos cesset cantus memorare vetustas :  
 Nil audietur , pra numeris lyra  
 Perpetua , triplicisque Phœbi :  
 Seu te Græca rotunditas ,  
 Seu juverit Romana Suada , Teutonis  
 Seu grave plectrum.*

## ANTISTROPHE II.

*Minora ( quamquam quid minus  
 In maximis ? ) non jam celebro.  
 Gallus adstet , torpet Ibernus , Ita-  
 loque animos posuisse volenti est.  
 Gentes diserta , cuncta , sed heu ! brevi  
 Domino calitis hujus cithara de-  
 ferre student , & jam meliori cedere dulce est :  
 Cum mox scelestæ quis temerat manu  
 Dulce decus ? fera Caucasæ gens ,  
 Et sancti impius hospitibus  
 Latro Scythes , & Turcæ cælo dimicans  
 Horreat omen.*

## EPODOS II.

*Sic grande nil , nostro manet perenne  
 Tempore : conspicitur , fugitque  
 Facies soli ,  
 Quidquid sidereo vigore gaudet.  
 Huc nempe pietas , huc tetendit castitas ,  
 Oppositusque adamus malefactoris ,  
 Et mens indocilis decipere , aus capiti.  
 Huc inuisitata*

*Constantia, ardor, mens hilaris, vicens,  
 Ac omnia tam prisci fidibus,  
 Quam majora novis. Et pridem totus ad astra  
 Dulce vocantia Thidericus  
 Ibat. Nova jam carmina terras  
 Undique celo  
 Advertent. Mea tu, sonis  
 Nunc cede tantis, Pieni,  
 Ipsa voles quos reddere Fama.*



## CONDITORIUM THIEDERICI,

*sen*

### CONSOLATIO AD PARENTEM SUPER OBITU FILII.

*Amplissime VIR,*

**V**eni & vide. Hic est locus quietis, & spei, & gaudii, & amœnitatis; quamquam non amœnæ. Hic Filium tuum condidimus: hic decus Tuum pariter ac Nostrum ad spem resurrectionis sepelivimus: resumpturi, cum suprema jubebit buccina. Arceant sane, quicunque imbelliâ pieratem metiuntur ac scemineo planctu, à filiorum cadaveribus parentes; acerba ex oculis funera surripiant; sepulcra omnibus ostendant, præterquam cui ostendi præcipuè oportebat. Virum, & Christianum; genitorem, & sapientem, ad filii ossa, non ad questus & dolorum impotentiam, jure maximo advoco: nec ab officio interim & egregio memorique affectu repello. Veni, & vide, & considera. idque paternâ, sed generosâ ac Tuâ mente. Titulos mihi aspice, & consentientis Famæ officium. Prima se oculis vox offert:

*Quis-*

*Quinquis spectator advenis, cave ne profanus adeas, impium recedas. Impareti, dico, ne adferas, moestum ne hinc auferas animum. Virum fortem, magnanimum, absolutum, nemo sanus luxit. omnes venerantur, collaudant, intuentur.*

Subsistamus hic, Pater optime, constantiam votis placeamus, ne indignum eo, quem visimus, indignum nobis, non ex officio officium festinemus. Referantur jam oculi ad sequentia.

*Audi hoc amplius. DEI Præpotenti, Benefici, Sapientis numen hic suspice, & adora in limine natus. Ille pectus igneum, vi sua ac cælo instruxit. ille artes, linguas, scientias in electo vase condidit. Ille tot ac tanta uni contulit, quæ multis negavit. Ille laceritiam hanc parentibus, patriæque & bonis fecit. Ille perpetuam apud non ingratos esse iussit, cessare, ubi cesset grati animi studium. Quid enim ereptum quereris? quod repetiit auctor suus & dominus. Quid contra mentem Unius Mentis lugubre facis, quod non intelligis? Pateat arcanum cæli, discant, quibus nulla heberudo, nulla obstat impietas. Sanctissima & suprema Majestas bonum factum esse iussit, ut intelligant tandem habitatores orbis: Bonos præstantesque viros usura commodari non peculio. Eorum dotes perennes esse, nec cum vitâ finiendas. Debitores fieri, quicumque usi sint, aut utantur. Lamentantium neminem intellegere, quid lamentetur. nec uti quidem scire, cujus usum desiderare in ipso possit. Invidia igitur, non pietatis id esse. Denique fixum manere ratumque, vitam & excessum, bona malaque, pro arbitrio divinitus imputari mortalibus. Non tempore, loco, ulla re interverti ista posse. Unum certum esse, aliam aut certiorrem viam nec querendam, nec inveniendam. Si quis secus faxit, hunc sua temeritatis panam, prout visum supremo iudici fuerit, luiturum.*

Hic vero vivo flumine opus est; hic lotas purasque manus tollemus; hic dicamus: Fiet, quod iussisti, Magne Imperator. Filium dederas, exornaras, evexeras; gaudeo ac immortales habeo gratias. Rursum admovisti ad Te pro-

pius, ex ulnis meis & speratis amplexibus, in tuum recepisti sinum: id quoque grandis beneficii debitorem me facit. Meliora in videre nolo: nolo in deterrima & ruinas nostras retractum. sit maneatque mihi salutaris clementia Tua; ea me, si quid dierum superest, conservet, ea filium mihi, me filio, cum voluerit, reddat. Et scio, Vir Summe, Te pridem hæc & majora animo agitare. Neque audietur hic infelix illa orbitatis nænia: Fili cui me reliquisti? Cui enim? nisi Deo Sospiratori ac Liberatori; Patriæ & Academicæ clientibus. Quas si in locum filii publicus parens adoptas, orbus jam non eris aut defertus. Non audientur vulgares cantiunculæ, ò si aut habuissem nunquam, aut non amissem, quem habui! Juvenem amisi, ò si maturum annis, spectatum gloria videre licuisset! fato saltem suo obiiisset, nunc sicariorum manu cecidit! & cœtera delicatis solita mollicies. Revertendum enim est ad lapidem nostrum, ubi proxima hæc sunt:

*Porro florentem ætatem nemo interruptam dicat. florem verum, nec imminuendum adepta est. Nec annis æstimanda maturitas, sed gloria. Quam, si mortales respicias, absolverat; si cum ea, qua in cælo fulget, compares, inchoaverat; XX. & IV. annos vixit, ne, quorquæ futura sunt, seculis moreretur. Puncto temporis universam ejus vastitatem complexus. At avulsus est vita! Et quam segniter tu, ac minutatim subduceris, quam longe distimeris ab ista meta? At insons, at crudeliter cecidit! quorum alterum nec luctum habere potest, nec alterum noxam. Crudelius maculatus ad majestatem suam pertendit Christus. Heroum primi etiam suorum perfidia occubere. Quam inopinus dolor!*

*Quin qua non metuis, tibi proxima crede. volamus  
Et fugimus: requies unica, mortis amor.*

*Heu grandis jactura! quia patria sua felicitatis instrumentum ante fructum amisit. Tu, qui quereris, qui otiose stupes; sarcias,*  
oppo-

*opponas cervicem , Thiedericum regeneres , si potes . Sin :*

*En vindicta Dei Te magni casibus ultro*

*Quid nequeas , monuit . Nec nisi sic sapimus .*

*Thiedericum , virum calitem , plorare , mori est ; imitari , vivere ; laudare ejus merita , triumphare . Hoc agamus . Nemo sibi pradiatum neget . Violatores manium aeternorum iterum exesse , & plorare suam temeritatem , quantum opus erit , jubentur . Tu , qui melior : qui rectior , dicas : Euge , sublimis anima , tecum vivamus , ut bene , ut semper vivamus .*

Perlustravimus conditorium . sed ecce majora , quam in ipso . solatia non inveniemus . Adeo occupata sunt , quæ dicturus eram , adeo publicæ vocis rationes , privatis multum antecellunt . Neque profecto plura apud memorem , & quod propius huc facit , magnum dici fas est : nisi eadem opera diffidere constantiæ tuæ , & exprobrare velimus imbelliam . Quorum neutrum à calumniâ procul abest . Nec etiam meliore ad hanc rem magistro uti , quam Te ipse possis , imo usus jam olim es : adeoque non descivisse ab animo forti es putandus , qui vices omnes , omnia intervalla in virtutis immobilis tenore ignoras . Sciebas utique , quem , cui , filium genuisses : videbas brevem vitam , beatitudinem æternam esse ; agnoscebas quanta ingenia ostenderentur tantum terris : reputabas quanta habuisse talem laus , quantum esset solatium , quod rarissimis felicium vix obtrigerit . Quid ergo attinet verba cumulare , quid æmpla egregiæ mentis ex longinquo petere ? Nihil horum deficit intuenti filium . Quam animosè mortem excepit ipse , & excipientem aspicere alios voluit ? Quam illustri voce , ne gentilium constantiæ Christiani cedamus , monuit . Neque enim in verbis rem verti ac virtutem . ostenderemus , quo robore mentis recordari saltem & aspicere , quod ipse perferret fortiter ac toleraret , possemus . Subita casuum & injurias , divinitus perimitti . iis neminem eximi , omnes inde liberari , Est præterea

terea modus pietatis : est meta paterni amoris. desperatio in Deum , & quidvis potius vocanda sunt , quæ plus ultra hic procedunt. Quid ? quod nunquam tantum doloris vel apud effœminatos mors Thiederici , quantum lætitiæ ejus vita apud non iniquos judices est habitura. Fave itaque æternitati Filii Tui , Amplissime vir , quemque superstitem in hoc ævo optaras , ævo omni ac terrarum orbi superstitem in cælo factum lubens lætusque adspice ; id est , venerare Deum , ama filium. Hæc sola , sed vera parentandi pietas relicta est.

*F I N I S.*

J. H.



J. H. BOECLER

PROGRAM-  
MATA ACADEMICA.





# JOANNES HENRICUS BOECLERUS,

Eloquentiæ Professor Publ.

*LECTORI BENEVOLO S. P. D.*

**S**I, cum nuper amplissima mihi Eloquentiæ Professio demandaretur, tantummodo, quid tam ardui muneris provincia, & publica de reparandis, quæ ab illa vetere gloria magis in dies desciscere videmus, hisce humanitatis studiis expectatio postularet, spectare voluisssem; fecissem id, quod iusti metus modestia ultro subieci-  
bat, ut dimitterem anceps inceptum, cujus ut conatus quidem aliqua in laude, ita effectus omnis in casu politus, incertam ac pæne nullam spem relinqueret. Non poteram ignorare, oratoris laudem multis litteris, & iis quidem reconditis ac exquisitis, summoque studio & exercitatione constare: hæc vix mediocria mihi aderant. videbam sordere ac tantum non publice sperni eloquentiæ studia, quæ si quis in dignitatem vellet pristinam vindicata, huic auctoritate præcipua, iudicio autem opus esse plurimo: deerant & ista; simulque grande rebus gerendis impedimentum, expugnatuque non difficile minus quam periculosum, moris antiqui oblivio obversabatur. Unum erat, quod nu-

tantem firmaret animum, expulsoque metu spe audaci, sed pia impleret. Sciebam Divinis imperiis geri, quicquid gestum est: eandemque esse Numinis Benefici providentiam, quæ ut mihi præsentissima per omnem vitam ope innotuisset, ita nunc inopinantem, ut solet, vocaret, Patriæ & Academiæ præsidibus commendaret, ad destinati à se muneris cathedram, per media obstacula veluti manu arreptum deduceret. Igitur, quod felix & faustum solennia aggredienti vota esse jusserunt, auspicatus professorios labores, statim in id incumbere cœpi, ut situm his litteris ac ex situ contemptum detergerem, desidiâque circa eas publicam (patiantur quæso Studiosi juvenes me non tam ipsis, quam sæculo id exprobrare) aliqua *Exercitationum & amenitate & varietate*, ad strenua studia invitarem. Descripsi publicis dissertationibus earum genera, & rationes, partim veterum recentiumque doctissimis usurpatas, partim nostra observatione repertas: atque nunc adeo festino propediem videre egregios exercentium cœtus, qui æmulatione industriæ ad decus rectissimorum studiorum nitentes Auditoria eruditus vocibus, hebdomadas pulcris speciminibus, urbem ipsam sui laude & fama impleant. *Sola enim est ad eloquentiam via, exercitatio.* sine qua non ingenium oratorium, non studia oratoria, non observationes oratoriæ, non erunt, inquam, hæc omnia talia, id est Oratoria, sine oratoria exercitatione. Huic cum plerique maximam in eloquendo vim tribuant, nonnulli totam malunt tribuere. Certe si Græcorum fide stamus, Demadem illi suum nobis, & Æschinem, ipsum quin etiam Isocratem, non arte ac disciplina, sed exercitatione sola ad summam hujus laudis excessisse iactabant. Frustra his Quintilianum opposuerimus, qui postquam in eos tela quædam torserit, doctrinamque in his monstrare conatus fuerit, denique exercitationem esse, quæ disciplinæ & nomen & vim sustinere sola possit, fatebitur: Nam id, inquiet, *potentissimum discendi genus est.* Si ad Romanos venimus, quor illi nobis viros narrabunt, quibus *disciplina fuerit forum; magister; usus & leges & instituta populi Romani*

*Romani mosque majorum ?* Equidem in universum rem æstimanti satis patebit, veteres, ut eorum, in omni disciplina, & sollertia & studium fuit ardentius, ita in exercitatione dicendi majore industria defudasse, quam hodierna segnitie (ita enim profecto comparationis causa loquendum est) vel capit vel credit. Totus admirationis impleor, cum Brutum Ciceronis (ita dicitur, quem de claris oratoribus scripsit librum) memoria repero. Invenias ibi ingeniorum miram & raram felicitatem, studiorum præstantiam singularem, dotes varias, insignes, admirabiles: nisi longe esset admirabilius, longe insignius, tot ferme exercitationum flagrantissimarum prodigia, quot virorum nomina, occurrere: ut dubium nemini esse possit, quin si horum attendatur judicium, primæ, secundæ, tertiæ, quod de actione Demosthenes dixisse fertur, exercitationi tribuendæ sint. Sed enim nequaquam patitur instituti nostri ratio, antiquitatis laboriosæ laudes in nostri suggillationem amplificare; Tulliosque hic & Cæsares referre: quorum ille quotidianis commentationibus, auditionibus, scriptionibus, lectionibus, non, dum proficeret, sed cum profecisset; non cum fori, sed cum eloquentiæ jam universæ, cum reipubl. suæ princeps esset, exercebatur: hic autem inter tot publicæ, inter tot privatæ rei negotia, adeo studiis se non abdicavit, ut quæ ejus feruntur fuisse scripta, quæ celebrantur exercitationes, adhuc hodie suspensum orbis judicium teneant, felicissime Imperatores Principesque omnibus civilis prudentiæ artibus superarit, an præstantissimorum gloriam eloquentia exceßerit. Tam rara in eo laude, Pelidæ magnanimitas cum suaviloqui facundia Mæonii certavit. Illud propius nostram recordationem tangit, & vota sollicitat, quod hæc ipsa Academia inusitata quondam exercitationum gloria floruit, quod per orbem egregiæ strenuitatis fama ivit, quod externos venerabunda adeundi tam felicitis Athenæi cupiditate excivit: quod jam dissimillimi status comparatione pristinam nobis tristi efficacia sortem commendat. Quid enim? eo novitia sapiendi insolentia

pervenit, ut nobilissimas *Declamationum* exercitationes, pueris relinquendas, aut ad eos relegandas, qui è gymnasio essent recentissimi, turpiter, ita me fides amet, turpiter multi existimarent. Ita nimirum est; impetu & consuetudine & fortuito opinionum inconsultissimarum errore ducimur improvidi; spernimusque sæpe utilissima, quæso ecquam ob causam? sprevit enim ille; quis autem ille? homo præter inanes glorias flare nihil doctus, arrogans, rudis, annis tamen & quadam verborum jactantiâ strepituque, & quod plerumque ad exemplum sufficit, magnifico studiorum nomine seque orium velare peritus. A qua fœdè rate procul scilicet Juventus nostra aberit; cui longe aliud conditorum virorum consensus, qui discantibus vice legis esse debet; aliud inclyti Senatus auctoritas, quæ salutis scholasticæ cupidinē, obsequium meretur ac reverentiam; aliud ipsa ratio, cui sanum repugnare neminem fas est, sive suadent sive imperant. Sed & aliud nos ominari jubet, Eximii Juvenis, atque ut ingenio felici, ita animi cultura cum primis gnavi ELIÆ KOLBII, ARGENTORATENSIS, exemplum. Qui cum pridem studiorum rectitudinem, sedula exercitatione ad Academiæ ornamentum non sine magna Professorum voluptate, commilitonum applausu, conferre cœpisset, non distulit meæ quoque Professionis initia felici eruditionis suæ fœtu, tanquam fausto omine insignire: oblato eleganti, quod venusta Elegorum facilitate conscripsit, carmine. In quo, repetitam paulo altius populi Israëliti conditionem, pœnas scilicet ejus & à pœnis liberationem, ad nobilem felicemque GEDEONIS adversus Midianitas, quæ Judic. VII. describitur, pugnam deducit, victoriæque ejus typum ad Servatoris nostri, quos devicto Satana, morte, inferno, reportavit triumphos, accommodat, eoque veluti Pæane Ascensionem ejus veneratur. Placuit extemplo scriptionis & industria & felicitas: non perfunctoria, ut apparebat, bonorum Poëtarum lectione adjuta, judicii que limatioris vestigiis ubique interstincta: itaque neque verbum immutare, sed

sed illibatam egregii Juvenis doctrinam publicis auribus committere visum est. Rogamus autem omnes, quibus honestissima literarum studia curæ cordique sunt, prout cujusque dignitas capit, demisse, reverenter, officiose, ut die crastini hora VIII, matutina, eruditi carminis recitationi benevole interesse, suoque in exercitationes ejusmodi solennes studio, ad capeſſenda simili laude studia, Juventutem literis deditam inflammare, nostro autem Declamatori fausta quæque apprecari ne graventur. Valete.

Perſcriptum Argentorati, die 24. Maji, Anno M. DC. XXXVII.

## II.

**P**Riscis temporibus, cum adhuc moribus censerentur non titulis res humanæ, cum ad usum studia non ad pompam referrentur, cum non sua amplificare, sed publicas utilitates attollere, finem sui operis & regulam pro se quisque reputaret; tanta fuit agendi dicendique & tam arcta societas, ut quantum in alterutro quis deficeret, tantum in utroque existimaretur ei deesse. Satis quippe apparebat, rationem, cujus consilio vivendum mortalibus esset, sine oratione veluti sepultam; orationem vero, quatenus à ratione abiret, noxiam fore aut inefficacem. Igitur cum tam præſens usus, utriusque culturam & studium ab initio omnibus commendasset, geminæque utilitatis potius quam naturæ foetus, *Sapientia* nasceretur ac *Eloquentia*, donum tam cœleste, ita ut erat, integrum nec dissociabile, statim ad civilem societatem instruendam juvandamque suas penitus cœpit vires conferre, iidemque actores rerum qui oratores verborum esse: neque quisquam dubitabat, quin uno nomine expresso utriusque vis intelligi deberet. *Cum vir ille vere civilis & publicarum privatarumque rerum administrationi accommodatus, qui regere consiliū urbes, fundare legibus, emendare judiciis possit, non alius sit profecto quam orator, quæ exordientis suum opus Quintiliani verba sunt.* Precedentibus annis, cum in scholas eloquentia concederet, occasione orii quod ibi nacta erat, de ornatu sibi & quodam nitore liberalius

ralius circumponendo visa est laborare, cum fructu illa quidem, si cum modo. Observatum enim est, tantam à Sapientiae profectu, commodis, gravitate factam discessionem, quanta cura à rerum actu ad fallaces rerum imagines & loquendi delicias erat properatum. Nisi quod animadversa degenerantis tam bonæ rei iactura, tum in Græcia, tum apud Romanos cordatiorem industriam erexit, ut quod vitæ causa generatum esset, ad vitæ usus ex umbra denuo revocarent. Hinc jam officii quondam oratorii nomen, notitiæ titulus ac discriminis extitit, ut πολιτικοὶ seu civiles dicerentur, qui secundam magnarum artium prudentiam, & scholarum studia ad rem civilem, & humanos usus unice referrent, & φέρει πολιτικὴ, oratio quæ relictis scholasticis floribus, & Sophistico tumore, decentior quam splendidior, gravior quam comptior esset. Hinc apud Athenas schola πολιτικῶν λόγων; hinc πολιτικὸς θρόνος, & auctoratus ei cathedræ talento annuo Professor, magnis scriptoribus memorantur. ad hunc dicendi characterem (sive Rharnusius Antiphon sive quis alius viam primus patefecit) Isæus maxime animum adiecit, & secutus eum Demosthenes ad fastigium hujus laudis excessisse, apud Plutarchum in vit. Rhet. refertur. Non distulerim inter hos laudare Julii Cæsaris eloquentiam: quem πρὸς λόγους πολιτικούς αἰεὶ αὖθις, egregie ad civiles orationes comparatum fuisse, idem Plutarchus perhibet. Sed & Augusti *prompta ac profluens & quæ deceret principem eloquentia*, quam in eo Tacitus agnoscit, ab hoc genere plurimum traxisse existimanda est. Pertinent huc Lycurgi quoque & Democharis elogia: quorum ille ἐπολιτίεσσατο ἐπιφανῶς ἐν λόγων ἐν πρῶτον, vitam civilem ut factis sic oratione illustravit; hic κατὰ τὸς πολιτικὸς λόγους ἐδίδως χεῖρων ἦν, nemini civili eloquentia concedebat. id quod auctoritate tertium jam laudati scriptoris illius Chæronensis firmamus. Nec prætereundi hic plane sunt, L. ille Torquatus, *quem tu non tam cito Rhetorem dixisses (etsi non decras oratio) quam, ut Græci dicunt, πολιτικόν: & Lentulus, qui eloquentia satis habuit ad rempubl. duntaxat quod*  
opus



opus esset : & C. Lælius, cui eloquentiæ tantum tribuitur, quod esset in rebus privati amici ejus, in republica ipsius dignitati satius : de quibus in Bruto suo Tullius Noster ita judicavit. Igitur Fabius quoque, civilis viri vereque sapientis eloquentiam à ceterorum facundia diligenter distinguit, eamque ab otiosis Philosophorum quorundam disputationibus removet. Et Seneca Rhetor, pressam ac civilem orationem laudat. Cujus specimen dum quærimus & exempla, optaremus quidem exstare *Aristotelis Politicam ad Philippum epistolam*, de quibus cur aliter quam de ceteris ejus viri scriptis cogitemus, causam non video : esse scilicet quicquid ab hac mente prodiit, in suo quodque genere, ita ut nihil possit magis, excellens : optaremus tot *Politicas orationes facundissimorum principum*, quorum nihil præter nomen ad nos pervenit : verum nec in his, quæ usurpamus veterum monumentis, proficiendi nobis copia ac imitandi deest. In Ciceronis certe & Demosthenis scriptis licet multa sint quæ emineant, nihil magis tamen quam τὸ πολιτικὸν τῆς ῥητορίας soleo admirari. nisi quod splendoris oratorii gravitas, non simplicem, sed jam ornatam ejus indolem exhibens, judicium minus exercitati alicujus possit distrahere. Historicorum igitur hic præcipua & manifestior est commendatio. quorum nisi Civilis sit oratio, neque Historicam esse, audemus pronunciare. Neque tamen una facies iis operæ placuit. Cum severitate enim hoc præstant Thucydides, Tacitus, Sallustius ; nisi tamen hic moderationi propior : cum ampla quadam & læta majestate Livius, & Polybius : cum emendatissima moderatione Curtius, Cæsar, & nulla re nisi mole aliis minor Herodianus. nam de iis, qui historicam civilitatem solutiore Rhetorum instrumento interpretare, nihil hic dicam. Sed nec quisquam est è scriptoribus, quibus Classicorum nomen, eruditorum consensus tribuit, qui sive Poëtam, sive Oratorem, sive Historicum, sive Philosophum agat, non aliquam ex hac laude laureolam appetiverit. Atque hinc jam judicio colligentium, & sollertia observantium, illa, quam quærimus paulatim

latim formari potest, *facundia Politica*. Equidem licet nulla vitæ pars, nullum studiorum genus, neque publicis neque privatis in rebus vacare eloquentia possit, haud dubie tamen, apud Gentiles quidem primus & maximus; inter Christianos post Theologiam proximus ejus usus in civili societate ornanda animadvertitur. Vult scilicet ejus argumenti & amplitudo explicari; & gravitas ostendi, & magnitudo splendescere, & varietas exundare, i. e. vult omnis ea prudentia ipsissimis eloquentiæ operibus conservari ac succrescere. Quod ego mecum perpendens, cum & à puero non de studiis magis, quam de studiorum usu cogitare consuevissem, & officii præsertim, quod nunc gero, cura me commonefaceret, ut de præparandis vitæ & usui publico juvenum animis essem sollicitus, visus mihi sum operæ facturus esse pretium, si ad civilia potissimum lectiones publicas & privatas cum exercitationibus plerisque referrem, sepositaque sterili facundia, jejunisque dictionibus, ea ad discendum & dicendum proponerem, quæ ut administrationem in ipso opere habent gravissimam, ita diligentem ante opus exercitationem ac studium suo quodam jure requirunt. Huc, secundum Plinianas Annæanasque interpretationes, spectarunt hactenus præexercitamina nostra, institutæque per singulas hebdomadas scriptiones & recitationes: huc in posterum, quod DEUS bene vertere jubeat, sollemnes quoque Declamationes spectabunt. Auctor, inquam, ero Auditoribus meis, ut materias ex omni Doctrina Civili præcipuas, paulo accuratius elaboratas in publicum afferant, ac judiciis tam splendidi Auditorii submittant. Cui instituto favere egregie fortuna videretur, & veluti bono omine spem nostram attollere, dum MELCHIOREM FREINSHEMIUM obtulit, qui suam rei exordiendæ industriam polliceretur. Scilicet excellentis ingenii Juvenis, dum per *Clarissimi Fratris* vestigia ad magna quæque, pulcherrima æmulatione contendit, omninoque eum se præbet, cujus & sedulitas pridem aliorum conatibus exemplo, & profectibus subsidio, egregia soli-

solidaque, quam sibi comparavit, doctrina esse possit, nihil sibi eorum omittendum putat, quæ ad bonæ mentis & studiorum rectitudinem Academiæ nostræ approbandam, quodammodo videntur pertinere. Convincet hoc factum, vanitatis suæ, arrogantes illos, qui paulum aliquid ultra primas litteras progressi, nescio quid magnum sapiunt, atque eloquentiam rem sacerrimam (liceat mihi M. Senecæ verba in hunc sensum inclinare) *quia præstare non possunt, violare non desinunt*: contemptu videlicet, & altioris scientiæ, quam inter sui simillimos venditant, persuasione. *Sed tam contumeliosos quidem in se (cum Fabio loquor) videt invicem eloquentia: & qui stultius videri eruditi volunt, stulti eruditius videntur.* Ille igitur, quem modo nominatum ne pro meritis laudarem reciproca inter amicos modestia obstabat, *cras hora VIII. matutina*, eo, quod dixi, proposito, de Studio civilis prudentiæ universo, orationem habebit: atque *quibus res tam ardua auctoribus ex antiquitate, quibus recentioribus nitatur, quæ præsidia in animo, quæ in libris, quæ in vita, tum querantur à multis, tum à cordatis querenda sint*, quantum temporis feret ratio, explicabit. Argumentum quod per se difficile, difficilius etiam multitudine diversa sentientium redditur, (omnes enim Politici sunt, citiusque qui imperii administrandi, quam qui unius domus regendæ scientiam profiteatur, invenias) facilius posse fieri sperat benevolentia Auditorum ac æquitate. Quos equidem ut sollicita obtestatione colligam, non existimo necessarium. Si enim ulum, hoc profecto illud tempus est, quo inter laudes cuiusque Boni Viri numeraverim, studiis & studiorum cultoribus favere, eorumque omnibus officiis industriam incitare: adeo nobis ejectæ passim Musæ, & ad solitudinem ac vastitatem quandam redactæ, nostram felicitatem cum vehementia quadam comendant, delicatumq; illud fastidium abstergunt. Reverentiæ tamen, & honoris, & officii causa non omitimus, unius horæ opellam precibus expetere. V.

Perscriptum ARGENTORATI, die 6. Septembr.  
Anno clō dc cxxxvii.

## III.

**V**ersamur in fine anni, quem periculis varium, casibus atrocem, memorabilem eventibus, Europæus orbis partim admiratur, partim deplorat, partim exosculatur, partim nihil aliud quam loquitur. Tale animorum divortium, tam diversa nationum judicia, tam pugnancia studia terrarum, primævus error humano generi invexit, & sua cuique utilitas, detestabile imperiorum idolum, magis subinde magisque confirmavit. Lugent alii mala, alii faciunt: alii bellum execrantur, nonnulli odere pacem: incendia quidam restinguunt, plures excitant. Ipsa mortalium & universi societas, dissociabiles ubique animos; & communis jus, communionis hostes, invenit. Quæ si inter eos sunt, quorum nullo vitæ, nullo morum, nullo linguæ commercio cætus cohærent, iniqua dixeris & infausa, sed exempli crebritate minus admiranda. Est enim aliqua in humanis mentibus peregrinitatis dedignatio: est aliqua rerum longinquarum neglectio: est aliquod ipsius ignorantie adversus ignorata fastidium. At vero, cum nec imperii & juris & civitatis communione sociati, communia læta, communia tristia habent, sed alter quidem interitu alterius gaudet, alter mœret felicitate; tum vero infandæ res indignitatis plena, luctuosissimique ad omnem posteritatem exempli haud immerito censetur. Utinam vero Germaniæ nostræ, civili bello pæne sepultæ, ultima hujus rei exempla hic annus tulerit! Utinam civilis belli mala & flagitia ultima viderit! Quæ an acerbiora dicas, an fœdiora, non parum dubites, ita permixta horrore deformitas, deformitati horror, omnia miseriis, & sceleribus replevere. Ultra quorum tamen immanitatem, eorundem inhumanam securitatem dixerim: dum plerique, nulla partium aut summæ rei cura, *malis publicis læti* austique, divina humanaque omnia conculcant. Qua de re, si gravius loquendum sit, aptissime ad Germanum orbem transtuleris, quæ de Romana Urbe, Vitellianis tumultibus non pejus vastata quam polluta, scriptorum gravissimus usurpat: *Sava ac de-*  
*formis*

*formis ubique facies: alibi praelia & vulnere, alibi balnea popinae. Simul cruor & strues corporum; juxta scorta & scortis finiles: quantum in luxurioso otio libidinum, quicquid in acerbissima captivitate scelerum: Prorsus ut easdem terras & FURERE crederes & LASCIVIRE. At enim non est hujus est loci ea commentari, quæ vel publicus dolor abscondit, vel metus & horror calamitatum suppressit, vel circumspectio seponit. Et quantum ad extraneos quidem attinet, non ita securi temporum vivimus & incuriosi, quin afflictis solatium, depressis auxilium, paventibus constantiam, iracundis mansuetudinem, flagitiosis meliorem mentem cupide exoptemus: Illud autem propioris existimamus curæ, si, quid nostræ Reipublicæ, nostræ Academiæ hic annus boni malique tulerit, pia meditatione pensitemus. Qua in re, si omnia excusserimus, apparebit, habuisse nos annum, si prudenter loqui volumus, *periculose utilem*; si pie judicamus, *nililiter periculosum*. Nam & salutaria sunt, quæ eventus mitigat pericula; & plus sapiunt, qui adversis explorantur, quam qui incurioso foveantur otio. Quinimo securitas est, in communi incendio flammam metuere tantum: felicitas, in communibus adversis, felicitate tantum carere. Quaquam nec illa caruimus, si felices non abundantia rerum, sed necessitatibus metimur; tum autem veram felicitatem, in sola juris divini humanique libertate collocamus. Cujus conservationem cum in hujus anni muneribus nominamus, omnia nominamus: laudumque amplior nobis materies nascitur, quam laudationis relinquatur facultas. Verisimile enim est, illam meditationem animo pudorem, ruborem vultui, voci moram ac hæitationem allaturam: cum nullo nostro merito, nullis gratæ mentis studiis, nulla bonorum nostrorum reputatione, incorrupto status nostri tenore, inter medios terrores, & minas, & diversi fati exempla, perennasse nos & evaluisse reminiscemur. Igitur quatenus anteaactis quidem, nullum nisi in venia auxilium restat, enitendum arbitror, ut, quod unum superest, de præclaro sine imponendo, sedulo dispiciamus: & ad meliora*

initia, exitu dexteriore præparemur. Communem piis omnibus curam, non decuit ab iis alienam esse, qui pietatis officina propiore excoluntur. Quocirca, cum exercitationis oratoriae caussa in publicum prodire, præclari Juvenes nonnulli agitent, reverentia temporis facile perfecit, ne argumentum aliud quæreretur, quam quod nostri cordis commentationi proximum, ceterorum autem expectationi maxime esset consentaneum. Tres fuere, quorum perlata ad me honestissima desideria, fidem bonæ mentis ac eruditionis vel propterea asseveraverunt, quod editis jam antea cum laude speciminibus Academicis, ad solidiorem industriæ fructum, ipsa continuatione industriæ videbantur properare. Igitur ELIÆ KOLBIO quidem (nam hic auspicabitur argumentum) auctor extiti, ut *finientis anni prospera vel adversa, quatenus ad Rempublicam præcipue nostram pertinerent, commemoratione brevi collecta audientium meditationi committeret.* Post quem JOANNES JACOBUS HEIDELIUS, *consideratione divinorum beneficiorum ad solvendas nostro Conservatori laudes gratesque Auditorium excitabit, bonasque preces precabitur.* Denique JOANNES SEBASTIANUS GAMBSIUS, *de clausula huius anno feliciter & pie imponenda differet, demissaque Infantis Servatoris veneratione bonam spem testabitur.* Recitabuntur ista diei crastini hora VIII. matutina, ab iis, quos dixi, florentissimi ingenii juvenibus: quorum notam diligentiam nec commendo in præsens, nec audientiae vestræ concilio: prorsus confisus, satis commendatos omnibus literarum amantibus fore, qui literarum ipsi semet nomine & pignoribus commendant. Brevis erit & vix horaria auscultatio, qua tria simul exequi, qui voler, poterit: nam & conjecturam capere patriæ juventutis licebit, cuius triplicem florem videbit; & nostros obligabit ad mutua officia animos; & piæ meditationis occasionem habebit. Neque enim quenquam esse existimo, qui quacunq; causa stimulatus, invitus ejusmodi cogitationibus accedat, quibus à miseriæ doloribus, ad miseriæ levamenta; à periculorum formidine, ad periculorum remedia; ab ipsis denique

que bonis & prosperis, ad bonitatis prosperitatisque fontem animus revocatur. Quod superest, DEUM enixissime precamur, ut hanc exercitationum annuarum clausulam, studiorumque nostrorum conata, clemens ac propitius suscipiat, deque strenue repetendo eorum cursu consilia suppeditet: ut Studiosorum animos amore pietatis & doctrinæ adversus imminantis barbariei minas expleat, successum laboribus, successui maturitatem largiatur; ut nostras mentes sui favoris officinas, nostras linguas suæ instrumenta gloriæ esse velit ac manere. Valete.

Perscriptum ARGENTORATI, die xx. Decembr.  
Anno clō Idc XXXVII.

## IV.

**M**omentum est, quod humana vertit convertitque, cuius incerta semper vicissitudo priscis temporibus senior rarioque, nostro ævo violentius imminet: atque, quasi ad finem rerum properantibus fatis viam lucrifaceret, ruinas non disponit, sed cumulat; neque improvisis serenitatem fulminibus interpolat, sed continuis profligat. Pone, quingentos imperiis annos; jam incredibilia loqueris, detrahe dimidium; sed & ita supra captum nostræ tempestatis ominabere, in sæculum durationis metas contribue: hic ego ex te quæram, quid intelligas sæculum? tu de centum annis cogitabis, ego vix triginta concedam. ne enim ad perfectionem numeri ascendamus, imperfecti retrahimur moris vanitate. quæ, quotiens mutato rerum statu novam faciem induit, toties sæculum facit. atque ita ad sæculum raro aut nunquam pervenimus, quia multa in sæculo sæcula præcipimus. Nemo te Politicorum decipiat cum tot annis (nam & incertissima hæc certa facere postulant ac definire) regna, familias, scholas, stare dicunt aut esse; postea paulatim mutari, denique ruere. Brevius loquendum est, ut loquamur accuratius. nihil horum stat, nihil durat, nihil est: sed *mutatur*; & dum *mutatur, interit*. Quæres jam porro, quot annos mutatio rerum (ita pro duratione fari decet) complectatur? dicam te frustra quævisse,

fuisse, quippe non annis mutationem, sed ipsa mutatione  
 metimur; neque annorum spatiis ista extendimus: sed  
 mutationis circulo convolvimus. Cujus & ipsius muta-  
 tio per omnia mutabilis, observantes fallit, confundit nu-  
 merantes, indagantes eludit. Præcipue in Scholis, de  
 quarum fatis, cum nostra ætate Vir doctissimus, accurate  
 disseruerit, plura jam à nobis exempla acciperet, quam no-  
 bis dedit: paucorumque annorum experientiam res mul-  
 tas & miras suppeditare, quas tot retro sæcula, quot ille  
 complexus est, non viderunt, lubens, si hucusque vitam  
 produxisset, fateretur. fortasse & illud: in summa de fatis  
 Scholasticis disquirendi varietate, in exacta explicandi sub-  
 tilitate, bona fide denique, ad solidam factorum ignorantiam;  
 id est, ad silendi necessitatem perveniri. Nisi quod  
 hic una vox & sola, Admirationi relinquitur. Cum ex-  
 emplo loquimur Argentoratenses: quibus in sæculari pietate  
 versantibus, & *centesimo hoc, ab instituta publica illustri Scho-  
 la anno*, incrementa vel decrementa literarum, casus docen-  
 tium, vices studiorum, varietatem fortis, & ubique Divi-  
 num Numen, ejusque curam atque consilia recognoscenti-  
 bus, non contigit, altius ascendere, quam ut neglectis ve-  
 terum Sophorum, *Nihil admirantium*, decretis, strenue  
 OMNIA ADMIRAREMUR. Professi id sumus in  
 Ecclesia ad civitatem universam: professi in Schola inter  
 eruditos; quos in cœlestem hanc philosophiam vel pro-  
 vocavimus vel ereximus. Nunc juvenus nostra agit quod  
 suum est: acceptaque tam mirabilis anni prodigia, pio stu-  
 pore, modestaque stuporis sui expositione recolere, publi-  
 coque & ista & obsequii sui rationes cupit reddere. Quo  
 de genere, id est, ex ipso flore ingeniorum, magna conten-  
 tione animi & successu studia æmulantium, sunt, qui die  
 perendini (is hujus mensis erit XVIII, D. Lucæ sacer)  
 VIII. mat. sollenni declamatione in Auditorio Majore de-  
 fungentur. Cum enim dicendi studio, & impense tenean-  
 tur, nec temnendos in eo jam fecerint progressus: non pu-  
 tarunt committendum, quin tempore tam festivo publicæ  
 pietati



pietati suam jungerent, patriæque miracula grata mente, ut agnoscerent, sic pro virili prædicarent. Sed quædam argumenta quærentur à curiosis per ambitionem; quædam eliguntur à peritis per intelligentiam; quædam arripiuntur ab imprudentibus per temeritatem; quædam accipiuntur à modestis per reverentiam. Videantur licet insolentia & mirifica, quæ dicturi sunt Elegantissimi Juvenes, nihil tamen est, quin vel à tempore, vel à temporis festivitatem, vel à festivitatis miraculis, vel à miraculorum laudatoribus, vel à publicæ pietatis spiritu hauserint expresserintque. Solum est, quod fallere possit, vocabulum. Μεταμορφώσις enim præferunt & transformationes: sed nec Ovidiana hic fabula, neque Pythagorea transmigratio (ut nunc Græcorum vocabula ita exprimamus) neque fanatica recentioris sæculi abortu edita persuasio; sed sola Philosophorum & rationis filia, Comparatio, locum habet. Igitur cum Primus eorum JOANNES SEBASTIANUS GAMBSIUS, *Bestiam in hominem transisse*, alter ELIAS KOLBIUS, *Hominem in Angelum (seu bonum genium) emis-  
sisse*; tertius JOANNES JACOBUS FRIDIUS, *Argentoratium in Athenas transformatum esse* narrabunt, nullibi lusum ingenii aut prodigientiam temporis, sed illi quidem, opus necessitatis; *isthic*, rem salutis; *hic* felicitatis gloriam; *ubique* autem Scholarum ac Dei munus agnoscemus, & si animum advertimus, etiam spectabimus. Neque sane hoc tempus, aliud insignius spectaculum decuerit. quo rectissime sæculares Romanorum ludos obliviscimur; ipsamque Argentoratensis theatri pompam dediscimus: ut pro oculorum voluptate animum solis sapientiæ apparatus ac speciminibus oblectemus. Porro, ut prima sapientiæ vox est, *nosce teipsum*, id est, *nosce bestiam*: ita primum sapientiæ opus, *è bestia hominem facere*. primum dixi: tu intellige & summum. Nemo sublimius philosophatur. Quid exemplis agam? Cæcum animal, præter nativitatis labem, tot fuligines animi patitur, tot maculas, *ὡς καὶ κατὰ φύσιν τῶν ζώων*; ut nullum animal

ΥΥ

impie-

impietate deterius homine ac feritate ad postremum inveniatur. Τίλ@ γὰρ ἀπὸ θνητῶν, ἐξ ἑσῆς τῆς ἀνθρωπίνης φύσεως. quam enim res misera? non sufficit, inter bruta censerī; sed à bruto in feram belluam, exuta penitus humanitate itur. Διότι ἔ, κατὰ Σωμά καὶ ψυχῶν ἰδὲν ἐστὶν ἀνθρώπου φοβερώτερον, ὅταν ἀπαξ ἀπὸ θνητῶν. Ergo jam tum nihil homine in ferinam rabiem verso terribilius sive corpus sive animum respicias. Polybium, scilicet hominem & moderatissimum & φιλοσοφώτατον inter Historicos, testem laudavi. quod si ad severiorem vitæ magistrum eamus, ut quosdam animalium loco, non hominum; sic quosdam ne animalium quidem, sed mortuorum Seneca numerabit. Vita enim sine virtutis studio ac sapientiæ, sive quod idem est, sine literis, non est vitalis. Quemadmodum autem Scholarum beneficium cum humana societate naturaque in gratiam redditur; ita nonnunquam eo usque proficit hæc industria, ut hominem quem vitæ præparavit, in angelum & vitæ ornamentum attollat expoliaturque. Hinc veterum gloriatio de Platone: quem supra humanas laudes, Θεῶν; de Aristotelē, quem supra Philosophi excellentiam, δεινότητα cognominarunt. Neque nobis hodie, cœlestis spiritus indolisque viros, editaque in splendorem sæculi ac salutem ingenia, nefas est. Angelorum titulo venerari; præsertim cum regula loquendi ac norma, sacratissimus Bibliorum cōdex, tum Doctores verbi Divini omnes, tum populi moderatores, aliosque singularibus factis destinatos, ita soleat significare. Igitur duæ, quas dixi, transformationes nec fabulosæ, nec absurdæ, ad tertiam, tanquam ad causam matremque referuntur. cujus originem sane Deo festoque sæculari unice deferimus sacramusque! non immemores interim prorsus, quid STURMIUS ille condiderit formaveritque. qui de suo opere non vere minus, quam cum successus omine, quondam scripsit: *Meum institutum difficile & arduum est, quod cum Atheniensium tribus Gymnasiis contendere de gloria videatur, Academia, Lycei, Stoæ: vel potius quod ex his tribus compositum sit: & excellentius aliquid videatur promittere.* Hæc sunt illa, de quibus multæ expectationis notique jam successus Juvenes,

venes, verba facient. Vos, quicumque Scholas non aspernamini, favete labori in honorem Scholastici Festi suscepto, & pro capitu ætatis (nolui enim huic officio intercedere) bene peractum existimate, quod amor patriæ venerationique, vestraque benignitati & audientia dedicatur. Valete, & transformationum, quas laudamus, complementum τῆς μεταβολῆς πόλεως εἰς τὴν μέλλουσαν μεταμόρφωσιν, cogitate.

Scrib. Arg. XVI. die Octobr. Anno clō Io CXXXVIII.

V.

Quod in Novi fœderis, historia, CHRISTI accidisse ejus temporis, de promissionum uberrimarum magnificentia, de Regis Θεωδώρας beneficiis, vel ex ipso audissent, vel prophetantium vocibus meminissent edita; ea illi pleraque ad sæculum hoc, imo ad momentum mundani ævi, prono ad caduca affectu interpretarentur: id pati quodammodo omnes, quadam veluti imbecillitatis contagione, passosque jam olim esse, rerum eventis ubertim docemur. Est, ubi nec piis hominibus, adversus respectum fragilitatis, satis usquequaque animus constitit: quin cœli & Spiritus bona, ad terrenam speciem & carnis suavitatem, crassiori expositione applicanda existimarent. Hinc promissa genti Sanctæ tranquillitas, prædictus folio Davidico splendor ac potentia, ostensa credentibus opulencia, pax, claritudo, facilius ad id trahi opinionationibus plurimorum cœpere, quod naturæ ad sublimia cœcutienti proximum, plerumque & primum creditur. Ubi ergo in captivitate Israëlīs, illa pax, quam ad maris instar diffusura erat Numinis benignitas? Ubi victoria, in afflictione? ubi gaudium & exultatio, in luctus assiduitate? Hæ scilicet carnis voces; hæc erroris confessio; hæc tentationis sunt initia. Observavit eam rem præcipuus Patrum, Episcopus Hipponensis etiam ad illa Psalmi LXXXVIII. verba: *Ubi sunt misericordia tua antiqua, sicut jurasti David in veritate tua?* Quod illud juramentum, quæ promissio? *non terrena carnalisque felicitatis*, quam nonnulli temporibus Salomonis assignatum

ibant ; sed cœlestis ac spiritualis. Benedictio quippe Domini in semine David ( de qua finis Psalmi : Benedictio Domini in eternum : fiat, fiat ) non ad aliquod tempus, qualis diebus Salomonis apparuit, sed in eternum speranda est. Hoc tam magnum bonum quivis in hoc sæculo & in hac terra sperat, insipienter sapit. Grave id cūprimis, & cordatum summi viri iudicium ( extat autem de C. D. 17, 13. ) non tantum illis opponendum est, qui sacra quædam oracula consentaneo cum suis votis intellectu, de nescio qua felicitate Ecclesiæ, de fine miseriarum, de aureo denique quodam sæculo accipiunt : sed & sufflaminanda est hac ratione otiosa quorundam industria, quibus una sermonum materies, vitæ non insuavis tenor ; una cupiendi lubido, rerum copię ; una pietatem jactandi occasio, pro meliori orbis statu preces fundere. Quæ res tum alias, tum ibi se præcipue exerit, quando redauspicante annum cœlo novas sibi quisque vel sperandi vel timendi metas constituit. Hic satagimus magnifice, ut gaudia & gaudiorum exstruamus apparatus, nec gaudendi uspiam reperiamus fidem : ut spe nos multa oblectemus, nullo vel fragila spei fundamento. Certas autem, i. e. solas & veras spes, solidæque prosperitatis gaudia, languide transimus, aut nihil aliud quam mentione verbisque defuncti, ad vim ipsam affectumque sinceriorem nunquam progredimur. At, quæ sinisteritas, pacem anhelare ( id enim unice jam solenne canticum est ) nec venerari pacis auctorem ? pacis tempora somnare, nec de pacis artibus ullam cogitationem suscipere ? pacis commoda agitare, nec cognoscere pericula ? *Etiā de hū, ais, prospiciam, imo jam prospicio.* Sane ut difficilem me habeas ad fidem, illud efficit, quod consilium istud tuum anniversarium præpostere & ita comparatum est, ut, quæ prima dixi, in labris ; cetera geras in pectore. Quæ longe secus ab iis suscipi commentatio debuit, quos veræ æternæque sapientiæ candidatos, non tam astra, quam astrarum factorem, non tam orbis præfagia, quam mentem orbis moderatricem ; non tam ævi mortalis umbras, quam bonorum cœlestium

stium veritatem, æquum est respicere. Perfecit hæc meditatio, ut lubentissime studio meo complecterer, qui mox nominabuntur, Adolescentes. Cum enim sub ipsas festorum maximorum ferias, adeoque sub ipsa anni hujus initia mihi exposuissent; teneri se jampridem exercitationum Academicarum desiderio: inter quas non negligendam sibi publice declamandi consuetudinem existimassent: dispexisse jam argumentum, quod temporis ipsius ratio, crebraque tum publica tum privata cohortatio commendasset, *ac Sionis gaudio à Zacharia vate prædicto illustratoque*; vehementer me oblectavit earum societas meditationum, quibus omnes velim imbutos deditosque. Ita enim apud animum statui meum: si de bono omnium maximo, de unico eoque tutissimo salutis fulcro rite pieque meditemur, posse fieri, ut, in mediis malis bene, in adversis agamus prospere: novi autem anni exordia exornemus præclarissime; progressus dirigamus quam rectissime. Quid si enim cogitationes nostras, Propheticis jungentes vaticiniis, *Regem illum*, Orbis dominatorem; *illud Sionis gaudium*, nostrorum summam votorum; *illam Jerosolyma exultationem*, nostram beatitudinem; *illum adventum*, nostram refectioem agnoscamus: atque inter hæc, terrena obliti omnia, omnis ævi, annorum omnium fortunam, uno sed divino complectamur compendio? Cujus primas quodammodo lineas ducent, duabus, cras hora VIII. matutina recitandis orationibus, MATTHIAS KORNMANUS, Augustanus; FRIDERICUS WOLFIUS, Argentoratensis. Quorum *Ille*; ex persona Zachariæ, *præconio gaudii Sionem excitabit*: *Hic*, in persona Sionis, *denuntiatur gaudium præ se ferens, adventantem Regem excipiet*. *Præconium*, quo nullum ab orbe condito exitit illustrius; *gaudium*, quo nihil habet tota religio religiosius; *adventum*, quo nihil videre secula mirabilius; impari quidem sed sincero puroque ritu celebrantibus non defuturam existimo eorum benevolentiam audientiamque, qui ad bonum omen, ad auspiciis temporis sufficere intelligunt, vel solum illud nomen JUSTI, RE-

GIS, SALVATORIS. Hoc fidei receptum animo neminem de Præsede anni, de Sospitatore Urbis, de Vindice, de Conservatore rerum; sinet dubitare. *Rex gloria est, quem dicimus: Erimus ergo magni Regu (O quam beata!) civitas. Salvator est: Erimus ergo salvati, erimus redempti à Domino. JUSTUS est: Erimus ergo arbores iustitie, plantatio Domini ad gloriam. Felicem populum, felicem regiam, quam elegit voluntas tanti Regis! ergo in posterum salus & incolumitas, & bona fortuna, & mysteriis salutaribus plenissimum bonum, iustitia domum sibi & sedem hanc constituent: Ut fiat illud, quod frustra quæivere potentissimi Principes, frustra jactavere regnatrices gentes; URBS in tempore ÆTERNA, URBS inter peritura omnia, INEXPUGNABILIS. Fiat! & ut fiat, seris quisque mecum gemitibus contendite: Declamatoribus autem nostris, Adolescentibus ingenuis ac sedulis ad majora calcar addite. Valete.*

Perscriptum ARGENTORATI, d. xvi. Januar. Anno clō lōc xxxix.

## VI.

**D**Isturi sunt cras, Octava matutina, consuetudine Academicæ, de OSTRACISMO, tres è juventute erudita eximii Commilitones. Nomina sunt: WOLFGANGUS FORSTNERUS, *Austriacus*; M. ESAIAS STEUDNERUS, M. JO. PHILIPPUS WEBERUS, *Augustani*. Illum Fratris Magnifici, tum in gravius Musæ studiis, tum in actus publici meritis eminentia, efficaci cum primis stimulo, auctoritate, exemplo ad magna omnia incendit: *hos*, expectatio patriæ & accepti recens honores literarii, in publici egregii curas, quod bonæ mentis scilicet artisque generosæ instructu reparari pridem desiderat, excitarunt. Operas in hunc modum disparitivere. FORSTNERUS, commemorata lucide ac simpliciter Aristidis expulsiōe, quale sit Ostracismi ingenium, tanquam prævia cognitionis causa, exponet. STEUDNERUS Calumniam, exilii tam celebrii artificem magistrumque, exultantem

suo

suo opere, & quos, quibus artibus in posterum petitura sit, confidenter edisserantem, inducet. Exprimere visum est hoc vocabulo, non modo, quod seorsum & proprie calumniam dicimus, sed confusas cum ea veluti in unum, *Invidiam, injuriam, fallaciam, & quæ has comitantur.* Ita enim videmus opere ipso actuque conjungi, quæ nominibus segregantur. quod cum primis observandum est illi, qui feliciter in hac philosophia operam cupit collocare. Exemplum prævit, apud Lucianum, Apelles: qui in pictura calumniæ, ceteras quidem, de quibus innuo, socias nominatim; injuriam autem ac vim ea imagine significavit, cum capillis prehensum adolescentem ingenuum, manus cælo tendentem, deumque ac suam innocentiam testantem, nihil moveri religione sueta calumnia, insecta secum dextra rapit. WEBERUS postremo sermone, non tam orantis, quam differentis ritu, philosophiam hujus loci Aristotelicam, comparatis eorum sententiis, qui, in questione juris, varie de Ostracismo pronuntiavere, tractabit. Hæc breviter, & ad modum non totius ferme horæ accommodata, adferent. Cetera in infinitum parent. Voluminis quantumvis magni mensuram excedit, si quis ostendere instituat, quanta flagitiorum copia uno nomine involvi progressu temporis cœperit. Profecit Ostracismus iste Democraticus, mirifica fecunditate, in Ostracismos Aulicos, Senatorios, Curiales, Militares, Privatos, Publicos, Gentiles; Sacros, Profanos; Manifestos, Arcanos, Mixtos; Speciosos, Crudeles; & quis omnia formarum genera titulis exprimat, quibus toto passim orbe iste ludus luditur, & ludetur in omne volubilis ævum. Nam de hoc ut sentio, ita intelligi volo: id est de re ludicra & testacea, sive de testularia. Est, inquam, ludi quoddam veteris genus. ὀστρεῖον δὲ αὖ dixere, (videnda Meursii Græcia ludibunda, ubi locis Auctorum res affirmatur; & Erasmi Chiliad. 2. cent. 1. prov. 51.) Si quis Ostracismum vocare malit, me non repugnante id fecerit. Præsertim cum à testula utrumque nomen descendat, & testulis res ipsa peragatur. Dummodo id constet, non aliunde rectius peti originem proverbii: ὀστρεῖον ἀναισθητόν, *Testula conversio*: quo subitas rerum in diversum

sum commutationes indicare ; mos doctorum tenet. Hic subsistere possemus : nam exemplo satis amplo totum hoc Univerſum nos inſtrueret. In quo proſpera adverſis, læta triſtibus, bona malis, durantia cadentibus, florentia proſtratis ſuccedunt, varia mutationis celeritate, miſcenturque, id eſt, quid aliud, quam *ludus teſtularum & converſio* luditur ? Quod ſi amplius tamen de conſuetudine ludi & ratione ſumus ſoliciti, non unas quidem opiniones reperiemus, ſed liceat nobis Polluci auſcultare. Dicamus ergo, duas puerorum ludentium partes, projecta ad definitam lineam teſtula, de victoria contendiffe. Quam ubi hujus partis aliquis jaſtu ſibi ſuisque eſt adeptus, altera pars curſu in fugam ſe coniecit. Tum inſecuti viſtores quemcunque è fugientibus prehenderant, cogeabant in medio conſidere, **ASINOQUE** nomen dabant. Ibi jaſta miſer teſta (cujus interior pars picea, tenebras ; exterior lucem præſerebat ) tantisper **NOX DIES** ingeminabat, donec ex illa in hanc & meliorem fortunam eniteretur. Puerile eſt quod dico, & cum venia ejus ætatis noſcendum : niſi quod Viros quoque magnos non piguit hujus ludi. Sane Julius Cæſar, cum Romanis *ἑταῖροις παισι* luſit. Fac, ambitionem, opes, gloriam, libertatem teſtulas eſſe : his ludit Cæſar, his Romani. Cæſaris pars vincit, fugat, capit ceteros. Ergo illi jam ſedent, neſcio an **ASINI** (quanquam impoſita per luſum nomina nemini aliquid detrahunt aut addunt, quod ſerio ſenſiſſe cum autumo, qui Aſinum omnibus rebus publice antepoſuit) certe ſervitutis teſta, tories à ſedentibus in curia, in foro, in campo jaſta, & nil niſi **NOCTEM**. **NOCTEM** referens, ipſa patientiæ Romanæ arcana tentavit. Celebratos primum ſollenniter hos ludos exiſtims *A. V. C. DCXCV, Julio & Cæſare COSS. (Suet. Jul. 20.)* reperitos poſtea innumeris vicibus. Longe autem ante id ævum Philippus Macedo, teſtulis inauratis, ſpecioſus & felix luſor, cum civitatibus & viris maximis *de libertate* contendit. ne quis antiquæ tantum Germaniæ eam labem fuiſſe ludendique temeritatem Tacito credat, Quid propioribus



ribus ludis Julianus Apostata molitus sit, gemitus eorum testantur, quibus acerbum videbatur & intolerabile, *Afinos fieri, & Nox dies jácere*. Ne de singulis dicam, totæ gentes obstant: quas ad *Afinorum conditionem & obscuras noctes*, non aliud ludendi genus redegit. Quod ob id rectissime ad *Ostracismum* ab Erasmo refertur: nam & ea sive ars sive monstrum, ex hominibus afinos, ex afinis homines; ex præsentibus, absentes; ex vivis mortuos, & contra, facit an fecit, an utrumque? Sed lufum satis est. Seria quibus audire curæ est, eos ut cras hora præfinita ne graventur comparere, rogamus. etiam illud: Ut quæ *juvenes optimi* in gravi materia minus graviter elaborateque dixerint, pro indole ac ætate accipiantur. de qua interim *egregia* plurima speramus. v. perscript. Argentor. XVIII. Decembr. clc lœc xxxix.

## VII.

**M**aximum citra controversiam & humanis rationibus imperferutabile est, ut nativitatis & vitæ, sic passionis ac mortis Dominicæ, mysterium. Omnia hic miraculis, omnia miraculorum causis, omnia causarum viribus, omnia virium operationibus, omnia operationum non confusa, non divulsa, non permixta, sed singulari & Deo tantum auctore facta unione, in eam divinissimi secreti magnitudinem conspirant, cujus nec interiora angelicæ mentes arbitrari, nec ænigmata in revelationis speculo possunt comprehendere homines. adeundum simplici pietate sacrum, colendum uno ardore, admirandum unius quidem ardoris sed diversis affectibus. Omnia dolore plena, omnia voluptate; ideo voluptate plena, quia plena dolore. Omnia quam inusitata, tam tremenda; quam summa, tam exoptata sunt in passione ejus, qui pati non potuit per naturam, pati non debuit per innocentiam, pati voluit per gratiam, & quod voluit, potuit per sapientiam. Quam admirabile est, quod Deus voluit, quam admirabile, quod homo potuit; quam admirabile quod Deus & homo, homo & Deus, Deus-homo, inquam, Homo-Deus unum voluit, unum  
 z z potuit!

poruit; quod Dei voluntas est hominis voluntas, quod Dei potestas, est hominis potestas! imo vero quod Dei & hominis, in diversarum naturarum veritate ac distinctione, per intimum consensum ac unionem una est voluntas, una scilicet unius voluntas, unius potestas, qui nec Deus esse desinit, cum homo factus est; nec homo esse desinet, postquam in Deitatem est assumptus. Atque hic quam admiranda est assumptio, tam admiranda sunt assumptis in assumpto; assumpti in assumptis, sive opera sive passionibus. *Opera*, salva facultatis operantis discrimine, ipso operationis ἀποτέλεσματι una: non societate operantium, sed unitate operantis, id est, personæ. *passiones*, in quibus homo, nec sine Deo, nec per Deum, patitur: neque minus interim in eo, quod pati nequit, homo subsistit: & cum, quod pati potest, patitur; non homo tantum patitur, sed Deus patitur in homine. quia licet naturæ sit hominis, pati posse, ipsa passio personæ tribuitur, quæ Deus & homo est. Quare nec virium humanarum, nec pretii humani res est, σωτηρίαν παροῦσα. Incipiemus à monte Oliveti. Ibi consistatur, angitur, pavefcit, trepidat, patitur dira ac horrenda omnia, quæ, nec vocibus mortalium exponenda, nec indaganda sensibus, ἀγυνίας titulo tanquam velo involvit Evangelista; ibi procidit, lamentatur, sudat sanguinem: quis? an Deus? at in istum nil tale cadit, an homo? at his talibus nemo hominum sufficit, quin, sicut ad divinitatis sublimitatem nulla pertingit calamitas; ita tanta tamque immensa malorum incubantium moles, non hominem, sed humanum genus opprimere poterat. Patitur ergo & sustinet; torquetur, & evadit; prostermitur, & vincit, non unius naturæ particeps, sed geminæ ita compos, ut dum humanitatis doloribus, divinitas robur; merito, pretium communicat; neque hominis interim tantum sint dolores, neque Dei solius meritum: quoniam nec humanitate tantum censeretur qui doluit; nec divinitate sola intelligendus est, qui meritum contulit. Idem de vinculis Christi judicandum est: quæ æternis tenebrarum vinculis Christiana

stiana fides efficaciter opponere potest, quia Deus est, quem Judæi pro homine nudo vinciunt. Injuriae autem, probra, crimina, ignominiae, hominem certe arguunt, qui his omnibus maſtari potest: at pro ceterorum securitate ista pertulisse, plusquam humanum opus est; neque solius tamen Dei, sed hominis, qui Deus est. Hujus est illa quæ apud Prophetam vox extat: *Dorsum meum dedi ad flagella, & genas meas ad alapas, & faciem meam non averti à sputorum contumelia.* Scilicet idem hic loquitur, qui hujus meriti commemoratione, infinita trepidæ genti solatia pollicetur, ac bona plane divina. Denique clavi, lancea, crux, Deum violant ac perimunt. itaque in creatoris sui morte, orbis concutitur & ruinam metuit: ad lucis unicæ labores, solis radios pudet videri: ad necem vitæ, mors confessâ cladem suam, vitæ dimittit, quos pertinaci nexu attinuerat. O mors acerbissima, quæ tot tormentis constitit! ô mors pretiosissima, quæ tot divinis meritis abundat! ô mors maxime vitalis, quæ tot exitiorum genera absorpsit! ô mors divinissima, quæ tot passionibus Dei, tot calamitatibus Dei, Deo stetit! ô mors admiranda, quæ tot mysteriis scatet. quot nec orbis capere, nec natura testari potest! quæ licet prodigiis plurimis maximis id agat, nihil præter stuporem humanis sensibus relinquit. Unum superest miraculum vere magnum, vere dignum tantæ passionis ac mortis testimonium. **DEI DOLORES, PROBRA, CRUCEM, SANGUINEM,** id est, thesauros Universo majores, immensos, infinitos, inaccessos rationi, incomprehensibiles possessioni, **FIDES CHRISTIANA** CAPIT, & complectitur humanæ mentis angustia, imo tenet, obtinet pro suo, quod angelicis conceptibus sublimius, cælorum munditia purius, sæculorum ævo profundius, omni capacitate grandius. Atque hæc est illa sive incomparabilis possessio, sive inæstimabile solatium, sive admirabilis & mystica *αἰνεσις* *ἡ* *ἐκείνου* (hac enim voce, ineffabile hominibus, salutis æternæ tam operosis passionibus partæ, pignus indicat, stilus Spiritus Sancti)

qua plenus divinarum passionum, id est, amoris divini sensu Evangelista, ad beneficæ redemptionis communionem omnes erigit ac invitat, cum inquit: τὸ αἷμα τοῦ χριστοῦ τοῦ υἱοῦ τοῦ θεοῦ καθαρίζει ἡμᾶς ἀπὸ πάντων ἀμαρτιῶν: Sanguis Jesu Christi filii Dei mundat nos ab omni peccato. Meditationes super re tanta, nullo die ac ne momento quidem omittendas, cumprimis hoc tempore celebrat Ecclesia: quo Historia *ἡλυσμῶ* sive propitiationis nostræ per passiones Dominicas consummatæ, publice privatimque recolitur, exponitur, cantatur, memoratur, piaque simplicitate expenditur. Estimulare potest quamvis segnes animos, ipsa rei majestas; sive propius incitamentum quærendum est, sua cujusque necessitudo ac incolumitas. Quam in universorum causâ, singuli sibi suo jure vindicant. Nostra juvenus ex vasto illo admirandorum pelago, exercitationis Academicæ causâ (nam & has ad temporis annique solennitates instituta nostri ordinis accommodant) unum selegit, SUDORIS SANGUINEI, in horto Oliveti, miraculum. De hoc dicturi aliquid sunt, crastini hora VIII. matutina, tres industrii literatique adolescentes: è quibus JOANNES JACOBUS FEDERLINUS, Ratisbonensis, *oratione quasi pravia* animos in pietatem toti salutaræ passioni debitam excitabit: JOANNES SPALTHIUS Argentoratensis, *Qualis & quam mirabilis Sudor sanguineus Christi fuerit*, reverenter inquireret: JACOBUS FUSSENEGGERUS Augustanus, *Quam sit idem sudor salutaris*, breviter ostendet. Si nil dignum tanto argumento attulerint, fatis magna se Regii Psaltis auctoritate tuentur: qui inter angelorum júbila, & sapientum carmina, aliquam chori partem infantibus & lactentibus tribuit. Ultra quorum simplicitatem, nemo hic ascendit: cum hoc totum seu odeum seu phrontisterium, non eruditionis sit ac sapientiæ; sed candoris & pietatis; in quo non tam subtilitas curiose sciendi: quam prudentia reverenter ignorandi locum habet. Quibus commodum est, exercentium studia favore aut officio auscultationis dignari, eos ut hora die-

que

que nominatis, præsto sint, vehementer rogamus. V.

Perſcriptum Argent. IV. Id. Martias, Anno clō Idc XL.

## VIII.

**A** Nima eſt ac veluti condimentum vitæ; *Libertas*. Non loquor de periculofa, quidvis ex arbitrio agendi licentia; ſed moderatarum illud mediumque bonum intelligo, quo Principatus à dominationis infinita poteſtate, ad patriæ auctoritatis temperamentum; Optimatum imperia, à privatis ad publicæ rei augmenta; Popularis ſtatus ad æquabilitatem juris, excluſa violenti moris aut ſoluti deformitate; denique in omni vita, à vi ad leges, omnia rediguntur atque conformantur. Hæc eſt ratio vivendi diviniſſima; quia diviniſſimum in terris lex eſt & jus & æquabilitas, quam humanis cupiditatibus, æterna lex oppoſuit: quia, ne inconstantia humanæ voluntatis libeat, quod Deo non libet, nulla re præſtari poteſt, niſi divinæ voluntatis character & regula ubique attendatur: quia, ne majeſtas imperii, quæ divina eſt, ſerino licentiæ more polluat, divino quodam exemplo, quod in æqui boniq; natura conſtitutum intelligimus, cavendum eſt: quia, communis vitæ æqualitatem, quæ à Deo eſt, non decet perpetua inæqualitatis affectatio, & mutua oppreſſionis mutuæ ac inſidiarum concertatio. Hæc eſt ratio vivendi antiquiſſima: quia, quantum ad ſacros Annales attinet, non alia in terris lege agere, creatos à ſe homines, Deum voluiſſe; neque dominationem & ſervos, ſed rectores ac cives, non oppreſſores & oppreſſos, ſed liberos & amicos inſtituiſſe, ſatis edocemur: quia, quantum profana retro colligere hiſtoria petuit, primas liberorum civitates exiſtiſſe, deprehenderunt Ariſtoteles, Polybius, alii: quia, ſi memoriarum veterum nos deficerent monumenta, inde ſciremus antiquiſſimum, quod integriſſimum vitæ genus nulli dubitamus. Eſt enim omnino hæc ratio vivendi inter omnes optima: optima moderatione; optima ſocialitate; optima firmitudine; optima tum per ea, quæ diximus, tum per ea, quæ præſtantiam publici privatiſque moris, ejusque τὸ ἡμέτερον καὶ δίκατον.

ut magnus Scriptor vocat, plurima amplificare possunt, & humanis usibus commendare. Verum rem tam salutarem, limis primum oculis perstrinxit invidia; mox ambitio infidiis aggressa est; ad extremum, injuria expugnavit extinxitque. Ea exempla postquam semel publice innotuerunt, assidua deinceps repetitione & revolutione, per omnes orbis partes, per omnes vitæ societates, usque in hoc tempus instaurata, eandem ludi in terris fabulam, facile nobis persuadent. Quo in negotio, nihil equidem ad fraudem publicam & damna fertilius est, quam quod, quæcunque adversus libertatem ubivis vel callide structa, vel superbe tentata sunt, specioso libertatis nomine, & simulata cupidine, illiberalis auctores moris & magistri, convelarunt. Quanquam ad hos solos nemo culpam, nisi imperitus retulerit. Ipsa libertatis possessio, lubrica & cautionis plena est: neque facilius adversum habentes, quam ab habentibus prælidium oppugnationis petitur. Dicam uno verbo rationem. Dum rem publico destinatam devotamque, privatis quisque vel ingenii sui, vel utilitatis, vel temporis rationibus accommodat. perit tota ejus indoles, ut nec privatim profit, & publice omnibus obsit. Erroris hujus, qui ad lacrymas & sanguinem plerumque in vita erratur, imaginem quandam etiam in literarum studiis licet observare. quæ, sicut modo & temperamento sapientiæ, componi in publicum habitum gaudent; ita libertate ingenia in communes usus animari erigique postulant. At illa libertas quotiens in licentiam degenerat! id est, se pariter ipsam & studia infamat. Possemus per multa ostendere, quod in præsens quatuor exemplis demonstrabitur: earum scilicet artium, quibus præ ceteris magna sui operis concessa publice existimatur libertas; *Philosophia*, *Oratoria*, *Historia*, *Poëtices*. Quid enim excogitari potest, quod non mentiri aliquis, sub nomine *Poeta*; contorquere, sub *Philosophi* titulo; infectari, sub *Historici* velo; fucare & corrumpere, sub *Oratoris* jure audeat? Itaque quid vere his liceat, quidque licere, falso autemetur, disquisitu cognituque res est non indigna.

Quam

Quam tractandam susceperere, Quatuor è Juventute Academia præclari eruditique Commilitones. Nomina fortuito ordine collocata hic consignavimus. FRIDERICUS STOCKERUS, Schaphusianus, PHILIPPUS FRANCISCUS KÖNIG, JO. SEBASTIANUS GAMBSIUS, BASILIUS GEIGER, Argentinenſes, *De libertate & licentia Historicorum, Oratorum, Philosophorum, Poetarum, exercitatione declamatoria breviter agent & simpliciter.* Nam limatum aliquid nec polliceri de iis possum, nec postulabit cujusquam ab æquitate non alieni expectatio. Testor inrerim, sedulo hætenus eos excolendo stilo comparandæque scribendi facultati operam dedisse: cujus specimina, Deo favente, majora alias edent. Nunc, ut in graviore argumento, voluntas quoque vel laudabitur vel excusabitur. Tanto id quidem magis, quod suo exemplo eorum præpostera consilia strenue coarguunt, qui eruditi eloquentesq;, & esse & videri volunt, sine ulla exercitatione. Id quod prorsus mihi videtur tale, ac si quis militaris sibi virtutis laudem vindicet, qui hostem nunquam acie, nunquam concursu, nunquã armis expertus est, sed fortasse aliqua in bello vidit alios facientes, alia ne vidit quidem, sed audivit. Adversus quos nihil equidem nunc vacat adferre, nisi quod hoc unum obiter suggero: *etiam eos, qui multa legerunt audiveruntque, nisi scriptionem junxerint, nescire admodum quid sciant; neque aliter, quam tam præſenti remedio à suis persuasionibus ad leniores spiritus & moderatores, tum ad agnitionem sui; traduci possẽ.* Ergo quibus commodum erit, *cras hora VIII. matutina, in Auditorio Majore, favorem & audientiam præſtare Juvenibus, quos modo dixi, genere, indole, spe, profectu florentissimis; illis, quantum in nostras vires cadit, gratum animum candide pollicemur.* Valet.

Perſcriptum ARGENTORATI, vi. Kal. Jun. Anno cldc xl.

## IX.

**D**e Luna proximo (erit à XXVIII. Martii) hora VIII. matutina, in auditorio ſolenni perorabunt, duo virtutis præſtantia

stantia & antiquissimæ gentis imaginibus Nobilissimi Juvenes, BENEDICTUS & OVA BROCKTORFII Equites Holsati, sanguine *Patruales*; affectu, studiis, profectu *Germani Fratres*. Argumentum delegerunt ex illis, quas hætenus cum Jurisprudentiæ studio conjunxerunt, litteris. ALEXANDRUM, admirandi nominis Principem, tertiæ conditorem Monarchiæ, VIRTUTIBUS & iis, quibus orbem vicit, artibus, MAGNUM alter æstimandum dabit: alter EUNDEM, postquam degenerasset, VITIIS & quibus priorem gloriam sædavit facinoribus NON MINOREM, deplorandum exhibebit. *Itane*, inquiet aliquis, *tam turbulento, tam negotioso hoc sæculo vacat veterum narrationibus, & quas de Heroibus conspexere, scibulis auscultare?* Solent, nec ignoro, in tales censuras erumpere, qui nec rerum, quas vita postulat, vera æstimatione; nec studiorum, quibus istæ continentur, interiore commercio utuntur. Tractarunt Brocktorfii Nostri accurata diligentia scriptorem clarissimum Q. CURTIUM: in eo, præter summam & incomparabilem stili venustatem, deprehenderunt gravissimas de præcipuis civilibus negotiis institutiones, imbibebunt reconditiora humani actus documenta, denique in singulis versibus plusquam singula prudentiæ specimina observarunt. Ea cum viderent, non minus in præsentis & post futuræ ætatis usus valere, suis quæque temporibus & occasionebus usurpanda reservantes, maluerunt interim veruſti schematis habitum meditando excutere, atque describendo effigiare: præsertim cum recentia pleraque animum potius advertentem, quam stilum denotentem amare videntur. Quanquam hoc ad *nominum & vocabulorum* ætatem tantummodo pertinet. nam in rebus ipsis, quam absurdus foret, qui Historiam, remotissimi etiam temporis, ex præscripto artis & prudentiæ, compositam, ab hodierni actus genio alienam autumaret? Intueri divinam in diruendis imperiorum fastigiis justitiam; in condendis regnorum fundamentis potentiam; in extruendis principatuum incrementis sapientiam: Persarum aurum & luxuriam de-

spicere:



Spicere; Macedonum ferrum & virtutem æstimare: Darium felicitate nimia præpinguem & prægravem miserari; Alexandrum divina quadam indole excitatum, & Heroico spiritu accinctum admirari: hæc non unius temporis, sed omnis, quæqua pater aut patebit, ævi; nec unius gentis, sed universi nimirum orbis disciplinam continent. Aut, si in Alexandro manemus, quæ est omnino pars civilis prudentiæ, quam non complectitur vita tanti Regis, quam non attingit calamus tanti Scriptoris? Hic parantur bella in externos; & pax domi civibus stabilitur. Hic exercitus cum cura legitur, non sine auctoritate regitur. Hic disciplina militiam, lex rempublicam continet. hic armorum trahantur consilia, nec minus aularum revelantur secreta. hic militares, hic imperatoriæ, & ob Heroici auspicii majestatem, plusquam imperatoriæ spectantur artes. hic locus castris & munitio designatur: hic obsidiones cum operibus suis & instrumento; hic prælia cum casibus suis & fortuna non tam memorantur, quam representantur. hic bellatoris & victoris officia, Regis auspicia, Regni sacra, copiose pariter & profunde declarantur. Cum autem porro manca sit & mutila prudentia, quæ virtutes artesque imperiis parandis, firmandis, servandis debitas tantum sequatur, non observatis & intellectis, quibus imperia diminutionem potentiae felicitatisve patiuntur, caussis: Igitur *Alexandri degenerantis, in pejus mutatio*, totam hanc partem supplebit ac illustrabit. Occurreret nobis statim illud vulgatum: *Maximarium opum αὐτῶν & πατρῴων minimo saepe intervallo, aliquando pene nullo, distingui.* verum id ad observationem cujusvis; Curtianum de caussis judicium, ad sapientis cogitationem spectat. Scilicet, *animos hominum non capere magnam eandemque diuturnam gloriam, sed vi dominationis ac licentia regni convelli mutarique: ideoque felicitatem cum virtute stare solitam, ad exortum flagitiorum, cedere, terras ac territorum dominos relinquere.* jam vero, *admissi semel in aulam sceleris eam esse impudentiam, ut non diffusis modo exemplis increascet, sed novis subinde incrementis usque ad imminutionem status publici*

*grande Cat.* Hæc enim illa sunt, quæ à capite dimānantia, unversum summi illius Imperii contextum, non paulatim, sed velut una & subita vi, dissolverunt. Non patitur angustia hujus paginæ, ut de gravioribus sapientiæ ac bonæ mentis monitis mentionem inferam: quæ nimirum capaci melioris disciplinæ animo insinuantur, cum *Majestatis regia coruscum antea virtutibus fulgorem, in obscuritatem scepro decorum per vitia ivisse; cum, auspici Principalis & Monarchici ineluctabilem jam cum imminente casu luctam; cum pro miraculis monstra successisse animadvertit: donec tandem, qui partas Deo auctore victorias, in auctoris contumeliam exercere festinavit, in ipso vecordia impetu corruit.* Hæc & talia plurima in oculis amicisque habuere, Nobilissimum Par Juvenum, BROCKTORFII: cum eam, quam ante signavi, ad scribendum sibi materiem defumerent, ita studiorum suorum repetitioni ac meditationi, ita exercitationi eloquentiæ, quæ civilem actum non ornat modo sed animat, consultum iri videbant. Equidem dum nobiscum vivere, ita vitam studiaque sua gratissimi hospites instituerunt; ut inter ornamenta Academicæ Juventutis præcipua, communis suffragio amarentur, prorsusque judicarentur implere *Salustianum* illud, hujus sæculi moribus valde antiquatum: *Non divitiis aut superbia, sed bona fama, factisque cæregnis, nobilis ignobilem anteire debet.* Cum primis autem hoc loco, exempli vice, commendari debet, quod hætenus in comparanda stili facultate posuerunt studium, usi hac in parte tum *Ephori sui, Viri doctissimi & præstantissimi*, quem idoneum ad omnia honesta ducem habent, consilio; tum mea qualicumque opera, quam lubens ipsis & in spem publicam commodavi, magnaue voluptate, quibus subinde exercebantur, meditamenta inspexi, & recitationes privatas audivi. Publicæ exercitationi, me impulsore, semel ac iterum aliquid destinaverant, composuerantque: sed cum modestiæ partem crederent, cum aliqua cunctatione ad cathedram sollennem accedere, tandem Curtiano usi auspicio, laudabili opera, domesticisque, ut ita dicam, viribus, adornarunt

narunt scriptionem, die & loco, quem prædiximus, publicis auribus committendam. Ut auscultandi gratia compareant, quibus commodum est, non existimo conquestis rationibus impetrandum: ipse qui Nobilitati debetur, favor; qui Academiae, honor; qui virtuti & Doctrinae, amor, satis valida argumenta sunt. Quod superest. Deum precamur, ut Nobilissimam Brocktorffiorum familiam in decus sæculi & solatium fervet, geminumque ejus germen, quod Academiae nostræ fovendum commisit, constantia virtutis ac bonæ mentis roboret, eruditione & scientia publice utili perficiat, vitæque & prosperitate gerendarum rerum cumulet. Propositum in Academ. Argent. xxvi. Martii, c15 l5c XLII.

## X.

QUI Historiam, præsertim universalem, quam vocant, serio tractere instituunt, eorum cognitioni atque observationi duo veluti capita *παράλληλα* offeruntur: *Ecclesia* *fata*, ac *Reipublica*. Non sufficit, *propagatas gentes, condita imperia, bella, paces, cujusque avi dinumerare*: Religionis enim *Pietatisque cultus, disciplina, augmenta, detrimenta* *ἐπίστασι ἀρχιτεκτονικῶν* atque talem in hoc studio observationem habent, sine qua de civili humani generis republica idoneum nequit judicium ferri. Quippe Divina Providentia, cum amplissime per humana omnia suas non dispositiones magis quam monumenta advertentibus ostendat: in Ecclesia tamen, ut in secretiore sui operis officina, per compendium (si quidquam in tantis compendiarium est) quæri gaudet atque æstimari. Quinimo pleraque in Civili Orbe ad Ecclesiam, tanquam ad centrum lineæ solent, vel destinatione, vel dispensatione, vel moderatione Divina referri animadvertet, qui conjunctim considerabit, quæ sejuncta ne possunt quidem, nisi cum erroris periculo, considerari. Magno id exemplo tota nos docet pagana antiquitas. A qua frustra expectes ullius temporis Historiam Universalem: frustra Historiæ Universalis fructum petas. Ejus enim partem, quam diximus, alteram, non nisi sub fabularum nube vi-

dit, id est, quid aliud, quam ne vidit quidem? tum autem, qua videre jam remoto temporis *aditu* velo patefactum sacrarium poterat, superstitionis ipsa sibi, ne videret, velum crassum & perenne obduxerat. Quo factum est, ut τὸ πᾶν ἱστέας καθελομένης, ipsa Historiæ Universæ anima interceperetur, id est, *verum de universis judiciorum*. Nam particulas rerum, in proxima tractationis superficie, ut sic loquar, arbitrari, nec de connexionione totius fati universè ullam suscipere cogitationem, fuerit forte animi plus justo terræ affixi: quæ nisi à cælo pendere jubeatur, chaos erit. Enimvero, ne nostræ quidem tempora inconvnientibus oculis intuentur ubique hanc lucem: negligentia hominum nunquam sibi plus indulgente, quam ubi maxima ad diligentiam & subsidia præsto sunt & invitamenta. Itaque, qui temporum seriem, gestorum memorias possint percensere, facile reperias: qui judicare de temporum gestorumque *διερεύη* queant, pauci erunt, quippe cum nec illi, qui speciosos Historiæ Universalis titulos profitentur, hanc viam, qua tamen nulla epitome carere debebat, curent insistere. Sed hæc forte alterius temporis disquisitionis fuerit: nunc ad id, quod proposuimus, revertendum est. Volebam dicere, Ecclesiasticam & Civilem Historiam, non modo universe & in contextu fati totius, in unam Prudentiæ institutionem conspirare, quod præcipua nimirum observationis est ac disciplina: sed in partibus etiam ac speciebus rerum, secundaria sed utilissima comparationi locum esse. Cujus unicum nunc exemplum produxisse, satis erit. Seditionis in Republica, & Hæreseos in Ecclesia prorsus magna est similitudo: sive originem spectemus causasque, quibus exoriantur; sive artes notemus ac instrumenta, quibus promoveantur; sive exitum consideremus satumque, quo plerumque comprimuntur. Ambitione cœpit utrumque in terris malum Diabolus; calliditate promovit; audacia pertendit; donec pertendentem Majestas, quam oppugnavit, serius ocyus, semper autem & ubique graviter coërcuit. Majestas, inquam, Divina est quæ utrobique oppugnatur. Ea quoque, quæ Regum & imperiorum dicitur Majestas, potius Dei in

Regi-

Regibus, in Imperiis, Majestas est. Itaque cum in favorem, regiae imperatoriaeque majestatis vindicandae, multa severitas, extra & citra humani fori consuetudinem partim conceditur, partim commendatur: Divini in civili societate characteris sanctitas honorari existimanda est. Nam qui arcana dominationis hic in ore & animo habent, invdiam & injuriam faciunt Majestati, quam non intelligunt, Ceterum sicut Divina Majestas, illatam sibi per latus hominum contumeliam, humanis ferme manibus & gladio, quem imperantibus tradidit, ulciscitur: ita insurgentes adversum se haereticos, suis ut plurimum judiciis reservat; neque tam ferro extirpari ab hominibus, quam constituti divinitus temporis calibus vult relinqui. Verum de hoc argumento, die Jovis, qui erit hujus mensis sextusdecimus, hora VIII. matutina, publica & Academica exercitationis causa amplius differant, ornatissimi, Bonarumque artium & Linguarum studiosi Juvenes, JOANNES SCHMIDIUS, JOH. JOACHIMUS FRANTZIUS, Argentoratenses; SAMUEL BROTHAGIUS, Emmendingensis. Quorum primus, origines causasque seditionum cum originibus causisque Haresum; alter, seditionum artes, consilia, instrumenta, cum Haereticorum molitionibus; tertius, utrorumque exitum ac fata comparabit, ac inter se invicem contendet. Exempli loco, Catilinam in Republica; Arium in Ecclesia, considerabunt. Occasionem suppeditavit ille ipse Catilina; quem Sallustio memoratum diligenter legerant. Stilo utentur, quem sicut à perfectione commendare, supra aetatem scribentium fuerit: ita lubentissime, suae indoli decorique relinquere debui; felicem insuper judicaturus in hisce studiis Academiam, si ad hoc exemplum, inficetam barbariem, quae imperitis etiam ad ostentationem placet, aspernari discant, quotquot ad altiora studia viam affectant. Si quis suo tempori ac negotiis non incommodum arbitrabitur, recitantibus favorem ac lubentiam aspirare, praeclarosque ad majora conatus animare: is eadem opera partim testandae erga Praeclarissimos egregiorum Juvenum Parentes benevolentiae cultusque, quem omnes,

per a ferriſſimæ communi illi Patrono, Parenti & Doctōri, Magno Theologo SCHMIDIO, debemus, occaſionem inveniet; partim prodendi erga utiliſſima Humanitatis ſtudia favoris opportunitatem ſibi datam intelliget. Vale, Lector Benevole, & pro incolumitate Inclytæ Noſtræ Reipublicæ Academiæque, pia Chriſtiano ritu animoque vota ſuſcipe. Argentorati, xiv. Junii, clō Idc XLII.

## XI.

**J**ucundiſſimæ philoſophiæ comparatio eſt, qua præclari Scriptores, totarum civitatum fata, per fata ſingulorum hominum interpretantes, *Urbes quoque, ut homines, dicunt naſci, vivere, mori.* Nativitatem hominum, inſtituto à ſe matrimonio procurat DEUS OPT. MAX. Ex quo ſemel ſolenne iſtud ab ore DEI carmen exiit, *creſcite & multiplicamini & replete terram*; non defecit, nec deficiet, generationum & nativitatum ſeries. quam Auſtor ſuus mirabili ſæpe, ſemper autem prudenti ratione, diſpenſat. Prorſus, ut in Urbium procreatione fieri animadvertimus. Ecce renato poſt diluvium orbe, auſtaque denuo hominum multitudine, de coloniis deducendis moniti primo divinitus mortales, ſi Joſepho credimus; mox, cum ſegniter parerent, inſanoque interim ſubſtructionis Babylonice opere mallerent occupari, compulſi ſunt, in varias terrarum partes demigrare, urbibus originem, inſulis cultum dare. His parentibus creatæ urbes; mox ipſæ parentes factæ; dum ad juſtam gentium magnitudinem & numerum, Orbis iſte adoleſceret. cujus vita, ut ſic dicam, mutationibus alitur hætenus & mortibus. Modo in terra moritur civitas, ut in mari reſurgat: modo truncatur in mari, ut in terra geminetur. Nunc in cineres ſubſidit oppidulum, ut è cinerum favilla veluti vento translata, alibi oppidum inſtauretur. Videas bello abſumi urbes, ut ex abſumtis, alibi naſcantur gentes. Cui viciffitudini omnia elementa vel viribus ſuis vel caſibus ſerviunt. Quis neſcit, Ætneum ignem tota aliquando oppida evomiſſe, dum incendia ſua evomit? ſcilicet dum vicina vaſtavit, excitavit remota: dedit

dedit locum, quibus ademit; atque quorum securitati invidit, eorum promovit incrementa. Sed nec officina rerum mirabilium mare, hic minus deprehenditur mirabile, cujus hieme & vastis fluctibus, non monstra sæpius belluarum, quam semina & genitores urbium involvuntur. Abi ad litora, atque naufragiorum spolia quære: & inter illa, novarum conditores urbium, veluti salutaria ejectamenta, salvere jubebis. Videbis, etiam in *Aëre* advolantem, Hircum illum præpetem, *cujus pedes non tangebant terram* (*Dan. 8, 5.*) & ad urbes magnas non comminuendas modo sed & condendas festinantem. Erit, cum subsultans *Terra*, non tam in exilium suos incolas excutiet, quam ad oppida statuenda ablegabit: quorum sedes ut ex voto occuparentur, sæpe prioris patriæ sterilitas admonuit. Ita nascuntur urbes, varia sui ortus occasione, varia parentum conditione, varia genituræ sorte. nascuntur ex cadaveribus aliarum; nascuntur, ut fiant cadavera; nascuntur ad expectationem gentium; nascuntur præter opinionem hominum; nascuntur ad ætatis incrementa & decremента. Igitur infantiam suam infirmitate, nec rarius ineptiis produnt: Adolescentiam ardore fatentur; Juventutem viribus ostentant; virilem maturitatem industria & dexterritate demonstrant; senium & senii incommoda plerumque dissimulare non possunt. Sic nascendo, sic vivendo discunt mori: serius an ocyus, nihil interest ad communem mortalitatem, & ad certissimam ejus mobilitatem. Quid mihi sæcula memoras? quid periodos ratiocinaris? quid tertii, quid quinti, quid octavi centenarii terminum infamas? Nondum evicisti, quos in humano ævo climacteres prædicas: & si evicisses, exprobraret tibi illa ipsa comparatio, rei comparatæ ignorantiam. Nam invenio in homine dimensa valetudinis spatia, distinctas virium vices, & in communi ac ordinaria, ut sic loquar, habitudine, magnam ascendendi & descendendi æqualitatem: neque sic tamen certas temporum leges invenio. Quomodo igitur urbium temporibus tam definitas designabimus metas? Nonne

Nonne intervalla earum & vices à voluntatibus hominum dependent, quibus nihil est mutabilius, nihil inæqualius, nihil incertius? Corporis valetudinem & tempora, regit naturæ quidam tenor, ut non prorsus & ubique sibi similis, ita plerumque tamen ab exemplis sui moris vix discedens. At vero ingenia hominum actusque, quibus civitatum duratio & vita temperatur ferme, in assiduæ mutationis varietatem eo usque patent, ut, quamcunque tibi regulam constituas, pauciora ad regulam quam ad regulæ exceptiones collecturus sis exempla. Mancat ista inter arcanas Providentiæ cœlestis provisiones notitia; nobis haftenus scire satis esto, *Quod urbes alia subita, alia lenta, omnes aliqua morte extinguantur; quod viam ad mortem sæpe latentes morbi, sæpe manifesti, est & ubi perpetui præparent; quod causas maturati aut dilati exitii plerumque una causa intelligat, qua ceteras moderatur; quod longe dignius sit Philosophi munere, vitam civitatis utiliter regere, quam mortis tempora curiose definire.*

Præfari hæc libuit de illo ipso argumento, quod Oratoriæ exercitationis ergo tractandum susceperere Studiosi aliquot Juvenes; quorum nomina cum argumento scriptura; Die Jovis (i. e. III. Novembris) hora VIII. matutina in sollemni auditorio recitanda, nunc publice indicamus. Primus enim JOH. JACOBUS BENTZIUS, Argentoratensis, de *Nativitate Urbium*; Alter JOH. HENRICUS SCHATZIUS, itidem Argentoratensis, de *Vita Urbium, verba facient*; Tertius ANTONIUS SCHMIDIUS, Wetteraviâ Feuerbacensis, *Mortem Urbium cum morte hominum comparabit.* De indole eorum, possem ingenua & strenua pleraque polliceri, si id agendum hic esset. Stilum non prædicabo supra captum & simplicitatem ejus ætatis, in qua pro effectu, conatus laudari potest. Malui ipsis relinquere sua, quam adsuere aliena. Faciant potius jacturam ornatus, quam laboris sui Eximii Juvenes: dum modo frequentius manum operi admove-re, & publicæ luci assuescere condiscant. Quibus commodum erit, auctoritate, conspectu, favore recitantes animare, illi brevissimi temporis officium, quod Academici ritus obler-



observantia commendat, & succrescentis cura juventutis suo quodam jure desiderat, fortasse non male collocaverint, cum præsertim ex paucis & obviis, quæ dicentur, cuius occasio de multis & reconditis meditandi, subnasci posse videatur. Equidem vivimus eo tempore, quo non tam de propaganda civitatum vita cogitare, quam assiduas mortes Urbium & funera lugere necesse est. Jacent ante oculos cadavera, prospectant è ruinis feralibus passim busta nobilissimarum urbium, quas in communi Patria non tantum vidimus mori, sed sensimus. In tam tristi ergo tamque amplo cœmiterio, magnum scilicet & copiosum habemus de Urbium fato commentarium. Hic non sufficit, exquirere genesin, numerare ævum cujusque civitatis, disputare de morbis, nisi quatenus una omnes pestis corripuit, quæ satis intelligitur, etiam cum non nominatur: altius ascendendum est, supplicique prece coram Deo agendum, ut, quandoquidem Germaniam nostram, celebre olim tot urbium domicilium, nunc mœstum earundem conditorium esse voluerit, piorum suorum reliquias, inter luctum sæculi pæne contabescentes, in mansuram Urbem & novam colligat; ut tot ruinis unam imponat ruinam, quam soli possunt timere, qui perennis habitaculi quietem desperavere; ut, si quid ad fatalem supremæ restitutionis terminum superest, ex cineribus interim & ruderibus medius templum refuscitet atque tabernacula, in quibus nomen ejus laudetur, gloria adoretur, oracula semper audiantur. Sed nobis finendum est. Vale Lector Benevole, & Urbem eam cogita, quæ nec nasci potuit, quatenus in Deo est; nec vitam periodos numerat, quia in æternitate est; nec mortem admittit, quia in regno vitæ est. Propositum ARGENTORATI, 1. Novembr. clō 1721.

## XII.

**M**ira sunt & mera ænigmata, quæ de *ave unice-unica PHOENICE*, scripserunt magno numero veteres Theologi, Oratores, Poëtæ, Philosophi, Græci Latiniqve. inter quos nota illa sunt ex *Lactantii Phœnice*:

b b b

Hac

*Hac fortunata fortis satique volucris,*

*Cui de se nasci prestitit ipse Deus;*

*Femina vel mas hac, vel neutrum sit mage, felix,*

*Felix, qua Veneris sœdera nulla colit.*

*Mors illi Venns est, sola est in morte voluptas,*

*Ut possit nasci, hac appetit ante mori.*

*Ipsa sibi proles, suus est pater & suus hares,*

*Nutrix ipsa sui, semper alumna sibi.*

*Ipsa quidem, sed non eadem, quia & ipsa, nec ipsa est:*

*Æternam vitam mortis adepta bono.*

Cui ænigmati ut aliquid lucis possit conciliari, dignus est, qui hic adscribatur *Clementis Romani locus, ex epist. 1. ad Cor.* nondum ille quidem in vulgus notus, quippe ex monumento nuper reperto. Ἰδωμεν τὸ παρ᾽ ὁδοῦ σημεῖον τὸ γενόμενον ἐν τοῖς ἀνατολικοῖς τόποις, τοτέστιν τοῖς περὶ τὴν Ἀρβίαν ὄρεον γὰρ ἐστὶν ὃ προσσημαζέτω φοῖνιξ. τὰτο μονογενὲς ὑπάρχον ζῷ ἐστὶ πανταχόστω. γενόμεν ἐν τῇ ἡδὴ πρὸς ἀπόλυσιν τῇ ἀτοθάνειν αὐτὸ, σηκὸν ἑαυτῷ ποιεῖ ἐκ λιβάνης καὶ σμύρνης καὶ τῶν λοιπῶν ἀρωμάτων, εἰς ὃν πληροῦνται τὸ χρόνον εἰσέρχεται καὶ τελευτᾷ σηπομένης δὲ τῆς τετελευτηκότητος σαρκὸς, σκόλης τις γεννᾷ, ὅς ἐκ τῆς ἱκμάδος τῇ τετελευτηκότητι ζῶν ἀνατρεφόμενος, πλεονεῖ. ἔτα γεννᾷ γενόμενος αἶρει τὸν σηκὸν ἐκείνον, ὅτε τὰ ἐς αὐτὸ προγεγονότα ἐστὶν, καὶ ταῦτα βασιάζων, διατρέχει ἀπὸ τῆς Ἀρβίης χώρας ὡς τῆς Ἀγίτης εἰς τὴν λεγομένην ἡλύπολιν, καὶ ἡμίεως βασιπόντων πάντων ἐπιπίλας, ἐπὶ τὸν τῷ ἡλίῳ βαυμὸν τίθησι αὐτὰ καὶ ὕτως εἰς τοῦτόστω ἀφαιρᾷ. οἱ ἔν ἱερῆς ἐπισκήπτης τὰς ἀναρχεσθὰς τῶν χρόνων, καὶ ἐνείσκειν αὐτὸν περτακοσίου ἔτους πεπληρωμένῃ ἐκλυθῆναι. Consideremus signum admirabile, quod in Orientalibus locis sive in Arabia accidit. Avis est, quæ appellatur Phœnix: ea sui generis unica est & solitaria, vivitque quingentos annos, cum autem animadvertit suum finem instare, ipsa sibi loculum facit ex ibure & myrrha aliisque aromatibus; revolutoque tempore ingreditur in eum & moritur. Soluta deinceps in putrefactionem carne, vermis inde generatur, qui ex humore defuncti animalis nutritur, plumescit, robustiorque factus tollit illum loculum, ubi ossa parentis sunt, & portans ea ex Arabia in Egyptum,

ptum, in civitatem Heliopolim pervolat, claroque die in conspectu omnium advolans super aram solis illa ponit, atque ita remittitur prius iter eo, unde venerat. Sacerdotes ergo inita ratione temporum, ex illa observatione inveniunt, quingentesimo quoque anno expleto avem illam venisse. Accommodatur postea hæc narratio ad resurrectionis mysterium: cujus symbolum & alias sancti Patres à Phœnice crebro desumerunt. Præsertim autem admirandam de Christi Jesu Servatoris Persona. naturis, officio Θεολογίας, hac imagine, tanquam emblemate, subinde illustratam est videre. Licet autem multos moverit & numerus & auctoritas scriptorum, qui talia de Phœnice tradiderunt, ut pro historia mallent complecti, quam pro fabulis aspernari: consensu tamen doctorum obtinuit, fabulosam avem esse Phœnicem. sub quo elogio etiam diligentissimus vir Ulysses Aldrovandus in specioso opere Ornithologico eum annotavit. Verumenimvero, cum epistola illa Clementis esset reperta, non parum ponderis visa est habere viri Apostolici auctoritas. quare doctissimus *Patricius Junius*, primus tam memorabilis monumenti Editor, in notis, quas adjecit, denuo pro veritate Historica Phœnicis pronuntiavit. Cui tamen, & simul iis, qui propterea abjudicant Clementi illam epistolam, pro solita moderatione & prudentia obviam ivit *Gerardus Joannes Vossius*, in *Physiolog. Christi. lib. 3. cap. 99. cum necesse non sit credere, Clementem scivisse omnia que facerent ad arcana natura.* Nos & hanc annotationem, & in universum eorum sententiam amplectimur, quibus fabula videtur, illa de Phœnice Θαυματολογία dicam an εὐρυματολογία. De cetero Clementis epistolam censemus non exigua æstimatione dignam, etiamsi de auctore certa asseveratione designando, sustineatur interim sententia. Unde porro tam contestata opinio & communis fama, quæ tot viris magnis imposuit, originem traxerit, & an ex hominis alicujus historia, ut sæpe factum est, fabulare commentum, an vero aliunde exortum sit, altioris est conjecturæ. cui nunc indulgere non possumus. *Scaliger exercitat. 233. de Indica ave Semenda* conjecit, atque ita autumavit: Phœni-

*cem haud esse penitus fabulosum, legimus in commentariis navigationum, in mediterraneis India reperiri. Semenda vocatur ab incolis. Inciderunt autem in hoc argumentum tres ornatissimi Juvenes, magisterii Philosophici, quod vocant, candidati, illamque exercitationis Academicæ materiem delegerunt. Disiuri ergo sunt die crastini hora VIII. matutina in auditorio majori hoc ordine: JOANNES JODOCUS SCHELLIUS, Argentoratensis ostendet, quid veri simile habeant, quæ de Phœnice traduntur, sive qua fidei specie viti videantur; IMMANUEL ECKHARDUS, Seseñheimensis, refutat, quæ in speciem adferebantur, mendacium rei & fabulam arguer; ISRAEL SPACHIUS, Argentoratensis, quos vel ad elegantiam vel ad doctrinam usus habuerit illa tradito de Phœnice, aut habere possit, declarabit. Quibus commodum erit, recitantes auscultare, illorum prudentia & meditatio hac occasione, gravioribus leviora facile supplebit. Sunt illustra, nec pauca argumenta, quibus Phœnix noster accommodari potest. Ne dicam de ceteris, quam convenienter juvatur consideratio de Heroibus tali comparatione? Hi sunt Phœnices humani orbis, nisi Herois appellatione minus excelsæ, quam par est, utamur: hi incomparabiles sunt, & plerumque sine pari, sine socio; hi ad cœli momenta, id est, ad altioris instinctus moderamina, moventur dirigunturque; hi non semper, sed ominosis tantum magnisque temporibus veluti cœlo missi apparent: horum genitura, indoles, vita, exortus, omnia admiranda sunt. ex horum rogo, busto, cineribus, ossibus, aliquando subnascitur Heroica proles; Deo nimirum fata Heroicarum familiarum, & successuum miracula resuscitante. Hi ex orientalibus locis proveniunt: quia diviniore indoles è cœlo emicat. hi sepulcrum sibi & conditorium ex aromatibus extruunt: quia omni odoramento & aromatibus fragrantior est virtutum spiritus, inter quas & per quas mori, quibus immori solent, ut vivant. Hi sunt Phœnices, & prodromi unius Phœnicis. qui illos per millenarias, & quingenarias & centenarias periodos disponit, donec expleto magno hujus ævi*  
*morta-*

mortalis anno, appareat ipse ille unus & unicus Phœnix, & instauret annum sine anno, sæculaue cum orbe toto aboleat, ut nova civitas, nova terra, novum cælum, Phœnicia, ut sic appellem, miracula, omnibus piis æternum spectanda, tractanda præbeant. Hæc & similia suppeditabit nobis tota Christi historia, Christi nativitas, vita, passio; quam præsertim nunc sollemniter & publice meditamur. Neque enim averfatur Deus talia Christianæ pietatis inventa & symbola: quinimo statuendum firmiter habemus, nullam esse occasionem negligendum, qua ex quovis argumento argumentum nostrum faciamus, id est, Phœnicis nostri mysteria (pie tamen ubique & cante) contemplemur, interpretemur, balutiamus, etiam obstupescamus. Per scriptum Argentorati, XXI. Martii, Anno Chr. clō lxxc xliii.

## XIII.

**E**st inter exempla rarioris industriæ & celebritatis Academicæ publice numerandum prædicandumque, quod in pertractandis C. Cornelii Taciti annalibus, mecum superioribus mensibus collocavere studium, Generosi florentissimique Juvenes: qui ex variis terrarum oris, ad suum decus & spem sæculi, huc veluti in eximiarum curarum laborumque palæstram confluerunt. Excitabatur ipsa difficultate gravissimi Auctoris, discentium alacritas: quam contentio sustentabat, æmulation pulcri profectus magis magisque accendebat, cultura denique eruditionis & solertioris judicii, non temnendis successibus remunerabatur. Quorum specimina hætenus insignia publicis splendidisque confectibus præbuere, institutæ feliciter de nobilissimis argumentis dissertationes & collocationes; præcipua laude hic memorandæ, nisi in recenti Academicæ nostræ memoria versarentur, atque alibi notitiæ publicæ forent à nobis commendatæ. Cum præsertim ad novæ laudis prædicationem nunc manum nostram calamumque inviret, duorum è præcipuis Commilitonibus strenuum & singulare circa prædictas occupationes studium. Sunt ii Nobilissimi Juvenes, HERMANNUS SAMSONIUS,

bbb ;

Livo-

Livonus; VITUS LUDOVICUS à SECKENDORFF, Eques Francus. Qui, cum hætenus omni virtutis genere ac litterarum flagrantiore studio ad palmam & decus exsplenduiſſent, alter (SAMSONIUS) etiam in publico eruditionis præclaræ, alibi quæſitæ, apud nos amplificatæ, ſuſcepta feliciterque propugnata commentatione in VI, VIQUE *caput lib. I. Annalium*, ſpecioſa documenta edidiſſet: nunc proſectui prudentiæ, uterque exercitationem *Eloquentiæ*, ex illo ipſo Tiberii Principatu, quem publicæ prælectionis argumentum, ſicut cœpimus dicere, delegeramus, deſtinavit adjungere. Quibus ignota eſſent Nobiliſſimorum Juvenum ingenia, magnum, ni fallor, notiæ atque commendationis argumentum, ex hac ipſa judicii conſiliiſque cordata rectitudine poſſent deſumere. Quam uſitatum enim plerisque eſt, divellere illa ſtudia, ſive potius utraque negligere: tam certum inter doctos omnisque ævi auctoritate reſtatum eſt, non valere in præſentes vitæ uſus & graviorem in rep. actum, niſi indivulſo copulatas nexu, *civilem ſapientiam & civilem eloquentiam*: quæ propterea ſi non una voce appellari, certe ſub una vi comprehendendi debent ac intelligi. Sed nimirum oppido pauci æſtimant ſacrum illud vinculum, quod naturæ ſocietatiſque humanæ Deus, tanquam fatale & æternum pignus, intimæ religionis cærimonia commendavit. Aliqui & contemnunt; ut plerumque ignorantæ comes eſt arrogantia: dum homines noluiſſe videri volunt, quod aſſequi nequiverunt. quod arcanum impudentiæ, nonnemo Veterum obſervat dicam, an arguit. Sed nobis nunc cum bonæ mentis Juvenibus, res eſt; & de iis ſermo. Delegerunt ſibi civilis eloquentiæ exercendæ, argumentum, quod *Priores VI. Annalium Taciti libros*, id eſt *Principatum Tiberianum*, ſicut antea monui, exhauriret; forma ſcriptionis hunc in modum ordinata: ut è *duobus orationibus*, Prior SAMSONIANA, TIBERII LARVATI ſimulacrum, ſive *Rationem ſtatus*, quam vocant ſequiores, *ſpecioſo vulſu adornatam ex mente & ſcopo Tiberii oſtendat*; Altera TIBERII REVELATI *formam ſive Ratio-*

RCH

*nem status aperta facie deprehensam prostitueret. Fuit Tiberius singularis simulationum ac dissimulationum omnium artifex summusque fraudis civilis & sophismatum in gerenda republica architectus. cumque nihil non ex tyrannico more consilioque ageret, vitia tamen sua sub virtutum specie occultabat. unde illa Historicorum judicia: cum virtutibus & vitiis ex agno usum, tanquam si alterutrum operam tantum dedisset. Pro quo potius dicendum erat: virtutum simulatione veluti larva obrectum, denique in scelera & dedecora prorupisse. sicut rectissime Tacitus judicat, sine Sexti Annals: ubi tempora potius morum diversa, quam duplicem indolem, quod alii faciunt, in eo agnoscit. Morum, inquit, tempora illi diversa: egregium vita famaque, quoad privatus, vel in imperiis sub Augusto fuit: occultum & subdolum fingendis virtutibus, donec Germanicus ac Drusus superfuere; idem inter bona malaque mixtus, incolumi matre: intestabili savitia, sed obrectis libidinibus, dum Sejanum dilexit rimuit: postremo in scelera simul ac dedecora prorupit, postquam remoto pudore & metu suo tantum ingenio utebatur. Nos, ex loco multæ profundæque meditationis nihil aliud nunc, quam propositum illud Tiberianum consideramus: cum libidinem animi & ingenii sui pro suprema ratione habens, nihil illicitum, quod explendæ dominationi; nihil turpe, quod aliquo colore involutum; denique omnia, modo clam, modo palam, tyrannidis impotentiae accommodanda aut indulgenda crederet. Id egit, cum sub schemate cultuque Principalis officii, opera tyrannorum faceret: id egit, cum remoto velo, ne famam quidem tyrannidis expavesceret. Ceterum illa posterior Tragœdiæ pars, nihil nisi luctu & sanguine theatrum implevit: priores fabulæ actus, multa specie, ornatu, gravitate præfulserunt. itaque non ut fabula & sub persona res actitari plerisque videbatur: sed serio Principis veroque actui competere credebantur, quæ tanta arte in nativæ decus formæ Romanus imperator concinnaverat. Plane sicut ii facere solent, qui omnem prudentiæ actusque civilis summam, Ratione quadam status sequioribus annis metiuntur. Quod vocabulum*

lum si, quid portendat, exquiras; totam tibi pulcherrimarum rerum & decore splendidi spectaculi scenam instruent, ne quid ad salutis *supreme legisque majestatem*, ad *interiorem & sacram actus imperatorii prudentiam*, ad *sollertiam publici compendii*, ad *universam denique status intendendi, firmandi, locupletandi, ornandi artem*, desiderare possis. Verum si ex ipso postea actu eventusque, id est, ex proprio interpretationis politicæ fonte, singula investigaveris, apparebit hanc esse unam horribilis illius arcani legem; *suprema legis titulo, quidquid ad utilitatem dominantis aut libidinem placuit, involvere; nihil pensi moderatique habere, justitiam postponere, honestatem deferere, æquum & bonum ultro negligere; nihil illicitum, quod fructuosum, putare.* Hæc commenta, vaframenta, artes, aulam Tiberii tanquam sedem & patriam præcipuam agnoscunt: indeque adeo fit, ut exemplum Tiberiani Principatus à Tacito deformatum, veluti regula aulicæ politicæ, contra mentem Taciti, à plurimis *dominationum magistris*, quos præter Latinorum consuetudinem *Statistas* multi vocant, passim arripiatur. idque ipsum *tacite ac dissimulanter*: ne quid minus ex decore artis, hic geri videatur. Quo pertinet etiam nuperum exoticæ calliditatis inventum: cum de *extraordinaria Prudentia*, quam honesto titulo appellant, sive *de ratione status* non quidem scribere, sed scripta edere desinunt: atque in fatalibus & secretis libellis circumferunt furoris Pythici oracula; exemplo scilicet Florentini veteratoris cautiore facti; & sub ænigmate rem felicius gesturi. Hinc ergo *Ratio illa status*, si denuo quid sit interrogas, non immerito vocabitur à nobis: *larva Dominantium; histrio aulicorum; virtutis ludibrium; conscientia scopulus; sagæ populorum; rete urbium; Pacis loligo, armorum arugo; tabes sæculi; mysterium iniquitatis; tormentum religionis*: denique quid dicam de eo, quod est NIHIL, & est OMNIA? Unum illud nobis propositum est, ut Juventuti studiosæ, subinde monita cautionis & Prudentiæ, contra irritamenta calliditatis suggeramus. Quo etiam *Orationes illæ duæ, ad quas crassini VIII. matutina, loco sollennis audiendas ipsa Nobilissimorum Ju-*

VENIUM,



renum, qui perorandi provinciam in se recepere, virtus & doctrina, utriusque decoris amatores invitat, unice spectabunt. Quippe cum veram studiorum publice salubrium viam cordate prudenterque pridem institissent, & hæcenus prospere decurrissent, hac occasione industria sua specimen publicabunt. Et Alter quidem, ut supra cœpimus dicere, exemplo Tiberii declarabit, quibus coloribus, qua specie, Ratio prava status in aulis elaborata extra anlas soleat ostentari; & quam solícite præferantur illi tituli: Omnia ad vim Principatus dirigenda esse; in qua sit tutela regnorum: igitur Principes instar Deorum habendos, omnemque irreverentiam & audaciam erga summa fastigia legibus, viribus, ordinariis extraordinariis rationibus, districte, acriter, & ubi res postulat, atrociter vindicanda; auctoritati servitium juxta & tempori, & utriusque ingenio accommodandas agendi artes; quo recto cursu perveniri nequitum est, obliquo tramite incedendum; admittendas necessitatis aut utilitatis causa fraudes, dissimulationes, odia, amicitias; denique utilitatem status præcipua statum ratione agnoscendam. Alter ostendet: frustra præferri virtutum nomina & species, adhiberi verborum magnificentiam, laudari jura, jactari religionem Principatum; ubi omnia ad expleudas tyrannidis & infinite dominationis libidines referantur; neque συντροφικὴν πολιτικὴν & laudabilem illam extra regule ordinem Prudentiam, quam necessitas aliquando suadet, nec honestas damnat, cum κακοπραγμοσύνη & prava calliditate confundendam esse. Ceterum sicut scripserant, ita recitabunt: i.e. sua, proprioque Marte elaborata; neque alienis inferitis interpolata, aut compilatione locorum communium vane adornata. Etiam si enim omnia, ad exactam scribendi normam limata non erunt; talia tamen judicavi, quæ ingenii & eruditionis præstantiam abunde possent declarare.

Script. Argentor. xxvii. Septembr. cło Ioc XLIII.

## XVI.

**N**ON absurdum est, inter medios bellorum tumultus de Pace meditari, loqui, scribere: cum vel sola ista ratio sit, quæ calamitatem temporis & tam diuturnam boni inter humana bona præcipui absentiam solari quodammodo,

modo, restrictumque argumento sæculi & conturbatum animum possit relaxare. Effecit hæc ipsa cogitatio, ut ad dissimillima nostris tempora respicientes, lubentissime subsisteremus in contemplatione *Pacis*, qualem non uno nomine fas est dici incomparabilem: cum sub Augusto Imperatore, omnium inter se gentium aut pax aut pæctio esset. Etenim Augustus, cum ruentem in deteriora & procumbentem intestinis vitiis rempublicam, non sine maxima rerum conversione, toriusque, quod perite *Florus* iudicat, corporis agitatione, in novum statum formamque ordinasset, atque libertatem degenerem ac licentia præcipitem, præsentaneo *μοραφίας* remedio abolevisset: statim consilium cepit conservandæ per longissimum tempus pacis; cuius mansuetudine ac tutela, terrarum orbis membra in unius corporis firmitate coalescerent. Videbat Prudentissimus Princeps, nulla imperia esse stabiliora, quam quibus non indelectantur subjecti: itaque dulcedine otii imbuendos censebat animos, tot bellorum jam pertæfos, omnemque armorum culpam in auctorem novi status rejecturos. Videbat, crebris bellorum motibus, etiam cum feliciter & ex voto cessisset victoria, aliquid de robore aut partibus Imperii decerpi, imminui, aut labefactari. Videbat, neminem citius periculum incurrere, quam qui sæpius periculosam militiæ aleam cum fortuna ludere audet. Videbat, boni moris disciplinam, unicum & verissimum imperiorum vinculum, nec formari inter armorum strepitus, neque regi satis posse. Quo accedebant altiores de fato & regnorum fortuna cogitationes, quæ suadebant procurentis imperii cursum coercere, neque magnitudine nimia potentiæ, dissolutionem vastæ ac inhabilis molis ultro arcessere: nihil in rerum natura, nihil in humanis opibus, cum excessit modum, esse durabile. De tuendis pace, quæ bello parva essent, nunc cogitandum esse; firmandos imperii terminos; concludendam intra tutos recessus potentiæ amplitudinem: samæ studendum denique, quam vel minui apud posteros, si nihil nisi bella præferret; vel lacerari esset necessum, si pacis

pacis artibus videretur caruisse. Veniebant in partem tallum curarum callidiora quædam, arque, ut nihil in gentium consiliis usquequaque sincerum est, ex dominationis vafamentis exorta, qualia erant ista: exarmare prætextu pacis Italiam, emollire & quasi enervare otio, tumidos bellicosarum gentium spiritus; servitutem tanquam frenum orbi terrarum, tranquilla quadam violentia, ut sic dicam, magis magisque inducere ac imprimere. Talibus ferme sui propoliti rationibus nitebatur Augustus, cum pacem illam longam & magnam imperio suo terrisque indulgeret. At vero *Augustam* sive *Augusteam pacem* non ea tantum parte debemus considerare, qua Augusti est: sed oportet inluper attendere superioris auspicii consilia, quatenus à sanctiori auctore, diviniore quodam modo, *augusta pax* est, & merito appellatur. Longe enim alia, longe graviora sunt; quæ sub hac pace, divina moliebatur Providentia: in cujus sanctissima consilia si quis velit, quia pie licet ac decet, inquire, multam profundamque meditandi observandique occasionem reperiet. Voluit Augustus ad fastigium potentie evehere Romanum imperium; voluit & Deus: sed diverso uterque consilio. Augustus famæ celebritatem querebat & amplificationem Romani nominis: Deus gloriam Christi sui & Christiani nominis incrementa spectabat. Deus, cum in terras missurus esset, novo & singulari missionis genere, *Principem Pacis*; arma passim omnia jussit conticescere: Deo jubenti, cui obediunt omnes creaturæ, paruit cum creaturis omnibus Augustus: quanquam ita paruit, ut cui pareret, & an pareret, non satis animadverteret. Sentiebat animum suum bellis triumphisq; innutritum, subito & arcano instinctu ad pacem inclinari: sed inclinantem illam vim nec intelligere volebat, nec audebat detrectare. Interim nascitur cum sua Pace, Pacis auctor & origo unica; Pacisque nuntios & legatos per orbem parat dimittere. Exit sonus Pacis in omnem terram: & pro tubarum clangore, Evangelicæ prædicationis suavis passim aures animosque permulcet: pro exercituum

& copiarum agminibus, speciosi pedes añuntiantium Pacem perambulant montes, qui subsidunt; valles, quæ assurgunt; populos, qui mitescunt; regiones, quæ beantur. Mirantur sæculi mansuetudinem & fatalem rerum conversionem, mirantur, inquam, sed non capiunt Romani sapientes: interim tamen, quasi caperent, quod mirabantur, canunt Augusto laudes, instruunt Panegyricos: *Tibi, inquam, Auguste, ridet terra, floret ager, lucet cælum; tibi maria navigantur, habitantur urbes, tibi pax & opulentia & securitas ludos quotidie & spectacula facit.* Quæ, cum similibus, soli debebantur *Pacis Principi*; qui Augusto animum ad amorem pacis temperaverat, qui Augusto vires ad restituendam pacem suppeditaverat: qui terrenæ pacis symbolo æternæ pacis dulcedinem figurare destinarat. Delegerunt hoc de PACE AUGUSTA argumentum, de quo in publico aliquid dicerent, florentissimi duo Juvenes, laudisque ac honoris, qui ex litteris petitur, candidati valde industrii, JOANNES SCHILLING, Argentoratensis, & ANDREAS FÜRNSTEIN, Austriacus. Si cui erit commodum, *Die Luna proximo, hora VIII, matutina* recitantes audire: is ex prioris oratione percipiet, quid humanorum ac civilium consiliorum habuerit pax Augusta; alterius oratio, quantum divina habuerit ea providentia, brevissime conabitur indicare. Vale Lector Benevole, & de observantia studioque erga Te nostro optima quæque Tibi pollicere. Scribebam Argentorati, xxiii. Martii, Anno Chr. clō Idc XLIV.

## XV.

**D**Ivinum quid in terris esse Regnum, Regesque quasi quosdam inter homines Deos, omnium gentium ætatumque asseveratione traditum est. Sed divinitatis ejus nec originem, nec vim, nec symbola penetraverunt illi, quibus ipsa divinitatis veræ summæque mysteria nunquam patuerunt. Sane, ut in multis aliis, ita in hac ipsa re, quidam divinitatis sensus etiam gentilium, Deumque ac divina ignorantium, animos pertentavit: eoque adegit, ut de veneranda eximie Regni Regumque majestate serias cogitationes

nes suscipere. Infudit, inquam, in oculos animosque hominum, suam lucem Regia Majestas; & Augusto se, usitataeque dignitatis modum supervecto honore monstravit. sed praesentius erat tanti splendoris lumen, quam quod oculi divinitus non illustrati recto obtutu intueri possent. Hinc varia caecutientium aberratio; dum quidam *patrem divino saspigio sublimitatem rati*, per consecrationes, & cultus humanam sortem penitus excedentes, sua commendare obsequia student; alii, par superstitioni vitium, adulationem induentes, quicquid ad inflandos Regum animos pertinere potuit, comminisci instituunt. His maculis non vacant pleraque, quae apud profanam antiquitatem occurrunt: ita tamen, ut in tenebris etiam, vestigia lucis appareant. Talia sunt, cum *Homerus*, *sceptrum à Jove* deducit, ut Agamemnoni suo tradat; cum Scythae per *solum regium*, tanquam sanctissimo juramento, apud *Herodotum* jurant: cum insignia regni caetera vario more ritumque, sed ubique tamen ut symbola divinitatis regiae admirantur, colunt, praedicant Gentiles. Et quam subtilia sunt, ac divinum quid conantia, quae de *auspicio regio*, de *fortuna Regibus propria*, de *satu regis*, de *majestate & sanctitate regia*, passim philosophantur Scriptorum nobilissimi? Negari non debet, adulationis ab initio voces fuisse, cum *divinitatis titulos* Principibus aulica obsequia admetirentur; cum *divinas occupationes*, *divina edicta*, *divina* denique *omnia fortuna actusque Principis instrumenta*, ipsosque imperatores *sanctissimos ac divinissimos* dicerent: sed retinuit postea, imo & auxit Christianorum pietas verborum honorem, sustulit autem ejuravitque adulatoriam superstitionem. Deum scilicet ista in Regno celebrant; non autem Reges Deo aequant: & quod adulatio olim sine affectu & ratione enuntiaverat; quod superbia praeter rationem, affectu immodico, sibi vendicaverat; postea ratione fulta modestia & obsequium pietate informatum, verbo tenuis non abrogavit, sensu autem toto emendavit. Quamquam cum de se ipsi ita loquuntur Principes, quis neget nimium esse? nisi quod alienae manus ministerium, quod in-

tervenit oraculis Principalibus, sui potius obsequii respectu, quam ex voto Domini longius evectum, invidiam omnem mitigat aut abscondit. Et datur hæc venia iis Prudentum consiliis, quæ αὐτεξέσια σκέπησιν, plenitudinem regis potestatis, nulli mortali submissum fastigio, auctoritatem imperii inviolabilem, securitatem gentium ac salutis publicæ tutelam, divini splendoris sed Deo cæloque orta efficacia terris cupiunt conciliare. Denique & Prudentia suis inventis artibusque; & pietas suæ religioni meditationique hinc argumenta, fulcra, robora, colores petere potest: suntque adeo utroque sensu, e. g. symbola regni & insignia, θεῖα τινα, καὶ τινων ἀρρήτων μυθικῶν ἐκάρματ'α, ut Nicephoro Castillo dicuntur. & Nicephorus Gregoras, affectu non minus Christiano ait: τὰ τῶν βασιλέων κεφάλια ἐνθεα εἶναι, ἢ οἷα χρεὼν ὑπὲρ τοὺς πολλούς. regum ornamenta & insignia divini quid habere, atque merito supra captum vulgi posita existimari. Ceterum cum nulla re magis Deum imitari divinamque præstantiam quodammodo repræsentare se posse cernerent Principes, quam virtutum illustri splendore actuque: cognomentis virtutes varias præferentibus sua edicta, litteras, tractatus insigniverunt. Itaque passim cum nominibus comparent præscripta omnis, quæ ex honestate petitur, laudis elogia: Εὐσεβεῖς, ἀγαθοποιοὶ, ἐνεργητικοὶ, μέγιστοι ἐνεργέται, εἰρηνικοὶ, ἡμερότατοι, ἀμνηστικάκοι, ἐμφορῆσται, φιλόφρονες, τοῖς ἀδικημένοις σωτῆρες, Πῖ, Benigni, Munifici, Maximi Benefactores, Pacifici, Mansueti, Injuriatum immemores, Sapientissimi, Nobilitatis amantes, Liberatores afflictorum; aliaque his similia; quæ posteriores Orientis Imperatores una Pietatis laude complexi, πιστὸς ἐν χριστῷ βασιλέας, fideles in Christo imperatores se præscribebant. Atque, ut omnia augustiora viderentur ac diviniora, suam quandam & propriam adscribere Regibus Regnisque Fortunam, peculiaremque Divini numinis in scepra favorem Fatorum Regionum elogiis honestarunt. Hinc ἐντυχῆς, νικηταὶ, τροπαῖχοι, Felices, Victores, Triumphatores, non tam eventuum feliciū, quam ipsius Fortunæ Regiæ, quæ tales Regibus eventus pollicetur aut gratificatur, celebrationem spirare

spirare & loqui videntur. Omnia autem illa, quæ de Majestate Regia, de Virtute Regia, Regisque fatis hætenus diximus, complectitur incomparabile & vere Imperatorium nomen *Augusti*, quod apud Romanos Principes, non sine omine fastigii, cui nullum esset aliud simile, remansit. Nam qui autumant Romanos Imperatores majestatem nominis Regii non satis intellexisse, quod alio potius quam hoc dici maluerint, illi nec prudentiam ejus consilii ex historia meminisse, nec sanctitatem nominis *Augusti* satis reputare videntur: quod supra Regis titulum quodammodo ascendit, ex quo Deus Imperatorem & Augustum esse voluit Romanum Principem, i. e. ex quo fecit eum tot Regum dominum, tot Regnorum moderatorem. certe comprehendi sub ista appellatione *Regis* elogium, nimis quam manifestum est. Unde cum Græci *αὐτοκράτορ* suum, interdum *βασιλεύς* interpretarentur, non auxerunt virtutem tituli, sed sublimioris vocabuli eminentiam populari & ad captum faciliori nomine aliquatenus declararunt. Cujus rei considerationem paulo accuratiorem non admittit hæc pagina: quæ nihil aliud quam præfationem sibi proposuit super *exercitatione Academica oratoria*; qua REGNUM DAVIDIS, quatenus tam gravis argumenti tractatio in hanc ætatem & studiorum mediocritatem cadere potest, delineandum sibi sumserunt, egregii juvenes, & non unis hætenus speciminibus nostræ Academiæ noti probatique, PAULUS REICHARDUS, JOH. JACOBUS GAMBSIUS, JOH. ULRICUS FRIDIUS, *Argentoratenses*. Et primus quidem *Majestatem Regiam*, in Davide divinis quibusdam radiis explendescentem, venerabitur: Alter *Virtutis Regiæ* harmoniam concentumque in Davide celebrabit: Tertius *Fatorum Regiorum* observationem è regno Davidis meditabitur. Nimirum, quidquid in universa philosophia Regia vel illustre, vel subtile, vel memorabile occurrit, ex Sacris Scripturis Sanctissimorumq; Regum exemplis, ante omnia petendum est. Fulget equidem in omnium regum capitibus honor diadematis; aut, ut propius ad nostrum positum

positum loquamur, omnibus impressa est Regnis Regibusque quædam divinæ majestatis imago, & ille character amplitudinis, quæ Majestatem in imperiis repræsentat: sed in sanctis tamen, Deoque peculiariter electis ac dilectis Regibus, radio haud dubie districtiore micat, quicquid divini est in majestate. Jam virtus, ut vere Regia sit ac dici possit, non assimulata specie æstimanda, quod Politicorum profanissimi nec nostra quidem ætate erubuerunt tradere; neque etiam solo naturæ magisterio informanda est, quod Gentilibus olim placuit: sed divinæ legis norma requiritur, ut ad honesti mensuram exacta & regis animo fortunæque digna procedat actio. Denique factorum Regiorum casus & exempla, non deesse quidem possunt in ullis Regis historia: sed in sanctorum Regum imperiis, divinæ occupatio providentiæ, ut in theatro interiore, penitus potest introspecti, eoque condisci plenius. Sicut è Davidis regno luculentissimis apparet speciminibus: quem Deus & summis regiisque virtutibus ornavit; & domi forisque veneratione majestatis præmunivit; & fatis ingentibus, arduisque per utramque fortunam casibus vicibusque exercuit. Quæ si cui placet, *die Jovis proximo, i. e. 1. Augusti, hora VIII, matutina*, ex ipsis publice dicturis adolescentibus loco consueto audire, eum præter hoc qualecunque à me factum indicium, & industria Juventutis patriæ, & merita Parentum, & ipsa officii cujusvis, quod in præclarissima studia redundat, honestas invitare potest. Vale, Lector Benevole, & nos ama. Argentorati, xxx. Julii, clō Idc xlv.

## XVI.

**M**ajestatem Regum Principumque, nulla fuit ætas, quæ non sacrosanctam cuperet aut faceret. Hinc præter obsequia devoti cultus, *sacrata Majestatis leges, & districta Majestatis judicia*; passim observantur. Quanquam, si de formula legum ejuscemodi ac judiciorum disquiramus, nihil fatis liquidum, fatis plenum, etiam in nobilissimarum gentium disciplina, licuerit reperire, nisi quod historia & rerum memoriæ, exemplis interpretantur ac sup-  
plent



plent pauca legum, quæ vetustatis injuriam evasere fragmenta. Illud interim satis constat, quæstionem Majestatis in Principatu seu imperio singulari (nam libertas certis formulis legumque præscriptis tenacius gaudet) non tam regulis fori submissam, quam præsentiore Principatus arbitrio definitam, & plerumque ex usu status imperatorii, intimisque imperii & aulae arcanis dispensatam esse. videbatur nimirum ad conditionem imperandi pertinere, ne Majestas præsidia suæ tutelæ ac instrumenta, aliunde quam ex se & suo auspicio expediret. Unde etiam, quæ super tali argumento Principum rescripta & constitutiones extant, cum interioribus regni consiliis ita cohærent, ut sine illis nec intelligi, nec ad usus publicos rite possint transferri. Quomodo peritissimus artium regiarum auctor Augustus, ejusque exemplo, longo post tempore, Arcadius & Honorius, *Majestatis legem* interpretatione nova ampliarent, *criminaque majestatis plastica* commenti sint, nemini obscurum est. Nec alio sunt vel jure usi vel consilio, quicumque Principum, suis reservatam addictamque arbitriis hujus causæ interpretationem & tractationem voluerunt. nisi quod diversa tractandi ratio, ex diversitate status imperii ac imperantium, invaluisse animadvertitur. Non jam dicam de more tyrannidis, quæ & vim & indolem & finem legum majestatis pervertit, indeque nescio quod instrumentum iniquæ acerbæque dominationis concinnat: ut majestatis crimen per miras artes fiat eorum crimen qui crimine vacant, sicut subtilis Panegyristæ sententia summum indicat, & Tacitus in *Principatu Tiberiano*, magno exemplorum numero interpretatur ac demonstrat. In ipso Principatu non-tyrannico, discrimen in hoc genere causarum non leve deprehendas. Sicut enim ad gubernandas imperii utilitates non unum adferunt ingenium, aut eandem morum consuetudinem, sive Principes sive Principum adjuutores: ita nec Majestatis crimen una omnes via aggrediuntur, aut una judicant sententia. *Quidam enim*, generosas & magnitudine Principalis fastigii animique dignas

d d d

curas,

curas, pro consiliorum norma amplexi, ut alibi, ita hic, omnia malunt *ex cauta moderationis gravitate*, tanquam ex fonte derivare; perennemque potius regni firmitatem, quam præsentaneam assertionem speculantes, non dubitant, magnitudine animi nihil Principi vel ad gloriam vel ad munimentum honestius esse; nec ullum prospere diuque imperaturo verius consilium dari posse, quam ut status sui præsidia in animis civium, in visceribus, ut sic loquar, civitatis reponat: aulam periculose à republica in hoc negotio scjungi; gravitate judiciorum plus profici ad famam & potentiam, quam severitate vindictæ: plus in auspicio regalis fastigii esse, quam in gladio: præsertim autem in divinæ cura providentiæ, quæ reges amat unice tuerique, summam spei pariter atque consilii statui debere. *Altos* autem animosior pro incolumitate Principum sollicitudo, aut usus aularum interior, *in districta præsentioris imperii judicia & severitatem vi Principatus*, ut autumant, dignam rapit: atque hi Majestatis regię auspicia, sanctitatem, vim, magnificentissimis elogiis deprædicant; in eaque omnem publicæ salutis tutelam collocant: rem tam divinam, inquit, tam sanctam, adeoque tam teneram, ne attaminari quidem citra reipubl. periculum posse; pertinere ad securitatem omnium, quæ usquam sint, regnorum, ne ullibi regum quisquam impune violetur: ex indole delicti nullum hic clementiæ, nullum veniæ locum esse; nullam emendationis spem in eo superesse, qui tantum semel furorem admisit; ita plurimis noceri, dum paucis parcitur: dissolvi vim Principatus, nisi vincula, quibus continetur, ex quavis occasione arctius adstringantur; præsidia regnorum non permitti fortunæ incertis, sed præsentissima manu constitui oportere. Ex hujus philosophiæ sinu, etiam ea emergunt, quæ ad peculiare hujus argumenti quæstiones pertinent. Ita, *cum de facto dubitatur*, conjecturis animosius uti, quam priscae gravitatis genius pariebatur, inter artes, an & obsequia, aulæ est. Sed & *ubi definitio hujus criminis quaritur*, non parci sunt aut timidi interpretes, quicunque

acrioribus Principatus consiliis insuere. Quod in culpa silentii, crebro hic occurrente, observare licet: quæ cum sæpe diversam æstimationem ex personis causisque recipere videatur, plerumque tamen uno suppressionis titulo damnatur: sicut in causa Philotæ, apud Curtium, talia pleræque notabili expositione declarantur. Hujus exempli mentionem de industria quæsi, quippe qui semper arbitratus, & studiosæ Juventuti testatus sim, illustriorem hujus argumenti de causa Majestatis tractationem in antiquitate tota non reperiri. ita enim describit Historicus causam Philotæ & Parmenionis, quæque connexa sunt ejusdem generis alia, ut cum sensibus aulicorum & Principis, quos exponit, prudentia certare videatur. Casus Parmenionis, qui indicta causa, immisso percussore sublatus est, scorsum multam considerationem mereri & capere videtur: neque frustra inter Prudentes dubitatum est, an merito majestatis crimine conciderit. Nam eruditissimum Clapmarium nolim sane hic sequi; cum tanquam de fonte, & justa supplicia passo pronuntiat. Quem non potius moneat gravissima Curtii ratio? qui expositis Parmenionis laudibus dotibusque subjungit: *Hæc impulerint illum ad regni cupiditatem, an tantum suspectum fecerint, ambigi potest. quia Philotas ultimis cruciatibus victus verane dixerit, quæ facta probari non poterant; an falsis tormentorum petierit finem, re quoque recenti, cum magis posset liquere, dubitatum est.* Quid pro Alexandro in speciem possit adferri, satis video: sed cur in causa tam perplexa, de plano judicari, aut à cordato veterum judicio discedi debeat, nondum discerno. Denique si modestissime agendum sit (quod ego quidem, summarum potestatum reverentia, libentius probem) causa Parmenionis inter eas nominanda est, de quibus merito vetus illud obtineat: **NON LIQUET.** Interim, quia totum Majestatis argumentum sub hoc titulo considerari potest, non debuit mihi displicere, duorum è Commilitonibus nostris eximiorum Juvenum, laudabile in eligenda exercitationis oratoricæ materia propositum: è quibus

d d d 2

CON-

CONRADUS BARTHIUS, *Fürstenvverdenſis Marchicus*, quasi ex persona districtioris & consilia dominationis regiae professi aulici, ea summam tractabit, quae supplicium tam repentinum Parmenioni indicta causa instigendum suadere ac defendere videantur: alter CHRISTOPHORUS KERSTENIUS, *Regiomontanus Borussus*, moderatioris in crimine majestatis tractando prudentiae studium induet, ostendetque, quid dissuadere Parmenionis supplicium potuerit debueritve. quae pars praesertim in historia Cartiana deest. quippe, sicut in causa Philotæ, Craterum, Hephæstionem, Cœnum, severitatis consilia sub formula fidei in regem ac pietatis amplexos, ceteri facile secuti sunt: ita nec pro Parmenione, quicumquam ausus est regem interpellare; ne parum obsequii aulici gnarus aut regiae salutis studiosus haberetur. Delegerunt, ut cœpi dicere, Juvenes Præstantissimi hoc argumentum vere πολιτικός, dum singulari studio, ut in aliis auctoribus, ita in Q. CURTIO hætenus versantur; indeque ad vitam civilem quaecunque possunt præsidia sibi ac instrumenta, raro diligentiae exemplo, comparant. Meretur enim tot experimentis mihi cognita virtus in publico commendari; ne vel præclare factis præmia, vel honestæ æmulationi invitamenta videri possimus denegasse. Et BARTHIUS quidem, cum post illustrium aliquot Gymnasiorum disciplinam, Ioclytæ Regiomontanæ Academiæ sua studia commisisset, ibique triennium moratus esset, perlustratis aliquot in Dania, Belgio & Germania Academiis, ad nos concessit: totoque, quo nobiscum fuit tempore, seriæ pietati, virtuti, honestissimisque studiis eam dedit operam, quam necesse est illos dare, qui Patriæ ac Principibus suis indolem, profectum, & omnia sua proposita cupiunt dicare. Non sum alias prodigus elogiorum, neque Prudentis duco, figuris in hoc genere indulgere: sed merita hominum, partim convictu, partim quotidiano studiorum usu æstimatorum, debito fraudare testimonio, parum ab insolentia abfuerit. Id quod ad KERSTENIUM quoque pertinere volo, quem Barthio ex Regiomontana Academia discedenti

for-

fortuna itineris comitem, & hæcenus, studiorum socium junxit. approbavit is nobis insignem morum modestiam, bonæque ac piæ mentis rectitudinem, cum eleganti ac decora judicii sollertia; quæ magnam præclare sperandi materiem peritis ingeniorum æstimatoribus suppeditare potest. De studiis ipsorum, tum ad elegantiam, tum ad Prudentiam civilem spectantibus, ipsa res, & nunc, & pluribus deinceps speciminibus loquetur. Illud unum, in fine hujus paginæ rogaverim, ut tam pulcris exemplis instigati juvenes studiosi, scribendi laborem, certissimos olim fructus allaturum, subterfugere nolint amplius aut negligere. Quibus commodum erit (nam id superest, quod adjiciam) *die perendini, sive mensis hujus XVII, hora VIII. matutina*, publicantes sua studia Præstantissimos juvenes audire, illos à nobis, quæcunque in nostras vires poterunt competere, gratias jubemus expectare. De æquitate judicii huc adferenda nolumus dubitare: & jam aliquoties professi sumus, satius nobis videri, si scriptioni Juventutis plufcula condonentur minus elimata, quam si rigidioribus censuris ætati vis aliqua, ut sic dicam, inferatur. Scrib. ARGENTORATI, XVI. Decembr. c1513c XLIV.

## XVII.

Qui magnis Principibus suam in aula operam dicarunt, consiliisque præsertim, & interioribus curis adhibentur, illustri sane nomine ac munere præfulgent, sed periculis expositi sunt & pluribus fere & majoribus, quam qui extra speciosos aulæ titulos, suam dignitatem ratione vivendi ad privatam sortem propius accedente tumentur. Persuasit ea res nonnullis veterum, ut viro Sapienti subterfugiendam prorsus aulicæ vitæ consuetudinem existimarent. Sed moderatius philosophantes non potuit latere boni civis officium: cujus est, quæcunque Deus in civili societate stationem assignaverit, pro viribus obire, atque aspera omnia vel pervadere vel sustinere. Itaque, sicut non satis perite cauteque cogitaverit, qui certam sibi ac stabilem in aula perennandi fortunam polliceatur: ita suffecerit forte,

si quis animum adferat propitiandi melioris fati nec ignarum nec securum, de cetero autem, adversum casus metusque diversæ fortis providum ac paratum. Cum præsertim non parum sit in consiliis humanis: quæ genium aulæ, non plane intractabilem, si commode aggrediaris, fato favente, conciliant; aut fato sinisteritatem aulici moris pravitatemque puniente, alienant. Certe maxima quæque præcipitata ad extremum aulicæ fortunæ exempla, ipsorum culpam aulicorum, & accelerandi tentamenta fati ostentant. Nisi quod humanæ notitiæ multoties subducta causarum series, præter conjecturas post eventum, nihil relinquit. Inter eas eximia mihi semper visa est, si cum debita in providentiam Dei pietate, & modesta in hominum existimationem æquanimirate conjungatur: *quod magnos aliquando aulicos inopinata, atque, ut ex proximo casuum contextu apparet, immerita opprimat ruina, ideo; quia Deus alia peccata, que in aulica vita, tot irritamentis delinquendi undique obsepti, committuntur, tali occasione constituit vindicare.* Verum, ut cœpi dicere, hæc sapientia secretior est, quam ut cujusvis ingenio gubernari possit. Revertendum nobis est ad dotes ingenii & artes animi, quæ aulicæ vitæ fortunæque conveniunt aut disconveniunt de quibus optima nos magistra erudire Historia potest; cumprimis Alexandri Macedonis; ne ab instituto longius nunc digrediamur. Quippe in magna aula, sub magno rege, inter tot magnos viros, magna deesse in utramque partem exempla nequeunt. Qui in præcipua & flagrante regis gratia ad vitæ ultimum perseveravit incolumi dignitate famaue, *Hephestion* prima nobis sui documenta præbeat. In quo, instar omnium elogiorum, OBSEQUII artem & gloriam, nominabimus. Hanc, natura regis regnique amans suggestit, prudentia formavit, elegantia excoluit, industria illustravit: hæc regis ingenio consentanea, fortunæ decora, aulæ utilis, familiaritatem observantia temperavit, libertatem modestia condivit; merita, extenuatione velavit; adornata invitamentis gratiæ, remota à blanditiis adulantium, invidiæ non

non capax, gloriæ non appetens. Ea propter vir parendi scientissimus, venerationis juxta & charitatis regi debitæ artibus instructus, quidquid in amicum summi Principis cadere potest honorum amorumque meruit : *εισαλαβαντες* etiam nobilissimo cognomine dictus, amator nimirum *Alexandri*, amare doctus & amari dignus. Quæ obsequia, id est, propriam aulæ sapientiam, si quis penitus introspicere cupiat, illi scrutanda erunt sacra regnorum, mysteria auspicio- rum, arcana majestatis in altissimo secreto reposita; nec iis semper intellecta, quorum hæc propria schola fuit. Statim enim hic se *Clytus* offert ex aula *Alexandri*, parvis dignitatis, sed disparis gratiæ fortunæque homo : qui dum neglecta obsequii aulici religione, CONTUMACIÆ potius suspectum se, & mox reum facit, à rege minus aestimatur primo, deinde odio, ad extremum exitio multatur. Non deerant huic viro, quæcunque magnum possunt & illustre nomen parare. eximiae virtutes, gloria militaris, merita in regem regnumque : sed dum nimium sibi suorum decorum conscius est, dum regem non minus sibi quam se regi obligatum autumat, dum gradu officioque amici securius & intemperantius utitur, suam ipse fortunam corrumpit, incrementemque dominationis superbiam in apertæ tyrannidis furores provocat : miserandus ille quidem, quia sub opinione generosioris constantiæ impegit ; Sed non laudandus, quod contumaciam à libertate non distinxit, neque hanc obsequio temperavit. Sed quis satis cavere sua pericula potest in aula ? Dabo tibi ingentem merito, spectatum obsequio virum, nullaque aulica arte aut gloria maximis minorem. Is jam ad septuaginta ætatis annos felicitatis suæ incrementa provexerat, cum jamjam ex æquore illo exscensurus naufragium in portu facit. *Parnionem* signari, etiam demto nomine, omnes intelligunt. Cujus casus cum nuper in disquisitionem venerit, nunc alio nomine denuo attingendus fuit. Quia enim in trigam illam magnorum aulicorum, omnia aulæ fata & merita videntur competere, non absurde & sibi argumentum dispe- xerunt,

xerunt, de quo in publico verba facerent, tres Generosi florentissimique Juvenes, è quibus CAROLUS ROELER a Dirſperg/ & ACHATIUS à LAYMING, indyti generis nobilitatem & majorum merita eximio utiſſimorum ſtudioꝝ morumque proſectu, pro ea, quæ utrique contingit, ingenii felicitate, valde ſatagunt hætenus illuſtrare, & ad illud decus graſſari, quo nunc quidem inter Academicæ Juventutis præcipua ornamenta eniteſcunt, deinceps autem in inſtaurata, quod optamus, Germania publicis meritis præfulgebunt. His ſuam conjunxit diligentiam CAROLUS SCHMIDIUS, Argentoratensis; qui ut præclaram Honoratiſſimorum Parentum Patriæque ſpem, ex ſauſta indole ipſius & vigore conceptam, impleat, auſpicatis omnibus votisque proſequi tam pulcre in deſtinata contendentem, fas eſt. Illi, cum hætenus quotidiano præne commercio ſua mihi propoſita & incrementa approbaſſent, poſt tot privata ſpecimina, in publicam quoque lucem evocandi videbantur: ſuppeditavitque ultro materiem, quam diximus, politiſſimus aulicæ eloquentiæ prudentiæque magiſter, Q. Curtius; è cujus Historia, *Primus* quidem HEPHÆSTIONEM OBSEQUIOSUM, *Secundus* CLYTUM CONTUMACEM, *Tertius* PARMENIONEM PRÆPOTENTEM meditandum deſcribendumque ſuſceperunt. *Illi*, obſequii aulici genera, conſilia, artes, fruſtusque annotabuntur: *iſtic*, contumaciæ diſcrimina, propoſita, colores, peccata, & damna exponentur: *hic*, præpotentis in aula ſaſtigii pericula, cum periculorum cauſſis, obſervabuntur, uſusque argumenti totius breviter commendabitur. Qui ſuccreſcentibus in ſpem ſæculi atque effloreſcentibus eximie ingeniiſ, publico nomine favere didicerunt: non illibenter ſuis hanc induſtriam ſuffragiis ornabunt, & quatenus cuique commodum eſt, auſcultatione dignabuntur. Dies exercitationi dictus eſt, *Jovis proximus; menſis hujus ſextusdecimus; hora VIII. matutina.* Quod ſuper eſt, Deum Ter Opt. Max. hujus, quem inchoavimus, anni prælidem rectoremque, voce publica obteſta-



testamur, ut Argentoratensis Civitatis Academiæque fata, tempora, ac fortunas benigne in perpetuum moderetur, tueaturque. Perscriptum Argentorati, Anno Christiano cdo lbc xlv. d. Jan. xiv.

## XVIII.

**R**ecitabunt die hujus mensis penultimo, loco ac tempore in Academia nostra usitato, *comparationem Alexandri Macedonis & Julii Caesaris*, duo egregie morati ac eruditi Juvenes, JACOBUS PELTRE & JOANNES DINGUENHEYM, *Metenses*. Argumentum ab ipsis sponte electum, & pro ingenii captu non infeliciter tractatum, non debui rejicere: cum præter exempla antiquitatis, & summi scriptoris *Plutarchi* (qui illos ipsos Principes inter se comparavit) etiam peculiaris utilitas, in excitandis Juvenum, qui exercentur, ingeniis, id genus disciplinæ commendet. Quippe, dum respicere se invicem omnia debent, adeoque non plane eodem modo, quanquam eadem, ad personas referri amant; virtutum naturam morumque perquiri diligentius, & à communibus locis ad distinctiora, vitæque ac sapientiæ studio propiora sermonem flecti necesse est. Accedit, quod nihil satis jucunde sine comparatione vel laudatur, vel vituperatur, itaque nec illos, qui simplicia instituunt elogia, conferendi studio videas abstinere. Ne dicam de ipsius argumenti gravitate; quod in suis penetralibus non pauca eximia recondit. Quanquam, ne quid dissimulem, ætati ac industriæ nostrorum, quos nominavimus, commilitonum suffecerit, notiora & magis in obvio posita morum factorumque in utramque partem momenta perstringere, nam quæ fato publico & humani orbis fortunæ interius sunt innexa, majorem dicendi judicandique facultatem desiderant. Destinaverat utrumque Principem Deus, mutandis & in novum reipublicæ statum reformandis gentium populorumque fortunis; decreverat Alexandro Græcæ, Julio Romanæ instaurationem monarchiæ; dederat utrique, quæ plurimis ante & retro sæculis nemini dedit; singularem

c c c

utrique

utrique indolem concesserat, propriam utrique fortunam adjunxerat : sed, quod malis artibus tot bona cælitus indulta temeraverant, alterum iu flore ætatis, alterum in confinio consummati operis, ex fati publici theatro submovit. Uterque admiratione hostium celebratus, odio suorum depressus est : uterque ambiguum sui æstimationem posteris reliquit : uterque suo obitu improspere terris tempora sive peperit sive præfagiit. Neque cetera minus congruunt. Sicut enim sub Alexandro & ejus patre Philippo, omnis literarum armorumque gloria Græciam late illustravit ; ita sub Cæsare & Augusto Romana majestas, & studiis ornatissima, & incitatissima armis fuit. Imo, sicut Alexander suæ doctrinæ virtutisque exemplo præcipuum ad colendam sapientiam momentum contulit : ita Julius Romanus disciplinarum liberalium & rei militaris gloriam suo auspicio, potentissimus scilicet auctor, ad summa provexit fastigia. Addam, quod pauciores observarunt. Alexandri ingenio & fortunæ, omnis regiarum artium sollertia, omnis aulicæ disciplinæ subtilitas, & erudita secretaque majestatis regię observantia debetur : plane sicut Julii Cæsaris invento in rem Romanam inducta sunt arcana dominationis & consilia regni, quæ Augustus postea consummavit ac perfecit. Hæc atque talia Prudentioribus expendenda relinquimus : & ad declamatores nostros revertimur. qui felicitate indolis, & diligentia studiorum mereri videntur, ne in auscultando difficiles se præbeant elegantis literaturæ fautores ; quibus invicem prompta voluntatis nostræ studia ex occasione pro viribus testari non omitteremus. Juventutem vero Studiosam amice admonemus, ne ad noxios publice errores, quasi ulla doctrinarum atque scientiarum studia, absque omni solida bonorum auctorum tractatione, feliciter suscipi queant, revolvantur. Sunt in oculis vulnera Christianæ Reipublicæ & disciplinæ sæculi, à crudis ejusmodi ac jejunis studiis olim profecta : quibus omnes meliorem discendi rationem doceri poterant, certe debebant. Quod si Deus benignissimo tandem munere

nere afflictæ Patriæ quietem indulserit ac pacem, num per semidoctos aut rudes, prolapsæ passim scholæ instaurari, aut pacati instrumenta sæculi recuperari posse autumabimus? Cogitet quisque status sui & officii (est enim munus ac officium studiosi & grave & laboriosum) regulas, vincula, jura: veneretur Dei ab unoquoque studiorum rationem repetituri majestatem: honoret majorum auctoritatem, & gravissimorum Principum ac Magistratuum sapientiam; qui longe diversam, à perfunctoria ista & divellegdis imo corrumpendis studiis nata multorum consuetudine, industriæ Academicæ formam præscripserunt. Hæc vera sunt & publica bonæ mentis præcepta: quæ qui neglexerit, sero suum dedecus deplorabit. Sed malo meliora sperare, quam triste quidquam in præsens ominari. Per scriptum Argentorati xxviii. Januarii clō Ibc xlv.

## XIX.

**D**ile perendini, qui erit mensis hujus tertiusdecimus, hora VIII. matutina, in auditorio sollenni orationem habebit Nobilissimus Juvenis WOLFGANGUS OFFMÜLLNERUS à MÜLFELD; qui post Gallicam peregrinationem sua studia huic Academiæ, ante complusculos menses, polienda commisit. Quod propositum hætenus tam strenue & feliciter tenuit, ut, festinante ad egregia omnia profectu, non dubitaverim ipsi auctor esse publicandi aliquid de suis laboribus; quorum mihi assiduâ specimina approbaverat. Et quoniam in argumento militari forte versabamur, placuit instituere *comparationem* VETERIS ET NOVÆ MILITÆ. Sic enim mea fert ratio, ut, dum stilum Juventuti commendamus, non minus de utilitate argumenti interim cogitemus. Quotusquisque autem serius studiorum ac temporis æstimator, in scribendo, in ediscendo, aliquid operæ sibi ponendum arbitrabitur, si in usu ea non sit habiturus, quibus calamus aut memoriam fatigavit? Patet hæc disquisitio per amplissimum civilis prudentiæ spatium: &, si dicendum, quod res est, alteram ejus partem constituit, Iccirco utile videbatur talibus studiis intento, noscere præ-

cipuos scriptores, requirere judicia prudentum, revolvere historiam, & inter meditationes scholæ, providere pedum viam, quæ circa hanc materiam per omnis vitæ cursum deinde terenda esset. Quare nec displicuit conatus optimi Juvenis, quotiens ipsa summorum virorum verba suæ dissertationi intexuit, & illorum aliquando maluit ore, quam suo loqui. Præterquam enim, quod exemplis sæculi satis se tueri potest ea res; etiam pars consilii videri debet, si adolescentem juvenilis ætatis industriam, hac indulgentia invitemus, ut penetralia sapientiæ minus timide ingreditur, haustamque ex ipsis præcipuè fontibus rerum & sermonis salubritatem, hoc adjumento in suum sibi succum & sanguinem convertere paulatim condiscat. Equidem si unquam, in hoc certe genere (cum *M. Seneca in præmio libri X. controversiarum*) multa donanda ingenium puto; nec sum ex judicibus severissimis, qui omnia ad exactam regulam redigam. Præsertim si recorder infaustum publiceque noxium morem, cum è florilegiis, quæ vocant, consuere verius quam conscribere orationes misera juvenus passim jubetur, absque peritiis rerum, absque notitia auctorum, absque dilectu sententiarum. Et quandoquidem eleganter de rebus differere, non eloquentiam modo insignem, sed eruditionem quoque singularem postulat, itaque juventuti omnino aliquid concedendum est, quo tanquam cortice natare discat. Id quod ista, quam reprehendi, ratione non periculose modo sed inepte fieri; illo autem, quem paulo ante laudavi, modo, rectissime, confici, doctissimus quisque per se intelligit. Erunt forte, qui orationem de militia parum huic tempori convenire putabunt, quo circa deponenda arma, reducendamque Christiani orbis pacem, omnium cogitationes, vota, sermones occupantur. Absit equidem, ut desideria nostra à publicis unquam sejungamus: aut de pace parum diligenter ac pie cogitemus, cujus alumna & comes esse amat sapientia, cui studemus; & eloquentia, quam inter bellorum strepitum surdis pæne auribus commendamus. Versamur nunc in expectatione, & spe, & precibus:

tribus: quas subinde, ut sunt teneri quidpiam valde cupientium affectus, ex transverso aliquis metus interpellat; & pietatem nostram modesto silentio attemperat. Dabimus interim hoc divini Numinis reverentiæ ac honori summorum capitum, ut malimus ipsis solidos gaudii fructus, quam præceptos atque præflosatos in acceptis ferre. Quod si novi & melioris sæculi aurora, ex montibus objectarum difficultatum se emerferit, totius pietatis ac lætitiæ vires in gratulationes, laudes, vota, grates excitabimus. neque sic tamen de bello cogitare prorsus desinemus. Illa ipsa pietas, cujus auspicio in veneranda pace utemur, jubebit nos respicere, & divina in his bellis opera, quorum conspectum hætenus interdum pulveræ ac sulfureæ nubes, & ingruentium undique terrorum consternationes quodammodo præpedire videbantur, attentius contemplari. Erit, cum ex ruinis belli, disciplinam pacis meditabimur: erit, cum è cladibus belli, bellorum usum purgatiore affectu reputabimus. Surgent è ruderibus vastatæ patriæ fulcimenta tuendi status: & ut vincere discamus eos, adversum quos Deus & jus humani orbis arma nobis tradidere, nihil aliud magis præstabit, quam si spectemus arma civili cruore & domesticis cladibus purpurata. Eluenda videbitur ex fama rerum isthæc macula; & ne unquam nostris armis in posterum nosmet oppugnemus, nova militiæ disciplina resurgenda, vera bellorum gravitas condiscenda, prisca Christianorum armorum auctoritas revocanda erit. Adeo scilicet non intempestivum est, de militia agitare in pace, cum pacis una sit custodia, armorum meditatio. Et, quandoquidem proximus suo fini orbis, nihil minus, quam omnium inter se gentium quietem pacemque perpetuam promittit, illud unice providendum est, ne inter illos bella gerantur, quorum societas, sub uno pacis Principe, per sanctissima pacis & concordie vincula constringitur. Recordor nunc non præfagam minus quam piam Alexandri Bulgarorum Principis ab Andronico Imperatore pacem petentis vocem: *indignum esse Christianis, favire adversum se invicem*

armis, cum, pace constituta, bellorum vires in impios & communes hostes expediri rectius possent ac deberent. Pœnituit Andronicum, precantis consilium rejecisse: & futurum erat ut pœniteret amplius, si maluisset deinde victor Alexander iræ suæ potius, quam bonitati obsequi; sicut ex Nicephoro Gregora uberius licet cognoscere. Quis nescit, Turcorum & barbarorum immanitatem jam olim, inter Christianorum discordiam & ignaviam, irrepsisse in amplissima terrarum orbis domicilia & adolevisse? Et quanquam tot sæculis jam coaluerit ea compages, dubium tamen non est, quin concordia & virtute Christianorum nullo non tempore sit trepidatura. Ac fortasse Deus Ecclesiæ & nominis sui honori illud gratificabitur, ut concussæ immanissimi hostis opes, præviis quodammodo cladibus, de imminente supremo illo casu (quem suo tempore immitteret ipse vindex suæ causæ Christus) graviter admoneantur. Sed nobis ad *Offmüllnerum* nostrum revertendum est: cujus industria & virtus meretur benignos auditores & judices, quos propterea nec operosis precibus conducere, nec argumentis conquisitis allicere, animus est. sua cuique virtus pro stimulo est, ut in altero amet, quod ipse sequitur. Illud unum adjecerim, non immemores nos fore officii, quod nobis præstabitur. Deus faveat præstantissimi Juvenis profectibus, & *Magnifico Nobilissimoque Parenti*, novam subinde ex filiis gaudendi materiem gratificetur. Vale, Lector Benivole. Perscriptum Argentorati d. xi. mens. Novembr. clō Idc XLV.

## XX.

**S**onat adhuc in auribus nostris, & vivit perpetua meditatione in pectoribus, quam proximis diebus anniversaria Ecclesiæ pietas recoluit, vox Angeli annuntiantis gaudium magnum, & cælestis exercitus collaudantis auctorem tanti gaudii; quantum vel efficere, vel donare non est nisi ejus, qui solus magnus, solus potens, solus clemens, solus sanctus, solus Deus, solus est Servator, solus Dominus. Vidimus admirabile germen ex arida radice Jesse subito exortum,

tum, vidimus Dominum è cælo humanos artus gerentem, vidimus gloriam unigeniti Dei; eundemque filium hominis, primogenitum & unigenitum virginis complexi sumus. Juvabat nos apud greges in agro Bethlehemitico splendore Domini circumfundi, excipere nuntii cælestis verba, auscultare hymnos in terris, in tempore, quales apud thronum agni in beata æternitate canuntur. Festinavimus cum piis pastoribus ad præsepe, omnibus thoris, omnibus palatiis augustius, & infantis Domini fascias tractavimus, frontem exosculati sumus, ex oculis ejus spiritum alacritatis & pietatis hausimus. Nec satiari potuimus, quin eandem viam cum Magis redordiremur; & coram Immanuele nostro in genua provoluti, nos totos victimam Deo, donum Regi, pignus Fratri dicaremus. Hæc nos adhuc tenet pietas (quid enim est ex ceteris, quod non hic repetatur?) donec paulo post cum infante & matre ad puerperii expleti solennia festinante Hierosolymam ascendamus, ibique cum Simeone in familiares amplexus effusi ulnis nostris cingamus, recipiamus pectoribus: quem non cælum, non terra, non totus orbis capit. Quædam & anticipavimus ex adultiori ætate, securi de ordine: qui unus est in tota Christi vita, ut omnia meditemur, ut ex omnibus quæcunque libet meditemur, dum modo pie meditemur. Sed ad Magos redeundum est. quos ex Persia (nec enim Arabes fuisse credimus) ad nativitatis tantæ miracula singularis quædam stella excivit. Stella nunquam visa: stella vera; quia non inanem imaginem aut vanam speciem gerit: stella nova; quia nec numero nec censu reliquarum comprehenditur: stella mira, quia cursus sui conspectusque, nec spatium unum nec tempus idem servat: stella regia, quia regem natum demonstravit: stella divina, quia divinis honoribus colendum, qui natus erat, significavit. *Vidisse enim se stellam nati regis Judæorum, & venisse, ut adorarent eum, citra omnem mentis hæitationem ultro Magi profitentur. Quæ vobis oculorum acies, ô viri eximii, qui tubus, quæ conspiciant, tam abstrusa hujus stellæ mysteria detexerunt? Sa-*  

pien-

pientes vos fuisse, & multis præclaris supra vulgus doctrinis eruditos, ipsum nomen, quo vos Evangelista, non utique contumeliæ causa, denotat, argumento est. Sed quæ vos sapientia doceret, quod nullis sapientum disciplinis continetur, nullæ eruditorum investigatione eruitur, ac ne humano quidem captu definitur? Solenne vestris populis fuit, vultus in cælum erigere, speculari sidera, observare stellarum naturam, quærere vires, mirari, sed & adorare, præstantiam. At vero ista vos eruditio, quam inquinavit impietas, non adoratores fecisset hujus regis, quem quæritis, sed contemptores. Igitur longe alia visio fuit, quam quæ oculis absolvitur; nec tam naturæ lumen quam gratiæ in penetralia animorum se immisit. Quod stellam vidistis, naturæ est: quod regis stellam vidistis, divinæ gratiæ est: cujus lumen forte & ante stellam, certe cum stella in mentibus vestris accendit is, qui stellam accendit, qui se signari, se quæri voluit: sive Danielis oracula in eam rem, sive aliud genus divinæ revelationis vobis adjumento fuit. Hac luce illustratis non fides ad credendum, non industria ad inquirendum, non constantia ad perseverandum deesse potuit. Quid enim? perturbatur ad mentionem nati regis Herodes; contremiscunt Hierosolyma: Magi perstant in proposito, quærunt, auscultant, & ab incredulis doctoribus discunt credere, Bethlehemam esse destinatam, quæ nascituro regi Judæorum incanabula præberet. huc viam intendunt, huc pertendunt iter, huc fulgore stellæ rursus semet ostentantis deducuntur. Quid dulcius hac Dei bonitate, quid pulcrius hoc bonitatis spectaculo? Fax illa, quæ primum ex alto visa longinquos fines illuminavit; quæ motu suo (quid enim vetat credere?) itineris cursum demonstravit; quæ aliquantis per se subduxit, ut rediret suavior; nunc & ipsa propior Magis, propior Domino esse, cui lucet, quem signat, denique tanquam apud terminum sui muneris cupit conquestere; descendit, ut fulgeat lætius; consistit, ut ipsam domum designet radiis, demonstret indicio. Quid mirum ergo gavilos



vifos effe Magos gaudium illud magnum, quod Angelus paftoribus prædixerat, quod Deus ab æterno piorum animis deftinaverat, quod nati regis Judæorum fuavitas imprefferat? Meditare fecreta hujus gaudii, & liquefce animo, folvere affectu, exulta fpiritu: mifce lacrymas, infere fufpiria, procide in genua, & cum Magis Regem Tuum, Deum Tuum, Fratrem Tuum, qui nunc hofpes apud te effe vult, ut in patriam te reftituat, venerare. Sed quo feror? non poteft abyffus maximorum myfteriorum & miraculorum noftra cogitatione exhauriri, oratione explicari, nedum hujus paginæ anguftiis comprehendendi. Illud tantum volui dicere, quosdam ex juventute bonarum artium ftudiofa eximios commilitones, occafionem & exemplum publicæ pietatis fecutos, die perendini hora VIII. matutina de jucundiffima Magorum hiftoria, loco rituque Academico verba fafturos effe: ita partitis operis, ut *Primus* JOH. FRIDERICUS HEILBRÜNNERUS, *Ulmenfis*, de *Adventu Magorum*; ALBERTUS DEUBEL & JOH. GEORGIUS ARTOPOEUS, *Argentoratenses*; ille de *Inquifitione*, hic de *Adoratione Magorum* foluta oratione constituerint dicere. *Quartus* JOH. JACOBUS PANTRION & *Quintus* JOH. CHRISTOPHORUS ARTOPOEUS *eadem Argentoratenses*, ligato fermone, alter quidem *ſummatim percurreret*, alter ad *Academica vita inſtitutum totam accommodabit hiftoriam*. Quibus licuerit aut libuerit auſcultare recitantes ornatiffimos, quos dixi, juvenes, illi præter foliti in bonas literas favoris gratiam, etiam pietatis documentum poterunt edere, ſi de ſummis Chriftianæ religionis myfteriis balbutientem urcunque ætatis nec dum firmatæ linguam non dedignabuntur. Nam in ſtulo, me multa conditioni & captui declamantium indulgere, nec unas ob cauſas, jam aliquoties profeſſus ſum: ut nova excuſatione opus eſſe non videatur. Deus in Academia noſtra Magorum exemplum & ſtudium in perpetuum conſervet! Perſcriptum Argentorati XXI. Jan. clō 1764. XLVI.

**C**onstituit *Generosus & Nobilissimus Juvenis* LUDOVICUS HENRICUS à WACHENHEIM, *die hujus mensis tertio & vigesimo sive Jovis proximo, hora VIII. maturina, in Auditorio Majore, orationem habere* DE RE NAVALI; delectis ex amplissimo argumento locis nobilioribus, quantum temporis ejusmodi exercitationibus Academicis destinati ratio feret. Repetita enim breviter origine rei nauticæ, & ostensis navigationum utilitatibus, summam rerum passim per orbem mari & navibus gestarum proponet, atque commenta quædam inventaque navalia attinget, aliaque nonnulla adjiciet, quæ auditu non injucunda fore confidimus. Est omninò navigatio inter utilissimas humano generi artes, & eximia sollertis ingenii inventa, suo jure referenda; quicquid olim visum sit iis, qui abusum rerum, sinistro philosophandi genere, adversus innumeras utilitates non verentur tanquam unicam æstimationis ac judicii legem opponere. Primæ navis architectus & auctor ipse Deus fuit, cum in arca Noachi reliquias humani generis è diluvio conservare statuisset. Facta post diluvium terrarum orbis divisione, Japetus ad occupandas, quæ ipsi obtigerant, regiones, utique navibus opus habuit, quibus vastum mare transliceret. Successit postea demigratio demigrationi: quarum antiquissimas nulla quidem lux historiæ illustrat, conjectura tamen satis firma ex propagatione nationum, & habitatione terrarum, non plane in obscuro latere sinit. Certe navigationibus plerumque quæsitæ sedes, & mutata domicilia, omni dubio caret. Quin etiam in ea quæstione, quam pro inextricabili hodie habent, de origine Americanarum gentium, verisimilior videtur eorum sententia, qui navibus eò deducunt primos incolas, sive id antiquissimis jam temporibus inter primas demigrationes factum sit, quod nonnullis placet; sive diffusis & vehementer auctis populis; sive itidem ab oriente via, sive ab occidente in Americam reperta. Quapropter inter eas rationes, quibus summi Creatoris providentia to-

tum orbem incolis voluit impleri, navigationem referre nihil dubitamus. Quamquam non defunt, ne hodie quidem, qui diversum statuunt. *Mare navigare* (inquit non-nemo è recentissimis scriptoribus) *magis ab audacia hominum natum est, quam ab instituto Dei, qui terram hominibus dedit, uti piscibus mare: licet nusquam ejus providentia absit.* Videant, qui ita sentiunt, quomodo hæc congruant cum dominio in pisces maris, quod Deus primo homini concessit; & cum rationibus aliis, quæ nec paucae nec invalidæ pro navigationibus ex sacro textu & historia judicioque sanctissimorum virorum repetuntur. Quantum lateret nobilissimorum Dei operum, nisi in maria navibus itum esset, ad investiganda quæ latebant, ad occupanda quæ vacabant? An frustra excitavit vox prophetica insulas maris, & omnes fines terræ, ad audiendum canticum novum, ad percipiendam vocem domini? Imò verò memorabuntur perpetua prædicatione naves illæ, quæ apostolos Dei sanctosque viros alios, in insularum terrarumque remota vexerunt, ne quis locus in orbe esset, in quem splendor orientis ex alto non penetraret. Quod si rem ipsam ex eventu & memoria gestorum æstimamus, certe altera totius mundanæ historiæ, & humanæ occupationis pars in mari quærenda est. Hic bella pro salute, aut de imperio gesta; hic conditæ novæ gentes, structæ moles, tractata commercia; hic non Ecclesia minus quam civilis Respublica suos fluctus, suos cursus, sua naufragia, suos portus habuit: hic reperta abunde, quibus vita hominum sustentari, juvari, ornari consuevit; hic Deus suorum operum varietates, & miracula copiosissimè explicavit. Pro quibus sane beneficiis fas erat, ut orbis maritimus gratum se Deo piumque præstaret, sequestrato omni navigationum abusu, piraticisque sceleribus & luxuriæ avaritiæque studio procul relegatis. At vero sicut optimæ cujusque rei maximus abusus est, ita vehementer tamen injurius in optimas artes esset, qui vitia hominum in ipsarum injuriam rerum converteret. Sed hæc hæc hactenus sufficiat præfationis loco posuisse: cum præfer-

tim juventutem Academicam suopte ingenio ab ejus generis erroribus alienam esse, satis persuasum habeamus. Erit, præter dignitatem argumenti, invitamentum non leve in *persona dicturi de hac materia*. Talem enim se hactenus præbuit *Generosus juvenis*, ut industria, & virtute, non prosapiæ modo suæ, sed nostræ quoque Academiæ, insigni ornameto esset. Cujus testimonii honore eo promptius lætiusque ipsum impertimus, quo minor talium exemplorum copia per calamitates sæculi suppetit. Quot decora Germanicæ nobilitatis integrasque familias absumpsit diutina bellorum sævitia? Nunc, dum omnes pacem suspirio, voto, spe anhelamus, nulla temporis convenientior cogitatio animos Generosæ Nobilitatis potest implere, quam si de instrumento pacis, id est, de bonis artibus & civili literarum cultu serio incipiant esse solliciti. Reposcet communis patriæ necessitas illustria veterum familiarum merita, & nisi in vobis, ô Generose flos juventutis, revixerit, quicquid est meritorum in Rempublicam, & gloriæ quæ ex studiis petitur, vereor ne facile inveniat & præsens ætas & posteritas, quod vobis possit exprobrari. Sed Deus servabit vobis mentem veræ laudis & virtutis semper studiosam ac memorem! Cujus voti fiduciam non sinunt talia exempla languescere, quale in nobilissimo *Wachenheimio* nostro commendavimus. Ad quem audiendum, ut tempore, quod supra signavimus, haud gravatim convenient, quibus præclara studia cordi sunt, officiose rogamus. Argentorati XXI. Aprilis clō Idc XLVI.

## XXII.

**D**Um ad eruditissimum *Plutarchi libellum de Musica*, pridem horis subsecivis ex iis quædam copiosius annoto, quæ in tali argumento Ptolemæus, Aristoxenus, Cassiodorus, Boërius; & præsertim duo diligentissimi atque doctissimi scriptores, *Mannet Bryennius, in libris ἀκουσικῶν, & Aristides Quintilianus περὶ μουσικῆς* (quos MSC. ex Berneggeriana Bibliotheca sibi comparavit nostra Academia) tum alii auctores ex occasione passim, vel acute repererunt, vel erudite

erudite explicarunt : insignem hujus otii mei fructum me percipere intelligo, quod à conspectu publicorum malorum, & discordantis à sua harmonia orbis tumultibus, subdu-ctum animum subinde aliquis illius virtutis sensus reficit, quam Musicæ propriam esse voluit ὁ θεὸς μουσικῆς. Deus, inquam, qui universum hoc, quod oculis usurpamus, artificis nulli oculo usurpandis, congruenter ordinavit, totamque præsertim ani-mam perfectissima quadam harmonia ratione arcu stellatus est, (sic-ut rotundius, quam Latine expressi, suo ore loquitur Ari-stides ille) suæ divinitatis notam tam efficacem Musicæ im-pressit, ut invitis revera Gratiis Musisque nati videantur, quorum ea nec sensum afficit, nec animum extollit. Quan-quam exterior est tantum, ut sic dicam, ea oblectatio, quæ ex vocum, nervorum, tiliarum cantu ab omnibus æque percipitur. interior autem illa, sapientum propria est, qua numeris & ponderibus, vocum modos & discrimina partiun-tur : intervallis & dimensionibus, corporis harmonici membra ordinant ; sonis gravibus acutos attemperant, acutis graves substituunt, utrisque medios interjiciunt ; at-que his omnibus varietatem, vices, mobilitatem, quietem, rationibus nec numero nec voce comprehendendis dispen-sant : ex perpetua discordia, perpetuum consensum ; ex pugna, amicitiam ; ex obstaculis adjumenta redeunt : to-tius denique concentus decus, & vim, & spiritum & indolem distinguunt sæculis, accommodant nationibus, admetiuntur animis, inferunt affectibus, comparant naturis rerum, & formis negotiorum. Talibus olim curis inten-tus Pythagoras, *Tetrachordum* suum, quatuor elementorum discordiæ concordæ, & congruentibus per diversa officii conformavit. Post quæ nonnullos aliorum nature medita-tio, ad *Heptachordum*, tanquam ad typum & figuram fidera-lis, quæ inter Planetas est, necessitudinis deduxit. Et quo-niam iterantur ac multiplicantur primarum cognationum & congruentiarum munia, itum est ad ampliorem concen-tus formulam, ut xv chordarum dispositione τέλειον ἡρμω-μὲνον σύστημα, sive instrumentum musicæ harmoniæ perfe-ctum,

Etum. & quod canonis vicem fungi posset, contineretur. Denique quicquid in rerum natura consensionis est ac amicitiae, ad musicam non comparabant modo, sed exigebant, praeclara, id est, altiore communis harmoniae sensu motuque imbuta atque excitata ingenia: cumque totum mundum musica ratione factum animadverterent, id quod in toto *ὑπερβόριον* deprehendebant, in singulis quoque partibus coeperunt requirere. Hinc & corporum turbata valetudo, & animorum commotiones, musicae, tanquam restitutionis & compositionis atque ordinis reginae, obsecundare credebantur. Asclepiadem sane ferunt, phreneticis mentem, beneficio symphoniae, reddidisse: ne de aliis nunc dicamus, quorum similia vel consilia, vel experimenta, nescio quam historice, certe non sine quadam philosophia, tum alibi, tum apud Apollonium Dyscolum celebrantur. Pythagorae moris fuit, priusquam se somno daret, & cum esset expergefactus, cithara cantare, *ut animum sua semper divinitate imbueret*, sicut Censorinus refert: sive, ut ad agendum erectior mane fieret animus, ad quiescendum autem vesperi sedatior & ab affectibus purgatior; quod de Pythagoreis Fabius tradit. Illa utique animorum medicinae destinata, *καθάρσις* (pergamus enim uti Pythagorea ex *Jamblicho* voce) adeo non est inficienda, vel sola musicae harmoniae recordatio, graviore mentium perturbationes, quales ira, tristitia, sollicitudo, metus adfert dispulisse non raro comperta sit: dum manifeste naturalis congruentiae argumento, in suarum formarum habitus rapit animos, & quasi transformat. Nimis est arguta eorum cogitatio, qui ex nescio quo concentu siderum, Pythagorae veteris commento, quod propiori aëvo ex Hebraeorum magistris *Doctores perplexorum*, satis ipse sibi hac in re perplexus, renovavit, animorum & ingeniorum studia, propensiones, incitationes metiuntur. Sed quantum supra mortalitatem assurgat, caelestiumque sensu rerum quodammodo imbuatur anima, cum in se recessit, & musicam auscultavit, vix verbis declarari potest. Loquor haec cum iis, qui *musicam multum obtinere divinitatis*, &

*tis, & animis permovendis plurimum valere, & fenserunt, & dixerunt* : quamquam, quid in musica maxime esset harmonicum, & in harmonia maxime architectonicum (utendum enim nunc est his vocibus) prorsus ignorarent. At vero, qui principia musices non ab Apolline aliquo, aut Mercurio, aut Pythagora, sed ipso universi conditore, & primo vocis architecto didicerunt arcescere, illis longe suavius sonat modulatio, longe congruentius ordinatur melodia, longe interius insinuat harmonia. Hic, jam sine fabulis & ambagibus, *cantant astra matutina* : hic chorus angelorum Deum universi factorem, quod omnia bene, omnia musice fecerit, deprædicat : hic hominum pietas opera Domini innumera, ab ævo in ævum, per intervalla, per gradus, per modos, collaudat. Hic David aliquis pulsat citharam, plenam mysteriis, plenam gratiis, plenam deliciis. Cithara quam dixi, mundi miraculum, an compendium est. in qua naturæ salubritas, sapientiæ amplitudo, imperii majestas, in unius symphoniciæ temperamentum consentiunt. cithara, quæ Saulis furorem levavit ; quæ divini Spiritus impulsu oracula cecinit ; quæ regis adsonuit curis, regios temperavit affectus, regias modulata est artes. cithara Medici, cithara Prophetæ, cithara Regis : cithara, inquam, Davidis, qui & medicus & Rex & Propheta. Talem citharam nemo vidit, talem cantum nemo audivit, talem harmoniam nemo sensit. Est enim cithara unica, cantus incomparabilis, harmonia mortali sensu animoque sublimior : cithara, cujus fides non describendo sed venerando reconcinnantur ; cantus, omnis studii auspiciu, omnis animi oraculum ; harmonia, quæ cælesti contextu, æternitati innexa, humana cum divinis copulat, conciliat, constringit. Cithara, quam eruditorum ænigma, Sapientum desiderium, piorum familiare instrumentum dixeris. cithara, cujus nec fides confractæ, nec cantus intermissus, nec harmonia ignota, credi debent, quamdiu supersunt divina illa carmina, quibus ut olim insonuit, ita hodie resonat : carmina, quibus cantus intervalla & mensuram designavit Dei digitus ;

digitus; quibus, harmoniæ cælestis meditata, ut mortalitatis solatium & præsidium, perpetuis terrarum orbis usibus consecravit æterna Bonitas. In hoc Odeo audiuntur cantica omni ævo vetustiora, omni invento recentiora: cantica gloriosa, cantica sancta, cantica angelica: cantica, quorum in terris sonus exultat, in cælis harmonia triumphat. In hoc odeo, agones musici non terminanda spectaculi suavitate exhibentur, quibus citharædus incomparabilis, quia parem non habuit, non habebit, secum ipse certat: ubi legem certaminis, Spiritus harmonicus, id est, solum & verum Numen harmonicum, dictat: ubi coronas & præmia Rex æternitatis distribuit: rex suavis, rex dulcis, rex omni vocum dulcedine, omni cantus suavitate æternum celebrandus: rex citharæ nostræ argumentum, citharæ nostræ temperamentum, citharæ nostræ præmium: rex Sanctus super omnes, Sanctus in omnibus, Sanctus pro omnibus. Dum in his meditationibus nuper versor, commodum se obtulerunt duo ex Juventute Academica egregii commilitones, qui de exercitatione oratoria instituenda meam requirebant sententiam. demonstravi illis statim mearum cogitationum argumentum, atque ut alter quidem CASPARUS WISMULLERUS, *Augustanus, Citharam Davidis Medicam & Propheticam*; alter GEORGIUS LAUB, *eadem patria natus, Citharam Davidis Regiam*, conatu musico pulsandam sibi deligerent; persuasi. Non quidem tam reconditæ meditationis disciplina, juvenili vel profectu vel sermone expediri potest: sed interest utique maturæ ætatis profectusque, ne adolescentior ætas, illa initia negligat, quibus ad omnium annorum totiusque vitæ felicitatem imbuendi sumus. Itaque, si lubebit, *crastini VIII. matutina, loco consueto*, recitantes audire (quod officium non male collocatum iri, persuadeant sibi rogo, qui humanitate studiorum imbuti aut politi sunt) non verebor, ne tenuis stilus, & tractatio argumenti rudior, æquos iudices offendat: qui, cum tyrones producuntur; satis distinguere scient comitatem discantibus indulgeri solitam, à censuris exactio-



exactioribus, quibus artificis opera examinare, jus fasque censeretur. Sed intempestivum forte fuerit, diutius his immorari: cum id unum superesse videatur, ut hic quoque decori musici non immemores, modum teneamus verborum, & Plutarchi clausulam, qua librum initio nobis laudatum finivit, nostram faciamus: ἀνώτατον δὲ καὶ μυσικώτατον, τὸ πλεῖστον προσήκον μέτρον ἐπιτιθέναι. Argentorati xx. Augusti cld Idc XLVI.

## XXIII.

**E**xpulsis Roma Regibus, ejuratoque regno, ad optimates haud dubie omnia redierant. horum enim ope, consilio, liberatus è servitute populus, statim imperium in libertatis suæ vindices transtulit. *Libertatis autem originem, inquit Livius, inde magis quia annuum imperium consulare factum est, quam quod diminutum quicquam ex regia potestate, numeres. omnia jura, omnia insignia primi consules tenuere.* At Valerius, quo adjutore Brutus reges ejecerat, in locum L. Tarquinii Collatini consul creatus, cum animadvertisset, se quoque in suspicionem affectatæ dominationis venisse, adeo factus est subito popularis, ut non speciem modo imperii, submissis pro concione fascibus, sed vim ipsam populo concederet, latis de potestate populi legibus valde magnificis, quæ Nobilitatis auctoritatem plurimum imminuerunt. *At prudenter eque Republica fecerit Valerius ille, non heri aut hodie demum disputatur, sed antiquorum temporum hominumque sententiis atque casibus disceptatum est.* Quippe hæc est origo tot contentionum, secessionum, turbarum in Republica Romana: dum Patres reperere à populo, incuria Poplicolæ translatam majestatem; populus asserere delatum ad se ultro jus arbitriumque rerum, summo utrinque studio annituntur. Qui reprehendunt Poplicolæ consilium, illis suspecta per se nimia popularitas, non nisi privatæ laudi utilitatique data videtur: ut invidia suspicacis populi magno aliquo præmio redimeretur, ut secura in posterum viri auctoritas, & certior sub dissimulatione potentia procederet. *Non oportere autem, inquiunt, in re tanti*

momenti affectibus aut privati studii duci, & quasi prater mentem fortuna publica, ac in præjudicium tot illustrium familiarum, jura Reipublice dilargiri aut transferre. ad Optimatum imperium, tanquam ad sacram ancoram delatas, ex fluctu conversionis, res Romanas; concussumque & circumactum imperii orbem, velut ad proximam & commodissimam metam subsistisse; non sine numine: cujus consiliis parum pie, & intempestive Valerius intercesserit. Mutationibus reipublica sua intervalla esse, in quibus nihil per saltum, omnia per seriem fieri debeant. Si regii imperii salubritatem non capiat amplius reipublica, proximum ex optimatibus auxilium ostendi; quorum regimen, non præstantia tantum gradu, sed conversionis ordine, secundum in omni argumento imperiorum, locum obtineret. Tantum imperii corpus projici facilius, quam transferri à summis ad ima potuisse. Neminem prudentium unquam Democratiam suasse, nisi postquam nulla in aliis formis spes superesset. Non enim in præsens modo levamentum periclitantis, sed in posterum firmamentum restituta reipublica spectari debere: quotiens de novo statu questio incideret. Jam vero populi ingenio nihil incertius aut mutabilius esse, cui non auctoritas, non potestas, non civilis actionis facultas sine periculo committi queat. Igitur leges Valerii pro populo, esse instrumenta & machinas adversus salutem publicam: cui nihil certius pereat, quam quod in vulgus dispergitur. Hæc & similia plura, adversus Poplicolæ Democratiam non abs re & specie, differi possunt. Nisi quod ex diverso, non plane nihil habet causa ejus, quo se tueri queat. Possit enim aliquis existimare, divino prorsus auspicio factum, ut liberata tyrannide Respublica in æquabile quoddam civilis disciplina temperamentum coalesceret: cujus initium ab Aristocratiâ sane fieri, robur autem & vis per Democratiam consummari debuerit. id natura convenientissimum regimen, id summa ratione comprobatum, si auctoritas in patribus, vis multo maxima in populo sit. ita suppleri, qua desint; coerceri, qua redundant, componi qua dissideant. procul removendos hinc locos communes, quibus in plebis inertiam & temeritatem declamare plerique solent. nunquam de tali forma reipublica Valerio in mentem venisse; cujus profunda solertia, ex omni Politica disciplina, ipsos prudentia & felicitatis publicæ nervos, in ordinari

ordiuati beneque compositi corporis decus compegiſſe videtur. poſſe Solonis, ſapientiſſimi hominis, diſcipulum ac imitatoreſ agroſci. qui & ipſe rectiſſimum ſeliciffimumque genus imperii iudicavit, ſi libertas populi ſummam rerum moderaretur. Ita faciliſſime excitari ingenia ad eximios conatus; ita virtutum ſemina generoſius concipi in animis, ſuccreſcere latius, effloreſcere ſpecioſius. non aliud magnorum operum certiſſimum auſpiciū, aut praſidium tutius. ita opibꝯ firmam, copiis locupletem fieri rempublicam. nunquam concitare libentius, nunquam ſelicius negotiari fortunam commerciorum, quam ſub vexillo libertatis. Fruſtra jaſtari depreſſam à Poplicola optimatum auctoritatem, & prerogativam populi ſupra temperamenti ſalubris modum eveſſam. ſatis enim proviſum patribꝯ, ut virtute praſulgere, prudentia anteſtare, induſtria emiuere, eloquentia praecellere, gratia prepollere poſſent. has optimatum artes, hac auctoritatis ſenatoria decora eſſe, quibus ad ſummam moderationem redigeretur populi poteſtas. Talia ſi quis amplius expendat, & cum ceteris, quæ ad hanc formam diſputari queunt, conſerret, jam ſerio forte animadverteret, ſingulare id popularis imperii fatum eſſe, ut à pauciſſimis vera æſtimatione penſetur. Nam quæ de intemperantia & licentia populi, plena manu ſparguntur convitia, plerumque extra ſæculi exempla ſunt. neque exiſtimo hodie in ulla nobiliore Republica dari tale imperium populi, quale ſibi plerique audito Democratix nomine fingunt, id eſt, infinitum, promiſcuum, nullo graviore conſilio munitum, nulla optimatum auctoritate temperatum. Talis enim ſtatus, præterquam quod in formis reipublicæ non habetur, facile & cito ſe deſtruit, adeo ut vel interitus, vel mutatio reipublicæ conſequatur. Illud quidem diſſiteri nihil attinet, quod initia popularis imperii non magnam ſemper ſpeciem præ ſe ferunt. Sed ea fors, ad cetera quoque regiminis genera pertinet. Et quid agemus tandem ac ſentiemus mortales, ſi præterito rerum præſentium ſtatu, ad primas ſemper origines reſpicimus? Valde fallor, aut ceſſabit exprobrandi libido. Nobis ab his initiis per veſtigia, quæ Deus fecit atque demonſtravit, ad ſummum Democratix decus licebit aſcendere; ut no-

scamus divinæ notam majestatis, non minus imperio populi, quam ceteris reipublicæ formis, communicatam, impressam, donatam. Hanc venerari fas est, ubicunque eam invenimus. Sancta nobis esto Regum majestas: sancta populi libertas: quia ubique à Sancto, & sanctum est, quod intuemur. Qui in summa unius sanctitatis majestate gradus sunt, illis, sicut Deus jubet, sicut Prudentes intelligunt, suus ordo, suus locus constet. Democratia nunquam gravabitur fateri, se diademati regio nec raro nec irreverenter commodasse fulgoris sui radios, quibus radiata Regum capita totum orbem illustrarunt. Sed redeundum est ad Poplicolum Romanum, de quo solo præfandum aliquid fuit: dum institutam Romæ ab ipso Democratiam, exercitationis oratoriae causa, in cathedra publica examinare constituerunt, Nobilissimi juvenes, JOH. CONRADUS ZIEGLERUS & JOH. ULRICUS PEYERUS im Hoff / Scapbusiani, convictores & hospites mei dilectissimi. Quorum ille quidem ea in medium adferet, quibus coargui Poplicola posse videtur: hic autem defendendam sibi Poplicolæ causam desumet. ZIEGLERUM Magnifici Parentis, Consulis Scapbusiani gravissimi, quem Helvetici fœderis Ciceronem merita pridem publica celebrant, exemplum ad eruditionis & virtutis gloriam stimulat: PEYERO tum alia familiæ decora, tum Nobilissimi viri JOH. LUDOVICI PEYERI, magna cum laude positi in litteris labores (quorum honorifica semper testis erit nostra Academia) incitamento sunt. Sub his auspiciis audebunt committere publicis auribus sua rudimenta: in quibus, ut sola voluntas, si non laudata, excusata tamen sit, precantur. Accessi lubens precum socius, & exemplum, juvenuti; industriam, fautoribus ultro commendandam duxi. Recitabunt die perendini hora VIII. matutina, loco consueto. Dixi argumentum, dixi cetera: nam quæ supersunt, gratæ mentis erga auditores, quos invitamus, pignora, repræsentare malimus, quam dicere. Argentorati xxvi. Augusti cld lcc XLVI.

## XXIV.

**A** Doleſcebat ſæculum à nato Chriſto ſeptimum , cum exortus, Imperante Heraclio , Mahometus, valetudine corporis & animi pravitate ipſe nefanda omnia præceps, inſaniam ſuperſtitionis, & furorem turbandi compoſita, tam immodico aſu in perniciem humani generis expedivit, ut ex contentiſſimis latrocinii initiis homo privatus & fanaticus regno caput daret , quod Saracenorum viribus auſtum , Turcorum nomine inſignitum ; toti propemodum orbi formidabile factum eſt. Præſertim vero Chriſtianis tam graviter in hunc diem incubuit illa tyrannis , ut inter omnia, quæ vel religioni vel reipublicæ , propheticiſ prædicta oraculis comperiuntur mala, non aliud videatur atrocius cenſendum eſſe. Longum foret recensere inſtinas imperiis ipſiusque rei Chriſtianæ labes, diſcordias, dedecora, flagitia : quorum occaſione partim naſci, partim augeri & invaleſcere potuit fatalis pernicies : neque enim tam Heraclio tribuenda eſt ea culpa , quam Romani imperii non diviſo modo, ſed pænè diſcerpto ſtatui : quem dum recolligere & componere negligunt poſtea , quibus religio & publica ſecuritas cordi eſſe debebat, cum flagitiis hominum augmentur flagitiorum pœnæ, quæ, adhuc incertum eſt, quem modum aut limitem ſint habituræ. Non caruit tamen omine, ſingularis ille honor, quo Heraclius ( memorante Nicephoro Conſtantiopolitano ) Turcorum Principi, cujus adverſus Perſas auxilium ambiebat , ſuum ipſe detractum ſibi, diadema, impoſuit : quaſi ſignificaretur Imperii Romani per Græciam & orientem decus , ipſis Imperatoribus per vecordiam quaſi tradentibus , ad Turcas olim tranſiturum, quorum nomen tum non alio quidem quam barbariei titulo notum, ad imenſarum opum famam proceſſurum eſſet. Conſultatum quidem tandem eſt inter Chriſtianos Principes, quomodo eccleſiæ religio, populis libertas, tam crudeliter, tam diu oppreſſa reſtitueretur : ſed jam ita coaluerat Turcicæ dominationis moles, ut convelli ſine convellentium exitio non poſſet. Commendari ſane merentur , quæcunque

magnorum virorum in eam rem vel dicta prudenter, vel suscepta generose, vel fortiter patrata extant. Quinimo si historiam Passagiorum (ita enim vocantur à sequioris ævi scriptoribus expeditiones communi ope adversus Turcas susceptæ) evolvamus, ingentes gloriarum ac triumphorum titulos cognoscemus. Et quis unquam satis laudaverit Godefridum Bullionium, qui Henrici IV. Imperatoris auspicio, tot clades nominis Christiani hostibus intulit? Quis dignis extollat prædicationibus Friderici Cæsaris virtutem, qui perpetua felicitate jamjam æquaturus erat Alexandrum Macedonem, nisi infelicius, quam ille, corpus in Cydno flumine abluisset? Interim non pauca reperias in ejusmodi militia, & fœderibus Christianorum; quæ minuendo malo, nedum extinguendo, adeo non erant idonea, ut præter cladem & dedecus, ultro iram divini numinis adversum nos cumulasse videantur. Tanta fuit sæpe æmulationi ducum, licentia militum, temeritas consiliorum, cum primis autem plerique non id quærebant, quod huic militiæ unice debet propositum esse: quosdam fides domi afflicta, alios spes prædarum, nonnullos ipsa dissoluti moris illecebra, aut alia privata stimulatior; ad sacramentum militiæ, quæ nihilominus sacra vocabatur, & signo crucis præ Christi gloria insigniebatur, excitabat. Cordate Guibertus Abbas, de incondito Petri Eremitæ agmine: *indisciplinatis (ita loquitur) mors obviat, & quidquid pensi moderatique nihil habet, parum durat.* De expeditione autem sæculo duodecimo admonitu Bernardi Abbatis Clarævallis præcipue suscepta, Otto Frisingensis qui interfuit, ita fatetur: *Sidicam sanctum illum Abbatem, spiritu Dei ad excitandum nos afflatum fuisse, sed nos ob superbiam lasciviamque nostram salubria mandata non observantes, merito rerum personarumque dispendium deportasse, non sit à rationibus vel antiquis exemplis dissonum.* Liberius, pro more (si modo affectus plane abest) Jacobus Meyerus in *Annalibus Flandricis*, cum rei male gestæ contra Turcas mentionem fecisset, judicium suum in hæc verba subjicit: *Crediderim numini non placuisse tales pugnatō-*

res, nempe superbos, vanos, arrogantes, falliosos, discordes, luxui libidineque nimis deditos, religionis exortis & schismaticos. Fuit, cum expeditionis sacræ rursus impetum tam inconsulte caperent, & apparatus tam inepte administrarent homines, ut risum potius amicis, quam metum hostibus excitarent. Conati equidem sunt viri eximii, omnem militiæ tam gloriose ac necessariæ rationem facultatemque, susceptis peregrinationibus explorare, compositis monumentis perferibere, summorumque Principum animis & auribus fideli consilio commendare. Fecit id præsertim *Marinus Sanutus* Patricius Venetus, qui ante tria hæc sæcula, magna diligentia & rei Christianæ studio, *Secreta fidelium crucis*, ut vocat, elaboravit: in quibus varia rei suscipiendæ conscientiaque consilia exequitur, notatis simul erroribus, qui ante id tempus successum armorum impediverant. Et quis fere magnorum virorum, vel in republica gerenda, vel in litteris colendis principatum aut nomen aliquod tenuit, post ea tempora, qui non istud votum animo, sermone, consilio, stilo foveret atque promulgaret. Sed factum est, proh dolor, ab aliquot ætatibus, ut Christiani in sua viscera conversi, dum ad internecionem usque mutuis cædibus sæviunt, internecinum illum hostem fœderibus & tributis donisque placare, quam armis communibus debellare maluerint. Quod sicut in singulis interdum necessitas excusat: ita universis Christianis nunquam indecorum erit, quod nobilissimas sui corporis partes Turcis passi sunt fieri tributarias. Et quid deinceps futurum est? Auguratur sane *Nicolaus Chalcocondylas*, non incelebris rerum Turcicarum Scriptor, fore ut tandem convellatur illud culmen potentiæ, ex quo res Christianas Turca non despectat modo, sed quasi fulminibus quibusdam ferit. Eritque forsitan hæc pars vindictæ & militiæ, qua Christus, antequam ad æternos triumphos suam colligat Ecclesiam, immanissimum hostem, non parvam scilicet triumphandi materiam, deijciat atque concidet. Sed profecto aliis opus est animis, aliis moribus, aliis fœderibus, quam quæ hætenus inter

rer Christianos, sacramenti & imperatoris, & tesserae suae nimis oblitos, observamus. Praefari hæc libuit indicendae exercitationis Academicæ oratoriæ gratia: qua ex commilitonibus nostris duo *Argentoratenses*, JOH. PETRUS STORCKIUS *avo & patre Coss. & Scholarchis Reip. celeberrimis ortus*; & JACOBUS PHILIPPUS ESPICHIUS *Excellentissimi Professoris JACOBI VALENTINI ESPICHI, Collegii Med. h. t. Decani Spectabilis, collega, affinis & fautoris nostri honoratissimi filius*, delegerunt sibi argumentum de rebus Turcicis: ut ille quidem, *de Turcarum origine, progressu atque adversus rem Christianam conatibus ac molitionibus*; iste, *de Christianorum adversus Turcam consiliis operibusque* aliquid publice differeret. Et quanquam paulo aliter, quam ego animo destinaveram, laboris forma processerit, tamen quia industriam singularem animadverti ab utroque, nec infelicitè, adhibitam, nihil immutavi: cum haud raro fieri soleat, ut præclara ingenia, in nobiliores conatus libentius se excitent, si rigidioribus censuris non absterreantur. Certe, quæ scripserunt, talia sunt, ut ultro felicitis ingenii nomine commendari mereantur. Nam argumenti hujus amplitudinem exhaustire, aut gravitatem ornare, supra juvenilem industriam est. Accedit in partem favoris promerendi, expectatio præclara, quam de utroque, merito & firmiter concepimus, si Deus vitam ipsis, quod optamus, & bonæ mentis constantiam conservaverit. Recirabunt suas orationes *perendie hora VIII. matutina, loco consueto*, qui per se homines optimarum rerum artiumque studiosos allicere potest: ut nobiscum pia pro pace Christiani orbis, in qua certa Turcarum perniciēs continetur, vota suscipiant. V. Per scriptum Argentorati xx. Octobr. clb Idc XLVI.

## XXV.

**D**ilectissimus Judæorum Philo, eleganti libello, *Βίος πολιτικός, vitam viri civilis*, sub exemplo JOSEPHI, notabiliter explicavit. Nihil aptius titulo, nihil gravius argumento, nihil eruditius tractatione. Unde enim potius magnarum rerum documenta, in omne genus vitæ traduci debent



debent, quam ex illis monumentis, quæ ipsa scripsit Veritas, ipsa Sanctitas consecravir? Et sunt sane de Josepho ea, magni illius Mosis calamo, excepta atque consignata, quæ perfectissimi *Politici* exemplar possunt absolvere. *Politicum* autem nunc vocabimus ad exempli, de quo loquimur, formulam, non quemvis civili peritia virtuteque præstantem virum, sed qui ad ipsum civilis dignitatis fastigium, maximarumque curarum in Republica consortium, tanquam præcipuus Regum Principumque adjutor, & instrumentum felicitis regni, divinitus adhibetur. Hos tales viros Deus, singulari Prudentiæ opere, format, deligit, excitat, evehit, constituit, Reipublicæ usibus consecrat ac moderatur. Hæc est origo ingenii, quod non practicum modo, cum scholis; sed Politicum, ex fato suo, vocitare possumus: vim mentis acrem, habilem, promptam; solertia cogitandi, dexteritate judicandi, felicitate providendi, ad agenda expediendaque negotiorum ardua, semper instructam. Hæc est origo fortunæ successusque ad omnia valentis, per omnia penetrantis. JOSEPHI ingenium & singularem indolem multa sunt quæ declarant. nec de industria dubitandum est, qua tam præclara soboles & indulgentissimi Patris educatio sibi mutuo responderunt. Jam, quales ei fuisse stimulos credimus, quos arctior Dei cum Parente & filio familiaritas, diversis modis, semper efficaciter, utriusque animo sive insinuavit, sive impressit? Ita nascitur, ita educatur, ita præparatur Josephus. cujus præparationis magna statim pars fuit, duriorum casuum consuetudo: ne secundis tantum fuerus animus, perfectæ magnitudini ulla parte impar reperiretur. Quos natura ei conjunctissimos esse voluerat, hos invidia hostes ejus ac pæne parricidas, certe plagarios fecit. Venditur liberum caput, & peregrinæ servituti mancipatur: neque finis miseriarum; post patriam amissam, post caput diminutum, omni existimatione, confictis mire criminibus, spoliatur: in vincula conjicitur, ut nihil jam superesse, præter desperationem melioris fortunæ, videretur. Sub his ambagibus

h h h

latuit

latuit ingens illud, & sub tali exemplo omnibus commendandum sæculis mysterium: *Quo magis viri boni, aut quos Deus ad magna destinavit, premuntur, & magis eriguntur: quo magis obscurantur, eo magis eniteſcunt: quo magis infeſtantur humanis odiis, eo magis divino favore protegentur.* Converſa enim mox fatorum ſerie, Joſephus ille carceris inquilinus, in regis aulam producitur: juſſuque regio, qui captivus fuerat, Agypto dominari, & ab imminente periculo regnum tueri jubetur. cultus, inſignia, tituli, honores, ſolo regis faſtigio minora in eo publice conſpiciuntur, cui modo non die, non ſole, non hominum conſpectu frui licebat. Ecce, magni viri magnus caſus, magna virtus, magna gloria, magnum exemplum! Cujus dulciſſima meditatio longe me afficit prolixius, quam ut in anguſtias hujus pagellæ, primas ſaltem lineas designare auiſim. cum præſertim nunc nihil aliud quam præſari oporteat, de præſantiſſimorum juvenum inſtituto JOHANNIS CUCUELL, & JEREMIÆ DUVERNOY, Montisbelgardenſium: qui dum in bonis literis ſtrenuos ſe hætenus commilitones præbent, bona quadam fortuna inciderunt, etiam in Philonis, quem ab initio laudavi, libellum, de *Joſepho Politico*. Ea lectio non ſivit eos amplius ambigere, de exercitationis Academicæ materia. ſtatim ita partiti ſunt operas, ut alter, ſub exemplo Joſephi, DE VIRTUTE POLITICI; alter, DE GLORIA POLITICI, oratiunculam componerent, atque in publico auditorio recitarent. Quamvis enim argumenti gravitas, facile doctiſſimi cujuſque & ſacundiſſimi ingenium ac eloquentiam ſuperat, diſplicere tamen nobis non debet, conatus ejus ætatis, quæ maximarum rerum primordia, ut materiem majoris operis, provecſtoribus annis litteriſque, ſeligit ac auſpicatur. Itaque tenuitatem ſtili & tractationis, non excuſabo: viderunt ſæpius humanitatem auditorii, ſperarunt favorem ex ipſo Joſephi Politici vocabulo: denique ſi nulla re alia, certe brevitate, ſe placituros crediderunt. Hæc ut ab ipſis dicta accipi debent, quibus à me poſſem addere, indolis, quæ in utroque elucet, præ:

præstantiam; studiorum laborumque Academicorum industriam; propositum bonæ rectæque mentis, tum quæ eximiis Parentibus, & honestati generis debentur: sed à bonarum rerum & laudabilium exemplorum fautoribus non opus est conquisitis precibus audientiam efflagitare. Recitabunt, quæ scripsere, die *Veneris*, (qui erit hujus mensis xix, ipso JOSEPHI nomine in fastis signatus) hora VIII. matutina, loco solenni. Valete. Perscriptum & propositum XVII. Martii, Argentorati, Anno clō Idc XLVII.

## XVII.

DE CONVIVIIS dicturi sunt, *cras hora VIII. matutina, in Auditorio solenni, duo egregia indolis ac spei Adolescentes, ANDREAS SCHILLING, Viri admodum Reverendi Præclarissimique Pastoris & Ecclesiæ Summi Templi, Argent. Fautoris & Affinis nostri honoratissimi, filius: & JOHANNES FRIDERICUS von der Straß / cujus Parens p. m. perscribendis ararij publici rationibus præfectus, ut minime facilem, ita honestissimam stationem, magna dexteritate administravit, filioque non parvam virtutis Germanæ hereditatem reliquit. Quos convictionis & consuetudinis Academicæ humanitas imbuit, illi, non sane ad epulas Sybariticas, aut apparatus Persicos, sed ad simplicitatis antiquæ, & majoribus nostris amatæ officium; neque ventris onerandi, sed animi remittendi gratia, peramice invitantur. Fuit jam inde ab ultima vetustate viris prudentibus usitatum, ut non tam mensæ, quam animi delicias, neque sic cibos, ut acroamata, sermones, colloquia in conviviis sectarentur. Moderatam Pomponij Attici elegantiam ita describit Nepos: Nemo in convivio ejus aliud acroama audit, quam anagnosten; quod nos quidem jucundissimum arbitramur: neque unquam sine aliqua lectione apud eum cœnatum est; ut non minus animo, quam ventre, convivæ delectarentur. Recognoscere licebit in iis, quæ Declamatores nostri recitabunt, quædam lectionis antiquæ vestigia; licet non tam signanter expressa, quam tenuiter libata. In quibus, ut non sit magna delectatio, viam tamen demonstrare poterunt ad ea, quæ plus voluptatis afferent. Habemus convivium Socrati-*

h h h 2

cmm,

cum, ab elegantissimo & suavissimo convivatore, *Xenophontis* apparatus: Habemus *convivium septem sapientum*, imo *omnis generis eruditorum*, & *artificum in quavis arte praestantium*, cum insigni varietate *acroamatum*, *quaestionum*, *disputationum*, apud *Plutarchum*, & *Athenaeum*. Quem ista neque delectare possunt, is videat, ne poetæ veteris *Satyræ* novo exemplo insigniat, quando describitur,

*Rusticus, abnormis sapiens, crassaque Minerva.*

Si quis interim stomacho delicatiore, peregrinos, aut è *Græcia* accersitos cibos, minus concoquere potest, ei mensam magis familiarem instruent, & præmansa in os ingerent *Struskii Antiquitatum Convivialium* structor: *Jovianus Pontanus*, & *Jul. Caesar Bülengerus*, circa *conviventiam*, & *convivia*, pridem comiter, nec ineleganter occupati. ne de *Sarisburiensi*, & aliis dicamus. Horum copia supplebit paupertatem nostrorum commilitonum: qui apud eruditos Auditores, lautioreque apparatu assuetos, veniam se exoratorios confidunt, si hanc tabellam publice præscribant Auctoritate nobilis poetæ (nam huic generi hominum propria quædam in conviviis gratia debetur)

*Plerumque grata divitibus vices,*

*Mundaque parvo sub late pauperum*

*Cena, sine aulæ & ostro*

*Sollicitam explicuere frontem.*

Nam ut aliunde mutuarentur, aut emendicaret, apparatus cultiorem, nolui illis auctor esse. Pro conditione hominum, & fortuna (sub qua hic ætatem, & captum juveniliū annorum intelligere fas erit) convivii æstimatio facienda est. Poterunt tamen, ni fallor, aliquid gratiæ scenerari, *acroamata* musica, & *symphonicorum* suavitas, quæ non aberit nostro sive triclinio, sive auditorio. Hæc innocua & ingenua est voluptas. nam reliquum epulandi & convivandi morem, non tantum diritas temporum, sed, quæ sola pro candore prisco regnum hodie obtinet, simulatio & fucata blanditiæ, præcipua jucunditatis parte privant. Atque ista ferme sunt, quæ in gratiam *eximiorum*

*Adole,*

*Adolescentum*, quorum studia & specimina Academica cordatis omnibus plurimum commendo, præfari hoc loco, non intempestivum duxi. de cetero, favor studiorum, & Parentum merita, si quid ad invitandum superest, facile pro argumentis erunt. Vale, Lector benevole. Argentorati 1x. Novembr. clj Jdc XLVII.

## XXVII.

**D**e perendini, qui mensis Martii nonus in fastis numeratur, hora VIII. matutina loco ritque Academico sollemni, orationem habebit Generosus & Nobilissimus CHRISTIANUS URNE, Eques Datus, Viri vere Magnifici, Per-Illystris, Eminentissimi, DN. CHRISTOPHORI URNE, Cancellarii Regni Danici, filius. Ad quem audiendum, ut frequentes conveniant, qui literas amant, Academiae favent, generosum profapiae decus venerantur, nationis denique Danicae laudatissimæ decora, quibus non olim tantum, sed à proximis mensibus, Argentoratenses Musæ enituerunt, merita æstimatione colunt; non opus est, argumenta conquirere. Suum cuique studium, pro ratione erit. Delegit argumentum, cujus nomen in ore populi celebre, fama inter doctos ambigua, intelligentia in aularum & enriarum secretis recondita, nisi quod genius seculi, nihil secretum esse patitur. Fuit enim tempus, cum in altissimo arcano, civilis tractatus mysteria custodirentur: nemini fas erat ostentare, ac ne nominare quidem, ea, quorum nullum in sermone vocabulum, nulla in exteriori scena species, sed interior, in penetralibus Prudentiæ, virtus quærebat. Interim dum revolvitur moris civilis & aulici orbis, cœperunt excogitari elogia, adornari figuræ, jactari argumenta, quibus in rationem & consuetudinem iret ostentatio rerum, quas ante profanari putabant, si extra cancellos & cubicula sacrarii aulici noscerentur. Causa varie traditur. Plerumque curiosi & ambitiosi nonnulli homines arguuntur, qui cum emissitios oculos ad inconcessa & seposita adjecissent, aut ad ministeria rerum abditarum admissi essent, unum sibi ad famam & opinionem sapientiæ, iter dari crediderunt.

hhh ;

runt,

runt, si tacenda eliminarent. Neque tamen prudentes gravesque viros ab hoc negotio excluſeris: ſive illis, in ſapientiam vertere, quæ ab aliis peccata, jam mutari non poterant, ratio fuit; ſive illa ipſa rerum abſtruſarum oſtentione ac prædicatione, deludi verius quam erudiri curioſos, nominaque profundioris prudentiæ, non momenta publicari vulgo, judicarunt. Memorabilis exempli vicem præſtare poteſt **RATIO STATUS**, de qua Generoſus Juvenis, quem nominavi, publice dicturus eſt. Retinemus enim vocem, Latinis quidem ſcriptoribus non uſitatam, ſed ab Italis ad Gallos, aliasque nationes tanta conſuetudinis aſſeveratione tranſmiſſam, ut, quod ante luſtra annorum non adeo multa, timide, & rarius, & cum præſatione uſurpandum fuit, hodie inter ſollennia Politicorum vocabula, quotidiana ſcriptura ſermonibusque jaſtitetur. Quæ deſenſio, etiam in aliis nonnullis, **URNEUM** noſtrum tuebitur. De rebus enim extra ſcholæ pomæria natis, & genio civilis ſcenæ, quæ temporibus ſervire ſolet, accommodatis, loqui fas eſt, cum iis, quorum nec auctoritati ratio, nec rationi auctoritas deeſt, etiam cum vetuſtas deeſt. Maluerunt aliqui vocare, *Prudentiam Extraordinariam*: ſed eo genere appellationis, genuina vis & natura rei, quam *Ratione Status* non ineleganter Itali notarunt, nequaquam diſerte exprimitur. Quicquid ſit de nomine, res ipſa longe minus explanatæ philoſophiæ eſt. Argumento poterunt eſſe, tot deſcriptiones, diſputationes, dubitationes Politicorum: addidiſſem pæne, abuſiones. *Boſeri* quoddam opus titulum hunc præfert, ſed materiam diverſam, deſcriptionem ſcilicet variarum Rerumpub. aut, ut alii loquuntur, Statuum ſpectat. *Palazzi* regulæ, ſi pro *Ratione Status* accipiuntur, nihil obſtabit, quo minus plurimos aliorum libellos, varia inſcriptione editos, ſub ejusdem elogii titulo conſignemus. Ut aliorum & præſertim *Bonaventura* deſcriptionem refelleret, ac meliorem aliquam investigaret, toto ſermè opere, diligenti ſane & laborioſo, *Claramontanus* occupatur. Sollertiſſimus *Septalius* ex ordinariis Politico-  
rum

rum regulis, & usitata civilis actus formula, multa in communione tituli admittit, quem de re ordinaria, ut cœpius dicere, alii non exaudiunt. Sunt, qui Ratione Status, non nisi rem malam signari autumant: nonnullis, præter laudata virtutis nomina, nihil habere videtur. Melius cæteri, in medio genere, quod partim laudis capax est, partim reprehendenda complectitur, reponunt. Inventa quintetiam est ratio subtilitatis cujusdam, quæ affirmaret: Rationem Status, non nisi per arcanos libellos, longe alia, quam in editis operibus fieri solet, descriptione, inter acutos Politicos (in Parnasso, opinor) quasi de manu in manum, sub lege altissimæ dissimulationis, contradi. Valde tamen vereor, ut se cuiquam illud *Σαυμάσιον ἄννομα* probare queat: nisi forte iis, qui nominum & rerum novitatem distinguere, parum didicerunt; aut studium civilis scientiæ, ultra paucos, heri & hodie natos libellos, nunquam proferre auli sunt. Manet interim Ratio Status, ænigma sæculi, materia subtilitatis; cum Proteo, Thetis; cum Paride, Helena; cum Ulysse, Penelope. Argumentum tam lubricum, & quod presse comprehendere refugit, cur, non quidem explanandum sed attingendum sibi existimaverit Nobilissimus URNE, ex ipso intelligent, quibus cordi erit, Virtutem & industriam ejus, qua hætenus Academiam nostram ornavit, præsentia, auscultatione, gratulatione sua honorare, ac familiæ tam generosæ, publiceque venerabili, faustæ sortis perennitatem nobiscum precari. Scr. Argentorati VII. die Martii, Ann. Christ. 1690. Idc XLVIII.

## XXVIII.

**A** Gellius Noct. Att. V. 13. refert memorabilem disputationem clarorum Romæ virorum, de gradu atque ordine officiorum, quando quærebatur: quibus nos ea prioribus potioribusque facere oporteret, si necesse esset in opera danda faciendoque officio alios aliis anteferre. Conveniebat autem facile (ita pergit) constabatque ex moribus pop. R. primam juxta parentes locum tenere pupillos debere, fidei tutelæque nostra creditis: secundum

dum eos proximum locum clientes habere, qui sese itidem in fidem parrevinumque nostrum dederunt: tum in tertio loco esse hospites: postea esse cognatos affinesque. Adducitur deinde Masuri Sabinus auctoritas, qui antiquiorem locum Hospiti tribuit quam Clienti, aitque, apud majores ita observatum esse in officis; primum tutela, deinde clienti, tum cognato, postea Affini. Ex quo intelligimus; officia Hospitii & Clientela, valde sibi vicina, æstimatione, religione, usu fuisse. Et de aliis quidem gentibus, Hebræis, Phœnicibus, Ægyptiis, Syris, non patitur instituti ratio, ac paginæ hujus modus, aliquid adferre. In Romanis autem institutis velut in unum conducta occurrunt, quæ ipsi à Græcis, Græci ab aliis in constituendo jure & bonis moribus formandis acceperunt. Hospitii vero humanitatem naturæ socialis ratio primum, & ultro commendavit gentibus: licet affectu propositoque diverso, nonnullas civitates, ut fieri solet, accedentibus præsertim quibusdam incommodis, demonstratum à natura iter deseruisse constet. Romanos autem non tantum amor officii, sed prudentiæ etiam civilis usus docuit, sanctam & cognatam facere Hospitii & Clientela necessitudinem. Atq; sicut Clientela ex instituto Romuli pertinebat ad concordiam ordinum, Patricii & Plebeji, fandiendam; adeoq; ad conjunctionem & consensionem civitatis stabiliendam: ita Hospitii comitas, ad devinciendos aliarum civitatum animos, utrique spectabat. neque profecto antiquiora Rerum publicarum munimenta nominaverim, quam domi concordiam, foris auctoritatem & famam. De utraque re ita tenendum est: quædam in Hospitio & Clientela, ad virtutem & consuetudinem bene moratam; quædam ad jus & legem; quædam denique ad ritus & formulas & symbola referri oportere, si scriptorum loca recte velimus interpretari. Hinc de more & jure hospitii ac clientela: de utriusque religione, dñs, sacris, pignoribus, officiis, legibus, ubique videas sermonem fieri. Scilicet, quod virtutis ratio suppeditat, lex in formulam officii collegit, distinxit, sancivit: accessere rei sanctæ legibusque præceptæ, sollennia quædam, variæque consuetudines,



nes, conciliandæ venerationis, partim submonente lege, partim ingenio studioque hæc officia usurpantium. qualia, ubi consensu veluti tacito convaluerunt, & ipsa sibi quandam legis jurisque formam induunt. De Clientela illustris est lex XII. Tabb. *Patronus si clienti fraudem faxit, sacer esto:* de qua *Servius ad sextam Æneidem*. Hospitii quoque sanctitatem, severis munitam legibus pœnisq; constat: hinc stigmata *ingrati hospitii* titulum præferentia; aliasque animadversiones historia loquitur. In amplissimo opere *Inscriptionum Gruterianarum pag. 362. & seqq.* extant quinque Inscriptiones, de *Hospitio & Clientela*, è quibus unam tantum ex ævo Constantini M. exempli causa, referemus. Tabellæ æneæ hic fuit titulus: *Valerio Proculo v. c. præsidi provincie Valeriæ Byzacenæ. Inscriptio sic concepta est: DD. NN. Crispo & Constantino Juniore Nobilissimis Cass. coff. III. Kal. Sept. Municipibus Municipi Æli. Hadriani Aug. Civilitani Q. Aradii Rufini Valerium Proculum C. V. Liberos posterosque ejus sibi liberis posterisque suis Patronos cooptaverunt tesseramque hospitalem cum eo fecerunt. Q. Aradius Rufinus Valerius Proculus liberi posterique ejus municipes municipii T. Æli. Hadriani Aug. Civilitani liberos posterosque eorum in fidem clientelamque suam receperunt. In quam rem gratuitam legationem susceperunt Insteius Renatus & Apollonius Gallentius Duoviri T. Ælius Optatianus Camarianus Flavius Secundinus Domitius Optatianus Æmilius Nemgonius Æmilius T. Tracius Statilius Secundianus ex P. P. & Univerſus ordo.* Hic, si liceret exequi, observarem multa ad hoc argumentum pertinentia. *Mutua erat pãctio* hujus necessitudinis; hinc non magis, qui se dabat in clientelam & hospitium, quam is qui recipiebat, voluntatem suam exprimebant. Nec inter singulos, aut familias tantum obtinebat: sed ad totas civitates gentesque pertinebat; dixeris *publica illa hospitia & clientelæ publicas*. sic Romani cum aliis populis ac civitatibus hospitium jungebant, alias item gentes & urbes in clientelam suam recipiebant: aut etiam (quod alterum hujus publicæ clientelæ genus est) populi, civitates. municipia, colonie in clientelam se mittebant Magistra-

tuum Rom. Virorum aut Familiarum Illustrium. quæ res multum observationis politicæ trahit, de qua nihil nunc attingere possumus. Ita hic Civilitanum municipium tradit se Valerio Proculo præfidi. *Hereditaria* ergo plerumque *necessitudo* hæc fuit, utrinque liberos posterosque ad patrocinii, clientelæ, hospitii officia obligans. *Instrumentu, monumentis, tabulis* etiam perscribebatur, expressis nominibus Coss. consensu eorum, quorum intererat, agentium curiam, legatorum super ea re missorum: sicut ceteræ Inscriptiones amplius ostendunt. *Conjungebantur* denique sæpe ista, publicis privatisque nominibus ex naturâ negotiî cognata, *Hospitioque & Clientelâ* simul excipiebantur, qui Tesseram hospitalem cum aliquo fecerunt. Quo minus admirari quis debet, conjuncta ad occasionem oratoriæ exercitationis esse, quæ nominibus discrepant. Dicturi enim sunt, *die Veneris* (huius mensis XI. signamus) *hora VIII. matutina, in auditorio sollemni, ornatissimi Adolescentes*, AUGUSTUS FRIDERICUS, & CHRISTOPHORUS JACOBUS, MOCKELII, *Hale Suevorum nati, fratres germani*, alter quidem *de Jure & more Hospitii*, alter *de jure & more Clientelæ*. Ab his, inquam, argumentis auspiciu facient exercitationis Academicæ, tentabuntque si forte possint in posterum, neq; ingratos in Academia cum ceteris hospites; neq; ineptos Academicorum procerum clientes se præbere. Nomina certe favore digna sunt, quibus se in publico commendatum cuit. Nemo quidem existimabit, accuratæ tractationis specimen promitti de hac ætate. quinimò ob id ipsum delicta est materia, quæ excerpando & memorando, non perorando & commentando, sub juvenilis stili prima rudimenta succederet: nam oratoris vim, inventionem, & copiam, nimis inepti sunt, qui descriptis locis communibus, & nescio quibus florilegiis excussis, affectant, utilioris operæ est, eos, qui facultate dicendi nondum polent, colligere & in orationis æqualis contextum ordinemque redigere sparsas alibi ac diffusas materias. Quæ res & scriptorum notitiam, & lectionis industriam, tum disciplinam

plinam meditationis instruit. Pollicentur nobis scilicet, curas Jacobi Philippi Thomasi de Tesseris Hospitalitatis, ubi jus Hospitii universum, apud Veteres potissimum, expendatur: quo forte supplebuntur & conducentur ea, quæ Stuckius aliique super isto argumento tradidere. Mockelliis nostris, pauca, nec indigna tamen cognita, in occasionem profecturæ deinceps industriæ, conscribere placuit. Quorum simplicitati fas est favere omnes, qui claras familias æstimant, & studiorum vel nomen amant, vel rationem intelligunt, vel consuetudinem non aspernantur. Dicta est materies, dictum tempus, dicta nomina eorum, qui se pridem Hospites Academicæ Clientesque professi sunt: nihil superest, quam ut benevolæ auscultationis argumento intelligant, se non frustra ab Universitate Academica, Hospitio ac Clientela susceptos esse. Arg. 1x. Aug. an. Christiano cdo 1706 xlviii.

*Duo infrequentia Programmata, nomine totius Collegii Philosophici  
proposita sunt; sicut solent facere, quibus munus creandi Ma-  
gistros ex more & ordine committitur.*

XXIX.

DECANUS ET COLLEGIUM  
FACULTATIS PHILOSOPHICÆ,

*Lectori Benevolo S. P. D.*

**M**agistrorum nomen, priscis recentibusque crebro & varie usurpari, nemo est qui ignoret. Ita sane, tum in studiis, olim docentium eruditio disciplinaque; tum in civili vita, dignitatum functionumque plurimarum sive munerum, sive onera designabantur. Quæ de re, anno abhinc decimo, cum publice Magistri crearentur, venerandæ memoriæ Senex, *Matthias Berneggerus*, copiose dixit. Sed & Græci sæpe retinuerunt, vocem usu commodam, interpretatione diferte nulla exprimendam. Hinc *μάγιστρος* apud *Athanas.* in *apolog.* ad *Constant.* & alibi: *μαγιστρον* apud *Suidam* (v. *Menf.* *Glossar.* *Græco-Barb.*) *μαγιστρον* recentioribus Græcis appell-

appellatur. Quid quod apud ipsos Hebræorum magistros, מַגִּיסְתֵּר פֶּלֶטֶן *Magister palatii κατὰ τὸν δὲ*, legitur? vid. *Cl. Buxtorffius in admirabili Lexici Chald. Talm. Rab. opere*, rad. מָגַס. Hodie celeberrimus notissimusque significatus vocabuli in Academico honore remansit: quo *Magistri*, vel sine adjunctione, vel ascito *artium* aut *philosophia* cognomento, illi dicuntur, qui ob comparatam fideliter artium ac philosophia cognitionem, obitaque cum laude examina, vigore Imperatorii privilegii honoribus, & insignibus magisterii publice, ab & in Academia, donantur atque decorantur. Qui magisteriam, imitatione Græculorum, μαγιστήριος vocabulo utentium, Latinis voluerunt obtrudere, nulla idonea auctoritate juvantur. cum præsertim etiam apud Cassiodorum, à vocibus parum Latinis alias non abhorrentem, magisterii dignitatem pro *magisteria* meliores codices reponant 1. Var. 12. Tribuitur autem iis, quos signavi, hic titulus; non, quod perfectio studii philosophici vel in multorum ingenia, vel in plerorumque studia, vel in juvenum Academias sectantium ætatem cadere possit: sed ut mysteriis ejus cum labore & profectu initiati, dum quibusdam præmiis mastrantur, se pariter & alios, ad majora aut paria, exsuscitent stimulentque. Cum præsertim titulus ipse quotidiani monitoris vicem fungatur: præclari magnique nominis mensuram, magnis meritis implendam esse. Hebræi veteres duo constituere magistorum genera. Nam רַבִּי aut רַב, cum plenitudine honoris, ac doctrinæ dicebatur, qui in opere ac re præsentī, i.e. in publico munere doceret. Qui autem ad aliquam quidem sapientiæ facultatem pervenisset, aptusque ad docendum jam videretur, nondum tamen magisterium aut disciplinam publice suscepisset, חֲכָם dicebatur. quasi tu dicas, *socium, familiarem, contubernalem*, denique *sapientem discipulum* Magistri sapientis & Promotoris sui, à quo vel imposta manu, vel pronuntiatis sollennibus verbis, ejus honore cognominis erat ornatus. Hujus propterea plerumque nomen addebatur, certe subintelligebatur: neque eo superflute, magistri sollenne vocabulum recepit, quem societatis, de qua

de qua dixi, dignatio honestaverat. Tale quidpiam solemus attendere in Magistris, quos in Academia creamus. Admittuntur in consortium ejus honoris, quos egregia profectuum ac industriæ specimina, obeundis non inepte seriis in sapientiæ studio ministeriis idoneos ostendere: verum ne admissi, peritis usuque exercitis, variaeque rerum tractatione spectatis studiorum magistris, pares se existiment, imo vero, ut à talibus semper discant, horum amicitia, convictu, auctoritate, generosam perpetuamque sciendi cupidinem expleant, adeoque cum *σοφίς* sive sapientes præstare nondum exacte possint, *φιλοσοφίς* seu veros sapientiæ amatores se diligenter præbeant: utque, sicut antea cœpimus dicere, non statim *רבנים* sed *חברים* existant, non perfunctorie admonemus. Idem in altero honoris Academici gradu obtinet: cum linguarum & artium Logicarum cognitio Baccalaureatus, quem vocant, præmio ad ampliora studia invitatur, & præsertim ad secundam lauream confectandam, veluti pignore laboris oblato, provocatur. Ita nimirum intenditur sedulitas, demitur ambitio, ardentiorisque cursus studii jucundis subinde spectaculis exsplendescit. Quam felicitatem præ ceteris in Germania Academicis, crudelem in modum hætenus turbatis, imminutis, Martioque furore propemodum afflictis, Nostra hætenus, divina largiente gratia, sæpius usurpat, & propediem de novo usurpabit. Die enim Jovis proximo, ipsis scilicet Kalendis Octobribus, DEO AUSPICE, annuente Viro Generoso, admodum strenuo Nobilissimog, DN. JOHANNE CHRISTOPHORO à Draydorsff / Pratore Inclite hujus Reip. gravissimo; cujus nunc est munus Imperatoris auctoritate faciendi Collegiis proficentium facultatem optimarum artium & disciplinarum, potestatem, ut meritis conferant honores & decernant titulos dignitatum scholasticarum (ita Cancellarium describit Magnus ille Joachimus Camerarius in vit. Melanchthonis) Magisterii honoribus, in Brabeuterio Academico, publica solennitate, ornabuntur Sex egregii juvenes, quorum nomina subiectus index memorabit; eruditionem, mores eruditis dignos, mentem

honestissimarum rerum partim opibus instructam, partim, cupiditate flagrantem, publica privataque examina abunde demonstrarunt. Tres item alios, *textum è Lauri baccis* (unde honor iste titulum nactus est) *serum* redimiet. Ita meretur præclara adolescentum horumce indoles, laudabiles in linguarum artiumque studio profectus, & fertilis magnæ spei contentio. Quod si meliorum literarum gnatis aut amantibus (quocunque illos nomine appellare, vel dignitate memorare fas est) benigne, amice, officiose, inditum à nobis Festum, obire ac invisere, quod eo quo par est studio rogamus, lubebit, habebunt illi nos, nec ad agnoscendam istam humanitatem hebetes; nec ad pensandam, si qua facultas dabitur, segnes. Quod superest, jubeat DEUS TER. OPT. MAX. perennare inclytam hanc Rempublicam, florere Scholam. Candidatos nostros ad rerum bene gerendarum, bene restaurandarum artes ac consilia feliciter succrescere. V. Perscr. Argentorati XXIX. Septembr. An. M. DC. XL.

XXX.

**D**Ie Jovis proximo. qui erit mensis hujus Quartus, celebrabitur Panegyris Academica: in qua auctoritate ac permisso Viri Generosi, admodum Strenui, Nobilissimique DN. JOHANNIS CHRISTOPHORI à Drärdorff / Argentinensis Reipublicæ Prætoris ac Tredecimviri Inclyti, Cancellarii Academiæ Eminentissimi, Mæcenatis ac Patroni nostri summa observantia & obsequio venerandi; honores primæ quidem Laureæ sive Baccalaureatus, quem vocant, novem Adolescentibus; secundæ vero Laureæ, sive Magisterii ac Doctoratus Philosophici gradum, decem juvenibus Studiofis; & ex his Uni, qui primum tenet locum, tertiæ Laureæ, sive Poëseos insignia, cum omni jure privilegioque, quod ejusmodi honoribus Academicis Augustum Casarea munificentia Diploma assignavit, honoris, loco, ritumque consuetis tribuimus atque conferemus. In loco & ordine assignando Candidatis secundæ laureæ, secuti sumus rationes legibus publicis descriptas: cumque in examinibus privati publicisque suos singuli profectus ita nobis approbassent, ut nemo non

EOTUM

eorum dignissimus honore, quem peteret, judicaretur, quatuor posteriores sortis arbitrio suam paritatem iussimus discriminare: rati scilicet, necessitatem ordinis facillime ita temperari posse, si fortuna suum cuique in pari dignitate locum demonstraret. Poëtæ iuculum non illi, quæ vulgo obtinet, versuum fundendorum aut dimittendorum sive reicritati sive consuetudini decrevimus: sed quia animadvertimus, & in examine huius rei gratia instituto deprehendimus, Candidatum nostrum præter ingenium subtilissima disciplina aptum, eloquentia, eruditioni, atque Poëtica serio intentum, sedula optimorum Poëtarum lectione, crebraque nec infelici eorundem imitatione, recta ad eam grassari laudem, quæ huius nominis decus non dedecet. Speramus autem, unumquemque pro se daturum operam, ut petiti, impetratique deinceps honores, assidua industria magis magisque excolantur, Deique Opt. Max. gloria, atque Reipublica utilitatibus unice accommodentur. De cetero, publica hac invitatione, omnes atque singulos studiorum & Academia fautores, ut cuiusque caput dignitas, rite cupimus rogatos, ut die nominato, vel presentia, quatenus licet, vel favore nostrum festum honestent, atque pro Reipublica, Ecclesia, Academia incolumitate pia nobiscum vota suscipiant. Perscriptum Argentorati die 2. Aprilis, Anno Christiano M. DC. XLIV.

Insequentia Programmata scripta sunt ab auctore, cum Rectoris Academia officio primum, & secundum fungeretur.

XXXI.

R E C T O R

ACADEMIÆ ARGENTORATENSIS,

JOHAN. HENR. BOECLERUS,

ELOQUENTIÆ PROFESSOR

PUBLICUS,

Civibus Academicis S. P. D.

**I**ndicandum est vobis funus Viri Nobilis, & Amplissimi,  
 PHILIPPI SCHEIDII, Jureconsulti & in iudicio Cæmerali  
 Cæsareo

*Cæsareo inclita hujus Reipublica Advocati præstantissimi.* Effertur is, ex ædibus post aulam Fratrum sitis, horam circiter primam pomeridianam. Vestrum erit, honorifico & frequenti confluxu exequias ire viro optimo, optimorumq; favorem & observantiam merito. Nec enim addam cetera officii ejus invitamenta: quæ Vobis Academici moris erga literatos comitas; debitumque propositis publico nomine cohortationibus obsequium ultro suppeditat. Patriam natus est *μπαλαίτης* Hagendam inferioris Alsatiæ Urbem: parentes, spectatissimum Virum, PHILIPPUM SCHEIDIUM, Civem Primarium; & ornatissimam foeminam, MAGDALENAM, Amplissimi JOANNIS LUDOVICI Greiffen/Prætoris Urbici filiam. His vitæ auctoribus, cum anno superioris sæculi LXX. die Maji xxvii, lucem aspexisset, infantia, per eximiae indolis indicia, ac omnia industriæ, exactâ, puëritiam adolescentiamque vera & expectata laudum fruge nobilitavit: donec mox maturæ juvenutis initium, strenuos in literarum virtutumque studio labores, trivialisque pariter & Academicæ eruditionis impletam mensuram, præmiorum apice honestavit. Accidit hoc, anno ætatis ejus xxvi, computi Christiani, cło Id xcvi: cum, sollennitate publicâ, Doctoratus Juridici insignia, die Augusti Mensis xxxi, Basileensis Academia non sine applausu & congratulatione, bene merenti largiretur; adeoque ceterarum Scholarum & peregrinationum, quas laudato & sine & studio obierat, vota decusque absolveret. Ex eo tempore, augustissima Juris dicendi discendique sedes, Imperatorii judicii ac sententiæ venerandum penetrale, *Camera*, quam vocant, *Cæsarea*, Spiram Nemetum, virum, exercitandæ in celeberrima officina prudentiæ, quam tot laboribus itineribusque sibi comparaverat, cupidum pertraxit. Cujus consilii, inter alia, illum tulit fructum, ut & magnis subinde occasionibus, inter illustres arbitros & idoneos operarum laudatissimarum censores, innotesceret ejus dexteritas: & deinceps, anno Christiano cło Idc xi. præclarissimo *Advocati Cameralis* titulo



tulo dignitateque ornaretur. Regressus Spira Argentoratum Nostram, hic plerumque vitæ exegit, celebri sed quietâ tranquillaque præstantia. Duxerat jam antea primam conjugem Argentorati, anno cło 15 xcviii. die Febr. xiv. lectissimam Virginem REGINAM BOTZHEMIAM, honoratissimi Dn. JOANNIS CONRADI à Botzheim, Triumviri monetarii filiam. Quartam ferme sæculi totius partem expleverat optatissima & per mutuam caritatem fidemque jucundissima societas: cum exempta mariti commercio & rebus humanis uxor, viduum pariter & orbum reliquit. Ac *viduitati* quidem, ab anni M. DC. XXII. m. Martio usque ad Majum vigesimi quinti in hoc sæculo anni, toleratæ, secundis nuptiis prospectum est. Quas id temporis celebravit cum matrona honestissima, CATHARINA TURCKHEMIA, quam & ipsam antea obitus ABRAHAMI BAUMGARTNERI, è præcipuis civibus, viduam fecerat. *Orbitas* autem, ne hoc quidem matrimonio, corrigi potuit. improlis itaque supervixit, cum præmisisset, ut sic dicam, ad æterna gaudia, alteram quoque conjugem, anni superioris mense Martio, donec Octobris proxime prætervecti die xxii, paralyti sinistri lateris correptus (quem casum continua inde destillatio excepit auxitque) nudius quartus, post duodecimam pomeridianam, fata ac dies suos explevit; septuagenarius senex. Quem numerum ætati humanæ consummandæ veluti decretorium & solennem, in Sacris, *Hiero-Psaltes*; in Profanis, *Solon* apud Herodotum designat. Certe quæ mortalium actibus & artibus efficacia aut progressus sperari potest, amplius spatium nec requirere nec ferre videtur. Ita loquimur ex observatione rei, non ex superstitione numeri. cui sicut perfectionem suam, decem *ἑξομάδας* complexam, non denegamus: ita hariolationum sideralium audaciam, & climacteris curiosam *κελσιν*, prorsus adimendam arbitramur. Fuerit sane hic annus, & aliis, & Nostro *climactericus & fatalis*; sed pio rectoque, id est, illo sensu, ut dicamus: *naturas hominum, si nec violentia, nec casus major, nec ἰσοσυρρε-*

*cia, nec liberrima Dei omnia sustentantis voluntas, intercedat ordinaria & communi habitudini, certis annorum spatiis proficere ac deficere, mutationes quasdam & conversiones sentire, indeque sanitate, morbis; vita, morte notabiles mutatione quasi consueta, periodos experiri. Sicut, cum aequali impulsu incitata aliquot pile, si aequale nec diversum per quod decurrant medium nacta sunt, eodem tenore ac tempore exerunt, distinguunt, absolvunt vires suas motusque, ac motuum vicissitudines. Hic subsistimus, ni fallor, si sapiamus, nam fortunæ casus, & liberos eventus & voluntaria cœpta; aut, quæ ex naturalis quidem causæ aspectu, sed indeterminata tantum & generatim, colliguntur, vel per accidens, ut Philosophi dicunt, adhæsisse accessisseque deprehenduntur: hæc, inquam, & ejusmodi alia, nemo cordate cauteque doctus, numerali judicio, aut climactericis divinationibus tribuerit. quas & tum corrumpit vanitas, ubi extra & ultra observationis simplicitatem, ad spem & metum, ad minas & promissa deflectuntur. Denique ipsa observatio (nisi à curiositate, & arrogantia omni penitus recesserit) quid habet, quo se tueatur? observavit hic & ille & iste, quorundam clarorum virorum eventus. hñrum si plurimos numeraveris, respectu eorum hominum, quos præteriit observatio, paucissimi ac pæne nulli erunt. Sed nos mittimus ista: & defuncto Nostro non tam longævitatem vitæ (quæ & ipsa interim felicitatem ejus auxit) quam æternitatem beatitudinis gratulamur: neque tam perfectionem numeri Critici admiramur, quam consummatam virtutis laudem prædicamus. Quæ, ut suprema, sic perennis, honesto fidelique officio memorabit, VIRUM BONUM, JURECONSULTUM PRUDENTEM, CIVEM MODESTUM, MARITUM COMEM, ANTIQUI MORIS FIDEIQUE EXEMPLUM. Quod hoc loco perscribendum duxi, tantum est. V. Argent. 22. Novembr. Ann, M. DC. XL.*

XXXII.

**O**bit supremum diem, Vir in tantum bonus, in quantum humana simplicitas intelligi potest. Non minus enim hoc, quo

quo Vellejus Romanum Antistium annotavit, caractere signari potest ac debet, quam ipso nomine, JOACHIMUS RÜDERERUS. Huic, ut celebres frequentesque exequias eatu, cum prima pomeridiana ex adibus apud Monasterium Penitentium, quas vocant, fuis esseretur, non tam Rectoris denunciatione, quam ipsius Virtutis Humanitatisque postulatione publica invitamini. Nihil figuræ aut ambitioni dabo: interim vere mihi videor posse affirmare, plerosque non intellexisse virum, minime vulgariter laudandum. Nam ut Inclyti quidem Senatus Nostri prudentiæ nemo est incognitus, omniaque penetrat lux illa curiæ, nec latere sinit in obscuro, quod splendere natum est in aperto: ita multitudinis judicium multa subterfugiunt, quæ & notitiam illustrem & exemplum rectissimum videntur continere. Fuitque hoc nec paucorum, nec ignobilium virorum fatum, ut in vita pæne inauditi, post fata inter clarissimos celebrarentur. *Vix recepit Secretam famam*, inquit Seneca. *Quamdiu Catonem civitas ignoravit? respuit; nec intellexit, nisi cum perdidit. Quam multorum profectus in notitiam evasere, post ipsos? quam multos fama non excepit, sed eruit?* Talia disserit plura vir sapiens: solatiumque ex posteritatis, suum cuique decus repensuræ, incorruptæ æquitate sollertiaque concinnat. quo nihil interim opus viris tam serio & simpliciter bonis. Cum enim, Catonis exemplo, nunquam recte faciant, ut facere videantur, sed quia aliter facere non possunt; parum scilicet sua aut virtutis credunt interesse, si negligentiam aut affectum, recte facta prætereant. Quæ vitia si quis expugnare instituat, multum illi exornationis & picturæ & ostentationis induendum erit. à qua sicut optimus quisque, ita præsertim RÜDERERUS Noster plurimum alienus fuit. Non cupiebat ille digito ostendi & inter admirantes conspici: neque minus tamen, vere aperto vivebat ostio. Non optabat in luce publica effulgere: neque latere tamen unquam visus est in tenebris. cumque multi foris splendorem ambientes, domi umbris quibusdam & nocte se involvant, hujus præstantia pari candore nituit, sive ex destinato se prode-

k k k a

bat.

bat, five ex nec opinato deprehendebatur, aut, ut rectius loquar, animadversa subito deprehendi non poterat. Antiqui moris non morosus affectator, sed ingenuus imitator; plurima scientia complexus est: pauca, scientiæ commemoratione, aut nihil prætulit. Quibus ex apparatu & ambitione æstimare claros viros mos est, viso aspectoq; innocentissimo viro, quæsiuissent fortasse claritudinem: at prudentes ex candidissimo sinceræ virtutis genio, qui in ipso ore gestuque omni residebat, actusque profundioris inspectione vel ex tempore emicare consueverat, facile generosum animum rarasque omni ævo dotes interpretabantur. Itaque non moris tantum sui comitati, sed merito laudum tantarum, dare credenda est Academia, quod honorata memoria publicoque elogio defunctum prosequitur. Quamquam illud mori potius quam voluntatitribuendum est, quod breviter & summatim vita ejus ac notitia hic signatur, quæ præconiorum amplitudine volumen poterat implere. Patriam habuit *Croneburgum Manderscheidicæ ditionis oppidum*: parentes, *Virum Amplissimum*, BALTHASAREM RÜDERERUM, *Consiliarium Comitum à Manderscheid, & procuratorem fisci*; tum matronam honestissimam MARGARETAM NÆSIAM SCHLEIDANAM. Ab his in lucem primum susceptus anno superioris sæculi LXVI, die Octobris XXI, mox diligenti educatione focillatam provocatamque indolem, eximiis veluti præludiis mature ostendit. Itaque studiis liberalibus tum domi, tum in Düsseldorfpiensi Gymnasio, annuo circiter spatio, eruditus, in patriam revocatus est anno Christiano M. D. LXXXIII: indeque à parentibus ipsis Argentoratum nostram deducto, hospes præceptorque obigit JOANNES ille STURMIUS, magnum non Urbis tantum nostræ, sed literati orbis decus. Sexennium jam expleverat partim publicis auscultationibus, Jurisque studio exercita industria cum anni M. D. LXXXVIII. mense Aprili domum reventus, annoque insequenti, defuncto interim parente, Argentoratum redux, hinc peregrinandi auspiciu sumsit

peragrataque primum Germaniæ magnâ parte Italiam petiit. cujus visenda pleraque magno studio utilique observatione cognovit: obitis, quæcunque fama aut nobilitate eminent, Urbibus, Academicis, regionibus. Satis constat, auctum viro pietatis ardorem, cum Romanas præsertim superstitiones & Idoli Lauretani quæstuosam fallaciam, aliaque paulo altius expendisset. Quod vel ideo monendum duxi, quia hodie, consuetudine ineptiarum, religionis diligentiam omittunt potius quam intendunt peregrinantium plerique. Nec tacendi essent comites totius itineris, *Petrus Angeli & Gerbardus Robertus* (cujus postea filius non parum, apud nos & alibi, studiorum morumque elegantia effulsit) si paginæ angustia caperet. Sed reduxit Nostrum sua Fortuna in hanc Urbem; domicilium deinceps, interim denuo hospitium præbituram & novæ occasionem disciplinæ. Nam ut *JCorum* placita in ipsa actus ac negotiorum luce, amplius condisceret, in contubernio *Viri Consultiissimi ULRICI DIETERICI* (Procuratoris nomen & munus in Senatu Minore, quem vocant, is gerebat) septennium ferme consumpsit. Interea temporis horrendum Hispanicæ Inquisitionis an dominationis dicam arcanum, ut alia inferioris Germaniæ loca, sic patriam ejus atrociter infestavit. Quo factum est, ut cum illuc se rursus contulisset, non semel in extremum vitæ discrimen adduceretur, inter milites, quibus, crudelitate uti & sævitia, religio vocabatur. Ea res Argentorato virum reddidit: ubi anno M. D. XCVIII. *Judicio sive collegio Tutelari; tum instaurato*, primus *Aquarius* datus duodecim circiter annis, officio honestissimo præclara prudentiæ & fidei laude præfuit. Secuta est *Quæstura Monasterii Pœnitentium*, sicut appellant: hic quoque expertæ antea virtuti, respondit xx. & vii. annorum industria constantiaque. Tot labores insignis honor excepit ante triennium: cum *augusto Senatui*, cui *Majoris vocabulum*, insertus, initia Senatoriæ dignitatis cum ejusdem complemento conjunxit inter *Ephoros Cancellorum*, reique *tutelar*is lectus, *judicibusque matrimonialium causarum collega* additus.

ditus. Expleto in Senatu Majore biennio, *judicio Tutelari*, cujus olim minister fuerat, auctoritate & consilio præesse cœpit. non enim absolvit destinatum tempus, morbo & morte, de qua mox dicemus, præventus. Tetigi potissimos honores: nam quæ per Tribus committi solent dignitatum genera illas, quas prædiximus, præcedere, Senatorium titulum, certo veluti ordine decurso, parere intelliguntur. Matrimonium ejus inter rarissima vel felicitatis vel diuturnitatis exempla referendum est. cum enim anno M. D. XCVII. *castissimam lectissimamque virginem BARBARAM, Quæstorii & Senatorii Viri, GALLI LUCKII, & ornatissima matrona BARBARÆ KRÆMERIÆ filiam* duxisset, tres & quadraginta annos auspiciatissimi fœderis, liberosque decem numeravit. E quibus filius Unicus, *Vir Præstantissimus & honoratissimus, JOACHIMUS RÜDERERUS, paterni & genii & in Quæstura officii successor, stipendique Mauritanii Rationalis, amicus & Fautor noster colendus; superstitum de septem, quinque Sororum matrimonio partim, partim virginitate, & egregiis virtutibus, quibus peræque omnes sunt ornatissima, floret.* Ac DOROTHEA quidem *Viro Spectato & Integerrimo, GEORGIO REHMIO, Quæstori Marciano; ANNA MARIA, JOANNI KÜNMEIERO, scribæ publico districtus Barrensis, viro itidem eximio, MARGARETHA, FRANCISCO CHRISTOPHORO CAROLO scribæ & Secretario Quindecimvirali, spectata & artis & industriæ viro; bonæ bonis, dignæ dignis nuptæ sunt.* MARIA autem SALOME, & CATHARINA, inter lectissimæ virginitatis & sui sexus decora præfulgent. Proposita est veluti summa fati Rüdereriani; nisi quod ultima superest linea: quam consummavit dies Martii XIII, cujus hora XI. meridiana attulit vivendi finem Seni, septuagenariam illam & solennem veluti periodum, annis V. mensibus V. supergresso. Itaque ergo nunc anima ejus in æterna quiete: memoria, in perpetua civitatis recordatione versabitur. cujus interest, ne Vir Pius & Bonus, modestissimus Civis, Senator prudentissimus, nomina publicis exemplis exemplis fœcunda;

da, ingrata oblivione sepeliantur. Sane integritatem & abstinentiam ejus, ne hoc sæculo, ne suspicax quidem, in dubium quisquam vocare potuit. Fides illibata & vere Germana, vel invidia teste: officium cuique & semper paratum: civilitas & moris urbici observantia, indigenis æmulanda, quamvis in novo homine: diligentia & assiduitas nullo senio vitiata: amor honorque studiis & litteris, in remotis quodammodo ab isto humanitatis usu functionibus, ad vitæ ultimum conservatus; obitque, quotiens licuit, dies actusque Academici: comparata & familiariter usurpata librorum, pietatem præsertim informantium aut instigantium supellex: hæc, inquam, & talia, insignem Virum exerte ostentant & semper ostentare debent. Cetera felicitatis elogia, nec pauca illa tamen nec vulgaria sunt. Quo nomine, velut uno complexu, communionem præclaræ fortis & celebritatem, liberis heredibusque gratulamur: nisi potius gratulatione digna est illa hereditas, qua transfusa patriæ virtutis indoles in liberis spirat; quæque, ut Ambrosii verbis hoc dicam, *non lacrymabili dolore percutit affectum, sed memorabili gratia commendat heredes*. Valete, Cives Academici, & bonæ mentis beatæque mortis exempla serio meditamini. Proposit. Argentor. ipso funeris die, Martii Mensis sextodecimo, Ann. Christiani cto lxxc xlvj.

## XXXIII.

**E**Ximia prudentia, rotundaque brevitate, quicquid vivunt in terris homines aguntque, exposuit Democrites, valde notabilis per dictorum gravitatem Gnomologus, cum prodidit: *ὁ κόσμος σκηνή, ὁ βίος παράδοχος, ἡ δὲ αἰς, ἰδέε, ἀπύλιδες*. *Mundus scena; vita transitus; venisti, vidisti, abiisti*. Sane vero *scena est mundus*: quæ modo in theatrum lasciviam Comicorum; modo flagitia, & atroces ausus Tragicorum; modo scurrilem Mimorum dicacitatem; semper autem & ubique, *vanitatem histrionum* emittit ac subinde instaurat. Nam cum cæteræ quidem scænæ temporariæ sint, & fabulæ breves; hæc una scena cum ævo ipsius Universi paria

paria facit; perennisque & continua aſtitatur fabula: adeo nullum vel aſtores vel ſpectatores à repetitione rerum toties repetitarum tædium avertit. In hac ſcena, quæ vel affectatione velamentorum, vel varietate & ineptiis ludicrorum, vel fragilitate voluptatis, vel utilitatis frustratione ſuperat eam, cui comparatur; vivere, agere, ludere, atque, ut multis placuit, perennare, ut res ipſa docet, perire homines videmus: quibus gravius videretur hoc ipſum fortaſſe, quod perirent; niſi inter pereuntia omnia & peritura, quadam, ut ſic dicam, quotidiana pereundi conſuetudine ſecuri plerumque & inopinantes perirent. Conſuetudo, inquam, pereundi, ſubſiſtentibus in hac ſcena otioſe & morantibus obrepi: quæ vitari interim poteſt & debet à prudenter & ſtrenue tranſeuntibus. Nam, ut morari nihil hic eſt aliud, quam mori: ita tranſire, vivere eſt ac conſervari. Ut fiat Democrateum: *vita tranſitus eſt*. Tranſitus, quo tranſimus tranſeuntia, & tranſeuntium pericula, licet non ſine periculo tranſeundi, præſertim niſi matura, niſi ſtrenua ſit hæc tranſitio. Sufficit *venire*, *videre*, tranſire, & mox *abire*. Equidem morantibus etiam, denique (quid denique? illud denique mox erit) tranſeundum eſt, abeundum eſt: ſed tranſitus ille inſructuoſus, abitio infelix eſt. venerunt ſine propoſito; viderunt ſine emolumento; abierunt ſine viatico. Ita venire, eſt incidere: ita videre, eſt cæcutire: ita abire, eſt interire. Tu quoque, ô Democrates, licet ſapienter prævideris, *mundum ſcenam*, *vitam eſſe tranſitum*: quomodo *veniſti*, *vidiſti*, *abiſti*? *veniſti* tu quidem, ſed ut nec auctorem adventus tui in ſcenam hanc mundanam, nec finem intelligeres. *vidiſti*, ut contemneres pleraque, ſed contemnendo nihil proficeres. *Abiſti*, ſed ut, cum ſemper abeundum ſcires, ac ſæpe feſtinandam abitionem memorares, denique cum abires, quo abeundum eſſet, ignorares. *Veniſti*, more plurium; *vidiſti*, more & ritu paucorum. ſed quia ne ſic quidem bene vidiſti, cum pluribus ad plures rurſum *abiſti*. Ut ſatis appareat, non niſi à Chriſtiano homine mundum ut ſcenam intrari; vitam, ut tranſitum,



litum, maturari feliciter posse. Hi soli veniunt recte, vident prudenter, abeunt tempestive & prospere. Cujus rei exemplum potest esse ille ipse, *Vir Amplissimus & Honoratissimus*, cujus funeri indicendo hæc præmisimus, ADAMUS SCHIFMANNUS. *Venit is in hanc Universi scenam, ut supra ex Democrate cœpimus dicere, non histrio ineptus, sed prudens spectator fururus, anno Christiano M. D. LXV: patriam Clagensfurthum Carinthiæ, Ducum quondam sedem, quam prisca Claudiam dixerat; parentes nactus Virum Spectatissimum TIBURTIVM SCHIFMANNUM, Mercatorem primarium, & Feminam Ornatissimam CHRISTINAM GREIFFIAM. Horum cura adgubernante, pueri indoles statim prima ætate litteris imbuta, cum amplio rem subinde de se spem concitasset, anno ætatis quintodecimo (erat is superioris sæculi LXXX.) Argentoratum in studia missus est. Ubi cum in scholis classicis per triennium strenue se gessisset, calamitas parentum, quibus religionis constantia exilium consciverat, filii quoque properantes ad majora profectus abruptit, genusque studiorum ac vitæ mutavit. Ex eo tempore, variâ suam industriam operâ viris bonis & honestis approbavit: donec auctorem certioris fati invenit Virum Amplissimum & Prudentissimum, DANIELEM à MOLSHEIM, XIIIvirum Inclyta hujus Reipublica gravissimum. Sub hoc, mercatorem fidelissimo ministerio ita tractavit, ut & viventi domino esset gratissimus, & à defuncti vidua, quamdiu superfuit marito, in familia retineretur. Biennio post hujus quoque obitum, anno scilicet M. DC. XXI, ipse de matrimonio & re familiarum instituenda cœpit agitare, ducta mox domum Ornatissima Letissimæque Virgine MARIA, Nobilis & Amplissimi Viri, GEORGII FETTICHII Patricii, filia. Hæc duorum liberorum parentem fecit. E quibus Filia MARIA ante quinquennium, suum diem explevit; Filius autem ADAMUS bonis litteris in Academia nostra deditus præclaræ spei semina non omittit (nec omittet spero) spargere. Quæ ut ad copiosam messem perveniant, patriæ & commu-*

nis rei causa optamus. Verum nobis ad Parentem reverendum est. quem ob perspectam pluribus rebus tractandis fidem, experientiam, integritatem, prudentiam Respublica Nostra propius sibi vindicavit. Anno enim hujus sæculi XXXI. in Senatum Minorem lectus, expleto de more biennio, amplissimo Cenforum collegio additus est. Anni trigesimali noni initium clarissima Amplissimi ordinis sive Majoris Senatus dignitate ornavit virum. Quibus in honoribus, ceteroque vitæ actu, prorsus ita se præbuit, ut reprehendendi cupidus, nihil ob quod merito debeat male audire; laudaturus vero solidam nec infœcundam materiem inventurus videatur. Tam sincera morum reſtitutione, sapiendique dexteritate & pietate, publicam privatamque vitam à sæculi pravitate & aberrandi facilitate, ad exactam præstantiæ normam conformavit. In scena vitæ nec otiosus, nec curiosus; sed gravis & utilis spectator fuit. Vidit ille, quid in beatiore sæculo ultimum, quid in calamitoso primum esset. Vidit Germaniam longe alia, quam olim viderat, facie. vidit omnia sceleribus & scelerum pœnis plena: & summam humanæ felicitatis, in VANITATE definentem. Vidit, & in solatio tristis spectaculi habuit, non videre diutius. Id enim *abitus* Christiani votum tum alias serio concepit, tum per valetudinis ultimæ tempora, quæ ipsum superioris anni autumnio finiente adorta, die hujus mensis quinto hora VI. matutina, cum vita reliquit. Vestrum est. Cives Academici, frequentes ire exequias, Viro optimo, Civi honestissimo, Senatori prudentissimo: cujus memoria sit in benedictione sæculi; Sicut anima est in æternitatis beatitudine. Efferetur ex ædibus in platea ab Allio dicta sitis, hora II. pomeridiana. Propositum die funeris, VIII. April. an. M. DC. XLI.

## XXXIV.

**R**arus in nostra Universitate honor, *indivivum funus feminae celebratum*. Rara, inquam, ejusce rei, non tamen nulla sunt exempla. Cum enim, non tantum sexus ipse magnis sæpe virtutibus abundet, sed consensu quodam pruden-

prudendum, uxores maritorum dignitates, privilegia, honores, pro capto sui decoris, participant: satis apparet: officii publici comitatem non usquequaque intra virorum cultum arctandam, sed pro conditione meritorum ad muliebria etiam elogia porrigendam esse. Decuit nos reverenter id expendisse, in vulnere domestico *Viri Nobilis, Amplissimi, Prudentissimi*, MATTHÆI BRAUNII, Consularis Emeriti: qui nudius quartus *Uxorem Carissimam, Matronam Ornatissimam*, MARGARETHAM, amisit. Cujus & origo claritudine præcellit famuliæ; & vita satis est nobiliter acta. Parentibus enim genita est *Viro Nobili, Amplissimoque*. JOHANNES SCHATZIO, *Tredecimviro de augusta hac Republica* præclarissime merito, & *Leclissima sæmina* SABINA BISCHOFFIA, anno sæculi præcedentis LXX, die Octobris tertia. Auspicatam nativitatem excepit prudens & pia educatio. qua factum est, ut & puellaris æras primula elementis virtutum, quas adolescentior perfecit, maturior exercuit, formaretur; ac quodammodo componeretur: & secundum mentis morisque reſtitutionem elegantia accederet varia: qualis vel puellam adornare, vel commendare virginem, vel juvare solet matronam. Ergo ad ordinis sui laudem & decus ematuruit, placuitque in matrimonium supra laudato, Domino Consuli. qui eam domum duxit an. Christiani computi clō 10 xcvi. die Novembris nono & vigesimo. Fuit hæc copula, mutuo amore, sæcunditate, & præsertim diuturnitate perquam prospera. Expleta enim in conjugio integra ætate humana sive sæculo (quod cum ultra triginta annorum spatium nonnulli vereantur porrigere. nobis intra quinquagesimum hic contingi sufficit) quid est quod amplius vel amorum vel votorum conjugum sine frustrari aut distingere conjuges queat? Parior, & mox caduca prolis felicitas, sed tamen felicitas fuit. Vehementer enim & ingratum & ignarum erga divina se præstiterit mænera, qui vel temporis brevitate mensuram beneficii metiatur & magnitudinem, vel amissionis dolore obruat acceptorum memoriam. Filiolum, quem novis

conjugibus annus M. D. XCVII. Augusti mensis dies trigessimus dederat (*Johanni Martino* nomen Christiano ritu inditum) insequentis anni Martius ejusque dies XIII. rursus ademit. Exinde orbitatem domus, sanctissimis Dei placitis solari, aliorumque benignioris facii munerum comparatione supplere, inter artes erat. Atque ita cum domui suæ præfuisset Matrona Honestissima septem & quadraginta circiter annis, die hujus mensis quartodecimo, hora VIII. pomeridiana, omnis mundani operis & laudis & vitæ suæ terminum attingit: brevissimo, id est, pridiano duntaxat morbo conficta. Credibile est, parum in tempore obvenisse hunc casum, Amplissimo Marito: cujus fessâ jam ætas & valetudo, præsidio tali plurimum recreabatur. Sed tempestiva sunt, quæcunque in quamcunque tempestatem ab ipso supremo Numine dispensantur: cujus arbitrio bonitatisque permessa, quæ nobis videntur aspera, facile mitescunt. Ne dicam, de magnis utilitatibus, in quas pietatis auspicio desinunt humana detrimenta. Equidem ad cælestia, ad æterna & vere desideranda, non inter postrema invitamenta, mentem erigit, amissarum desiderium necessitudinum, & illa cogitatio, qua felicitatem eorum meditamur quos præmisimus. & boni incomparabilis usum iis gratulamur, quod speramus interim, & vel ob hoc ipsum, ut cum nostris denique fruamur, fortius ac diligentius speramus. Quinimo quod intercipere videbatur nostra vota, promoveri potius ea potest: ut deposito quasi omni terreno onere, nec affectu caritatum morientium retentati, *ad Christum Nostrum levius subvolemus*, quæ Hieronymi in hoc argumento sententia est. Ibi vivemus apud viventem, redempti cum Redemptore, cum magno illo & mysteriorum liberationis opulentissimo Redemptore; quem cum exemplar exercitiæ agitæque per omnia casuum experimenta virtutis *Jobus* animo subinde intueretur, vidit in hujus mundi miseriis & ænigmate, quæ visurus esset clarissimo oculorum conspectu in resurrectionis & consummationis beatæ lumine. Quale visionis exemplum reliquisse Marito videretur

pie

Pie defuncta conjunx; cum illud Magni Jobi oraculum & vindicaret sibi dum vita manebat, & post fata, sermone funebri omnibus commendari veller. Efferreretur funus ex ædibus arcam summi templi anteriorem spectantibus, hora I. pomeridiana. Quod ut frequentia vestra cohonestetis, vestramque erga *Ampliss. Cos.* observantiam talis pietate officii declareris, ipsa vos res, & Humanitas, cui præcipue studere debetis, exhortatur. Propositum die funeris XVII. Aprilis, an. Christian, c15 Idc XLII.

## XXXV.

**A**Djecit rursus fatis rei scholasticæ Argentoratensis forensem administrationis semestris periodum divina bonitas. quæ ante omnia hoc tempore, quo Magistratus Academici novos honores ineunt, & agnoscenda serio, & pie prædicanda, & deveneranda est sollicitate. Id quod religio piis, eruditio doctis, prudentia cordatis facile inculcat. Neque enim vel modus hujus scripturæ, vel instituti ratio fert, ut differamus talia exponendo potius, quam attingendo perstringamus. Illud unum ex multis nunc subjiçio civium Academicorum sollertix: ut expendant tempora reip. *literaria, & casus & statum, & fatalia omnia.* Atque ab imperiorum quidem fortuna studiorum semper pendisse fata, notius est quam ut moneri debeat. Quo nomine, quas florens adhuc opibus & majestate Germania Scholas & Athenæa numerose ac in ornamentis suis ostentabat, nunc bellorum civilium malis rerumque perturbatione ad stuporem consternata, pro bustis aversatur; nec dum dinumerat quid aversetur; quippe cui nec memoriam ad dinumerandum, nec ad expendendum cogitationem vacaverit hastenus recolligere. Quare si contemplatione tot casuum, tot rudum, ad providenda, quæ deinceps imminet, acuamur; si præteritorum recordatione, æstimatione præsentium, disciplinam ingrediamur futuri: primo quidem quam longe à pace sua imperium abest, tam procul videri posset à sui restitutione adhuc distineri liberalium humanitas studiorum. sed hæc conjectatio, intra

acumen & metam divinandi subsistit. longe majoribus absumus spatiis ab eo quod optamus, neque tam mature (si modo unquam aliquid ejusce rei maturabitur) sed longe longeque lentius sperandum est. Pæne dixerim, non intelligere eum vastitatem patriæ atque omnis honestioris Musæ, qui in consopitis armis statim efflorescere studia posse existimat. Jacebunt per campos telorum fragmina, latebunt in agris ferri lapidumque pondera ac ostendicula: neque vel floribus artium illi, vel hi segetibus erunt idonei. Denique, ut clarius loquar cum clarissimo scriptore, *ingenia studiaque opprefferis facilius, quam revocaveris*. Præsertim cum præter *perversissimam agendi statum literarum rationem*, de qua alibi nobis dissertatum, non levia durioris in posterum fati & mutationis, si non ruinæ, omina, in oculis nostris ac pæne in manibus versentur. Non deplorabo jam fastidium, rei quondam in tantum æstimatæ, & omnium ordinum hominumque judicio pretiosissimæ: contemptum publicum & & sollennem literarum & literatorum; quibus olim favor Principum, munificentia Regum, studia populorum, non opinionis ergo, aulicove schemate & perfunctoria simulatione (sicut plerumque hodie moris est) sed seria sinceraque benevolentia bonaque fide patrocinabantur. Propiora sunt ac intestina, ut sic loquar, præfagia in proposito doctorum, in disciplina discentium. Sæpe reputo mecum, quæ ante sæculum & amplius, virtutes instaurationem disciplinarum publice utilium promoverint, barbariem extirparint. Plurimum diligentia & eruditionis observares: ambitionis parum aut nihil. Studium publici decoris, gravitate eximia præpollens: reverentia erga Deum, concordia cum collegis; æstimatio alieni laboris nec subdola, sed simplex & ingenua: domi dilectio, ad externos humanitas: dissensio citra similitatem; & controversiæ non odiis extractæ, sed pietate ac indulgentia præcisæ. Juventus grata & avida mente auscultare Doctoribus & obedire: fas metuere, jura intelligere, disciplinam capere: fastum Thraconibus relinquere, modestia inter pares, reverentia erga  
sup-

superiores uti : ignorantiam in probis , eruditionem inter pulcerrima, virtutem inter præstantissima numerare. Hæc & similia sicut olim sæculi & studiorum fortunam tanquam fatalia fulcra sustentabant : ita , postquam diversa omnia fieri videmus , fatalibus vitiis atroces exitus imminere, non jam curiose suspicamur, sed merito veremur. Cujus metus ut vos socios habeam , Cives Academici, publici ac vestra plurimum interest. Fiet enim hoc pacto, ut singularem Argentoratensis Academiae felicitatem agnoscatis pia reputatione , disciplinam ornetis innocentia & obsequio ; laudem propageris doctrinis & industria ; Professores ametis colatisque vero affectu & fide , denique novum RECTOREM *Magnificum & spectabiles Decanos* accipiatis grate, revereamini sincere, voluntati eorum & legibus constanter pareatis. Tali mente vos comparere cras volo, hora II. pomeridiana, cum in Brabeuterio, quod vocant, nostro, *Vir plurimum Reverendus, Clarissimus, Excellentissimusque* DN. JOANNES CONRADUS DANNHAWERUS . *SS. Theol. D. P. P. & Ecclesiastes dignissimus, Tutor, Collega, Compater noster non sine observantia colendus*, gubernationis Academicæ munus, Venerandi Consilii Academici suffragiis, & Inclyti Magistratus approbatione, delatum, cum bono Deo feliciter suscipiet ; *legesque de disciplina & officio studiosorum* publice prælegentur. Valete. Proposit. III. Maji an. Chr. cld lbc xli.

## XXXVI.

Postquam divina voluntate ad aliam stationem evocatus, dimissionem ab iis, quæ hætenus gessi, officiis apud Inclytos Reipublicæ Proceres, Dominos meos Clementes, reverenter cœpi petere : optabam sane, tam tristi scriptione supersedere, qualem nunc mihi imperat Viri Optimi & præclare meriti excessus. Die enim Dominica, quæ fuit Januarii septima, circa meridiem Deus Opt. Max. è mortali vita ad immortalem transtulit, quem hætenus *Ecclesia Argentoratensi Theologum & ad D. Thomæ Pastorem longe dignissimum, fidelissimumq;* commodaverat, *perquam Reverendum, Clarissimum,*  
*Doctissimum*

*Doctissimum*, M. FRIDERICUM SCHÖTTELIIUM: cujus memoria sit in laude ac veneratione perpetua! Natus est erat Argentorati, anno Christiano M. DC. die Julii triadecima: parentibus inter cives honestate & virtute probatissimis, ANDRÆA SCHÖTTELIO, qui chartariam officinam exercuit, & APOLLONIA HEISCHIA. Horum cura & educatione, Deo in Ecclesia primum consecratus, deinde in Scholis eruditus, anno ætatis XVIII, è Gymnasio in Academiam transiit, *primamque philosophia lauream*, quam vocant, accepit: tanquam pignus majorum præmiorum, quæ singulari industriâ magis magisque in posterum emeruit. Cum enim sapientiæ doctrinis animum probe excoluisset, Academicique laboris pulcherrima edidisset publice specimina, anno ætatis XXII, *Magister & Philosophia Doctor*, loco inter XV. competitores tertio, creatus est. Hinc Theologiæ se totum dedit, interjectoque biennio, insignes jam profectus in celeberrima *Jenensi Academia*, collocuplevit, & sub præsidio *Venerandi Theologi, Dn. MAJORIS, Professoris ac Superintendentis* (cujus merita in bonis recordationibus grata posteritatis pervigebunt) disputatione feliciter suscepta, sua studia publicavit. Quod nec omisit in patria facere, postquam peragratis compluribus locis, cum & Lipsiensi Academiæ aliquod tempus dedisset, plenus bona studiorum morumque fruge rediit. Excepere eum mox labores, officia, honores, quibus dextrè fungendis se tanto studio præparaverat. Anno enim XXVII. *Entzheimensi*; anno, qui ab hoc secundus ivit, *Eckboltzheimensi Ecclesia* pastor datus: an. xxxii, in Urbem vocatus, *Diaconatum ad D. Thomæ*, legitima electione suscepit. In qua eadem Ecclesia anno post tertio, *Pastor* constitutus, & simul *Canonici Thomani* titulo honoratus est. In his officiis atque dignitatibus, talem se præbuit, piè fortiterque agendo & patiundo, ut consensu honorum omnium vehementissime commendetur atque desideretur. Neque sane in angustias hujus paginæ concluderim materiam perpetuæ laudis atque gloriæ, quæ in ore Civitatis Argentoratensis, in animis colle-



collegarum & auditorum, in monumentis insignium meritum semper perennabit. Accedit, quod luctus, facundiam, & verborum abundantiam excludit ac restringit. Quidni enim verissimo doloris sensu illacrymare debeam acerbæ morti ejus Viri, quem in Ecclesia, ut Doctorem; in collegio, ut Patronum; in civili societate, ut Amicum & Fautorem; in exemplo vitæ, ut Magistrum & Præceptorem veneratus sum: cujus sermonibus publicis eruditus, privatis recreatus sum: cum quo dolui, cum quo speravi? Et illi quidem dolendi sperandique finem beatitudo æterna attulit: mihi, dum ejusdem boni societate potiri continget, novam de novo ostendit Deus viam, quam ingrediar & ambulem: nunquam omisurus interim memoriam tanti viri, quantum commendare pro merito supra meas vires est. Privatæ ejus vitæ idem tenor, eadem restructio. Maritus comis & prudens: Pater humanus & gravis: Amicus constans & fidus: hæc & ejus generis alia nomina, per omnem officiorum virtutumque seriem, verissimis viri elogiis adscribuntur. Candor in convictu, moderatio, prudentia, suavitas eximie in eo enituerunt. Contraxit autem matrimonium, anno XXXI, ducta domum uxore lætissima Virgine ANNA MARGARETHA, Viri perquam Reverendi Clarissimique DN. M. JOANNIS CHRISTOPHORI CAROLI, Ecclesie ad D. Petri senioris Pastoris fidelissimi, & SALOMÆ VOLMARÆ, pp. mm. filiâ: quæ felici partu octavum fecit eum Parentem. E qua subole, una filiola decessit, supersticibus tribus filiis & quatuor filiabus: quorum indoles partim eximiis jam documentis effloruit, partim sui ortus & domestici exempli spe gratiaque commendatur. Deus sospitet amicam domum: & in ea matronam viduam, cum laudatâ prole, solatio, sanitate, profectu, fortunâ recreet cumuletque! Ipsum pie defunctum Theologum nostrum, jamjam ista circumfluunt, quæ optari olim potuerunt. *Dominus cæli & terra dedit illi lætitiâ pro tristitia!* quo solenni voto, ultimas pro

m m m

Audi-

Auditoribus suis preces publice in suggestu effudit, cum in festo circumcisionis Dominica, pro felicitate novi anni Deo supplicaret. Illo ipso die in ægitudinem incidit, omniaque, sicut Christianum & Theologum decebat, ad red-auspiciandum in altera vita annum sine fine, & percipienda veræ pacis bona, comparavit. Multus illi de ovibus suis sermo, multa pro publico egregio, quod Deo commendavit, cura. Intentio precum, usque ad extremum halitum, acerrima. qua de re præsertim testari poterit abunde, qui ægrotanti assedit, omnemque amantissimi collegæ & fidissimi amici sollicitudinem operamque impendit, Vir Reverendus Doctissimusque DN. M. CHRISTOPHORUS ALGEIERUS, Ecclesia dictæ Diaconus dignissimus, Factor noster honorandus. Hora suprema jam ante dicta est: Funus hodie hora I. pomeridiana effertur ex ædibus, quas incoluit, in area Thomana sitis. Vestrum est, Cives Academici, magnâ frequentiâ exequias ire præclarissimo & viro & Theologo, eademque opera Deum rogare, ut publice privatimque sarciat jacturam, quæ in hac morte multiplex facta est. Propositum Argentorati die XI. Januarii, quem fasti insigniunt elogio FELICITATIS, tanquam omine & argumento ejus voti, quod, pro incipientis anni prosperitate obtinenda, vobis omnibus & singulis impertior!



*Sequens Programma in Academia Regia Ulbsalienſi  
propositum est.*

Quem inter commilitones, singulis hætenus hebdomadis, usurparunt recitandi morem, ejus specimen Vobis quoque, Patres Academici, congressu sollenniore, approbare cupiunt, lectissima Juventutis Academicæ decora:

decora : Comites , Barones , Nobiles , & ex reliquo Studiosorum ordine , alii. Occasionem & materiam sup-  
 peditavit , quem publica prælectione interpretandum sus-  
 cepi , Historicorum venustissimus Q. Curtius. è quo  
 CAUSSAM PHILOTÆ , distributis inter eos qui  
 exerceri cupiunt , personis , meditationi litterariæ apta-  
 re placuit. Quamquam autem in caussis majestatis non  
 tam memorandis quam explicandis , plane singularis sit  
 & prudentia Curtii & facundia : in Philotæ tamen nego-  
 tio , se quodammodo ipse superavit. adeo nihil desideratur  
 eorum , quæ in hoc argumentum vel autoritas juris , vel  
 utilitas regni , ex voto Principum & invento aulicorum in-  
 vexit. præsertim in silentii culpa. quam non alibi ad hoc  
 exemplum tractatam reperias. Sed , ut desit argumenti  
 commendatio , in ipsis illustribus & honestis nominibus ,  
 quæ mox annotabuntur , satis est momenti , ad benevo-  
 lentiam Professorum demerendam , & Studiosorum inci-  
 tandam industriam. *Alexandri Regis* personam geret , Co-  
 mes NICOLAUS Bræhe. Inde consiliarios Regis &  
 ministros , *Erigyium* quidem Comes GUSTAVUS  
 ADOLPHUS Torstenson ; *Cænum* , AUGUSTI-  
 NUS Kewenhiller ; *Hephastionem* , CAROLUS SPARR ;  
*Craterum* , PETRUS SPARR , *Barones* ; *Perdiccam* ;  
 ARVIDUS Jfvarsson ; *Leonnatum* , PETRUS Bonde /  
*Nobiles* , referent. *Cebalini* partes AUGUSTINUS  
 Leyonstildt ; *Nicomachi* , GUSTAVUS Silfverstiern ;  
*Nobiles* , sustinebunt. *Belonis* titulus , JOHANNI PAU-  
 LINO ; *Philota* nomen MAGNO PONTINO cessit.  
*Amynta* pratoris vocabulum assumet JOHANNES Bergh.  
*Metron* erit , PETRUS JOHANNIS MELANDER. *Pra-*  
*conem* aget PETRUS NICOLAI. *Militum* vicem obi-  
 punt CHRISTIANUS Wilschhausen / OLAUS Blij.  
 Præfabitur toti exercitationi M. JOHANNES TIDE-  
 RUS. Exercitatio ipsa , constat iis fere partibus ; *Phi-*  
*lota* silentium in comperto crimine conjurationis detegi-  
 tur.

tur, inquitur & condonatur : post veniam datam de-  
nuo inter consiliarios Regis disceptatur : Tum in judicio  
accusatur & defenditur : *Inde* nova deliberatione tormen-  
tis dignum decernitur : *Denique* expresse tormentis crimi-  
ne, Philotas non jam ob silentium, sed ut sceleris au-  
ctor & particeps capitis condemnatur. Quibus commo-  
dum erit, auscultare, suumque tali officio erga illustres  
familias studium, & in bonas literas amorem testari, illi  
rogantur, ut die crastini, qui erit hujus mensis xxiv,  
peracta re divinâ, hora viii. matutinâ, in Auditorio  
Gustaviano convenire non graventur. V. Upsal.

x. Kal. Novembr. clc lxx.

REVE-

REVERENDISSIMO & CEL-  
SISSIMO PRINCIPI AC DOMINO,

DOMINO  
LOTHARIO  
FRIDERICO,

Episcopo Spirensi, Coadjuto-  
ri Moguntino, Præposito Weissenburgensi  
& Odenheimensi, S. Rom. Imperii  
Principi, &c. &c.

DOMINO MEO CLEMEN-  
TISSIMO

Vitam, felices annos, gloriam ac  
salutem perpetuam!





**T**ertius & vicesimus præterit annus, ex quo Princeps ad Germaniæ tutelam genitus, omnique summo loco digna virtute adornatus, JOHANNES PHILIPPUS, Moguntini Electoris eminentissimum nomen ac munus, capessere cœpit. Ab eo tempore, singularia prorsus extant, & ad Imperii salutem pertinentia tanti Principis merita, quibus singuli anni multiplicatis titulis memorias hujus sæculi longe lateque impleverunt & illustrarunt. Sed ista quidem æternus annalium honos, & incorruptæ posteritatis testimonium inanet. Unum est opus, maximis quibusque comparandum, quod hujus anni finem insignivit, & tantum apud omne genus hominum, ad quos aliqua honesti & reipublicæ cura penetrat, applausum concitavit, ut loquacitas undique subito commota, in parte officii numerari concupiscat. Sufficit equidem ejus, quamquam in senium proventa, ætas, curis & laboribus; quibus strenuè assuetus, Reipublicæ servire, occupationibus vel continuare vel distinguere, id deum vivere, existimat. Ne tamen Principalium benefactorum seriem, Principum mortalitas interjungere queat, quæ potest esse æternitate Reipublicæ dignior proviso, quam si certus quærat successor, antequam succedendi necessitas supervenerit. Quâ in re magna profecto laus versatur ejus, qui sibi videtur senex, cum aliis non videatur. Dei nimirum cuncta moderantis hoc munus est, ut cum Eminentissimi Electoris voluntate, illustrissimi Collegii Cathedralis consensus, unanimo per omnia voto congrueret

eret. Non potuit non optimus esse & dignissimus, qui hoc modo electus est COADJUTOR. Mirum ergo non est, quod aures Tuæ, LOTHARIE FRIDERICE, Coadjutor Moguntine, Princeps Eminentia & Celsitudine Inclytissime, gratulationibus; manus osculis fatigantur. Dei consilium, Tuam virtutem, Imperii felicitatem, ut admirentur, ut exoptent, ut venerentur, quicunque sincerè Te amant, paterè quæso; & indulgentiæ Tuæ hoc primum specimen exhibe. Nihil divinius in Principe, quàm amare cives Imperii & suos; nihil felicius, quàm amari, si non ubique gentium, certe in Germania. Quamquam Tu pridem, ut domi visu, ita foris auditu venerabilis, generis humani affectus possides; quasi de Te in suffragium ivissent communia populorum studia. In quibus tamen, Germanis certum est, non vinci. Ac, si hominis privati animum posset intrare, species dignæ Republicæ orationis, fortasse ita Te Germania alloqueretur: Agnoscimus, Princeps magne, Divinum beneficium & consilium, quo res nostras beare voluit, cum Te Electorum Primo in partem curarum sociavit, & in nobilissima consilia operaque successurum destinavit. Age, felicibus auspiciis obsequere Deo, ama Rempublicam, supera spes & vota sæculi. Accedis ad res minimè securas. Sed ut Securitas publica Deo cordi sit, non exigua Tui muneris pars erit. Vidisti Electorem Eminentissimum eo stare & splendere loco, qui inter disjuncta, conjunctionis; inter dissona, concordia; inter aspera, mitigationis; inter dubia, firmitudinis & stabilimenti opem portendere, & subsidium præstare, ex ipsa Reipublicæ formulâ potest polletque.

Onerosum esse creditur, succedere optimo Principi: sed nempe illi onerosum est, qui dissimili ingenio, qui impar artibus, modo laudatis, noscitur. Tu divino humanoque judicio in proximam Augustissimo capiti necessitudinem vocaris: Tu Imperatoriis curis sublevandis, Tu Procerum Civiumque desideriis explendis, studiis demerendis,



rendis, aptissimus merito concelebraris. Nihil est igitur, quod à Te non expectet Aula, non speret Pax, non expectat Libertas. Quis est ille, qui nationum Germanicarum tendentia sæpe in diversum studia, ad commune bonum contemperare novit? qui comitiorum æstus temporivâ sedare sollertiâ, legum in duraturam firmitatem colligare vincula, spes merusque ex usu publico incitare aut inhibere, tristibus solatium; lætis modum; perplexis perspicuitatem, arduis facultatem dare didicit? qui amicus amicis, nec inimicus inimicis, vicinorum & viciniæ studiosus, exteris comis, æquus omnibus amorem & venerationem foris domique meretur? Quod est illud fidus, quod Augustum Solem benefica partientem vasto corpori lumina, inflexo cursu comitatur; nec à suis alienum ducit partibus, quod conjunctione aliqua publicâ toti sociatur. Eat per immensam artium optimarum seriem votorum publicorum cupiditas, & requirat, quis & quantus esse debeat, qui Primi in Imperio post Augustum Principis muneri destinandus sit. In unum nomen responsa omnium consonabunt: unum erit exemplum, **LOTHARIUS FRIDERICUS**, de quo dicatur, **HIC EST**. Neque hæc tam concors sententia, cuiquam in Imperio tot illustribus viris subnixo aliquid detrahit. Nam ut quisque est vir optimus, ita spectatæ per omnia virtuti minime invidet, sibi que & Reipublicæ potius gratulatur de felici electionis tam memorabilis successu eventuque. Ad eligentes certe magna & perpetua pars hujus gloriæ pertinet. Illorum splendidissima omni nobilitatis & præstantiæ genere nomina etiam sera posteritas venerabitur. His gratias agent, qui **LOTHARIUM FRIDERICUM** norunt, qui reverentur Imperatorem, qui amant rempublicam. Etiam exteri scire cupient, quæ numeraverit hoc tempore decora sui ordinis venerabile Collegium: ut tanta pro Imperii salute consensio, tanta virtutis, ad virtutem meritis honoribus ornandam, unanimitas, ut sic dicam, existere inter omnes potuerit. Quàm erit dictum

n n n

magni-

magnificum , quam lectu suave , quicquid de Tua electione , Annalibus Moguntinis subinde instaurandis inferetur ? Faxit Deus immortalis , ut , quæ hinc procedet longissima annorum series , operi det materiem Tua merita ad sidera laturo , neque præstantissimis quibusque historiarum argumentis cessuro. Juvent alios cruenti Martis supellex , & tropæa & triumphi. Tuo muneri , Princeps Reuerendissime , pacifica sunt officia proposita : Tibi meliores &

### plures de pace triumphos

fata pollicentur , quàm de bello quisquam unquam potuit referre. Satis prodegit sanguinis , satis in sua viscera strinxit ferrum Germania superiore & hoc sæculo. Tempus est , ut iras & arma tantum in hostes Christiani nominis habeamus. Quamquam nescio quis temporis genius , pacem , tam pretiosè , tam sero redemptam , in qua necdum lethifera Patriæ vulnera cicatricem duxerunt , inquietare , sparsis dissidiorum seminibus , suscitatis occulti ignis scintillis , non cessat. Hoc opus , hic labor est , hoc stadium , ubi Tua decurrat industria , Quietis & Securitati publicæ Imperatoris & Imperii omni contentione indefessis vigilis consulere , occurrere suspicionibus , obniti litibus , prospicere futuris , mederi præsentibus. Hæc Deo carissima , sæculo necessaria , posteris salutaris est occupatio ; hæc propria Archicancellarii virtus , extra & supra concertationes , pacem semper tenere , moderari , ornare , elaborare , conservare.

Ut Augustum caput , honore , auctoritate , potestate valeat excellissimè ; ut omnia amplissimi corporis membra , cultu & obsequio ad Reip. felicitatem necessario respondeant conjunctioni capitis & membrorum , quæ si laxa est , nulla sit oportet : hæc est meta , quam contingere amant , qui ex præscripto Legis Auræ Carolinæ Reipublicæ se constituerunt consecrare. Accedit , atque felici-

felicitatis simul & perpetuitatis Imperii summam ostentat, Pactio Pacis Monasteriensis & Osnabrugensis: quæ tantum non clamat hortaturque, ut Regum Regnorumque compaciscentium amicitia ex æquo colatur retineaturque, in quantum fieri potest. Metuunt enim non injuriâ, Germaniæ suæ revera studiosi, ne periculosum sit, quicquam ab altera parte dissolvi, quod communi partium confessione semel pro salute Germaniæ constitutum est. Non est enim hæc ex amicitiarum vulgari genere, sed inter ipsos necessitudinis publicæ articulos coiit. Quam nulla ratio debet, sed sola fortunæ publicæ ingens commutatio, quam Deus ne sirit evenire, potest diffuere. Non vivimus sane eo sæculo, quo conjunctissimorum etiam amicorum rationibus publicè semper idem prodesse & nocere queat. Sed, quæ multâ varietate discrepant, prudentiâ divinitus gubernatâ conjungi, inter pignora, si ullius certe Imperii Germanorum Romani, fatalia semper fuit, eritque. Neque ullius gentis, ullius sæculi, exemplum licebit ciere, ubi peræque difficilis & impedita fuerit Reipublicæ administratio, ac est hodie in Imperio. Verum in ipso querelæ argumento innascitur non iners solatium, quando ex memoria anteaucti temporis recordamur, Deum, regnorum regnatorem Deum, inter desperata rerum, velut ex machinâ statui nostro, quem ad finem mundi conservare decrevit, præsentaneam semper opem tulisse.

Tam arduis intento curis Tibi, Princeps Optime, contingat, vita longævâ, valetudine prosperâ, fortuna propitiâ, egregiis ministris, fama secundissima uti: annosque numerare successibus, menses distinguere laudibus, dies describere meritis. Ut publica hæc vota multis decenniis nuncupentur exsolvanturque, pia assonet temporique debita, nec cælesti benignitati Tuæ aspernabilis vox,

*Eminentia ac Celsitudini Tuæ*

*Scr. Argentorati XV. Decembris  
clō lxx LXX.*

*demississime devoti*

**Jo. Henr. Bœcleri.**

COADJUTORI  
TREVERICO

*REVERENDISSIMO ET CELSISSIMO*  
PRINCIPI AC DOMINO,

DOMINO

JOH. HUGONI  
AB ORSBECK,

Metropolitanæ Ecclesiæ Tre-  
virensis dudum Chor-Episcopo, Spi-  
rensis Cathedralis Ecclesiæ De-  
cano, &c. &c.

Feliciter.





**D**Um solennia anni incipientis vota, in Imperio, & per terrarum orbem, vel solvuntur, vel nuncupantur, *pro Christianorum concordia, pro salute & incolumitate Optimi Principis Augustissimi Imperatoris, pro felici Augusta puerperio, pro perpetuitate Pacis & securitatis Publicæ, pro Principum & Ordinum Imperii prosperitate:* TIBI REVERENDISSIME PRINCEPS, ultro magna & memorabilis & auspicata temporum nihil non boni in posterum pollicentium series divinitus cœpit procedere. Expectitus & assumtus es in partem curarum & certus successor constitutus EMINENTISSIMI PRINCIPIS, ELECTORIS TREVIRENSIS, eo rerum articulo, quo maximè Reipublicæ interest, magnos Principes magnis uti negotiorum suorum adjutoribus; eâ Illustrissimi Collegii unanimitate ac prudentiâ, quam non possunt non venerari æquerum iniquorumque ingenia; ea omnis ordinis, omnis generis hominum congratulatione & lætitiâ, quæ abunde testaretur, Electionem Coadjutoris Trevirensis nec suscipi, nec fieri potuisse melius, felicius, utilius.

Dubitari forte aliquando potuit, an satius esset, expectare casum, quàm prævertere. Et, sit sua cuique loco & nationi & collegio, ratio consuetudoque: quam disputando attrectare, incivile merito videatur. In S. Rom. Imperio, summa ratio est, quæ cavet, ne quis Principatus, vel ad breve temporis momentum vacet. Hinc, ubi jure sanguinis succeditur, defectum naturæ non diligenter modo sed maturè suppleant pacta familiarum illustrium, quæ in adoptionis & arrogationis locum, Reipublicæ causâ, instituta sunt. Ubi autem merita quemque sua ad Principis dignationem evahunt, non cessant eadem esse consilia ad salutem unius corporis,

poris, ubi eādem sunt pericula. Habere autem illum transitum rerum, quo mutatur Princeps, discriminis plurimum, & recipere varios casus, nulla est quæ non docuerit ætas. Si quid ergo speciosæ diversitatis in utroque genere Principatum excogitare lubet, plus tamen roboris in eo est, ut partes partibus ad conservationem totius congruant.

Quod si timere aliqui velint libertati suffragiorum, aut studia propinquitatis suspectare & cognationis, illustribus exemplis præcipuarum & vicinarum Ecclesiarum possunt ab illâ sententiâ revocari. Quis enim est, quin gloriandum esse omnibus sæculis intelligat, de pulcherrimo cooptationis talis successu & splendore, quo nunc fulget, Moguntina, Trevirensis, Monasteriensis Cathedra? Et sicuti prudentissime constitutum est, ne cognatio ac necessitudo sanguinis excluderet dignissimos: ita in Trevirensi Electione, conspirante cum Principis pro utilitate publicâ curis illustrissimi Collegii sententiâ, primi & unici momenti ad Te secreto scrutinio optandum fuit, meriti Tui veneratio, REVERENDISSIME ET CELSISSIME PRINCEPS COADJUTOR. Tu enim nec ambiisti, nec optasti. Maluisses imò humeros Tuos tantæ moli subtrahere, & in alios honoris id fastigium transferre; si fas fuisset, destinata salutis publicæ vota & divinitus gubernatæ electionis consensum subterfugere. Sciunt, hæc non per adulationem dici, quicumque Te noverunt. Sicut enim animum Tibi plurimarum rerum capacem, ita minime earum appetentem, dedit Deus, formavit pietas: cujus pars est, Deo ad magna & alta vocanti non oblectari.

Gratulandum est hoc nomine EMINENTISSIMO PRINCIPI ELECTORI; qui vivus fruitur voto, ut in successoris virtute & merito felicitatem Ecclesiæ & Reipublicæ suæ, suaviter & securè, in longam ætatem, quod Deus faxit, videat acquiescere.

Gratulandum est illustrissimo Canonicorum Collegio, qui firmitati & integritati corporis sui providentissimâ sollicitudine cavendum putarunt.

Gra-



Gratulandum est etiam Imperatori Augustissimo & Sacro Imperio, cujus fulcimenta, quorum præsidio dextra Imperialis potentiae roboratur, tam opportune, tam prudenter, tam feliciter suppleantur sufficiunturque.

Gratulandum est TIBI, REVERENDISSIME ET CELSISSIME PRINCEPS COADJUTOR, ad eum provecto locum, unde potentissima in terris Reipublicae, salutaribus consiliis, tempore necessario, fructu perpetuo decus pores & præsidium commodare. Qui isto rerum habitu, dum miros motus undique sidera fati publici portendunt, ad Rempublicam accedit, illius mentem pia solertia & assuetus divinis incitationibus animus, moderetur oportet & dirigat ad candidam illam metam, quæ conservatione patriæ insignitur atque demonstratur.

Existimant prudentes, non alibi terrarum difficilius geri Rempublicam quàm in S. R. Imperio. Eas difficultates ut feliciter pervadas & evadas, salvâ corporis cum Augustissimo capite congruentia, precari fas est.

Deus Te conservet incolumem, florentissime Princeps, ut Tuâ incolumitate plurima publicè privatimque gaudia sustententur.

Quæ in commune læta sunt, non excludunt privatos & singulos. Iccirco non ægrè feras supplico, quod longè positus, & in obscuro, sideris tamen novi ortum ausus sum venerari. Raptus sum in hæc obsequia, exemplo Reverendissimi & Illustrissimi Baronis PHILIPPI GUILIELMI DE BOINEBURG, quem hoc tempore omni laude & præsentis futurique decoris spe celsissime florentem, ex propinquo hic suspicere datur. Ille inter prospera sui ævi numerat, Tuam gloriâ intueri, virtutem imitari, fortunam collaudare. Illum inter jucundissimos vitæ suæ dies sensisse vidi atque consignasse eam lucem, quæ Te Principali dignatione celebravit. Ille propriam & quodam modo domesticam judicavit hanc felicitatem Trevirorum, unde auspicia singularis exempli ad tot inclyta familiarum Illustrum nomina videntur pertinere. Ille.

in præcipuis generosæ disciplinæ , cui studet , rudimentis amplectitur , Reipublicæ prospera voto , applausu , gratulatione prosequi. Quis non lætetur tam rectis in juvenili ætate sententiis , tam probis pro publico egregio iudiciis , tam meditatæ erga Deum hominesque officiis ?

Vive PRINCEPS COADJUTOR , & in ornanda Republica Tuum ipse exemplum supera. Vive . & flore , & vale . & res gere nulli non sæculo admirationi futuras. Qui publicam felicitatem amant , ita precantur : Qui Te non ignorant , ita sentiunt. Qui Deo confidunt , hujus voti fiduciam assumunt.

Iterum Reverendissimo & Cellissimo Principi COADJUTORI TREVERICO *Feliciter* , inter certantia omnium Ordinum obsequia , acclamat

*Reverentissimè atq; demississimè*

Argentorati 7. Januar.  
1672.

*Rev. ejus*

*Celsis.*

*addictus*

Joh. Henr. Boeclerus.

ELOGIUM  
CHRISTOPHORI  
FORSTNERI,  
SCRIPTORE  
JOANNE HENRICO  
BOECLERO.

CHRISTOPHORUM FORSTNERUM posteritati narrare, pium magis quàm facile est. Huic enim nomini statim æqua expectatur oratio. Cujus si quis fiduciam animo concipiat, parum meminisse videri queat nobilissima ingenii monumenta, quibus vir tantus non minus quàm nomine suo celebratur. Ergo etiam qui desperavit certamen, certare voluisse vel debuisse cum tanta eloquentia, putabitur. Sed adversus hæc vulgaria magis quàm probata rationum nomina, superest inculpatum amicitiae & innocentiae genus, si cum quo jam loqui non possumus, de eo nunquam loqui definamus. Nec dissimulo, me, quicquid id est officii, ultrò invalisse. De viro enim quem à primâ juventâ colui, amavi, quem frequentibus & mutuis literis semper, non raro colloquiis & salutationibus, haud vulgariter fautorem sensi, habuique; tum silere, cum necessitudo consuetudinis, quæ vivis propria est, intercidit; vereor, ne crimen animi à natura & literis non adeo benè instituti, magistri & arbitri humanitatis appellarent. Probè inter hæc commemini, quàm decora ingenia, ipsoque ætatis & eloquentiæ flore eminentia, de cultu FORSTNERIANI Nominis

000 2

inter

inter se & ad posteros contendere decreverint. Quibus tantum abest, ut præceptum aliquid hæ pagellæ velint; ut potius certa me spes foveat, istis veluti stimulis excitatos, quicquid est amicorum, longum pietatis & officii ordinem explicituros esse.

Genus CHRISTOPHORI FORSTNERI, etiam si natalium splendore non præcelleret, ab ipso certè, idoneo nobilitatis austore, incipere poterat: Qui ad omnium excellentium hominum indolem & laudes tam feliciter se composuit, ut in majoribus suis pulcerrimo propinquitatis specimine, quicquid nominum merito & virtute simillimum in generosis familiis est, annumerare posset. Sed non parca fuit, vel natura vel fortuna, in Avitis gentis hujus ornamentis cumulandis. De quibus tamen ut facundus fieri velim, non optant, qui unius Viri propria decora, omnibus undecunque accitis præferri oportere, haud ineratè arbitrantur. Hujus enim dotes artesque, tum universæ familiæ, tum parentibus inprimis gratulari debet commemoratio nostra.

Avus CHRISTOPHORUS FORSTNERUS Buducii in Bohemia Judicis ordinarii functus est munere. Parens PAULUS, Comitum de HARRACH Dynastiæ Birchkenstenianæ in Austria præfuit: donec religionis purioris studium pro crimine esse cœpit. Tum ergo in secessu prædii sui Breitenfeldii, quod nunc Comites de SCHALLENBERG agnoscit dominos, ad privatam redactus vitam, tranquillissimè senuit. Licet enim nova ipsi exilia consciscere agitarent, quibus familiare per ea tempora fuit, odio suo in viros innoxios & cordatos pietatis speciem præferre; Filius tamen, cujus memoriæ nunc operamur, in ea jam ingenii & morum specimina adoleverat, ut Cardinali CLESELIO primas tum in aula Cæsarea partes potentiae obtinenti, facile insinuat, & sibi multa dehinc beneficia, & tunc patri suo plenam vacuumque ab omni vexatione & molestia immunitatem à tanti patroni favore impetraret. Ita sibi Deoque permissus PAULUS anno demum

demum ætatis nonagesimo & tertio vivendi finem fecit. Susceperat autem ex nobili & ornatissimâ matronâ MAGDALENA Capelleriâ, conjugē suâ, filium avo cognominem CHRISTOPHORUM, quem lugemus, anno superioris sæculi nonagesimo octavo, die Septembris terciâ, septimam inter & octavam à meridie horam.

Propitia nascenti affuisse sidera dicerem; si de eo divinandi genere quicquam certi mortalium ingenis compertum esse constaret. Illud extra dubium ponitur, divini muneris esse, si cui ex optimis parentibus nasci, eorumque indolem referre & exprimere contigit. Tum enim facile ad summa ascendunt, & exempla originis suæ superant, illustrentque excellentes naturæ: quod genus propagandæ nobilitatis non privatis modò decoribus aptissimum, sed Reipublicæ plerumque saluberrimum esse solet. Habet suas gratias & prima educatio; facitque ut domo emissus elegans puer, magistris publicam adolescentum disciplinam professis, primum admirationem, mox amorem sui moveat: quo accedit tacitus quidam pudor, si non conferat pro se quisque, quantum potest polletque, ad ornandam eam ætatem, quæ maturitatem communibus votis expetendam tot pignoribus ac rudimentis promittit. Nec sanè vulgaris aut quotidiana hæc occasio est, sua bene feliciterque collocandi officia. Nunquam CHRISTOPHORUS noster amisit memoriam Athenæi Linciensis; quin ingenuè & liberaliter Præceptorum suorum merita in adolescentiam suam collata, etiam senior prædicaret. Tubingæ THOMÆ Lansio civi suo traditus, adeo indole & moribus enituit, ut eodem anno, qui sæculi hujus decimus tertius erat, tanti viri testimonium penè invidendum mereretur: Quo ad celebrem Medicum Persium, *toti Patriæ ornamento & præsidio futurum quandoque hujus adolescentis ingenium*, rescriptit. Nec aliud fuit aliorum ejus Academiæ Doctorum judicium, quorum favore & applausu mirificè floruit. In iis MICHAELI Ziglero, & postea magno Theologo MATTHIÆ Hafensrefferō, etiam propiore convictu amatus dilectusque est.

est. In eloquentiæ studio Buchnerum & Zachariam Schæferum habuit adjutores testesque amantissimos. Quid multa? anno ætatis nonodecimo, post alia meditamenta Academica, & pericula, experimentum famæ facturus, Hypomnemata Politica in publicum primâ vicē emisit. Ex quo tempore supra votum & spem fr̄i cœpit famâ sui: LANSIO præsertim & BESOLDO, quorum celebratis non TUBINGÆ tantum sed longè lateque nominibus, præscriptum erat opusculum, demonstrantibus & ambitiosè jactantibus id eruditionis, in ætate parum civilibus curis maturâ, sed abunde sufficiente, specimen. Hic diffusam historiarum lectionem, hic exactum in comparandis ad præterita præsentibus negotiis ac temporibus judicium, digito signabant: exempla quoque quibus antiqui illustrium ingeniorum florem ex forensibus adolescentiæ tyrocinii ostentant, æquari & superari, declarabant: tanto benevolentia & candoris certamine; ut ad Fabii Dialogum & Apuleji Apologiam eruditissimorum hominum, Crassi, Pollionis, Calvi, Antonii, Mutii, Sulpitii, Furii, Curionis nominibus & elogiis, FORSTNERUM in margine honorificâ notâ adjungerent.

Revocatus eodem anno (seculi decimus septimus erat) in Patriam, mox Vindobonæ, quam vulgo Viennam appellant, triennium impendit. Trahebat animum Reipublicæ devotum, non antiquæ tantum Academiæ celebritas, sed Aulæ Imperatoriæ cominus venerandæ consultissimum studium. Nam ut famâ & majestate nominis universum orbem in se convertit Augusta Imperii mater, ita lucis suæ radiis propius admotos aquilarum indole non indignos oculos, non explorat modò, sed confirmat assuetudine contuendi Solis emendatque. Hic se æstimandam offert Reipublica eo vultu, quo omnium gentium nationumque pulchritudinem antecellit. Ut bene uti possis notitia orbis exteri, Germaniam in Viennâ prius contemplare: Ita fiet, ne tu diu peregrinatus, nuspiam tamen magis quàm in patria peregrinus habearis. Sed FORSTNERUM multo jam

jam viri civilis instructu copiosum, Tubinga viris studiisque eximiis tum florentissima, denuo hospitii necessitudine devinxit, & ab anno seculi vicesimo ad tertium & vicesimum retinuit. Multis ergo literis artibusque, nec minore jam publicè famâ, compos, ad politiores extra Germaniam populos visendos, anno insequente animum adjecit. Nulla est natio, quæ majori hodie peregrinandi studio teneatur, quàm nostra: sed successus in ancipiti fere est. Ingressiuntur hæc itinera plerumque adolescentes, ætate convictus civilis imperitâ, mente nec studiis, nec moribus firmatâ: & propterea exteriorem rerum scenam oculis, ne satis curiosis quidem, usurpant; nullo ad interiora, & quæ polliceantur pretium operæ, profectu. Si præclare res geri putanda est, admovetur spei adolescentuli adultior aliquis: qui vel amittit vel perdit auctoritatem, suo alienove ingenio aut fato. Tum enimverò, si Forti Fortunæ litatum est, rector minori additus, aliquid peregrinæ mercis artisve refero; regendus probè vacuus, aut nimis onustus dediscendis, redit.

Res misera & fortioribus remediis digna. GERMANIÆ nostræ viscera inficit hæc labes. Qui enim non animo, non judicio competunt ad peregrina cognoscenda: postquam nihil serium, aut publicè privatimque proficuum foris intellexerunt, superbâ tamen & præposterâ prudentiæ peregrinæ opinione, domi, reipublicæ, & haud rarò familiarum imponunt, illuduntque.

Verum in viro ad ornandam patriam genito, non habet magnam commendationem, si dicatur à sinistris vulgi non vulgaris, consiliis, suas rationes sejunxisse: nisi quod peregrinationem FORSTNERIANAM tantum boni Germaniæ præstitisse, quantum malorum usitata plerisque aberrandi consuetudo affert, intelligi licet. ITALIA primum excepit, & triennio serè integro retinuit gratissimum hospitem. Quanquam autem nihil magnopere interest, quas primum terras, quas deinde adeat, qui rebus optimis peregrè addiscendis operam daturus est; valet tamen adhuc

huc illa ratio, quæ civilium artium cupidis primam & præcipuam demonstrat magistram Italiam. Nam qui animos Italorum à consuetudine victus cum peregrinis jungendâ alienos esse queruntur, sua narrant crimina; dum nec à quibus oportebat, nec quomodo oportebat, discere norunt. Forstnerus Latine pridem, Italicè statim peritus, moribus præterea ad unguem expolitus, faciles & obvias habuit Italicas Gratias. Qui enim omnem arrogantiam inculti moris effugerat, cautissimaque modestiâ, nec nisi tempestiva libertate, verba & facta sua moderabatur, non potuit habere minùs propitios homines, altâ & recondita & elegantia rimari non minus, quàm adamare fuetos. Athenas Venetas, Patavium, non celebritate tantum magnorum nominum pelleret, libenter incoluit: sed, quod uberius hinc copia sperari poterat, Venetias propius adamandi colendique, in hanc ille Rempublicam mira quadam cupidine animum & studia sua converterat. Hujus instituta & exempla, non aliter quam veteris Romæ solent alii, confestabatur: omnis rei Venetæ scientissimus. Tulitque sui consilii fructum insignem, tum nobilibus amicitiiis, tum vel præcipuo amore DOMINICI MOLINI honoratus. Viro ad sustinendam non familiæ modò, sed gentis & Reipublicæ illustrissimæ gloriam divinitus illi ætati donato, vel in salutantium turbâ innotuisse, magnificum & erat & habebatur. At verò ille FORSTNERUM selegit, interiore admissione æstimavit: multis officiis & laudibus ornavit: ut, quæ de Principatu TIBERII ad TACITUM jam tum commentatus erat, publici juris faceret, hortator auctorque, etiam contra objectas, nescio unde, difficultates præsto fuit. Impressus est Liber eximius Patavii; & JOHANNI CORNELIO Venetiarum Principi inscriptus. Nam & huic Italiæ decori, in cujus elogiis familiaribus etiam non legerentur Asiatici & Africani triumphi, regius tamen splendor, etiam matronali merito illatus Reipublicæ, late præfulgeret; luculenta occasione insinuatius erat Forstnerus. Cum enim anno præcedente novum honorem

COR.



CORNELIO, nomine florentissimæ in Patavino Lyceo Germanicæ Nationis gratulatus in confessu Excellentissimi Ordinis esset: non auditus modo benevole, nec sine testimonio politæ eloquentiæ, sed Eques quoque Divi MARCI creatus est: quo genere insignium Veneti non nisi præclarâ testatamque pacis bellive laudibus virtutem honorari, majestate nominis sui dignum judicant. Decorum fuit ergo & opportunum, gratias agere tanto Principi, & offerre ea, quæ non nisi virorum usu rerum & ingenio præstantissimorum judicium subire debent. Accessit oratio, de qua memoravi, cum præfatione ad DOMINICUM MOLINUM. Inter ornamenta editi hujus operis non immerito numeres LAURENTII PIGNORII, inter rarissima ejus temporis & elegantissima nomina celebrandi, applausum, quem facta ad antiquitatis specimen inscriptione, ceu pulcerrimam amicitiae sanctioris, etiam alibi antea professæ, significationem apposuit. Præter communem exquisitorum literarum amorem congruebat arcano miroque affectu utriusque viri indoles. PIGNORIO, matura, electa, utilia, ex alto doctrinarum secreto promere, judiciumque politum in promptu habere, sine ostentatione ars erat. FORSTNERUM in eandem sollertiam, modestæ & habilis scientiæ genius adornaverat. PIGNORIUS & intelligere & amare candorem amicorum doctus, nec minus FORSTNERUS, ingenuæ humanitatis fidem discernere & mereri peritus. Et dum neuter in altero quicquam nisi solidâ virtute imbutum spectat, aut exspectat, edita sæpius mutui animi pignora, perpetuitatem vinculi, quo colligari ratio fuit, adstrinxerunt.

Licet autem constitutum nobis non sit, omnes Italicæ FORSTNERI amicitias enumerare, taceri tamen omnino non debent, quarum memoriam commercio frequentium literarum in Museo FORSTNERIANO custodiri novimus. In his monumentis, præter Pignoriana, Epistolæ FELICIS Ossii, CÆSARIS Cremonini, FORTUNII Liceti, CASPARIS Scioppii, aliorumque, no-

PPP

bilem

bilem supellestilis rarioris & elegantioris partem faciunt. Quod si, more vulgato potius quam probabili, ex his liberet excerpere laudes, & judicia de FORSTNERO nostro, sanè non parum esset auctoritatis in tantorum virorum testimonio. Sed ex consuetudine & iudicio ipsius FORSTNERI, aliis forte usibus rectius hæc atque talia reservari, non erraverit qui existimet.

Non prætereundum est, quod in Italia, cum ad CAMPANELLAM inviseret, ei usu venit. Tenebatur ille in custodia, nec ad videndum nisi custodibus arbitris quicumque admittebatur. Plures una accefferant, & de more ævi libellos colligendis illustribus nominibus destinatos, CAMPANELLÆ in cubiculo tradi iusserant. Postquam inscripserat is quæ voluit, admissos contemplatus, sine hæsitatione FORSTNERUM numquam antea visum nomine compellavit, manuque prehensum de futuris honoribus & quibusdam aliis eventibus edocuit. Extitit fides prædictis, sive ex liberali & multarum bonarum rerum indice facie, feliciter conjecturam facere contigit; sive veterem de divinatione prudentum sententiam, ad hoc quoque præfagiorum genus, monitu exemploque CARDANI referre, fas est. Quanquam tutius est in his, facta scire, causam ignorare.

Ex Italia in Galliam profectus, ingenium Aulæ multis tricus per ea tempora impeditum, principum mores, æmulationes, studia odiaque perspexit ac memoriter tenuit.

Ibi Genium illum rebus Europæis fatalem, Ludovici autem Iusti magnitudini elaborandæ destinatum, vidit iis inrentum consiliis ac operibus, quæ adhuc sentit orbis & posteritas vix credit. Quo sit labore, solertiâ, constantiâ, virtuti militari fortuna concilianda, supra morem fere & modum virium humanarum; Rupellæ obsidio & deditio, in prodigiis potius, quam exemplis ævi ostendit. Quanta sit & quam multis industriæ & vigilantie artibus adjuvetur illa vis prudentiæ, quæ conjurata in perniciem Regis optimi domi forisque & insolubili nexu obfirmata molimina,

mina , explicavit tandem dirupitque , non alias majore documento cognitum est. Omnia in utramque fortunæ partem magna & insolita , veluti siderum vehementiore motu Galliam tum agitabant. Quibus temporum articulis uberior & incitator est civilis sapientiæ disciplina , animumque capacem non invitat modo ; sed rapit per momenta negotiorum ad abditas origines seriemque operum originibus debitam. Estque illustrium in Galliis virorum ea comitas , quæ decoras profanoque exemptas vulgo mentes ut admiratione sui potenter imbuit , ita profectû rarioris scientiæ , vel aliud agendo suavissimè collocupletat. Si paucis & sub exemplo agendum est , quali elegantiae genio , JOANNES olim BARCLAIUS , res in Gallia paulò ultiores , cum applausu omnium executus est : talis fuit FORSTNERI in commemorandis rebus Gallicis ceterioribus dulcedo , & multis arcanisque gratiis opulenta facundia. Inprimis autem per omnem vitam usui decorique fuit , tam exquisita rerum Gallicarum notitia , hominumque ornatissimorum feliciter ibi contracta amicitia : sive in scena Europæ Gallia partes suas , nunquam rebus modicis spectatas , noscendas publicè exhibuit : sive in Galliam Legato Reipublicæ causa eundum fuit. Cui muneri suus postea servatur locus.

Interea cum Viennam peregrè rediisset , non ignotus aut ingratus pridem hospes , Aulæ magis magisque se approbavit : Summis etiam in ea viris dilectus æstimatusque. In his CLESELII CARDINALIS favor iterum enituit : quem æmulati sunt præsertim STRALENDORFIUS , qui Archicancellarii Imperii vices tum gerebat , & NOSTITZIUS COMES , Vice-Cancellarius Bohemicus. Hi de retinendo in Aula orandoque FORSTNERO seriam susceperant curam , multaque rerum & verborum comitate testatam. Et ille quidem nimium quàm flagrabat cupiditate obsequendi tantis PATRONIS : neque unicus ille affectus in aulam Cæsaream , quo à prima ætate tenebatur , ad extremum usque halitum deferuit virum. Sed tum

temporis intercessit metus , ab invidia crebrescente in eos, qui Religionem ad conscientiam, non ad alienum arbitrium pertinere statuebant. Igitur CRATONI Hohenloico Comiti, causam Circuli Franconici tum apud Augustum agenti adjunctus , post quatuor mensium in Franconia moram , totius jam Domûs Hohenloicæ Consiliarius & Legatus , Aulam repetiit. Sed illam Comitum Electoralia maximis de rebus instituta cum Ratisbonam excivissent, secutus cum aliis Legatis FORSTNERUS, res inter Cæsarem & Electores palam & in occulto actas tractatasque, accuratâ & in exemplum à plerisque deinde optatâ laudataque epistolâ, anni insequentis initio exposuit. Accesserat eodem Jacobus LEFFLERUS Cancellarius Würtembergicus, cujus ingenio multa & magna hujus seculi negotia gubernata sunt. Ille , ut facile inter se congruunt excellentes naturæ, collaudatâ ex omni occasione Forstneri virtute, Vice-Cancellarii Montis-belgardenensis dignationem nomine sui Principis ei obtulit, atque, ut tempore ad consultandum cum suis necessariis sumpto , subinde in se reciperet, persuasit.

Neque triennium ab eo tempore præterierat, cum Cancellarii nomen & munus suo merito adeptus, ad finem usque vitæ præclare implevit. Magnum prudentiæ exquisitoris argumentum arbitror, constanter tenuisse, quod probe elegeris. Invitatus est haud raro ad alia loca, ad alia munia FORSTNERUS, luculentis conditionibus. Nolo enumerare, quæ ipse dissimulanda duxit. Sed quia ornandam non vulgariter, quam susceperat, Spartam existimabat, in eaque re quotidiano semetipsum profectu superabat, non melius sibi, non melius officiis consuli posse, certum habebat, quam si suæ affixus sphaeræ, ceu stella perpetua Cæli Heroici, inflexum lumen spargeret. Tulit eum constantiæ suæ fructum, ut primarii Ministri, & Consiliorum Actorumque Principalium moderatoris exemplum, suam vitam celebrari, magno famæ consensu vivus audiret undique & cognosceret.

In modicis quoque Principatibus non modici labores incumbunt ei, qui ornandam primario provisu in Germania suscepit talem Spartam. Cumque pacatioribus etiam temporibus, non facilis prudentiæ res sit, inter potentes vicinos conservare statum Reipublicæ conclusæ velut in medio, Forstnero in majus auxerunt molem negotiorum, tempora omnibus malis publicis horrenda & confusa; quibus ad sui muneris & miseriarum undique ingruentium initia accessit. Principes Fratres, ætate injuriis opportunâ, apud Helvetios & in Galliis paulo minus quam exilium, usque ad annum hujus sæculi quartum & quadragesimum tolerabant. Variæ sævissimi belli clades, pestilentiae horribilis atrocitas, omnis infortunii facies, nihil tuti lætæve interea reliquerant. Scisso velo, quassatâ nave, navigandum tamen erat. Quæ in re quid curarum, quid molestiarum versetur, non facile quisquam verbis expresserit, aut animo comprehenderit.

Conservatâ Principibus fide; provinciis, quantum humanâ fieri ope poterat, sublevatis & à desperatione resurgendi ad fiduciam traductis, meruerat, ut extra invidiam, non extra gloriam esset. Sed non defuerunt obrestatores, qui optimè ab ipso consultata & acitata, imprudentibus non minus quam importanis censuris apud redudem novum Principem vexarent. Vicit tamen ad extremum melior causa, & genius Optimi Principis ad tuendam suorum innocentiam nunquam difficilis. Præclare sapiunt, qui adversus inimicorum insidias, non fugiendo aut stationem suam deferendo, sed immobili gradu stantes malarum artium finem, & bonarum fortunam nunquam seram, etsi tardam, præstolantur. Certe utriusque Principis, & ejus qui Mompelgardensè regimen prior suscepit, quique Fratris successor adhuc magna cum gloria rerum potitur, iudicio ac testimonio, quod irrefragabile est, constat: FORSTNERUM fidelissimi & prudentissimi ministri omnes numeros usque ad fastigium exempli, quod in hoc genere optari potest, implevisse. Quare & gratiâ & munificentiâ

P P P 3

Prin-

Principali ad vitæ terminum usque floruit: carumque & honoratum etiam in Filiis nomen FORSTNERIANUM in aula perennat.

Itineribus creberrimis, modo in Galliam, ex qua Aula fortuna ditionis Mompelgardenfis non levibus momentis sæpius pendere visa est, modo alios ad Principes occupabatur. Neq; fuit unquam tempus, quin suæ virtutis & industriæ maximam opinionem, apud omnes, quibuscum ei negotium fuit, relinqueret. Testantur hoc magna, & totius pene Europæ Comitia de Pace ex sævissimo & longissimo bello reconcilianda, Monasterii & Osnabrugæ instituta. Quo ille missus, maximi cujusque Legatorum animos oculosque in se convertit. Hic Cæsarea Legatio, cujus Princeps tum Comes TRAUTMANSDORFIUS fuit, suâ prudentiâ dignum bonumque factum censuit, si Domui Augustæ FORSTNERUM iterum commendaret, & Consilio Aulæ Imperatoriæ adjungi cuperet. Hic Sueci propioribus consiliis ultro adhibere virum solebant; & quotiens Monasterio Osnabrugam reduces nova negotiosi tractatus capita attulerant, ignorare ipsum noluerunt, ut, quod ejus esset de re totâ judicium, resciscerent. Ab his quoque Reginæ optimæ non perfuntorie collaudatus, facie honoratum obtinuisset locum, nisi altiore consilio, persistere in officio tot curis suis perornato, & invitanti sæpius fortunæ aliter, id est, declinando nova, colendo vetera jussa, obsequi decrevisset.

Nemo credat, fugitantis laborum hæc consilia fuisse. Licet enim ad mutandam stationem adduci non debeat, nisi qui plus solito agere & ferre paratus sit (cum à novis & aliunde evocatis ministris, non expectari modo, sed exigij majora & inusitata soleant) dubitabile tamen haud erat, quanta domi laborum continentium moles, non senectæ, non valetudini vacationem promitteret. Secuta sunt sane tempora, quibus, incrementis cum annis artuum vixidine, valde anxium habuit FORSTNERUM illa cura, ne per infirmitatem ejus aliquid Respublica detrimenti sentiret.

siret. Quo factum est, ut ad privatam vitam, tanquam ad portum respiciens, dimissionem quandam anhelaret, Deo vacare inprimis, si quid superesset ætatis, cuperet. Visus est annuere velle Princeps Optimus, si alium muneri successorem ipse FORSTNERUS reperiret. Germano, sed rei & linguae Gallicae bene perito opus erat; nam cæteras artes, etiam cum non nominantur, intelligi constat. Nominati ergo varie, & excusati præstantes viri, sub onere denique FORSTNERUM reliquerunt; cui sola mors finem adferre potuit.

Felices equidem dixeris, quibus contigit, ab aulicis negotiis & curis civilibus vacatione impetratâ, mortem meditari impensius; assiduo Dei cultu, salutem animæ procurare avidius; atque ita ardua vitæ negotiosæ intervalla, sacrâ quiete, ceu notabili sine, claudere. Verum ab omni ævo pauci, quos hæc serio cura sollicitavit, voti sunt compotes redditi. Nam reliqui, quos nec familiaris, nec publicæ rei vincula à sanctiore ejusmodi proposito distrahunt, plerumque minoribus, nescio quibus curis, ad extremum intenti, majora oblivione transmittunt. Solari tamen desideria meliorum irrita potest voluntas ejus, qui omnibus voluntatibus modum ponit: quando nunquam dubitatum est, quin Dei & Principis voluntati parere, esset pars pietatis & religionis habenda.

Sed redimus ad FORSTNERUM, qui undique magnorum Virorum, etiam Principum literis, ad finem usque vitæ compellatus est. Si quid in Republica arduum agitabatur, FORSTNERI judicium de momentis negotii, quod rectissimum esse solebat, & provisio futuri temporis, in quâ acutum cernere sueverat, desiderabatur. Epistolis enim mirum quàm accuratis & nobiles, rem gessit: quarum ab amicis aliquæ sunt in vulgus editæ; aliquæ etiam ab iis, qui consiliis suis ab auctoris proposito plurimum alienis, hinc aliquem usum machinabantur. Nonnulli prudentiâ auctoris delectati, quem ignorabant, nomen aliud ex conjecturâ suâ affinxerunt. Offendit eum non parum

— ❧ —

remeritas nonnemini, qui studiis odiisque suis serviendo, intempestive Epistolas quasdam de Westphalicis actis aliisque rebus ediderat, Typographoque, ut Mompelgardi nomen præscriberet, persuaserat. Quæ de re cum esset à me certior factus, rescriptis paulo uberius in alieni Secreti temeratores; eamque responsonem in publicum edi voluit. Factus inde cunctantior ad respondendum de republicâ, non tamen evadere potuit, quin aliquando ad commercium illud epistolicum instaurandum retraheretur. Egit etiam delectum suarum epistolarum, & in volumen collegit potiores, quas petenti Germanico Mæcenati Baroni BOENEBURGIO mitteret. Musea quoque eximiorum virorum, quicquid hujus generis undique cogi poterat, inter pretiosas chartas custodiunt. Quantulo minus ergo quam publici juris sunt? Quæ res, submonentibus insuper ac pene efflagitantibus amicis, persuadebit, spero, Filiis, ut pleræque paternæ Epistolæ paulo post edantur. Ut enim hodie mores sunt, verendum est, ne tempore alieno, nec honestate officii adgubernante, sed lucri importuno amore stimulante, occupent hoc munus, quibus ludus est, res non sui juris ad suam libidinem attrahere. Pollent enim Epistolæ Forstnerianæ singulari quodam elegantiae & prudentiæ genio, unicuique hætenus exempli sunt. Verba Taciti, ex familiari ejus Scriptoris usu, decorâ & tempestivâ gratiâ se ubique offerentia, supra omne imitationis ingenium placent juvantque. Judiciorum contextus, & ex intimo negotiorum sinu emersa series, communi sensui aptam, nihil tamen vulgare spirantem, nec minus reconditam, quàm facilem concinnat scripturam. Notum est apud eruditos, quàm rara sint exempla, in infinitis penè operibus editis Epistolarum, quæ civilem sapientiam non umbratice adeptis satisfacere possint. In his FORSTNERO palma sine omni dubio decerneretur. Libertas etiam minus nunc offender, postquam eventus vel non fuit latere, vel ratio non perseveravit dissimulare, quæ inter tractatum & in novitate conspici refugiant.

Hoc



Hoc loco de libertate Viri optimi paulo amplius differendum est. Multum de virtutibus suis hanc amabat; quanquam non semper absque periculo. Constat sane omnibus ob quædam liberius posterioribus in Tacitum Notis inserta, prædium ejus Dambenoyanum incendio, non sine manifesta vindictæ denuntiatione, incensum absumptumque. Meruit etiam aliter præpotentium odia; quando, inter turbas temporum armorumque, voluntatibus eorum, constantissime Principis sui libertatem utilitatemque præhabuit, non minis, non auro expugnabilis. Raro equidem qui libertate verborum studiosius utuntur, vel crimen vel suspicionem criminis evitant. Solent enim parva quoque & prava ingenia, hinc speciem assurgentis ad altiora animi mutuari, livorique & malignitati suæ hoc prætextum obducere. Innoxia fuit, mentisque à calumniandi libidine intactæ, genio bene gubernata Forstneri consuetudo. Quo factum est, ut, quia nemini maledicere decreverat, conscientiam pro testimonio amplexus, ne in suspitionem quidem rei à suis moribus alienæ, venire se posse judicaret. Usu quoque inde à juventutē compererat, nec summos, in Aula principe, viros, temporibus satis lubricis, ingenuam nec imperitam libertatem judicandi, à qua malitiosa abesset animi affectio, aspernari consuevisse. Cujus rei specimina valde præclara non semel audiivi memorantem. Etiam illud sæpiuscule animadverti: non offensos esse magnos per omnia homines, de quibus liberius existimaverat; imo repulso qui invidiam ei hoc crimine concire moliebantur. Adjuvabatur hujus propositi simplicitas, instituto quodam & tenore vitæ; à captandis ex longinquo favoribus & beneficiis, longius remotæ; & extra sollicitudines, quæ magnos quoque animos debilitare, si non infringere queunt, constitutæ. Non poterunt autem tali exemplo se tueri, quicumque innocentia & ingenio inferiores, ardua nimis affectare instituunt: faciliusque FORSTNERO erranti (quis enim omnia semper conjectando assequatur?) quam censoribus & judicibus temerariis in verum in-

cidentibus, veniam dari convenit. Quærenda fuit hujus rei mentio, eo quod sinisteritatem male consultorum obrectatorum magnis nominibus præscribere, non obscure meditantur, quibus Herculis cothurnos pygmæo inducere, nullus pudor est.

Sed FORSTNERUM quidem ab omni obscuræ obliquæve indolis opinione, natura ipso aspectu, & honore ingenuæ faciei, vindicaverat. Candorem, libertatem, modestiam, sollertiam, unum sibi pulcherrimo temperamento domicilium legisse, statim crederes, & citra opem artis, quæ ex spectabilibus corporum notis interiorum animorum præstantiam colligit, deprehenderes. Nihil ad ostentationem, multo minus ad fucum, aut pompam compositum vivebatur audiebaturve: omnia sincera & ad demerendos homines occultis gratiis valida, virum coli amarique dignum, animis penitior recti honestique sensu imbutis, ultro insinuabant. Non intelligunt bonos, nisi boni; non distinguunt vana à veris, inania à solidis, nisi quos melior genius eorum numero exemit, qui destituti mentis acie, oculis velut aurigine infectis, magnorum virorum præsentiam spectaculis stultorum expectem; minuendæ famæ potentissimum argumentum; sicut factum & affectatam majestatem unicum famæ augendæ titulum, pro suo captu insolenter interpretantur. Quæ tanquam mali ominis nomina proscribenda sunt ab his paginis, Virum, in quantum intelligi virtus potest, optimum memorantibus. Inter prudentes, & collegas nemo unquam fuit, quin agnosceret divinam quandam hujus viri in judicando felicitatem, in suadendo dissuadendove providentiam, in efficiendo industriam, ac dexteritatem. Gravis sine tristitia, humanus sine ambitione, comis sine blanditiis, elegans sine offuciis, omnibus publicæ privatæque vitæ officiis parem animum commodavit. Rara & mira nec nisi consummatæ virtuti debita celebritas. Hic est, quem Principum nemo unquam fastidivit; Ministrorum nemo contempsit; Civium nemo non desideravit. Summis imisque ex æquo gratus,  
cum

cum stationis aulicæ, nunquam satis tutæ, pericula effugeret, dignitatem & præmia retinebat.

Fuerunt homines prave callidi, qui virum magnis in rebus civilibus versaturum, tribus cætere rebus, Religione, Uxore, Pudore, oportere, non sine suo & sæculi opprobrio disseruerunt. An adhuc sint, qui tam flagitiose sapiant, ego quidem nescio: Solus qui secreta pectorum inspicit DEUS noverit. Credo tamen, in Germania quidem, non dari aulas aut curias, quæ homines tam manifesto profanos tolerandos esse statuunt. Nam qui suspicionibus de re tanta judicari debere autumant, plerumque illis ipsis, quos fingunt reos, deteriores sunt. FORSTNERO certe nunquam ludus fuit Religio: vel, ut ipse eam simulando sperneret, vel ut ab aliis sperni comminisceretur; quam fraudis speciem sæpe scelestissimi homines, odio suo in bonos & innocentes viros præferunt, & imperitioribus, pecorum ritu antecedentium gregem sequentibus, disseminandam tradunt. Seria ipsi, Deoque familiariter dedita pietas, quotidie preces, suspiria, sanctas meditationes peperit. Librorum & amans & gnarus, unum tamen esse Codicem DEO Auctore proditum, credebat, qui oblivisci faceret Aristoclem & Aristotelem, omnisque sapientiæ humanæ laudata quamvis & in immensum exaggerata nomina. Hujus cælestis thesauri creberrimâ lectione & commentatione, quin plurimos, quibus hoc potissimum negotii datum est, vicerit, dubio omni caret. Additi sunt Theologi antiquitus & hodie sapientiæ pietatisque nomine insignes: neque quicquam omissum, quo ad beatam immortalitatem, natura mortalium facilius promptiusque elevaretur. Huic intentus studio animus summam pudoris, sive, ut sanctius loqui fas est, conscientiæ rationem habendam ratus, sibi tutam, aliis facilem, convictus & omnis commercii consuetudinem, concinnavit. Nam ubi apud eos, qui in excelso ætatem agunt, respectus honesti periit, tum licebit humilioribus & potentiorum ope indigentibus serio vapulare & plorare & venum ire, si non perire. Tum de misero illo

ro illo in tenebris oberrantium grege, & diis hisce nihil divini moris habentibus, oraculum fit illud poetæ:

*Enimvero dii nos quasi pilas homines habent.*

Conjugium quoque nihil impedimenti, sed plurimum adjumenti asferre homini rempublicam gerenti, FORSTNERUS non judicavit modo, cum viris affectata abnormis sapientiæ prodigia averfantibus, sed cum feliciter conjugatis expertus est. Ductâ enim in matrimonium ornatissimâ virgine ROSINA PAVERIA, tres & viginti per annos, omni genere fructuum, qui ex virtute & amore matrimoniali contingere possunt, domum & rem familiarem auxit beavitque: Filiorum quatuor, & unius Filiae pater factus. Et Filiam quidem multis jam adolescentiæ in parentum laudes surgentis speciminibus efflorescentem, acerbis funere orbata domus extulit. Filiorum numerus & ætas, non domi modo plurimum gaudii & ornamenti habuit; sed foris quoque amicorum spem, applausum & gratulationem uberrime excivit: donec natu major, PAULUS CHRISTOPHORUS, post exquisitam doctrinam & prudentiam sibi comparatam, & rarioris generis peregrinatione collocupletatam, felicitati tantæ, præmaturo obitu, caliginem & jacturam intulit.

Magnum id vulnus, nec cito consolabile fuit: quippe quo spei multiplicis contextus rumpi videbatur: nisi quod triga Fratrum superstes, Patris senectam & viduitatem (neque enim post ereptam satis dulcissimam conjugem ad secunda vota transiit) copiosissimo omnis spei & decoris proventu levavit & recreavit. In his LUDOVICUS quidem aulicis pridem ministeriis officiisque innutritus, gratiâ & dignitate apud Principem pollet. FRIDERICUS autem adhuc colligendis, sive potius cumulandis variæ peritiæ civilis præsidii, Aulas sequitur. In HENRICO, animus ad magna natus, omnisque negotii & officii capax, ea jam sui documenta dedit, quæ Parentem totum

tum solerter judicantibus promittunt. Itaque vivit vivetque FORSTNERUS in hoc Terrarum orbe, non ingenii modo monumentis, & meritorum in Rempublicam gloriâ, sed virtute etiam Filiorum, & producendis renovandisque per continuam Neporum seriem laudibus.

Et sicut nulla pars vitæ Forstnerianæ sic in oblivionem venire potest, quin plurima consiliorum, beneficiorumque late proficuum, tum decoræ comitatis, moderationis, elegantiae, aliarumque egregiarum artium nomina, in ore famæ, in memoria temporum pervigeant: ita suprema viri optimi multum quod admiretur nostra, recolat postera ætas, habuerunt. Antequàm quid in mortalitate ultimum esset, videre desiit, quid in beata æternitate primum esset, jam persensit. Tanta illi in DEUM pietas, tanta Christi recordatio, tanta salutis, quæ vere & sine fine vitalis est, cupiditas præsto fuit: & à sensu valetudinis, ipsiusque mortis, abductum animum libertati pridem expetitæ vindicavit. In precibus fundendis, in amplectendis spei nostræ mysteriis, & Sacramento Cælestis epuli suscipiendo, in Theologo, cui suam conscientiam regendam commiserat, avide, frequenter, reverenter audiendo, omnes boni Christiani numeros explevit. Eapropter finem ejus, ut exemplum & artem sive bene moriendi, sive vitam meliorem rite auspicandi, non perfunctorie celebrari audimus, Lugent Tempia auditorem & confessorem sancti gregis, vere religiosum: descent pauperes patronum liberaliter benignum: vocem tollunt lamentabilem, quibus non licet amplius voces benefactoris solatio miserorum sæcundas audire. Danbenoyanum vero, rusticatione & secessu erudito negotiosoque domini nobile Hæredium, villas suas majore mensurâ taxat, nec modicæ celebritatis genus existimat, FORSTNERO sepulcrum præbuisse. At memoriæ & nomini tanti viri non minus Cenotaphia in pectoribus suis, in literis & libris suis fabricant, quos melioris generis pietas, ad exempla magnæ virtutis veneranda excitare solet. Tu inprimis, WOLFGANGE FORSTNERE, Fra-

29. Decem.  
1667.

13. Jan.  
1668.  
æt. 70.

ter germano vere germane, sicuti per omnem vitam amore, fide, virtutibus, meritis certare vos invicem juvat; ita nunc gloriæ Forstnerianæ caput & sublime decus emines: Quod ut diu facias DEUS velit. Te eadem consiliorum gravitas & constantia, candor, libertatis modestiâ mixtæ dexteritas, cæteraque præcipua humani animi bona, in eo laudum collocant fastigio, unde geminum paulo ante sidus conspiciebatur. \*Tu Patris animum, Fratris Filiis; amici benevolentiam, Fraternalis amicis repræsentas. In te conspirant vota bonorum & prudentium virorum; Te vivere, Te valere, Te Fratris annos multum superare, exoptant. Sic enim putant, sua desideria ad felicitatem & ornatum sæculi pertinere: Tuæque virtutis diurnos fructus rebus in meliorem statum vertendis necessariis judicant. Et quoniam sanctior est firmiorque nostra amicitia, quàm ut Tecum me sinat loqui, quæ apud alios nunquam taceri debent; abrumpendum mihi uberiores sermonem, & in sua tempora differendum video. Nisi quod iterum profiteor, me non meritis FORSTNERI, quæ infinita sunt, sed meo officio, quod angustos etiam intra terminos contineri potest, satisfacere voluisse. Dicam imo apertius: ut decora nostri temporis ingenia, suas vires in illustri argumento experiri instituant, in facundo hoc scribendi genere, occasionem & materiem præbere, si non stimulos subjicere, consilium fuit. Vel sola Ratisbona, amplissimi PORTNERI, KERSCHERI, PRASCHII ( nam LENZIUM nuper ereptum adhuc lugemus ) ingeniis, quicquid est eloquentiæ ætatem laturæ, abunde & extemporali facilitate expediverit. Juvat enim Te juvatque, ornamentum Patriæ tuæ, totiusque Germaniæ, PORTNERE, necessitudinem domesticam, cum FORSTNERO Cancellario contraxisse. Illius virtus Mombelgardi Te detinuit: neque quicquam suavius hætenus esse Tibi potuit, recordatione consuetudinis tam nobilis, & fructu commercii Literarum, inde subnato, quo utrumque decore & peramice usos novimus. Neque dubitabit unquam Te interpellare Germania,







sa fragilium rerum , quæ vires opesque humanæ vocantur , in sepulchris infirmitatis. In tuo triumpho orbis terrarum thesauri continentur. Hinc dispensabitur Imperatori Cæsari Augusto & Imperio vita , felicitas , securitas : Hinc reipubl. Argentoratensi, veritas in Ecclesia, Doctrina in Academia , libertas in tribubus , sacrata fortunæ publicæ pignora egregiè constabunt. Hinc quæ hoc die , hoc loco aguntur , ad nominis Divini gloriam , & honestissimarum literarum decus pulchro ordine successuque provenient. Ita faxis , Christe , spes nostra : ita faxis , qui cum Patre ac Spiritu Sancto regnas in secula.

*Post Musicam.*

A precibus ad vota transibimus , quæ inter honores Augustales numerari solent. Erat Romanis antiquissimus Votorum mos , quæ in libertate vel solennia vel quinquennialia & decennialia pro rebus in meliorem amplioremque statum vertendis , aut in eodem statu servandis ; vel non statò tempore , sed ex occasione & causâ publica , nuncupabantur & solvebantur. Neque cessavit in Principatu ea religio , quanquam in argumentum hujus sermonis nunc non adhibenda : quando ea tantum vota publica spectamus , quæ pro salute Augustorum , quasi proprio quodam pietatis & honoris genere , vel principio anni , vel aliis temporibus , tum publica cæremonia , tum collegiorum , provinciarum , coloniarum , singulorum denique nomine & studio , concipi , persolverique , fas & jus habebatur : crebram rei memoriam conservantibus libris nemini ignotis , quibus Tabularum , Columnarum , Inscriptionum , Lapidum argumenta, præsertim juris Romanorum publici partem facientia , consignantur. Ducebat huc ratio evidens , quæ in Principis salute , tanquam in voto vota omnium complexo. Reipublicæ Salutem contineri , demonstrabat : neque aliunde expectari , quam à Divino beneficio , felicitatem Imperii ultro agnoscebat. Igitur Christiano ritu , detrahis

r r r

quæ

de Oblat.  
Vor. C.  
XII. 48.

quæ ignoratio veræ Divinitatis, nomina cumulavit, nihil divini habentia, invaluit amplius ista Religio, & exposita est uberius, & frequentata lætius. Christiani enim, licet quod in formulis & ritibus votorum paganismo imbutum erat, obire nec poterant, nec volebant; eoque nomine à delatoribus, læsæ Majestatis aliquando postulabantur, ethnica apud tribunalia; meliori tamen voto, pro salute Principum suorum etiam non Christianorum, sibi ad DEUM, qui Principatus & regna unus instituit, regit, transfert, preces fundendas desumebant, neque in hac parte, quicquam in se religionis patiebantur desiderari. Imperatores Christiani Arcadius & Honorius, in celebri Codicis Constitutione, nec vocem votorum mutarunt, à quo Doctores Ecclesiæ & Canones Conciliorum abhorruerunt. Manet enim vigetque Ecclesiæ Orthodoxæ sententia; Justum pi-umque esse, ut preces pro salute Principum nostrorum ad cœlestè Numen fundamus, gratiasque de impetratis beneficiis & promittamus & exolvamus, atque ita citra omne superstitionis Ethnicæ vestigium repurgato jure sensu verboque; votorum talium & rei & damnati pro diversitate temporum habeamur. Eat hæc Philosophia in exemplum: solvamusque hodie vota, & nuncupemus pro salute Augustissimi Imperatoris Cæsaris LEOPOLDI, quem Deus conservet.

Dedit Imperio hunc Imperatorem Divina benignitas, ea manu, qua felicitatem partiri populis consuevit. Dedit, qualem vota publica expetebant. Dedit, ut dissiparet eadem opera, quicquid ne daretur, humanorum consiliorum se objecerat. Trepidabat Pax publica, & nondum adultis viribus, acerbum finem sibi adesse, metuebat. Jam novarum turbarum chaos, pristino horribilius, nec oculis nec mentibus nos competere sinebat: cum exortus tam salutaris syderis, discussit caliginem publici pavoris, illustravit & refovit confusa & languentia: talemque orbi Germanico faciem reddidit, quam optare, prudentis; amare boni;

boni ; tueri , strenui civis esse , nemo dubitare poterat , Dignum erat , ut puto , beneficium DEI , pro cujus perpetuitate vota conciperentur , ab omnibus , qui DEUM revere-  
 vereri , Patriam amare didicerunt . Ab eo die , quo LEO-  
 POLDUM sæculi felicitas Imperio rectorem dedit , ven-  
 tum est ad decennalia vota solvenda , anno abhinc altero .  
 Multa tum illustria virtutis & gloriæ Augustæ nomina &  
 merita , in ore gratulantibus erant . Pax repulso hoste per-  
 niciosissimo , restituta : Justitia in Aula Imperatoria , non  
 hominibus , sed causis dedita : Æternitas Augustæ Domus ,  
 matrimonio fundata : Liberalitas , Clementia , æquitas  
 Augusti , cunctis Imperii civibus parata , & sæpè obvia .  
 Providentia in consiliis , industria in operibus , civilitas &  
 cura concordiæ in Comitibus . Horum felicem exitum in al-  
 terius decennii initio ominabamur & optabamus . Obtine-  
 bat locum eminentem in hac Votorum nuncupatione , Spes  
 publica , Augusti nominis splendore undique radiata : cui  
 tamen intercessit , umbra incertissimorum casuum gaudens  
 Fortuna ; & nova bella , horrida bella , non domui Augustæ  
 modo , sed universo Imperio comminata . Masculæ insu-  
 per Prolis Imperatoriæ , ostensæ tantum terris , orbitate ,  
 quicquid sæculi votis carum ac dulce erat , bis eripuit . Nec  
 modus aut finis , imminebat jam ultimi istius discriminis ,  
 ad cujus mentionem totus contremisco : cum in gravissi-  
 ma valetudine Augusti , animam agere cœpit securitas  
 Imperii . Quis animo concipere , quis oratione exprimere  
 posset varietatem metuum , periculorum , damnorum , quæ  
 talis casus , tanquam monstrum longissimè , ad vastitatem  
 Germaniæ , post se tracturus videbatur ? Omnes æqui ini-  
 quique , nec prudentes tantum , sed & illi , quibus à vani-  
 tate animi præsentia nunquam satis placent , ad cogitatio-  
 nem futurorum cohorrescere cœperunt . Ex longinquo ,  
 ex propinquo nihil satis fidum , satis tutum constitutumque  
 videbatur , unde non plus timeri , quam sperari debeat .  
 Ita fieri solet , ut , nisi amissionis metu icti , non agnoscant  
 sua bona mortales . Tempus scilicet erat , ut in templis ,

ut privatis in ædibus, supplices pro restituenda Augusti valetudine, pro perpetuanda incolumitate, omnis ætas, omnis sexus procumberent, vota susciperent, preces precarentur. Committit iram suam DEUS, & propitio placatoque vultu nos respexit, si sapere forte, & dare Cæsari, quæ sunt Cæsaris; DEO, quæ sunt DEI, disceremus. Hæc fuit iterum festorum & Votorum publicorum occasio, quibus Germania se salvam, salvo Cæsare, regionatim & oppidatim, DEO nuper gratulata est. Sterilis fuerit, opinor, & defecta pietas, nisi vota suscipiendo solvendoque quotidie instaurantur, cum præsertim tot in caput Augusti insidias instaurari audiamus, quibus nihil efficacius opposueris, quam tutelam Divini Numinis. Frustra equidem fœdera foris comparantur, satellitia domi augentur; nisi DEUS conservator & custos Domus Augustæ, ab occultis hostibus latus Imperatoris muniverit. Imperator Cæsar Auguste, DEUS Te conservet: non his modo decennialibus alteris, sed tertiis, quartis, quintis & amplius. Libertas Imperii Populiq; Germani, Tua incolumitate libratur. Serva eam Auguste, ut Te DEUS servet. Leges Imperii, Tua fide, Tuo candore valescant. Optimi Principes ita faciunt, ita laudantur. Validissimos corporis Tui artus, ipse tibi more Imperatorio fecisti, ordines Imperii, nunquam Tibi alieni, nunquam sejuncti, semper in amicis, semper in proximis numerentur. ita conticescent suspiria, quibus privata odia, publicis utilitatibus apud Principum aures insidiantur. Pax Augusta, nobilissimum Divi Parentis Tui opus, in Tua æquitate, clementia, fide, constantia acquiescat. Ut difficilius esset pacem tueri, quam facere, nova consilia, novi animorum ubique habitus efficiunt. Ut resurgeret ex ruinis suis Germania, D. Augustus Ferdinandus III. de genu supplicanti manum porrexit. Jvit in memorias hoc auspicio & publicorum factorum symbola ac imagines, Germania resurgens. Pulchrum & Patrium Tibi Decus, augeat Fortuna Tua, imitatione & spectaculo Germaniæ stantis, valentis, florentis. Advigilet bonus Even-

tus, ne intercedant his votis publicis ullæ voluntates desiderantium, quæ salva republ. nec dari, nec accipi fas est: ne quis Civium sortem suam aliam cupiat, quam concordii civitate esse potest. Sentiant Pacis Tuæ bonâ, Auguste, quos bellicæ calamitates affligerunt: nec restitutionis beneficium, mora corrumpatur: morâ, quâ invalescunt privatæ, publicoque Pacatoris consilio temerè adversæ molitiones. Quanto est augustius, & ad æternitatem laudis Imperatoriæ amplius, reddere statum, non habentibus, quam decernere? pervadere obstacula, rumpere tricas, quæ se adversus fructum pacis & complementum, velut in angulo & exitu objecerunt? Conspirent cum Augusto Capite suo, membra invicti corporis, ad Felicitatem Temporum, quæ in Tabulis pacalibus splendide describitur, in actis etiam & curis, fatisque Imperii vivo spectaculo representandam. Redeat amor Justitiæ, summis infimisque: auctoritas tribunalibus, iudicibus gravitas. Boni mores revo-centur; potentius legibus præsidium ad pacem stabiliendam. Absint cunctisque Imperii finibus absistant, quæ domi pudorem, foris metum incutere possint. Ponunt quidem castra circum Te, Auguste, Exercitus militiæ Cœlestis, & DEO caram esse salutem Tuam, ex omni custodia testantur. Neque in terris regnisque Austriacis lecta virorum robora, quibus objectu corporum suorum Tuum caput protegere, officium & votum est, deficiunt. Imperatori tamen Imperatorium decus sunt, arma, totius Imperii consiliorumque, in formam stabilis militiæ, ad perpetuos usus ordinata & expedita. Immortales dicebantur, qui sapientissimi Persarum Regis instituto, tutelæ Regni destinati erant milites. Ad immortalem Tui Imperii gloriam pertinebit, Auguste, si exercitus immortalis, Tuo auspicio, adversus temporum casus, pro salute & victoria Imperatoris & Imperii in excubiis consistere jubeatur. Certabunt de obsequii gloria Germanicæ nationes, patriæque potius, quàm exteris, florem suæ juventutis, sortemque & fidelem operam commodabunt. Erit hoc commune quasi vincu-

lum, quo distrahta locis, sejuncta consiliis copulentur : erit præsidium adversus contemptum & audaciam, vel apertorum hostium, vel occultorum insidiatorum. Damnabit artes suas æmulatio : conticescet invidia & obtrectatio : nomenque & auctoritas armati semper Imperii, pro muro pacis aheneo, pro pignore securitatis certissimo pervigebit. Votis quoque publicis, quod nostri munus est argumenti, accedet concentus militariter decorus, quo, ex instituto Constantini Magni, exercitus Imperii solennibus formulis, ut Imperatorem nostrum Leopoldum, Augustum, unà cum Augusta prole totaque Domo Imperatoria, incolumem & Victorem diutissime servet, DEO supplicabit. Armis sociare literas, in hoc Augustorum votorum curriculo, & decet & fas est. Non elegantia modò sed felicitas seculi, magna ex parte studiis debetur, haud sinistre tractatis. Tua, Auguste, multo sapientiæ instructu erudita mens, ut non honor modo mercesque, sed & disciplina constet literarum studiis, providebit. Magna intemperantia & licentia abutendi bonis artibus, easque in larvas deformandi, contra bonos mores conducendi, ex Musis prostibula redigendi, passim laboratur. Accedunt homines improbi, turpisque lucri cupidi, qui divino typographiæ invento, ad famulos libellos publicandos, ad calumnias, injurias, ineptias docendas, ad libidines, lascivias, nequitias venum exponendas, nulla publici privatiq; juris reverentia, nullo Imperatorii muneris, quo supremum omnis literaturæ moderamen continetur, respectu, abuti, in præcipuo negotio habent. Non est Tui seculi, Auguste, ut mala exempla vel nascantur vel tolerantur. Perit omnis studiorum fructus, nisi rationibus reipublicæ, honestate sola noscendis, attemperentur. Fugiet ad Orcum hæc labes, ut primum oculorum Tuorum, quibus amicas vitiis artes profligas, fulmen intentabitur. DEUS consilia Tua prosperet felicitate publica, Auguste, opera Tua coronet immortalis gloria & honore. Vivas, Auguste, & imperes : Floreat Augusta Domus, incrementis & ornamentis perpetuis. Vivat & al-  
luceat

luceat orbi Europæo Decus , sufficiat subsidia , Augusta  
 Conjux Tua; vivat Mater Augusta; vivant Srenissimæ So-  
 rores , quibus syderibus cœlum Heroicis signis coruscum,  
 nihil habet speciosius. Vivant & splendeant felicitati pu-  
 blicæ : vivant spei publicæ. Quam rectè ita gloriemur,  
 ita speremus, Venus Polonica nuper nobis fidem fecit. Quin  
 enim Imperio nostro felix & fortunata sit futura, hæc affi-  
 nitas , eo minus dubitationis datur, quò interius cum ra-  
 tionibus Felicitatis Publicæ Imperii copulatur. Cum Ger-  
 mania internis externisq; bellis undiq; urgeretur, sæpe pote-  
 rant, neglecti plerūq; à Nobis Poloni, nòcendi rebus nostris  
 occasiones & causas adipisci. Quod noluerunt pericula  
 nostra in suam rem vertere , eo mereri videbantur pruden-  
 tibus, ut eorum amicitia Imperio nec unquam negligenda  
 in posterum crederetur. Confecit hoc negotium Augustæ  
 Domus Hilaritas , Nuptiis Regis auspicata , quibus haud  
 parum solatii pars orbis acrior & magis exercita debe-  
 bit.

At te , defensore Salutaris Augusti, DEUS Imperator  
 universi, DEUS Regum Regnator, iterum supplici piaque  
 voce obtestor , ut pro salute perpetua Domus Augustæ,  
 vota solventi, nuncupantique, propitias aures præbeas : ut  
 à capite Augustissimi Cæsaris Leopoldi, omnem vim, om-  
 nes insidias propulses : ut conjurationum abdita , tuo nu-  
 mine, tanquam sole, retegas : ut veneficos, exitio; prodi-  
 tores ruina obruas. Compesce tumultuantes contra pote-  
 statem, à Te institutam, Tibi servandam, Tibi sacratam.  
 Redige in ordinem, quicquid Imperatoriis pro Imperio Tuo  
 fovendo curis & beneficiis obstrepat. Largire senatores,  
 consilio; Cives obsequio; milites Virtute promotos. Non  
 audiat in Aula , in Imperio Vox, Paci publicæ, Paci re-  
 ligioni datæ, inimica & contumeliosa. Amer Leges publi-  
 cas Imperator tanquam instrumenta boni seculi; excipiat  
 clemens desideria piorum civium; faveat seculo, faveat no-  
 bis, qui hæc vota , die locoque solenni, saluti perpetuæ  
 Augu-

Augusti Libertatique Populi Germanici, volumus dedicare. Fiat hoc sæpe, fiat melius, fiat lætius. Licet enim ad fidem & religionem nostram adjungi nihil queat, occasio tamen luculentior & facundia uberior, in iis sunt, quibus nos vinci, in parte votorum habemus. Vos inprimis, quibus suggerit vires ætas, vos, qui nunc Cæsareæ munificentiae fructu maſtandi estis, ut hujus diei memoriam pie recolatis opto, & nunquam finiri sinatis Votorum publicorum seriem, quin cum Poëta pro se quisque occinatis Augustissimo Cæsari :

*Optavi, peteres caelestia sidera tardè,  
Parsque fui turba parva precantis idem :  
Et pia thura dedi pro Te : cumque omnibus unus  
Ipse quoque adjuvi publica vota meis.*

Aut alterum illud, non incongruum Carmen :

*Tarda sit illa dies, & nostro serior ævo,  
Quæ caput Augustum, quem temperat, Orbe relicto  
Accedat cælo.*

Quæ si rata jusserit esse vota DEUS, nulla tam furda, tam incuriosa officii erit posteritas, quæ solvere nuncupata gravetur aut cunctetur : redeunte semper in orbem civilis pietatis religione ; donec inter beatorum cœlitum agmina, pro omnibus beneficiis, indefinenter laudes, gratesque, votorum ex asse rei decantabimus.

### *Petitio.*

Cæterum ut sic quoque peculiaris Voti fiant participes, quos in hæc subsellia produximus, Candidati, Tui nobis officii imploranda est autoritas, Generosissime & Eminen-  
tissime Dn. Cancellarie, Patrone Benigne, Postquam enim  
habitis



habitis publicis privatisque Examinibus , exactisque & præstitis, quæ præterea à Candidatis exigì præstarique debent , in suffragia de ipsorum studiis itum est : ita nobis approbarunt suam industriam , & commendarunt sua desideria , honestissimè nati eruditique illi Juvenes , & bonæ spei Adolescens , ut Collegium Philosophicum XII. priores , secunda Philosophica Laurea , sive gradu & honore Magistrorum , reliquum prima laurea philosophica , sive Baccalaureatu , decorandos donandosque , judicaverit ac decreverit. Quod muneris cum mihi Lex Academica injunxerit , superest ut à Generosissima Tua Eminentia , cujus est Cæsareo nomine largiri potestatem tribuendi merentibus honores Academicos , concedatur mihi , prout reverentissimè peto , facultas , XII. illos de meliore nota commendandos Juvenes , Magistros , Unum verò Adolescentem , Baccalaureum , creandi atque renuntiandi. Ampliat hæc indulgentia numerum eorum nominum , quibus nos pridem ad omne obsequium devinctos Generosissimo & Eminentissimo Domino Cancellario , agnoscimus & profiteri nunquam desinemus.

### Gratiarum actio.

Generosissimi & Eminentissimi Domini Cancellarii , Patroni nostri Maximi , tam expromtæ ad annuendum precibus nostris voluntati , tum Collegii Philosophici , tum meo Candidatorumque nomine , immortales ago & habeo gratias , DEUMque veneror , ut tanto Mæcenati vitam & felicitatem longissimam , nobis occasionem & studium grati devorique ipsius meritis animi reapse declarandi , largiatur.

Proximum est , Candidati Præstantissimi , ut ad jurisjurandi religionem obeundam , vos casto pioque ritu comparetis ,

*En DEUS est ! DEUS est : animis lingueque favete  
Quisquis ades.*

Recita, Domine Notarie, Jurisjurandi formulam.

Si igitur quæ Vobis prælecta sunt, & à Vobis rectè intellecta esse debent, servare, cum animis vestris constituistis, reverenter digitis primoribus Sceptrum Academicum contingite, & sic adstricta vestra fide, in altiorem hanc Cathedralam, honoris vestri insignia accepturi, ascendite.

Quod igitur felix faustumque sit publicè & privatim, Ego designatus ritè promotor, &c. ex concessa mihi per Privilegiorum Cæsareorum Custodem & Dispensatorem (Cancellarium) potestate &c. &c.

Te Johannem Georgium Wegelinum,  
Buxovillanum Hanoicum.

Te Johannem Philippum Bartenstein,  
Lindaviensem.

Te Fridericum Caroli, Lohrensem.

Te Johannem Diemerum, Argent.

Te Joh. Fridericum Pahl, Argent.

Te Johannem Roser, Argent.

Te Philippum Strohl, Argent.

Te Andream Burger, Colmariensem.

Te Joh. Petrum Storck, Argent.

Te Joh. Conradum Kœnig, Argent.

Te Samuelem Silberrad, Argent.

Te Marcum Philippum Algejer, Argent.

Omnes, inquam, Vos & singulos appello, creo, appellatosque, creatos in splendidissimo hoc ornatissimorum Hominum concilio, renuntio & proclamo Magistros, sive Philosophiæ Doctores: omnibusque iis juribus & privilegiis,

giis , quibus ulla in Academia Cæsarea creati Magistri uti, frui, gaudere possunt ac debent, impertio & cohonesto.

Te verò Johannem Büttnerum , Spirensē ,

Liberalium artium & Linguarum Baccalaureum creō ac renuntio, omniq̄ jure, quod primæ huic Laureæ Philosophicæ concessum est, dono ac exorno.

Atque hæc omnia facio in nomine SS. Trinitatis, Patris, Filii & Spiritus Sancti.

Pauca adhuc monendi estis, Præstantissimi Magistri, ornatissime Baccalauree ; quibus Ego primus hæc nomina gratulor. Ascendistis in hanc honestissimam Cathedram, non injussi sed vocati : ut meminertis, ad Sacra Musarum non irrumpendum temerè, sed consulto demum consilio & Mystagogis invitantibus ingrediendum. Non rapienda sunt ut prædæ exposita, præmia Musica, & officia eruditis destinata : Sed DEUS est, qui solet vocare ; auctoritas publici consilii est, quæ solet vocatos certa sede collocare. Librum è mea manu apertum accepistis : Ut eruditionis laudem non nisi multa & assidua lectione comparari, intelligeretis. Dixit quidam ; Philosophandum, sed paucis. Voluit forte idem dicere, quod alius ita extulit ; non multa sed multum legendum esse. Quanquam revera multa philosophantibus ad cognoscendum proponuntur. Quare disciplinæ hujus diei est convenientius, ut Aristotelem Vestrum hoc quoque sensu exaudiat : Philosophi non esse ad pauca respicere. Mitram violacei coloris capiti vestro imposui ; ut id capitis insigne, eximium honorem, ex consuetudine antiquitatis, signaret : & vos ab omni humilitate exceptos, libertatis conspectiore & honestiore ornatu ostentaret. Annulum quoque inferui digito, quo Philosophia amores suos Vobis despondere decrevit ; si amicè pudiceque eam habebitis. Osculo, pacis & Concordiæ studium, & officia caritatis socialis vobis commendavi. Faces, luminis claritudine, Pue-

et, ætatis innocentia, & habitus decore monere Vos possunt, ut luceat Lux vestræ Eruditionis & Virtutis coram hominibus; quod filios Lucis amet in hoc, coronet in futuro seculo, DEUS, qui est Lux inaccessa & immortalis. Laureum sertum, perpetuo virore celebratum, Baccalaureo in animum revocabit, Græcorum verbum; ποιῆναι τι θεῷ, οὗ γάρ γε χαράν. Facere aliquid oportet, nec otio sed laboribus se tradere, quibus genua flect.

Faveat DEUS honoribus Vestris, eosque benè Ecclesiæ suæ, benè Reipublicæ nostræ & Academiæ, benè familiis & caritatibus Vestris evenire jubeat. Pro cujus voti successu ut vota nuncupare semper & solvere mecum velitis, ipsa hujus festi celebratio animos Vestros cohortatur.

Quod mearum fuit partium, tantum est. Nunc dicendi lampada Vobis trado, & interrogo,  
Domine M. &c. &c.

# I N D E X

## Rerum præcipuarum in Orationibus & Programmatibus Bœclerianis.

### A.

**A**cademia Privilegia Argentoratensi Schola à Maximiliano II. concessa. 191.  
 Academia Argentorat. primi Professores. 196.  
 frequentia primis temporibus. 199.  
 Academia Julia institutio. 53.  
 Advocatorum Argentiniensium, s. Consiliariorum Reipubl. origo, & nomina. 132.  
 Adulatio fœdissima Rom. sub Tiberio. 311.  
 Alexandri M. historia considerata quantum doctrina suppediset. 369.  
 Alexandri M. & Jul. Caesaris comparatio. 401.  
 Americanarum gentium origo demigrationi navibus facta debetur. 410.  
 de Angelorum hymnogenioliaco. 14. 19.  
 Arcana majestatis vera, quæ Principibus suggerenda. 239.  
 Astrologicarum prædictionum vanitas taxata à Matth. Berneggero. 163.  
 Atheniensis reipubl. mutatio auctore Theramene facta. 244. 250.  
 Auctorum bonorum tractatio necessaria solidam eruditionem affectantibus. 402.  
 Augusti nomen incomparabile & verè Imperatorum quantum complectatur. 394.  
 Augusti Ducis Brunsvic. & Lunaburgensis laudes. 48. majores. 50. studia. 56. itinera. 59. pietas & Theologia

notitia. 61. Symbolum : Expende. 62. Bibliotheca ab ipso instituta. 66. conjuges. 70. liberi. ibid.  
 Aula Sædica sub Christina Regina optimè constituta. 43.  
 Aulicorum vita & casus. 397.  
 Auspicia regnorum quid? 234.

### B.

**B**erneggeri (Matthia) Historiarum Prof. Arg. laudatio funebris. 155.  
 Berneggeriana auctorum editiones commendantur. 172.  
 Bibliotheca Academica Argent. à Jac. Sturmio inchoata. 210.  
 Bruuselsius (Otto) ludum Argentorat. instituit. 188.  
 Brunsvicensium Ducum stirps unde. 51.  
 Bucerus (Mart.) duo Collegia Studioforum instituit Argentorat. 189.

### C.

**C**apitonius (Wolffg. Fabric.) cura in Scholis Argentiniens. adornandis. 189.  
 Carolus Gustavus successor in regno Suecico electus à Christina. 10.  
 Causidici & Jurisconsulti discrimen. 123.  
 Censura doctorum in alios tyrannica. 178.  
 Characteres morum & ingeniorum quàm difficulter deprehendantur. 275.  
 Christianorum sapientia dolendo plurimum adjuvatur. 294.

# I N D E X.

*Christina Suec. Reg. coronatio.* **L.** in pace Germania procuranda generositas.

**7. 27.** eruditio. **39.** Ministri. **44.** linguarum variarum cognitio. **45.**

*Cicero Augusti elogio φιλοπατείας dictus.*

*Cithara Davidica elogia.*

*de Civis boni præcipuo in republ. ejusque statum officio, oratio.*

*Clementis Romani Epistola.*

*Clientela & hospitii jura & cognata officia expenduntur.*

*Climactericorum annorum superstitiosa observatio improbat.*

*Clyti contumacia & exiis, deque eo judicium.*

*Comparatio seditionis in republ. cum hæresi in Ecclesia.* **322.** *factorum totarum civitatum, cum satu singulorum hominum.* **374.** *Alexandri M. & Julii Caesaris.* **401.** *mandi cum scenâ, & vita cum transitu.*

*Comparisonum utilitas.* **401.** *Conscientia mala tormenta sensit Tibertium.*

**CONSOLATIO** ad Johannem Silberstern, Secretarium Regium Holmæ, in morte filii unici.

*Consolatio ad Parentem in obitu filii.* **332.** *ad maritum in morte uxoris.* **452.**

*de Convitiis nonnulla, & qui de hoc argumentum scripserint.*

*Coronatio Regina Suec. Christina.* **L.**

*Critica defensio contra ejus reprehensores.*

*Criticorum opera laudatur.*

*Curtii in causis majestatis memorandis*

*planè singularis prudentia & facundia.*

*in Curtii lectione quæ notanda.*

**D.** *Elatores sub Tiberio.*

*Democratia s. popularis status commendatio.*

*Democratica reipubl. exemplum non aliud nobilius, quàm civitatis Atheniensis.*

*Demosthenes unus Atheniensium libertatem contra Philippi R. intentatam tyrannidem sustinet.*

*Depositionis Academica ritus & symbola quid significant.*

*Digressiones Historicorum an probanda.*

*Disciplina Juventutis cum salute reipubl. connectitur.*

*Disputationes Academicæ.*

**E.**

**E***ccllesiastica historia cum civili contextus ostenditur.*

**ELOGIUM** Linnæi Torstensonii tumulo dicatum. **73. 328.**

*Episcopi Spirensis, Coadjutoris Moguntini.* **463.**

*Job. Hugonis ab Orsbeck, Coadjutoris Trevirensis.*

*Christophori Forstneri.*

*Eloquentia exercitatione maximè paratur.* **340.**

*Eloquentia & Sapientia olim conjuncta.*

*Eloquentia politica.*

*Eloquentia civilem actum non ornat modo, sed animat.*

*Eloquentia civilis & Sapientia civilis connexæ.*

*Encyclopædian jactantiam vitandas.*

*Epistola*

# I N D E X.

- Epistola Forstneriana comendatur. 488.  
 EPITAPHIUM Illustris & Generosi Baronis Wolffg. Jac. de Gera. 286.  
 Eruditorum censoria in alios tyrannos. 178.  
 Examinatores Candidatorum in Academia Argentoratensi. 203.  
 Exercitatio sola ad eloquentiam via est. F. 340.  
 de Fasciis Christi, quibus involvuntur arcana majestatis, oratio. 231.  
 ex Florilegiis confusæ orationes inemptum. G. 404. 434.  
 de Era Liberi Baronis laudatio. 288.  
 Germania ad Christianam Suec. Reginam loquentis ethopæia. 8.  
 Germanica reipubl. tractatio reconditoris prudentia & laboris plus requirit, quàm in maximis quibusque regnis, & cur? 95. 473.  
 Germanica reipubl. novatores politici taxantur. 255.  
 Gorborum veterum gesta cum recentioribus Suecorum gestis comparantur. 25.  
Gymnasiarcha primus Argentinae. 203.  
 Gymnasium Argentoratense Academicum corpori olim connexum. 201. quando separatum. 203.  
 ex Gymnasio ad Academiam nimia puerorum properatio notatur. 161.  
 H.  
 Hæcæos in Ecclesia cum seditione in republ. comparatio. 372.  
 Hedio (Job.) Wilhelmitani Collegii auctor. 202.  
 Hippiasionis elogium. 398.  
 Heraclii Imp. detractum sibi diadema Turcorum principi imponentis, factum ominosum. 421.  
 Historia Alexandri M. quàm multa proponat consideranda. 369.  
 Historia Ecclesiastica cum civili contextus ostenditur. 371.  
 Historia veteris cognitio in consiliis moderandis multum prodest. 64.  
 ad Historia veritatem emendam ipse scriptorum dissensus ducit. 283.  
 Historiam scribentes quibus difficultatibus constentur, & erroribus abripiantur. 259.  
 Historiam rerum sua ætatis scribere, hodie quàm difficile sit. 281.  
Historici studii commendatio. 165.  
 Historici eloquentia qualis. 279.  
 Historico nulli, qui res sua ætatis scripsit, usque quaque credendum. 280.  
 Historicorum quorundam virorum, otiosis narratunculis seriem. historia fœdare. 264.  
 Historicorum digressiones an probandæ. Historicorum orationes. 345. (277).  
 Homo, sine virtutis ac sapientiæ studio, bestia est. 353.  
 Hospitii & clientela jura & cognata officia examinantur. 432.  
 Humanitas quantopere viro politico conveniat. 150.  
 de Hymno geneethiaco Angelorum. 14.  
 I.  
 Ingoldi (Franc. Rudolphi) laudatio funebris. 90.  
Ingoldi Legationes: 97. opera præcipua in impetrandis Argentoratensi Academiae Universitatis Juribus. 99.  
 Ingoldiana familia. qualis. 104.  
 Josephus viri civilis & perfectissimi politici exemplar. 424. Josephus

# I N D E X.

*Josephi vita & fata considerantur.* 425.  
*Jubilaeum Scholarum Argentinenf.* 185.  
*Julii Caesaris & Alexandri M. comparatio.* 401.

*Junius (Melchior) Job. Sturmii in Recloratu successores, Academiam Argentoratensem ornat.* 197. 202.  
*Jure & legibus salus reipubl. constat.* L. 285.

**L**AUDATIO FUNERIS *Francisci Rudolphi Ingoldi, XIIIViri & Scholarcha Argentoratensis.* 90. *Matthia Berneggeri. Historiarum Professoris Argentoratensis.* 155. *Job. Friderici Schmidii JCU &c.* 113.

*Laudis à patria, item à majoribus ducta elegans exemplum.* 117. *ab educatione.* 158.

*Legationes obire quàm arduum.* 134.

*Ex majestatis considerata.* 392.

*Libertas in literarum studiis, in licentiam saepe degenerat.* 366.

*Libertatis descriptio & commendatio.* 365.

*Libertatis speciosum pratendunt velum, qui adversus libertatem aliquid firuunt.* 366.

*Literarum & Literatorum contemtus publicus arguitur.* 454.

*Literis leviter imbuti plus incommodi in vitam civilem invehunt, quàm prorsus illiterati.* 31.

*Lunaburgensiun Ducum stirps unde?* 51. *in Reformationis negotio precipua cura.* 52.

*Legati prudentia quibus potissimum in rebus consistat.* 137.

*Ludus literarius ad D. Senioris Petri Argentina institutus.* 189.

*Lysia & Iberamenis consilia circa mutandum aut tuendum reipubl. Asbenensis statum.* 242.

**M.**  
*Magistri nomine ac titulo, ejusque vario usu.* 435.

*de Magistrorum quorundam in Academia recens creatorum vanitate & negligentia, digressio.* 119. seq.

*Magorum ex oriente venientium historia consideratur.* 407.

*Majestatis arcana involuta fasciis Christi.* 234.

*Majestatis lex & quaestio consideratur.* 392.

*Mentelio (Job.) Typographia inventum asseritur.* 221.

*Ministri Regina Christinae.* 44.

*Mundus Scena.* 447.

*Mutatio imperiorum perpetua.* 351.

**N.**  
*Navigacionis inventa utilitas & commendatio.* 410.

**O.**  
*Ocravii, postea Caesaris Augusti, studia Apollonia tractata.* 57.

**ORATIO** *ad Christinam Reginam die Natalitiae Festivitatibus tertio habita. &c.* 11. *ad Eandem in auspiciis Anni MDC XL.* 23. *in Natalem Christinae Suec. Reg.* 33. *Secularis in Jubilaeo Scholarum Argentoratensium habita.* 185. *habita, cum publice Magistros & Baccalaureos crearet.* 217. *de Fasciis quibus involvuntur arcana majestatis.* 231. *habita in auspiciando Recloratu Academico.* 241.




# INDEX.

- de C. Corn. Taciti historia, & multa scribendi arte judicioque. [258.](#) privata Velleji *Paterculi* interpretationi premissa. [269.](#) in Depositionis, quam vocant, Academica ritu celebrato habita. [297.](#) de Principatu Tiberiano. [301.](#) habita in solenni *panegyri*, cum Magistros Philosophiæ crearet, in qua vota pro Leopoldo Cesare. [496.](#)
- Orationes Historicorum. [345.](#)  
Ostracismus. [359.](#)  
*Oseanida*, ludi veteris genus. *ibid.*
- P. [\(7.25.\)](#)
- P**acificatio *Westphalica* commendatio. [386.](#)  
Pacis Augustæ consideratio. [386.](#)
- PANEGTRICUS *Christina* Regina Sueciæ in coronatione ejus dictus. [1.](#) in Natali Ejus. [33.](#) Augusto Duci Brunsvicensi & Lunaburgensi scriptus. [48.](#)  
*Panegyricorum* ratio & utilitas. [48.](#)  
Parmenonis præpotentis casus. [399.](#) supplicium, indicta causa occisi, an probandum. [395.](#)
- Passagiorum, s. Expeditionum Sacrarum infelices eventus unde? [422.](#)
- Passionis ac mortis Christi, in eaq; mysteriorum, consideratio. [361.](#)
- Peregrinandi studium in Germanis & successus anceps. [479.](#)
- de Peregrinationum vero usu & abusu, digressio. [124. 166.](#)
- Peregrinatorum Germanorum *κακοζήτεια* reprehenditur. [58.](#)
- Periodos certas regnorum civitatumque statuentes, refelluntur. [375.](#)
- Phoenix avis utrum vera an fabulosa. de *Pbesi Sacra*. [15.](#) [\(377.\)](#)
- Poeta titulus cui competat. [439.](#)
- Politica eloquentia. [344.](#)
- Popularitas *Valerii Poplicola* improbatæ & rursus defensa. [417.](#)
- Præceptorum in Gymnasio munus commendatur. [168. 214.](#)
- Principia historicorum operum qualia esse debeant. [272.](#)
- Promissiones divinas de hujus seculi bonis interpretari, humano affectui familiaræ. [355.](#) R.
- R**atio Status quid sit? [384. 430.](#)  
de Rectoribus Juvenum Principum (*Hoffmeister*) digressio. [127. 479.](#)
- Reges & regnum divinum quid in terris esse. [388.](#)
- Regnorum *ἀνάμνησις*, ultra quam non ascendant. [29.](#) S.
- S**alavia Professoribus bonarum artium parce divisa, quam noxam invehant. [212.](#) [\(343.\)](#)
- Sapientia & eloquentia olim conjuncta. [382.](#)  
Sapientia civilis & eloquentia civilis connexa. [382.](#)
- Schmidii (*Joh. Friderici*) Laudatio funebris. [113.](#) Legationes pro republ. Argent. obita. [134.](#) [\(ta. 188.\)](#)
- Schola Argentoratensis ortus & incrementum. [192. 354.](#) florentissimus status & frequentia. [193.](#) Doctores. *ibid.*
- Scholarcha Argent. [207.](#) primi qui fuerint. [102.](#)
- Scholarum origo & nativitas. [188.](#)
- Scholarum contemtores. [215.](#) [\(201.\)](#)
- Scholasticum regimen Argentorati quale. [367.](#)  
Scriptiois exercitium quàm sit necessarium ad eloquentiam eruditionemq;. [367.](#)
- Scri-

- Scriptura ratio ante typographiam inventam. 116. comparatio. 372.  
 Seditionis in republ. & hereseos in Ecclesia  
 Speculum Augustinum (liber hoc titulo) 71  
 Stella Magis pravia consideratur. 407.  
 Stoicorum doctrina traducitur. 291.  
 Stoicorum dogmata exagitantur. 41.  
 Studia Sapientia ejusque Professores florentis republ. iudicium & pignus. 183  
 in Studiis tractandis abusus taxantur. 161. 163. 289. (204.)  
 Studiorum incrementa & decrementa. Studiorum fata ab imperiorum fortuna pendent. 413.  
 Studiorum de Professoribus sinistra iudicia reprehenduntur. 170.  
 Sturmii (Jacobus) Prator & primus Scholarcha Argentoratus. 121.  
 Sturmii (Joannes) Parisii evocatur Argentoratum. 121. Rectoratum Scholae & Academiae quamdiu gesserit. 127. 202. sapientia eloquentissimus & eloquentia sapientissimus magister. 198  
 Sturmii de literarum ludis recte aperendis liber. 122. Epistola Classica 124. Academica. 125.  
 Suecorum recentiorum gesta cum veteribus Gothorum gestis comparata. 25.  
 T.  
**T**actus videtur regna latronum uarasse, non facta Principum. 305.  
 Taciti dictio s. stylus qualis. 160. Orationes commendantur. 267.  
 de Taciti historia ac multa scribendi arte iudicioque, oratio. 259.  
 ex Tacito quid potissimum disci possit. 263  
 Testularum ludus. 360.
- Tiberianus & Lyssa consilia circa mutandum aut tuendum reip. Atheniensis statum. 242. de Tiberanense diversa iudicia. 251.  
 Thiederic conditorum. 112. Ode Pindarica in ejus funus. 329.  
 Tiberius simulandi dissimulandique summus artifex. 302. 383.  
 Tiberii Caesaris principatus integra oratione descriptus. 301.  
 Torsleusonii Elogium, ubi ejus gesta in bello Germanico. 73.  
 Turcica potentia incrementum. 421.  
 de Typographia Argentorati inventa divinitate & fatis, Oratio. 219. 399.  
 Typographiae inventor Job. Mentelius. 221. utilitas ingens. 225. abusus. 229. 502.
- V.  
**V**alerii Poplicola popularitas quibus arguuntis vel defendi vel improbari possit. 417. 280.  
 Vellej Tiberio adulatur. 280.  
 Velleji Patreculi commendatio. 269. in chronologia s. temporum notatione cura singularis. 274. in descriptione personarum propria excellentia. 275.  
 Vita hominum cum secula comparatur. Vita tranfit. 448. (447.)  
 Universitatis privilegia amplissima Argentei ab Imp. Ferdinando II. concessa. 200  
 Votorum mos apud Romanos antiquissimus. 497.  
 Uxores participant dignitates, privilegia & honores maritorum. 451.  
 W.
- W**ilhelmitani Collegii ap. Argent. auctor Job. Hedio. 102.

Errata: Pag 390. lin. 12. pro Castillo leg Callisto. Pag. 420. lin. 39. pro commendam leg. commendandam.



# CATALOGUS

Quorundam Librorum, quorum copia suppetit  
in Officina JOHANNIS REINHOLDI DULSSECKERI.  
Argentorati, M DCC V.

<b>A</b> cta und Handlungen des Stiftes contra Meißter und Rath der Stadt Straß- burg. 4.	<b>B</b> aconis à Verulamio, Tractatus de augmentis scienciarum. 8.
<i>Aenea Sylvii Historia Friderici III. cum Annotat. J. U. Bœcleri.</i> fol.	<i>Barberini 3-Card. Poëmata.</i> 8.
<i>Aelianus, Graecè &amp; Latine, cum Notis Schaefferi &amp; Kühnii.</i> 4.	<i>Barclaji, Joh. Carmina.</i> 8.
<i>Ambrosii, Episc. Mediol. Libri tres de Officiis.</i> 12.	<i>Bubelii, Balthaf. de Principiis Officii Christiani natur. &amp; revelato.</i> 12.
<i>Anti-Machiavellus de regno bene admi- nistrando.</i> 12.	- - - <i>Antiquitates Ecclesiae Argentora- rensis.</i> 4.
<i>Argentoratensium Consiliorum, Vol. no- vum, cura Jo. Schultzeri.</i> fol.	- - - <i>Historia Ecclesiae Antediluvia- na.</i> 4.
<i>Argentoratensis Academia Privilegia.</i> 4.	- - - <i>Noachica.</i> 4.
<i>Arnisaus, Henning. de Republica.</i> 4.	<i>Bombi, Petri, Opera.</i> 8.
- - - <i>Doctrina Politica.</i> 4.	<i>Biccii, Gregorii, Aurea Juris Civi- lis.</i> 8.
- - - <i>de Jure Connubiorum.</i> 4.	<i>Bongarsii, Jac. &amp; G. Mich. Lingels- hemii Epistola.</i> 12.
<i>Arotini, Dan. Historia Florentini, item Commentarii rerum Italicarum &amp; Graecarum.</i> fol.	<i>Berneggeri, Matth. Orationes Acade- miae.</i> 12.
<i>ab Avila, Ludov. Bellum Germani- cum.</i> 12.	- - - <i>Tuba Pacis.</i> 4.
	- - - <i>Proanulsum.</i> 4.
	- - - <i>Observationes miscellae.</i> 8.
	<i>Bertii, Petri, Logica peripatetica.</i> 8.
	B. Soldi,

# CATALOGUS.

Besoldi, Christ. Historia Constantino- pol Turcica. 12.	Bacleri Series Caesarum Germanorum. 4.
- - - Historia Urbis & Regni Hieroso- lymitani. 12.	- - - de Pebus Scutis XVI. 8.
- - - Axiomata politica. 12.	- - - Historia Belli Sueco-Danici. 8.
- - - Synopsis rerum ab Orbe Cond. gest. 12.	- - - Museum. 8.
- - - <u>Synopsis</u> Doctrinae politicae. 12.	- - - Excerpta Controversae. 8.
Besius, Nic. de Statutis, Pactis & Con- suetudinibus familiar. illustr. & No- bil. cum Summaris & Notis Joh. Schlechteri. 4.	- - - Historia Universalis. 8.
Bicci, Gregor. Colleg. Jurid. Argen- torat. enucleatum. 4.	Arons, Ludov. Exilium Melan- choliae, d. l. Uniait, Vertreis. ber. 8.
Boceri, Henr. Disputationes de Uni- verso Jure. 4.	Cesaris, C. Julii, Omnia quae ex- tant. 16.
- - - de Crimine laesa Majestas. 8.	Ciceronis M. T. Epistola selecta, Lat. Gall. 12.
- - - de Tortura. 8.	- - - Fines, Officia, Latus, Cato, Paradoxa, Somnium Scipionis cum parallel. phil. gr. lat. & Rudim. Of- fic. J. H. Bacleri. 8.
Bodini, Joh. Methodus ad facilem bi- stor cognitionem. 16.	Cisneri, Nicol. de Orbone Tertio Imp. ejusque Instituto Concil. Imper. & septem Viris Elector. 8.
Bacleri, Joh. Henr. Characteres polit. in Vellej. Patercul. 8.	Comen, Jo. Amos, Vestibulum Ja- nuae ling. Lat. Germ. 8.
- - - Notitia S. Rom. Imperii. 8.	Comitus Natalis Historia sui tempo- ris. fol.
- - - Animadvers. in Hippol. à Lapide de ratione Status. 12.	Conseils sinceres sur le chix d'un Amy. 8.
- - - Nota in Jus Publ. Ottonis. 8.	Corderi, Matth. Collog. Lat. Gall. Ital. Germ. 8.
- - - Elogium Chr. Forstneri. 4.	Cortierius, Matth. de Hellenistis & lin- gua Hellenistica. 13.
- - - Suetonius cum animadvers. H. Cassauboni. 4.	Q. Curtius cum Commentar. & Suppl. Freinshemii. 4.
- - - Heroianus Gr. Lat. 8.	
- - - in Ciceronis l. Officior. & al. 8.	
- - - de Politicis Justis Lipsii. 12.	
- - - Sceptum Apollinis ad ill. Com. Gust. de la Gardie. fol.	
- - - Dissertationes Academicæ. 4.	
- - - Comment. in Grotium de Belli ac Pacis. 8.	

D Enaisii, Petri, Jus Camerale. 8.  
Dectura l. & ll. Dissert. Jurid.  
Inaugural. 4.

Didys

# CATALOGUS.

*Diitys Cretensis & Dareus Phrygii*  
Hist. Trojana cum notis V. Obrechtii &  
alior. 4.

*Discurius de necessit. Jcti ad Hippol.*  
à Lapide Praesat. libri de Ratione  
Status. 12.

**E**pistola L. Keppleri & M. Berneggeri  
mutua. 12.

- - - Winckarti & M. Berneggeri mu-  
tua. 12.

- - - Epistolare Conuertiunt M. Ber-  
neggeri cum Viris Erud. 12.

*Epitome partitionum Orator, M. T. Ci-  
ceronis & Joh. Sturmii.* 8.

*Erhard, Joh. Nicol. Comm. ad In-  
stitutum* 8.

*de Ecclesia Judaica Joh. Fechtii.* 4.

- - Noachica B. Bebelii. 4.

- - Aethiopica Joh. Utr. Wildii. 4.

- - Graecica Elia Veitii. 4.

- - Moscovitarum Mich. van Op-  
penbusch. 4.

- - Waldensium Joach. Hefsterber-  
gii. 4.

- - Mahumedana Sam. Schulteti. 4.

*Excerpta historica de finibus Imp. Germ.*  
ex Romanis non petendis. 4.

- - - de Encaniis Summi Templi Ar-  
gent. & Mercatu Adolphino. 4.

**F**lorus cum Notis Freinsheimii. 8.

*Forsneri, Christ. Nota ad Tacitum.* 8.

- - - Hypomnemata Polit. 12.

*Freinsheimii, Jo. Specimen Paraphra-  
seos C. Taciti.* 8.

**G**audensius, Pagn. de Justiniani  
Seculi moribus. 8.

*Giphanii, Huberti, Oeconomia Ju-  
ris.* 4.

*Gumpelsheimeri, Georg. Gymnasina*  
de Exerc. Academ. 12.

*Gentili, Huber. de Error. Testamen-  
tor.* 8.

*Gebuilerii, Hieron. Panegyris Caro-  
lina, cum Descriptione Alsacia &  
Argentorati.* 4.

*Gruteri, Jani, Florilegium contra-  
ctum.* 8.

**H**abrechtii Janua 6. Linguis. 8.

*Hercules Prodicus seu Principia*  
Juuent. Vita & peregrinatio per Vi-  
nandum. 8.

*Havvenreuter, Joh. Ludov. Compend.*  
Libror. Physicor. Aristotelis. 8.

*Hendreich, Petri, Massilia.* 12.

*Herodiani Historia cum notis J. H. Ba-  
cleri Graec. Lat.* 8.

*Horsii, Phil. Epistolographia.* 8.

*Hottingeri, Lexicon Etymologicum.* 4.

*Huyssen, Henr. de Justitio, Verichts-  
Stillstand.* 4.

**I**nstitutiones Justin. cum notis Locca-  
meri & Obrechtii. 12.

*Junii, Melch. Quaestiones Politicae.* 8.

- - - Resolutio Oratorum M. T. Cice-  
ronis. 8.

*Justiniani, Petri, Historia Veneta.* fol.

**K**ulpisii, Joh. Georg. Dissertationes  
Jur. Publ. var. 4.

# CATALOGUS.

Kellenbenz, Barthol. *de Renunciatione  
Successionum, cum Praefat.* Jo. Schil-  
teri. 4.  
Kbunii, Jo. Casp. *Panegyricus Ludov.*  
XIV. dictus. fol.

**L** Occameri, Georg. Dan. *Quaestiones  
Justin. & Feudales.* 12.  
Launoy, Jo. de St. Victorino Episc. &  
Mart. 8.  
Lycosthenis, Contr. *Apophthegmata.* 8.  
Lullius Raymundus, *de Conservazione  
Vna.* 8.  
Lupii Justii *Politica cum notis Berneg-  
geri.* 8.

**M** Anilii *Astronomicum, cum Notis  
Scaligeri & Bæcleri.* 4.  
Meyeri, Justii, *Tract. de Culpa in Con-  
tract. praestanda, cum Annot. Fr.  
Schrægi.* 8.  
Monzambanus *de Statu Imper. Roman.  
German. cum Additionibus necessar.  
& Obrechtii Specim. Exercitat. in  
eund.* 8.

**O** Brechtii, Ulrici, *Prodromus Re-  
rum Alsaticarum.* 4.  
- - - *de Vexillo Imperiali.* 4.  
- - - *M. F. Quintiliani Opera, variis  
lection. illustrata.* 2 Tomi. 4.  
- - - *Diclys Cretensis, Notis illu-  
stratus.* 8.  
- - - *Panegyricus Ludov. XIV. dictus.*  
fol.  
- - - *Monzambanus de Statu Imper.*

*Roman. German. Exercitationibus il-  
lustr.* 8.  
Ottonis, Jac. *Cynosura Augusti & Au-  
gusta.* 4.

**P** Actii, Julii, *Oeconomia Juris.* 4.  
- - - *Analysis Codicis Justinia-  
nei.* 8.  
Panyimius, Onuphrius, *de Comitibus.* 8.  
Prilanders von Eutenwald *Sa-  
tyrische Gesichte.* 2. Theile. 8.  
Prenners / Sebastiani, *Creßfeld  
Planeten Buch / samit der Geo-  
manie, Physiognomie und Chiroman-  
cie.* 8.  
Plutarchi *Vita Parallela, ex versione  
Gul. Xlandri.* 8.  
Plutarchus Rappii Gr. Lat. 8.  
Polydorus Virgilius *de Rer. inventor.* 16.

**Q** Vinciliani M. F. *Opera, ex recens.  
Ulr. Obrechtii.* 2. Tomi. 4.

**R** Ebbani, Joh. *Notegita Juris.* 4.  
- - - *Paraphomena Meyeriana.* 4.  
Reichlei *Elem. Astron.* 12.  
Rittersbusii, Contr. *Jus Justinianicum  
sive Com. ad Novell.* 4.  
Rittersbusii, Contr. *de Regula Juris.* 4.  
- - - *ad instituta.* 4.  
- - - *de Jure Asylorum.* 8.  
- - - *Partitiones Feudales.* 8.  
- - - *Differentia Juris.* 4.  
Rudingeri, Joh. *Controversia Juris  
Feudalis.* 8.  
- - - *Observat. Juris Cameralis &c.* 4.

Rudin-

# CATALOGUS.

Kudingeri, Joh. Enchiridion Juris Feudalis.	12.	Schragii, Frid. Introductio in <u>Jus Canonicum.</u>	8.
- - - Methodus Universi Juris Feudalis.	8.	- - - ad Institut. Justinian.	8.
Sausonii, Nic. Tabula totam Geographiam exhibeutes.	fol.	Stahlîi, Lazari, Sceleton Geographie.	4.
Schardius, Sim. de Jurisdictione Imper.	fol.	Scriptores Rerum Germanicarum à Carolo Magnos usque ad Fridericum III. inclus. cum Prefatione Joh. Schilteri.	fol.
- - - de Electione Imperator. in German.	8.	Simanca, Jac. de Republ. rectè instituenda & conservanda.	8.
Schefferi, Joh. Agrippa liberator sive de novis Tabulis.	12.	Soarii, Cypr. Rhetorica.	8.
- - - Dissertat. de Varietate Naturium.	4.	Statii, Pap. Opera Poët.	12.
Schilteri, Joh. Jurisprudentia.	8.	Suetonius, cum J. Casauboni & J. H. Boecleri animadvers.	4.
- - - Institut. Juris publici.	8.	<b>T</b> aboris, Jo. Ott. Commun. ad Tit. Cod. de Metatis & Epidemeticis, von Einquartierungen.	4.
- - - Epitome Juris privati.	8.	- - - Collatio Juris Romani & Hungar.	4.
- - - ΕΠΙΝΙΚΙΟΝ Rhythmo Teuton. Ludovico Regi aelam. &c.	4.	- - - Criminalium definitio. Rationationes.	4.
- - - de Restitut. Bonorum Ecclesiasticorum &c.	4.	- - - Filium Ariadneum.	fol.
- - - Herennius Modestinus de Cautelis.	4.	- - - Armamentarium Justiniani, h.e. de Jure Armorum.	4.
- - - de Pace <u>Religiosa.</u>	8.	- - - de Regimine Imperantium Ecclesiastico.	4.
- - - Tract. pract. de Renunciationibus.	4.	- - - Tabula Institut. Juris.	8.
<u>2. Tomi.</u>	4.	Tennagel, Phil. de Processibus.	8.
- - - Consilia Argentoratensia M. Ottonis.	fol.	Thilonis, Georg. Melch. de Ratione Status adversus Hippot. à Lapide.	12.
- - - de Comitum prerog. ac Jure inter ipsos & Ord. Equestr. immed. controverso.	4.	Turnebii, Adriani, Opera.	fol.
- - - Elsaß, und Straßburgische Chron. Königsbosen, mit Historischen Anmerkungen. mit Kupfern.	4.	de <b>V</b> erulamio, Baconis, de Augment. scientiar.	8.

Weyher

# CATALOGUS.


<b>W</b> Ebneri, P. M. Observationes Pract. cum novis diverfor. Jctor. additionibus & Praefat. Joh. Schil- teri. fol.	<b>Z</b> Abarella Opera Logica, Physica & de Anima.	4.
	Zentgravi, Joh. Joach. Anti-Textor.	4.
	- - - de Orig. Juris Gentium.	8.
Wenckeri, Jac. Collectanea Juris publi- ci antiquitatem & res Germanicas	- - - de Orig. Juris Naturae.	8.
- illustrantia, cum Epist. Joh. Schil- teri.	- - - Summa Juris Divini.	8.
4.	- - - Detectio Syncret. contra Ambi- sectum.	4.
Wimpbelingi, Jac. Catalogus Episcopo- rum Argentinenf.	- - - De Origine Juris natur. contra S. Pufendorf & Strimefium.	8.
4.		



V. 11  
1520536







RS



